

Devoti
~
Sua Canon.
~

to: 2.

BIBL. NAZ.
Vitt. Emanuele III

165

L

37

NAPOLI

NAPOLI

37

L

163

III. 163

BIBL. NAZ.

2.

la lancia

Decca


BIBL. NAZ.
V.M. Caputo III
163
L
37
NAPOLI

to 2.

San Carlo

Dei





BIBL. NAZ.


Vitt. Emanuele III

165

L

37

NAPOLI



JO

I

INS

POST
ET

2

JOANNIS DEVOTI

DEI ET APOSTOLICÆ SEDIS GRATIA

EPISCOPI OLIM ANANIENSIS

DEIN

ARCHIEPISCOPI CARTHAGINENSIS

INSTITUTIONUM CANONICARUM

LIBRI IV.

EDITIO SECUNDA NEAPOLITANA

POST NOVISSIMAM ROMANAM AB IPSO AUCTORE RECOGNITAM
ET NUNC PRIMUM ADDITIONIBUS LOCUPLETATAM EORUM
QUÆ SUMMORUM PONTIFICUM AUCTORITATE
IN NEAPOLITANO REGNO VIGENT.

TOMUS SECUNDUS.

NEAPOLI

EX TYPOGRAPHIA SIMONIANA

1852.



Sicut a Persona B. Petri Apostoli Episcopatus sumit
 initium, ita necesse est, ut disciplinis competi-
 bus Sanctitas Vestra singulis Ecclesiis, quod obser-
 vare debeant, evidenter ostendat. Sanctus Caesa-
 rius Arelatensis *Ep. ad Symmach. P. tom. 2.*
Conc. col. 936. Collect. Harduini ed, Paris.



Alt
 rum l
 clesia
 prebe
 jus C
 rales
 aeter
 et te
 sacr
 ceter
 les r
 cons
 eccle
 relig
 Regi
 grot
 Res
 di e
 omr
 rant

LIBER SECUNDUS

TITULUS I.

DE RERUM DIVISIONE.

I. et II. Res Ecclesiastica quid? ejus partitio.

§. I.

Alter hic liber pertinet ad res ecclesiasticas, quarum latissime patet nomen. Nam quidquid est in Ecclesia extra personas, et judicia, id rei nomine comprehendimus. Sunt autem res ecclesiasticae, quas jus Canonicum respicit, vel spirituales, vel temporales. Spirituales sunt, quae ad Animarum salutem, aeternamque earum beatitatem, tamquam ad finem, et terminum, totae referuntur, atque huc spectant sacramenta, preces, jejunia, dies festi, indulgentiae, cetera generis ejusdem. Pertinent etiam ad spirituales res sacrae, quae scilicet Deo, et Religioni sunt consecratae, ut divinus cultus exerceatur; veluti ecclesiae, sacraque vasa, et ornamenta, itemque res religiosas, domus scilicet, et loca, in quibus vel Regulares vitam traducunt, vel pauperes, atque agroti curantur, vel fidelium cadavera sepeliuntur. Res temporales ecclesiasticae sunt redditus, et fundi ecclesiarum, quibus aluntur clerici, et pauperes, omniaque ad Religionis usum necessaria comparantur (1).

(1) Ecclesiastica quidem praedia aliquando spiritualia dicuntur, non quod ea revera sint, quae nobis hoc loco spiritualia esse diximus, sed quod spiritualibus inserviant, et eo referantur.

§. II. De spiritualibus agentes non dicemus de gratia, fide, charitate, ceterisque virtutibus, quae sunt anima Christianae Religionis, quoniam ad Theologos pertinet tota haec disputatio. Nos de iis agemus, quae propria Juris Canonici sunt; et ordiemur a Sacramentis, quae Christus Dominus ad aeternam hominum salutem instituit.

I. Sacri
II. Vis
III. Ar
torn
IV. D
Legi
V. Sac
gis n
VI. et
et f
VIII. C
IX. Gri
proce
X. Sacri

Sac
tiplex
pecur
in se
myst
tus,
hoc
sibil
insti

dū. F
oblig

TITULUS II.

DE SACRAMENTIS.

- | | |
|--|--|
| I. Sacramentum quid? | mortuorum. |
| II. Vis, et natura sacramenti. | XI. Quae sacramenta characterem imprimunt? |
| III. Antiquiorum sacramentorum a novis diversitas. | XII. Sacramenta alia necessaria, alia singulis non necessaria. |
| IV. Divisio sacramentorum Legis veteris. | XIII. et XIV. Sacramentorum Minister. |
| V. Sacramentorum novae Legis numerus. | XV. et XVI. Ejus intentio qualis esse debeat? |
| VI. et VII. Eorum materia, et forma. | XVII. Intentio suscipientis sacramentum. |
| VIII. Gratia, et character. | XVIII. ad XX. Ritus, et caeremoniae sacramentorum. |
| IX. Gratia ex opere operato procedit. | |
| X. Sacramenta vivorum, et | |

§. I.

Sacramenti in re cum Civili, tum Ecclesiastica multiplex significatio est. Nam et jusjurandum (1), et pecunia, quam olim litigantes apud Pontificem, aut in aede sacra deponebant (2), et arcanum (3), atque mysterium (4), et interdum etiam sacer quilibet ritus, caeremonia sacramentum appellatur (5). Nos hoc loco sacramentum dicimus invisibilis gratiae visibile signum ad sanctificationem nostram divinitus institutum (6).

(1) *Auth. Sacramenta puberum Cod. Si advers. vendit.* Hinc jusjurandum, quo milites suam Imperatori fidem obligabant, sacramentum militare, et milites ipsi sacra

mento obstricti dicebantur *Leg. 8. ff. de Accusation. Leg. 11. ff. ad L. Jul. de Adulter. Leg. 13. ff. de Re militar. , L. 14. ff. de His quae ut indign. , Leg. 8. §. 1. Cod. ad L. Jul. majest.*

(2) Litigantes initio iudicii certam pecuniae vim apud Pontificem , aut in aede sacra deponebant ea lege , ut victor peracto iudicio , suam repeteret , victus autem poenae causa aerario relinqueret. Unde et haec pecunia deposita , et inita super ea stipulatio sacramentum dicebatur. Confer Jacobum Gutherium *de Jur. Pontific. lib. 4. cap. 21.*

(3) Apostolus *ad Ephesios IX. 11. ut notum faceret ,* inquit , *sacramentum voluntatis suae ; Tob. XII. 7. sacramentum regis abscondere bonum est ; et Daniel c. 11. v. 18. ut quaererent misericordiam a facie Dei caeli super sacramento isto.*

(4) Apostolus *ad Colossen. I. 27. Incarnationem Christi Domini appellat sacramentum. S. Augustinus Serm. 277. col. 973. tom. 5. edit. Maurin. Venet. 1731. memorat exorcismi sacramentum , et lib. 2. de peccator. merit. et remiss. cap. 26. col. 62. tom. 10. panem benedictum , et salem catechumenis dari solitum sacramentum vocat ; quò eodem verbo utitur Concilium Carthaginense III. Cap. 5. apud Labbaeum tom. 2. col. 1400. ed. Venet. Similiter S. Paulinus. Ep. 50. num. 4. et 15. col. 288. et 294. ed. Muratorii Veronae mysterium sacramentum appellat.*

(5) Ita orationis *Dominicae sacramenta* dixisse videtur S. Cyprianus *de Orat. Dominic. p. 189. ed. Rigaltii Paris. 1666. Communes christianorum preces in divinis celebrandis officiis similiter a Patribus dictae sunt sacramenta ; et hæc spectat S. Ambrosius lib. 3. de Virgin. cap. 3. tom. 3. col. 212. ed. Maurin. Venet. 1751.*

(6) Definitionem huic simillimam Augustini nomine proponit Gratianus *in Can. 32. dist. 2. de Consecr. Sacramentum ,* inquit , *est invisibilis gratiae visibilis forma : quae definitio his concepta verbis apud Augustinum nusquam extat , sed tamen , ut in eum locum monent Romani correctores , ex Augustini verbis in libro de Catechiz. rud. cap. 26. col. 293. tom. 6. ed. indic. desumpta est. Explicatius Catechismus Romanus par. 1.*

cap. 1. num. 11. Sacramentum definit, rem sensibus sub-
jectam, quae ex Dei institutione sanctitatis, et iustitiae
tum significandae, tum efficiendae vim habet.

§. II. Tria igitur sunt, quae ad sacramentum
pertinent, divina institutio, visibile signum, et in-
visibilis gratia, quae externo illo signo confertur,
et designatur. Nam summus dominator, et artifex
rerum Deus, ut quae occulta ejus virtute efficiun-
tur, facilius imbecillitas, fragilitasque humani ge-
neris intelligeret, eam ipsam virtutem declaravit si-
gnis, quae sub sensu cadunt (1), eaque esse vo-
luit quasi pignora divinarum promissionum (2), et
remedia ad Animarum salutem vel tuendam, vel re-
cuperandam (3), et vincula christianae societatis,
notasque, et symbola, quibus ejus fidem testatam
faceremus (4), quibusque fideles internoscerentur (5).

(1) Praeclare S. Joannes Chrysostomus *Hom. 82. in
Matth. num. 4. p. 787. tom. 7. ep. Montfauconii Paris.
1727. Si incorporeus, inquit, esses, nuda tibi illa, et
incorporea dona tribuisset: sed quia corpori conjuncta est
Anima, in sensibilibus spiritualia tibi largitur.*

(2) Egregie Catechismus Romanus par. 2. cap. 1.
n. 14. *Quemadmodum, inquit, in veteri testamento Deus
fecerat, ut magni alicujus promissi constantiam signis te-
stificaretur; ita etiam in nova lege Christus Salvator
noster cum nobis peccatorum veniam, caelestem gra-
tiam, Spiritus Sancti communicationem pollicitus est;
quaedam signa oculis et sensibus subjecta instituit, qui-
bus eum quasi pignoribus obligatum haberemus, atque
ita fidelem in promissis futurum dubitare nunquam pos-
semus.*

(3) Confer S. Ambrosium de Sacram. opp. tom. 3.
p. 440. ed. Maurin. Venet. 1751.

(4) Sacramentis enim fidem nostram in hominum
conspectu declarare, atque omnibus illustrem, ac ma-
nifestam facere videmur, et hac spectat Apostolas ad

Roman. X. 10. Corde creditur ad justitiam, ore autem confessio fit ad salutem.

(5) *In nullum nomen religionis, inquit S. Augustinus contra Faustum lib. 19. cap. 11. col. 319. tom. 8. ed. indic., sive verum, sive falsum, coagulari homines possunt, nisi aliquo signaculorum, vel sacramentorum visibilium consortio colligentur. Utrumque igitur praestant novae legis sacramenta, scilicet et fideles ab infidelibus distinguunt, et ipsos fideles inter se sancto quodam vinculo conjungunt.*

§. III. Sua etiam sacramenta habuit vetus Testamentum, eaque umbrae, et figura erant venturi Servatoris; verum sacramenta novae Legis Christum jam natum exhibent (1). Scilicet tantum fide in Christum servari homines possunt (2). Itaque, ut hanc fidem sustineret, abundans misericordia, et clementia Deus instituit sacramenta, quae vel venturum Christum adumbrarent, vel jam natum ostenderent; et vero tum ante, tum post Christi adventum fides in Servatorem illustrius excitari, fove-rique non poterat, quam externis signis, quibus homines fidem suam manifestam facerent.

(1) *Sacramenta novi testamenti, inquit S. Augustinus in Psalm. 73. col. 769. tom. 4. opp. cit. ed. Veneret., dant salutem, sacramenta veteris testamenti promiserunt Salvatorem.*

(2) *Apostolus II. ad Corinth. V. 19. et ad Galat. II. 16. Itaque ab exordio generis humani, inquit S. Augustinus Ep. 102. ad Deogratias col. 277. tom. 2. indic. ed. quicumque in eum (Christum) crediderunt, eumque utcumque intellexerunt, et secundum ejus praecepta pie, et juste vixerunt, quandolibet, ut ubilibet fuerint, et per eum procul dubio salvi facti sunt. Confer eundem S. Augustinum ad Bonifacium contr. duas epist. Pelagian. lib. 3. cap. 4. col. 450. tom. 10. et de Nuptiis et concupiscen. lib. 2. cap. 11. col. 313. eod.*

tom. 10. S. Ignatium martyrem ep. ad Magnes. apud Cotelerium p. 153. tom. 2. PP. Apostolic. ed. Amstelædami 1724. S. Justinum Dialog. num. 64. p. 161. ed. Paris 1742. S. Thomam in Sum. par. 3. quaest. 61. art. 3.

§. IV. Sacramentorum legis Mosaicae multiplex erat genus. Quaedam enim pertinebant ad consecrationem, sive institutionem populi, aut ministrorum in cultu Dei, ut *circumcisio* et *Sacerdotum consecratio*; quaedam sacrarum rerum usu constabant, ut *agni Paschalis in azymis comestio* quoad Populum, *oblatio victimarum*, *esus propositionis etc.* quoad sacerdotes: quaedam denique erant, per quae divini cultus impedimenta removebantur, nimirum legales sordes. et crimina, ut *purificationes ac lustrationes*, et *sacrificia piacularia*, praesertim *vaccæ rufæ*, et *hirci emissarii* (1). Verum hæc sacramenta Hebraicis tantum divina lege erant necessaria, non item reliquis gentibus, quæ etiam si ne his externis signis aeternam salutem consequi poterant, modo cum aliqua mediatoris fide legem naturalem observarent (2).

(1) Divisionem hanc sacramentorum antiquæ Legis tradit S. Thomas 1. 2. quaest. 102. art. 5. Consule Natalæ Alexandrum *Histor. Eccles. in IV. mundi ætatem dissert.* 3. art. 4. tom. 1. p. 361. ed. Venet. 1776. De hirco emissario vide Levit. c. xvi. v. 7. et seq. ibique Calmetum in *Comment.*

(2) Vide S. Augustinum de civil. Dei lib. 18. cap. 47. col. 530. tom. 7. opp. ed. Maurin. Venet. 1732., Theodoretum Interrog. 68. in Genes. opp. tom. 1. p. 53. ed. Paris. 1652. S. Gregorium M. Praef. in lib. Job. col. 9. tom. 1. opp. ed. Maurin. Paris. 1705. Aisdem tamen judaicis sacramentis tenebantur etiam Proselyti Exod. XII. 48. advenæ scilicet, qui ex gentibus ad Judæos transiverant.

§. V. Sublatis Christi morte sacramentis , et caeremoniis Hebraeorum, quoniam cessare oportebat umbras adventu ejus, quem figurabant (1), christiana sacramenta, jam nati mediatoris symbola, Christus Dominus instituit. Ea vero septem numero sunt, scilicet Baptismus, Confirmatio, Poenitentia, Eucharistia, Extrema Unctio, Ordo, Matrimonium (2). Quae singula vera esse Catholicae Ecclesiae sacramenta, nec plura, quam septem haec, a Christo esse instituta, explorata fidei doctrina est (3).

(1) *Prima Sacramenta*, inquit Augustinus *Contr. Faustum* lib. 19. cap. 13. col. 320. tom. 8. laud. ed., quae celebrabantur, et observabantur ex lege, praenunciativa erant Christi venturi. Itaque haec sacramenta ideo sunt ablata, quia ea suo adventu Christus implevit, uti pergit Augustinus loc. cit. quae cum suo adventu Christus implevisset, ablata sunt, et ideo ablata, quia impleta . . . et alia sunt instituta virtute majora, utilitate meliora, actu facilia, numero pauciora. Quod etiam tradit lib. de Vera Relig. cap. 17. tom. 1. col. 758., de Doctrina Christi lib. 3. cap. 9. tom. 3. par. 1. col. 49., et Ep. 54. t. 2. col. 124.

(2) Conc. Trid. Sess. 7. can. 1. de Sacram.

(3) Late de hoc catholicae fidei dogmate contra Lutheranos, Calvinianos, ceterosque haereticos disputant Jueninius de Sacram. dissert. 1. de sacram. in gener. quaeſt. 2. cap. 4. Drouvenius de Re Sacrament. lib. 1. quaeſt. 3. cap. 2., alique Scriptores rerum Theologicarum.

§. VI. Jam duabus veluti partibus constant sacramenta, signo sensibili, quod sensibus subjicitur, et re invisibili, quae sensus fugit. Signum sensibile constat ex materia, hoc est ex re, qua conficitur sacramentum, et ex forma, nimirum ex verbis,

quae in eo conferendo adhibentur (1). Atque in hoc ritu, qui ex rebus, et verbis divina auctoritate conficitur, sacramentum consistit, cum res a verbis sejunctae sacramenta non sint, sed per verba ad sacrum usum determinentur (2).

(1) Voces *materia*, et *forma* ex Peripatetica philosophia arreptae sunt, atque eas primus usurpasse videtur Guillelmus Antisiodorensis, qui saeculo XIII. vitae usura fruebatur, eum postea sequuti sunt Alexander de Hales, Albertus M., D. Thomas, ac denique Ecclesia universa. Ante hoc tempus in sacramentis res, et verba distinguebantur. Ita Tertullianus *de Praescr.* c. 40. p. 216. ed. Venet. 1744. ait daemone in suis idolorum mysteriis *res sacramentorum divinorum* aemulari. Dicebantur etiam communiter mystica symbola, sacra signa, Religionis initia, seu initiationes, et sacramenta. Paulo distinctius interdum designabantur per elementum, et verbum; quo sensu Augustinus in *Can.* 54. c. 1. q. 1. scribebat: *accedit verbum ad elementum, et fit sacramentum*. Sed primum Latinos, postea Graecos vocabula *materia* et *forma* usurpasse ostendit Morinus *de Sacrament. ordinat. par.* 3. exerc. 1. c. 3.

(2) *Detrahe verbum*, inquit Augustinus, in *Can.* 54. c. 1. q. 1, et quid est aqua, nisi aqua? *Accedit verbum ad elementum, et fit Sacramentum*.

§. VII. *Materia vel remota, vel proxima est.* Remotam dicimus rem ipsam, quam in conferendo sacramento adhibemus, qualis est aqua, oleum etc.; proximam vocamus ipsius rei usum, uti est ablutio, unctio etc. Forma aut pura, sive absoluta est, aut conditionalis. Haec in iis sacramentis adhibetur, quae iterari non possunt, cum incertum est, recte ne collata fuerint, an secus (1).

(1) Conditionalis formae expressa mentio primum occurrit VIII. saeculo in statutis S. Bonifacii Episcopi Moguntini, quae condita sunt circa annum 745., extantque apud Dacherium *Spicileg. tom. 1. cap. 28. p. 508. ed. Paris. 1723.*, itemque in Capitularibus Caroli M. apud Balutium *lib. 6. cap. 184. tom. 1. col. 638. edit. Venet. 1772.* unde idem decretum excerptis, suaeque canonum collectioni *t. 11. cap. 17.* adjecit Isaac Episcopus Lingonensis apud Harduinum *collect. Concil. tom. 5. col. 447. ed. Paris.* Ex quo recte colligit Edmundus Martenius *de Antiquis Eccles. Ritib. tom. 1. lib. 1. cap. 1. art. 16 num. 10. p. 59. ed. Antuerpiae seu Venet. 1763.* quantum a vero aberraverint, qui conditionalem hanc formam primum a Scholasticis inventam, atque in Ecclesiam inveciam putarunt, cum ea revera multo ante Scholasticorum aetatem adhiberetur. Ante saeculum VIII. sacramenta, quae repeti nequeunt, nulla adjecta expressa conditione repetebantur, cum plane incertum erat, collata ne, et an recte collata fuissent. Non inde tamen confici potest, quod aliquibus visum est, antiquam Ecclesiam sine ulla prorsus conditione conferre consuevisse sacramenta, quae iterari non possunt. Non erat quidem disertis verbis concepta conditio, quae tantum VIII. saeculo expressa esse coepit, sed erat tamen conditio tacita, quae eodem redibat; et Ecclesia, quae semper rebaptizantium haeresim damnavit, baptismum repeti voluit, quatenus non constaret, num collatus, aut num recte collatus fuisset. Nam non monstratur iteratum, quod non certis indiciis ostenditur rite peractum, uti loquitur S. Gregorius M. *Ep. 17. lib. 14. ad Felic. col. 1279. opp. t. 2. ed. Maurin. Paris. 1705.* Quod ante Gregorium docuerat S. Cyprianus *Ep. 69. ad Magnum p. 297. ed. Amstelædami 1700*, cum de vi baptismi clinicorum per aspersionem dati interrogatus fuisset, itemque S. Leo M. *Ep. 139. p. 490. par. 2. opp. ed. Rom. 1775.*, et Patres Concilii Carthaginensis V., qui, cum quaererentur, quid agendum esset de pueris, qui num baptizati essent, nemo certo sciebat, responderunt *Can. 6. col. 987. tom. 1. collect. Harduini, absque ullo scrupulo eos esse baptizandos, ne ista trepidatio eos faciat sacramentorum purgatione privari.* Placuit haec ca-

nonis verba describere, ut facile deprehendatur error Auctoris *Delectus actor. Eccles. univers. qui in notis ad eundem Canon. tom. 2. col. 169. Lugduni 1076. trepidationem, et dubitationem interpretatur conditionem, quasi omnis conditio a Carthagineusibus Patribus rejecta fuerit. Trepidatio, et dubitatio Patribus est incertus, ancepsque animus, propter quem illam ad synodum controversiam detulerant, qui dubitabant, num in illo rerum discrimine baptismum repetere oporteret. Evellant hunc scrupulum Concilii Patres agentes, baptismum repetendum, ne ista trepidatio (quod certo de conditione intelligi nequit) eos faciat sacramentorum purificatione privari. Idem quoque de iisdem infantibus respondit Gregorius II. *Epist. 2. num. 9 col. 1859. tom. 3. collect. concil. Harduini. Ecclesia igitur, cum eorum baptismum repeti volebat, et simul etiam damnabat haeresim rebaptizantium, non aliter illud fieri voluit, quam cum tacita animoque retenta conditione: si non est baptizatus. Quae conditio, uti dixi, saeculo VIII. verbis expressa esse coepit, eamque disciplinam sua jam aetate multis in locis receptam probavit, et ubique servari iussit Alexander III. in cap. 2. de Baptismo, ac denique confirmavit Joannes XXII apud Raynaldum ad an. 1333. n. 42. t. 5. p. 566. ed. Lucae 1750. Nunc igitur conditionalis forma adhibetur in sacramentis, quae iterari non possunt; verum ea non temere, et inconsulto adhibenda est, sed cum adest probabilis dubitatio, ac re primum cognita, et quaesita diligenter uti monet Catechismus Romanus par. 2. c. 2. n. 57. Confer Benedictum XIV., qui ea de re late disserit in *Inst. Eccles. Instit. 8. et 84., et de Synod. Dioecet. l. 7. cap. 6. Disputant Theologi, num etiam in sacramento poenitentiae conditionalis absolutio tribui possit, cum scilicet incertum est, num minister necessaria verba pronuntiaverit, aut num is, qui absolutionem obtinet, ad eam suscipiendam aptus, et idoneus sit. Hujus conditionalis formae in sacramento poenitentiae initium plerique repetunt a saeculo XVI, sed revera ejus est expressa mentio apud Joannem Gersonianum, qui ineunte saeculo XV., vitam agebat in tract. de Schismate p. 7. de***

*unt. Eccl. p. 118. in Respons. ad interrogat. Char-
iusian. pag. 461. n. 2. opp. ed. Antuerpiae 1706. Vide
Jaeninium de Sacrament. dissert. 1. de sacram. in ge-
nere quaest. 3. cap. 5. art. 2. Tournelyum Praelect.
theolog. 1. 7. de Sacram. in gener. quaest. 1. art. 4. con-
cl. 2., et Benedictum XIV. de Synod. dioecesis. lib. 7.
cap. 15., qui de ea re copiose disputant.*

§. VIII. Res invisibiles, quae signa illa externa significant, et continent, duae praecipuae sunt, gratia, et character. Gratia communis est omnibus sacramentis. Nam quisquis ea rite, et recte suscipit, hoc est nullo posito aut contrariae voluntatis, aut pravae dispositionis obice is gratiam accipit, quam Theologi *sancificantem* appellant. Haec autem non solum peccata remittit, sed justificat et renovat interiorem hominem, qui ex injusto fit justus, et ex inimico amicus Dei, ut sit haeres secundum spem vitae aeternae, uti docet Synodus Tridentina (1).

(1) *Sess. 6. de Justificat. cap. 7.*

§. IX. Gratiam sacramenta conferunt suapte vi, et natura, sive, ut inquirunt Theologi, *ex opere operato* (1). Itaque non ex meritis suscipientis, aut conferentis sacramentum vis ejus aestimatur, sed ea tota profluit a Christo, qui per ipsum opus, quod Minister rite conficit, divinam gratiam hominibus tribui voluit (2). Qua in re sacramenta novae Legis valde differunt a veteribus, quae tantum mediatoris fidem sustinebant, cum salus esset a fide suscipientium, aut parentum, neque sua vi gratiam conferebant (3).

(1) Conc. Tridentinum Sess. 7. de Sacram. Can. 8.

(2) S. Augustinus l. 4. *Contr. Crescon. Cap. 16. col. 493. opp. tom. 9. edit. Venet. 1733. non eorum meritis, docet, a quibus ministratur, constare baptismum, sed propria sanctitate, atque veritate propter eum, a quo institutus est. Eadem habet Anastasius P. Ep. ad Anástas. Imper. c. 8. p. 274. apud Pithoeum Cod. Can. Paris. 1687. Consentiant Graeci, et Latini Patres, quos cumulat Drouvenius De Re Sacram. quaest. 4. cap. 1. Ecclesia, ut haec catholica veritas planius populo fidei proponeretur, invenit vocabulum *operi operali*, quo circa aetatem D. Thomae Aquinatis uti coepit. Disputant vero inter se Thomistae, et Scotistae de modo, quo sacramenta gratiam elargiuntur. Illi nimirum sacramenta causam *physicam* gratiae esse contendunt; hi vero tantum causam *moralem*, hoc est non ipsis sacramentis velut inditam esse gratiam, sed per ea moveri Deum ad gratiam elargiendam; excepta Eucharistia, quae ex se gratiam effundit, quoniam ipsum gratiarum fontem Christum continet.*

(3) Apostolus ad Galat. IX. 9. *vetera sacramenta infirme et egena elementa vocat.*

§. X. Non eodem modo sese gratia explicat in omnibus sacramentis. Nam quaedam hominem mortuum veneno peccatorum excitant, et revocant ad vitam spiritualem, uti sunt Baptismus, et Poenitentia, quae conferunt *primam gratiam*, et *mortuorum* sacramenta appellantur. Reliqua sacramenta *vivorum* dicuntur, quod dantur iis, qui vivi sunt gratiae, eaque *superfundunt gratiam secundam*, prioris incrementum, et robur.

§. XI. Praeter gratiam, quae communis est omnibus sacramentis, quaedam sunt, quae conferunt etiam characterem, hoc est notam quamdam impressam, et insculptam animo, quae deleri non potest (1). Hujusmodi sunt Baptismus, Confirmatio. Ordo, per quae sacramenta fixa, certaue nota efficiuntur

aut Dei filii, aut Christi milites, aut christianae religionis ministri, ac sacerdotes. Et quia character semel animo impressus semper manet, idcirco tria haec sacramenta nefas est iterare; iterantur cetera, quae non imprimunt characterem.

(1) Concilium Tridentinum Sess. 7. Can. 9. de Sacram. Hujus signi, et characteris sitis perspicue meminit Apostolus II. ad Corinth. 1. 21. et 22. Qui unxit nos Deus, ait, qui et signavit nos, et dedit pignus Spiritus in cordibus nostris; et ad Ephesios I. 14. IV. 30. In quo et credentes, inquit, signati estis Spiritu promissionis sancto, qui est pignus haereditatis nostrae in redemptionem acquisitionis, in laudem gloriae ipsius Nolite contristare Spiritum Sanctum Dei, in quo signati estis in diem redemptionis. Apostolicam hanc doctrinam explicatius tradiderunt antiqui Patres, praesertim S. Hermas Pastor lib. 3. Simil. 9 n. 16. apud Cotelerium PP. Apostol. p. 120. tom. 1. ed. Amstelædami 1724. S. Cyprianus Ep. 68. p. 258. ed. Amstelæd. 1700. S. Cyrillus Hierosolymitanus Cateches. 17. n. 35. p. 282., et Procatech. n. 16. p. 12. ed. Paris. 1720. quorum primus Baptismum sigillum filii Dei, alter signum Dei, postremus signaculum sanctum, et indelebile appellat. Diserte etiam S. Epiphanius Haeres. 8. lib. 1. num. 6. tom. 1. p. 19. ed. Coloniae 1682. S. Basilii in Exhort. ad Baptism. hom. 13. t. 2. p. 117. edit. Montfaucon. Paris, 1721., S. Joannes Damascenus de Fid. orthodox. lib. 4. cap. 9. opp. tom. 1. pag. 261. ed. Lequienii Venet. 1748. S. Ambrosius de Spir. S. l. 1. c. 6. num. 79. opp. tom. 4. col. 22. ed. Maurin. Venet. 1751. et S. Augustinus de Baptism. lib. 1. c. 1. col. 79. et lib. 6. c. 1. col. 161 lib. 2. contr. epistol. Parmenian. cap. 13. col. 44. et 45. et in Sermon. ad Caesareen. Ecc. plebem n. 4. col. 620. opp. t. 9. ed. Maurin. Venet. 1733. memorant characterem dominicum, seu sacramentalem, per quem Christiani distinguuntur. Falsus igitur est Van-Espenius par. 2. Jur. Eccles. tit. 1. de Sacram. in gener. c. 1. n. 11. et 13.

cum apud Patres, aut in antiquis canonibus de hoc characterē nihil solidi occurrere asseverat, adeo ut antiqui scholastici, cum pro characterē pugnauerunt, tantum niti potuerint Decretali Innocentii III, in cap. 3. de Baptismo, qua expresse definitum est, Baptismo imprimi characterem.

§. XII. Rursus alia sacramenta singulis sunt necessaria vel omnino, et *necessitate mediū*, ut inquirunt, ita ut sine illis nemo aeternam salutem consequi possit, qualia sunt, Baptismus, qui necessarius est omnibus, ac Poenitentia, quae est necessaria iis, qui post Baptismum crimen aliquod perpetrarunt; vel sola *necessitate praecepti*, quo fit ut contemni quidem, aut oblata refutari sine Animae detrimento nequeant, at, eorum suscipiendorum non oblato loco, impune omittantur. Hujusmodi sunt Confirmatio, Eucharistia, et Extrema Unctio. Reliqua duo sacramenta, Ordo scilicet, et Matrimonium, necessaria quidem sunt universo corpori Ecclesiae, non tamen singulis, cum nulla necessitas cogat singulos homines aut ordines suscipere, aut nuptias conciliare (1).

(1) Conc. Tridentinum Sess. 7. Can. 4. de Sacram.

§. XIII. Omnia sacramenta ministrum postulant, et subjectum, illum scilicet, qui ea conferat, et illum, qui ea suscipiat. Utrumque soli homines praestant (1); sed non omnis homo ea conferendi habet potestatem, verum ii tantum, quibus id manus divina, et ecclesiastica auctoritate datum est (2). Generatim sacramenta conferre Episcoporum est, et Sacerdotum Quaedam tamen exigunt ministrum consecratum, quaedam ministrum quemlibet habere

possunt (3). Consecratum ministrum sacramenta omnia postulant, excepto Baptismo, qui a quocumque collatus valet (4), et excepto matrimonio, si vera est opinio illorum, qui putant, ejus ministros esse ipsos contrahentes (5).

(1) Quaesitum est in scholis, num soli viatores homines, an etiam Caelites, atque Angeli sacramentorum ministri sint? Certe viatoribus tantum hominibus id munus a Christo datum, sacrae literae ostendunt, quod praeter ceteris animadvertit Chrysostomus *de Sacerdot. l. 3. num. 5. opp. tom. 1. p. 383. ed. Montfauconii Paris. 1718.* ideoque ab eo ministerio Caelites, atque Angelos exclusos habere debemus; quamquam, uti docet D. Thomas *par. 3. quaest. 64. art. 7.* possit Deus, ubi velit, etiam Angelis extra ordinem hoc munus committere.

(2) Concilium Tridentinum *Sess. 7. Can. 10. de Sacram.*

(3) Discriminis ejus causas accurate, cum primis, enucleateque nuper illustravit V. Cl. Fr. Hermanus Dominicus Christianopolus Ord. Praed. in libro *della Nulità delle assoluzioni nei casi riservati c. 2. section. 1. §. 3. p. 142. seq.*

(4) *Can. 21. 23: 24. de Consecr. dist. 4.*

(5) De hac quaestione suus erit agendi locus paulo post cum de matrimonio disputabimus.

§. XIV. In conficiendis sacramentis Ministri media tantum salutis exhibent, et tractant, neque suam gerunt personam, sed Christi, qui eadem instituit, et a quo vis eorum procedit (1). Quare si-
ve bonis, si-ve pravis imbuti sint moribus, sacramenta conficiunt, et conferunt, modo id faciant, quod in sacro illo explendo munere catholica Ecclesia fieri jubet. Hinc mali ministri sibi quidem aeternam perniciem, et mortem afferunt, cum sancta

tractant impure, sed impedire non possunt fructum gratiae, qua donantur qui sacramenta recte suscipiunt (2).

(1) Concilium Trident. Sess. 7. de Sacram. Can. 12. et Sess. 7. de Baptism. Can. 4. *Magnum quidem est Baptisma*, inquit S. Jo. Chrysostomus *Hom. 3. in 1. ad Corinth. n. 2. p. 18. tom. 10. ed. Paris. 1732, sed non illud magnum facit is, qui baptizat; sed qui in baptismo invocatur.* Confer etiam S. Augustinum de *Baptismo Contr. Donat. l. 3. c. 10. col. 113. et Contr. Crescon. lib. 3. cap. 8. col. 439. tom. 9. ed. Venet. 1733, et S. Gregorium Nazianzenum Orat. 40. in. S. Baptisma p. 656. tom. 1. opp. ed. Paris. an. 1690. Atque huc spectat S. Joannes I. 33, et S. Paulus I. ad Corinth. I. 11. et seq. et III. 4. et seq.*

(2) *Memento ergo*, ait Augustinus lib. 5. *Contr. Iul. Petil. cap. 47. col. 253. tom. 9. sacramentis Dei nihil obesse mores malorum hominum, quo illa vel omnino non sint vel minus sancta sint. Et tract. 5. in Joan. n. 18. l. 3. part. 2. col. 328. opp. edit. Venet. cit. Dedit Baptismum inquit, Judas, et baptizatum est post Judam, dedit Joannes, et non baptizatum est post Joannem. Quia si datus est a Juda baptismus, Christi erat; qui autem a Joanne datus est, Joannis erat; non Judam Joanni, sed baptismum Christi, etiam per Judae manus datum, baptismo Joannis, etiam per manus Joannis dato, recte praeponimus. Atque haec causa erroris fuit Novatianis, Donatistis, S. Cypriano, et ceteris, quod non distinguentes externum sacramenti opus humanum ab interna effectu divino, perperam existimarunt, effectum sacramenti necessarium ab homine ministrante, non a sacrificante Deo procedere, ut observat Augustinus de Baptism. contr. Donatist. lib. 6, cap. 1. col. 161, tom. 9. ed. indic.*

§. XV. Quamquam autem sacramenta opus non habeant Ministri sanctitate, postulant tamen ejus.

intentionem, hoc est deliberatam voluntatem id quod agitur, conficiendi (1). Quam intentionem scholae triplicem faciunt, *actualem*, quae praesto est, cum ad id, quod agimus, animum impellimus, et nihil omnino aliud cogitamus; *virtualem*, quae adesse dicitur, cum ad aliquid primum animum adjunximus, neque postea voluntatem hanc revocavimus, sed adhuc in ea perseveramus, licet aliud cogitemus, cum rem ipsam agitamus; denique *habitualement*, quam habet, qui nulla animi deliberatione, sed tantum consuetudine proclivis ad sacrum ministerium, atque alio distracto animo sacramentum administrat. Sane *actualis* voluntas efficacissima est, *virtualis* sufficit ad vim sacramenti, *habitualis* autem plane inutilis est (2).

(1) Concilium Tridentinum *Sess. 7. cap. 11. de Sacram.*

(2) S. Thomas *part. 3. qu. 64. art. 8.* sufficere ait *habitualement* intentionem *ad perfectionem sacramenti*, sed ei voluntas *habitualis* est, quam nos hodie *virtualem* appellamus.

§. XVI. Nam sacramentalis actio humano modo fieri debet; scilicet non more pecudum, sed certo, ac deliberato animo, quod est proprium hominis, qui particeps rationis est. Atqui modum humanum non praestat habitualis intentio, quam habent etiam amentes, dormientes, ebrii, qui certe non humano agunt modo, nec cum iudicio rationis, quidquid agunt. Ferri voluntas debet in ea, quae Christus iussit, quaeque facit Ecclesia (1), eaque in hoc opere conficiendo seria, ac deliberata esse debet (2). Nam sacramenta mimice, et per jocum, aut dicis causa administrata nulla, et inania sunt.

(1) Concilium Florentinum in *Instruct. ad Armenos* apud Labbaeum tom. 17. *Concil. col.* 547. edit. Venet., Conc. Tridentinum *Sess. 7. de Sacram. in gener. can. 11.* Hinc inter ceteras propositiones ab Alexandro XIII. proscriptas illa etiam refertur; *Valet Baptismus collatus a Ministro, qui omnem ritum externum, formamque baptizandi observat, intus vero in corde suo apud se resolvit, non intendendo quod facit Ecclesia.* Quamquam vero Minister sacramentum conficiens debeat intendere quod facit Ecclesia, necesse tamen non est, eum etiam intendere, id quod ipsa intendit Ecclesia, quae per illum actum verum conferri sacramentum, et gratiam sacramentalem docet. Scilicet si quis improbus Minister intus inclusa cogitatione putet, sacramentum non eam vim habere, quam habere censet Ecclesia, sed tamen serio velit hos ipsos, quos Ecclesia adhibet, externos ritus peragere, haec intentio faciendi id, quod facit Ecclesia, non quod ea intendit, satis quidem habetur ad vim sacramenti. Audiendus ea de re D. Thomas in *Summ. par. 3. quaestion. 64. art. 6.* cujus haec verba sunt: *Si quis patiatur fidei defectum circa ipsum sacramentum, quod exhibet, licet credat, per id quod agitur exterius, nullum sequi interiorum effectum, non tamen ignorat, quod Ecclesia catholica intendit per huiusmodi, quae exterius aguntur, praebere sacramentum; unde non obstante infidelitate, potest intendere facere id, quod facit Ecclesia, licet aestimet id nihil esse, et talis intentio sufficit ad sacramentum.* Ita Ecclesia ratum firmum habuit Baptismum collatum a Pelagianis, licet ipsi non cogitarent de delendo originali peccato, quod negabant, et ita S. Pius V. approbavit baptismum Calvinianorum, licet ipsi intentionem non haberent baptizandi in remissionem peccatorum. Nam ad sacramenti integritatem nihil interesse, docet Augustinus de *Baptism. lib. 7. cap. 53. col. 201. opp. l. 9. cit. ed. Venet.* quae sit fides ministrorum. Confer etiam eundem Augustinum *Ep. 98. ad Bonifac. num. 5. col. 265. tom. 2. ed. Venet. 1729.* Ambrosius Catharinus e Dominicanorum familia in eo, quem in vulgus edidit, cum Tridentina Synodus haberetur, libello de intentionis externae sufficientia, contendit, ad sacra-

mentum rite et recte administrandum satis esse, quod Minister intentionem habeat serio perficiendi ritum externum, qui ab Ecclesia adhibetur, quamquam interius dicat, se nolle facere, quod facit Ecclesia, modo exterius serio agat, nulloque signo pravam suam voluntatem ostendet. Sententia haec a Tridentina Synodo damnata non est, sicuti monet Card. Pallavicinus in *Histor. Concil. Trident. lib. 9. cap. 6. num. 2.*, sed tamen a decreto Alexandri VIII., cujus nunc facta mentio est, grave vulnus accepit, uti inquit Benedictus XIV. qui de *Synod. Dioec. lib. 7. cap. 4.* ea de re accurate disputat. Sunt tamen, qui Catharini sententiam ita explicant, ut eam nullo modo proscriptam, atque improbatam fuisse defendant; et hi praesertim sunt Hyacinthus Serry in *Vindic. Catharin.*, Jueninius de *Sacram. dissert. 1. q. 6. art. 3.* Drouvenius de *Re Sacrament. lib. 1. quaest. 7. cap. 3. sect. 2. §. 1. et 2.*

(2) Lutherus *lib. de Captivitate Babilonic. cap. de Baptismo*, quique ejus deliramenta sequutus est, Kemnitius *par. 2. Exam. Conc. Trident.* etiam per jocum collatum sacramentum valere existimarunt. Sed gravissimum errorem damnavit Leo X. in *Bulla Exurge Domine 44. art. 12. p. 489. tom. 3. Bullarii Romani ed. ult. indic.*, et Concilium Tridentinum *Sess. 14. de Sacram. poenit. Can. 6.* Quod de S. Athanasio narrat Socrates *Histor. eccles. lib. 1. cap. 15. p. 44.* et Sozomenus *lib. 2. cap. 17. p. 67. ed. Vales. Cantabrig. 1720*, id vel falsum est, vel si etiam verum sit, baptismus ab Athanasio non per jocum, sed serio, ac vere collatus haberi debes, sicuti observant PP. Maurini in *Vit. Athanasii tom. 1. p. 9. ed. Patavii. 1777.* Fabulosum est etiam, quod de mimico Genesii, ac Dioscori baptismo narratur; qua de re vide Jueninium de *Sacram. Dissert. 1. quaest. 6. cap. 1. de Sacrament. in genere.*

§. XVII. Nec tantum dantis, sed etiam accipientis sacramentum intentio est necessaria, ut illud valeat. In infantibus, et perpetua amentia laboran-

tibus nulla voluntate opus est; sed hi in fide, in voluntate Christi, et Ecclesiae sacramentum recte suscipiunt (1). Adulti, qui integra mente sunt, habere debent intentionem sacrae in Ecclesia rei suscipiendae (2); iis vero quos ratio deficit, vel quod in amentiam inciderunt, vel quod vi graviore morbi opprimuntur, sacramenta tribuit Ecclesia, cum in vitae discrimine versantur, modo, cum bene valebant, sacramenti suscipiendi voluntatem significaverint (3).

(1) Can. 7. 8., et 74. de Consecr. cap. 3. de Baptismo, Conc. Tridentinam sess. 7. de Baptism. Can. 13. et 14. Catechismus Romanus part. 2. cap. 2. §. 33. S. Thomas in Summa par. 3. qu. 68. art. 9.

(2) Quamquam enim sacramentum accipiens patitur actionem, quam Minister exercet; non est tamen, inquit D. Thomas in Summa par. 3. quaest. 68. art. 7. passio illa coacta; sed voluntaria, et ideo requiritur intentio recipiendi, id quod ei datur. Vide etiam decretalem Innocentii III in cap. 3. de Baptism.

(3) Concilium Arausicanum l. Can. 12. apud Labbaeum tom. 4. col. 703. ed. Venet. S. Leo M. Ep. 84. ad Theodor. Episc. cap. 4. p. 429. par. 2. opp. ed. Romae 1755. S. Thomas Opusc. 65. §. de Extrem. unct. et in Summa par. 3. quaest. 68. art. 12. Catechismus Romanus par. 2. cap. 2. §. 39. Ritale Pauli V. de Baptismo adultorum. Quod si voluntas, quam pridem habebat aeger, aut amens, ita incerta sit, et obscura, ut nemo de ea testimonium ferre possit, tunc morienti danda potius, quam deneganda sacramenta; censet Augustinus de Conjug. adulterin. lib. 1. cap. 26. col. 403. opp. tom. 6. ed. Venet. 1731; licet alii id quidem negent ex illo Christi praecepto apud Matthaeum VII. 8. Nolite sanctum dare canibus, neque mittatis margaritas vestras ante porcos.

§. XVIII. Sacramentorum omnium, uti dixi-

mus, Auctor Christus (1), ipseque constituit singulorum materias, et formas, quae *substantiales* dicuntur (2). Quae a Christo sunt constituta, mutari ab Ecclesia nequeunt; sed tamen ipsa potest, salva sacramentorum substantia, quibusdam addere certas condiciones, quas omnino servare oportet, ut sacramentum valeat (3). Ritus etiam, et caeremonias sacramentorum accepta a Christo potestate Ecclesia constituit (4), et hi ritus, aut caeremoniae, sine piaculo omitti non possunt; quamquam si omitantur, valeat sacramentum, quoniam intimam rei naturam non attingunt (5).

(1) *Si quis dixerit*, inquit Synodus Tridentina *Sess. 7. Can. 1. de Sacram. in gener. omnia sacramenta novae legis non fuisse a Jesu Christo Domino nostro instituta, anathema sit*. Quibus verbis Synodus catholicum dogma stabilivit, sed expresse noluit definire, mediata vel, an immediata omnium sacramentorum institutio a Christo sit repetenda. Nam Alexander de Hales, Hugo a S. Victore, Petrus Lombardus, alique nonnulli Theologi Concilio Tridentino antiquiores putarunt, confirmationis, et extremae unctionis immediatum auctorem non esse Christum, quoniam nullus est Scripturae locus, quo haec divina institutio referatur. Tridentina inquam Synodus id expresse noluit definire, sed tamen multa sparsim constituit, ex quibus patet Christum immediatum omnium sacramentorum auctorem esse habendum; in primis autem *Sess. 14. cap. 1. de extrem. unct.* expressis verbis declaravit, sacramentum extremae unctionis fuisse a Christo Domino nostro institutum, et a B. Jacobo Apostolo promulgatum. Quibus verbis Christo institutio, Jacobo tantum promulgatio tribuitur. Atque omnes quidem, qui post Concilium Tridentinum floruerunt, Theologi immediatum omnium sacramentorum auctorem Christum esse defendunt, et contrariam sententiam vix jam temeritatis notam effugere posse sentiunt. Consule Tournelyum *Praelect. theol. de Sacram. in gener. quaest. 5. art. 1.*

Jaeninium de Sacram. dissert. 1. quaest. 4. de Sacram. in gener.. et Drouvenium de Re Sacrament. lib. 1. quaest. 6. per. tot. Neque obest silentium Scripturae, cum id doceat divina traditio, ac verbum Dei sive scriptum, sive traditum parem habeat auctoritatem, et huc referendus D. Thomas in *Summa par. 3. quaest. 64. art. 2. ad 2.*

(2) Atque haec quidem, quae a Christo stabilita est materia, et forma sacramentorum, quae *substantialis* dicitur, mutari non potest. Ita in Baptismo alia nequit adhiberi materia, quam aqua naturalis, neque aliis verbis hoc sacramentum conferri potest, quam illis, quae Christus constituit, scilicet in nomine Patris, et Filii et Spiritus Sancti. Modo tamen integra sit materiae, et formae substantia, veritati sacramenti nihil detrahit mutatio, quae *accidentalis* dicitur. Ita in baptismo nihil refert, num aqua sit frigida, an calida, atque in Eucharistia tum azymum, tum fermentum rite consecratur. Similiter Graeci in quibusdam sacramentis adhibent deprecativam formam, quae Latinis indicativa est; sed utraque forma vim eandem habet, et utraque eodem reddit, licet verba diversa sint. Confer Jueninium *de Sacram. dissert. 1. quaest. 3. cap. 3*, et Drouvenium *de Sacram. lib. 1. quaest. 1. cap. 1. §. 5.*

(3) Concilium Trid. Sess. 21, cap. 2. *de Communion.*

(4) Apostolos sacrorum rituum instituendorum potestatem a Christo accepisse, manifestum est ex Paulo I. *ad Corinth. XI.*, ubi postquam multa de Eucharistiae institutione, ejusque celebratione a Domino accepta praescripsit: cetera, inquit, *vers. 34, cum venero, disponam*: ipsa haec verba expendenti Augustino *Ep. 54. seu lib. 1. ad inquisit. Januar. cap. 6. col. 127. tom. 2. opp. edit. Maurin. Venet. 1729.* videtur Dominus ideo non praecepisse, quo deinceps ordine sumeretur Eucharistia, ut Apostolis, per quos ecclesias dispositurus erat, servaret hunc locum. Atqui potestatem a Christo datam Apostolis in spiritali fidelium regimine legitima successione ad Ecclesiam transmissam, inter omnes constat. Atque hanc sibi quidem inesse potestatem Ecclesia et declaravit, et factis demonstravit. Synodus Tridentina *Sess. 21, cap. 2. declarat, hanc potestatem perpetuo in Eo-*
DEY. Instit. Can. T. II. 2

clesia fuisse, ut in sacramentorum dispensatione, salva illorum substantia, ea statueret, vel mutaret, quae suspicientium utilitati, seu ipsorum sacramentorum venerationi pro rerum, temporum, et locorum varietate, magis expedire judicaret. Quam potestatem habere se Ecclesia verbo declaravit, eandem quovis tempore exercuit, uti ex antiquis Scriptorum Ecclesiasticorum monumentis perspicuum est. S. Justinus M. *Apol.* 1. num. 65. p. 82. seq. ed. Paris. 1742. caeremonias memorat ab Ecclesia praescriptas in Eucharistia conficienda, ac distribuenda. Baptismi ritus describit Tertullianus *de Baptismo* num. 7., et seq. p. 226. ed. Venet. 1744. Cyrillus Hierosolymitanus in suis mystagogicis catechesibus caeremonias, quae apud Orientales vigeant, catechumenos docet. Augustinus non semel explicat vim exorcismorum, qui ante Baptismum adhibebantur. Mitto ceteros Patres. Tantum indicabo testimonium Tertulliani, qui *lib. de Corona* cap. 3. p. 102. ed. cit. traditionis necessitatem vindicat, exemplo rerum multarum, quas sua aetate Ecclesia observabat, quamquam scriptae non essent, *Dissert.* 1. *quaest.* 8. cap. 3. Idem quoque confirmant *Enchologia Graecorum*, et *Rituales libri Latinorum*, ex quibus intelligimus, multas lapsu temporum caeremonias ab Ecclesia institutas, earumque observandarum legem ministris impositam. Confer Cl. Zachariam *Bibliothec. Ritual. diss. de jur. liturgic.* t. 1. Jo. Laurentium Bertium *de Theolog. discipl.* lib. 30. cap. 23. tom. 6. et Salam in *not. ad Bonam. rer. liturgic.* lib. 1. cap. 18. §. 1. p. 2. tom. 1. ed. Taurin. 1749., ubi plura etiam describuntur testimonia haereticorum, qui hanc veritatem plus semel fateri debuerunt.

(5) Conc. Tridentinum *Sess. 7. de Sacram. in gener. Can.* 13., et Catechismus Romanus *par. 2. cap. 1. §. 18.* Quid tamen agendum sit, cum necessitas non omnes adhiberi sinit caeremonias ab Ecclesia praescriptas, rituales libri demonstrant.

§. XIX. Ab ipsa sane Apostolorum aetate sacramentis extrinsecus accesserunt solemnes quidam ritus, et caeremoniae, quibus major ipsis adjungi-

tur reverentia, et eorum sanctitas altius in hominum animis imprimitur, et necessarius in Ecclesia ordo sustentatur (1). Earum caeremoniarum non eadem omnium antiquitas est. Quaedam enim ab ipsis Apostolis originem repetunt (2), atque has propter auctoritatem, unde manarunt, ubique retinet, ac diligenter custodit Ecclesia, quamquam sacramenti naturam non constituent. Sic ex. gr. signum crucis in omnium administratione sacramentorum ubique praescribitur (3), et ubique etiam sacramentorum materiae mysticis benedictionibus consecrantur.

(1) Confer Concilium Tridentinum *Sess. 22. cap. 5. de Sacrific. Miss.*, et Catechismus Romanum *lib. 2. cap. 1. §. 18.*, et confer Drouvenium *de Re Sacrament. lib. 1. quaest. 7.*, et Gagliardum *Instit. Canonic. lib. 2. tit. 3.*, qui de sacris his ritibus, et caeremoniis late contra haereticos disputant.

(2) Protrita est Augustini *Ep. 54. ad Januar. n. 1. opp. tom. 2. col. 124. ed. Venet. cit.* regula, quod ab Apostolis repetenda sunt ea, quae semper in Ecclesia observata esse constat, et quorum initium demonstrari non potest. Atque huc refer Tertullian. *de Corona cap. 4. p. 102. ed. Rigaltii Paris. 1675.*, S. Basil. *de Spiritu Sancti. cap. 27. tom. 3. opp. p. 55. ed. Paris. cit.* S. Cyprian. *Ep. 63. ad Caecilium. p. 100. ed. Rigaltii Paris. 1666.*

(3) Quod signum nisi adhibeatur, inquit Augustinus *Tract. 118. in Joann. col. 80. opp. tom. 3. par. 2. ed. Maurin. Venet. 1730.*, sive frontibus credentium, sive ipsa aqua, qua regenerantur, sive oleo, quo chrismate unguuntur, sive sacrificio, quo aluntur, nihil eorum rite perficitur.

§. XX. Quasdam autem caeremonias consequenti aetate adjunxit Ecclesia, et hae quidem non eadem ubique sunt. Nam suos habent peculiare ritus

Latini, Graeci, Orientales; quin et in Occidente non una omnium Ecclesiarum ea in re consensio est. Non enim in omnibus rebus iidem sunt ritus Ecclesiae Romanae, Mediolanensis, Hispanicae, Gallicanae; quod in ceteris etiam Orientis, atque Occidentis partibus evenire, ex omnium libris ritualibus compertum est. Romana Ecclesia reliquarum mater, et magistra, permittit, aut tolerat hanc rituum diversitatem, quae non officit unitati fidei (1), quae omnibus una est, licet dissimiles sint populorum mores, et consuetudines (2).

(1) *In una fide nihil officit Sanctae Ecclesiae consuetudo diversa*, inquit S. Gregorius M. *Ep. 43. ad Leandr. lib. 1. col. 532. tom. 2. opp. de Maurin. Paris. 1705.* Ad hunc locum pertinent etiam Augustinus *Ep. 36, ad Casulanum capit. 9. col. 77. tom. 2. ind. ed. Venet.* cum ait: *Omnis enim pulchritudo filiae Regis intrinsecus; illae autem observationes, quae variae celebrantur, in ejus veste intelliguntur. Unde ibi dicitur: in fimbriis aureis circumamicta varietate.* Vide etiam S. Hieronymum *Ep. 71. ad Lucinium. Boeticum num. 6. col. 432 opp. tom. 1. edit. Vallarsii Veronae. 1734.*

(2) De Graecis, qui Latinis subjecti Episcopis in Italia, finitimisque insulis commorantur, multae sunt editae Summorum Pontificum constitutiones, per quas ipsis sui ritus permittuntur, ac praeterea cavetur, ut neque Graecus ad Latinum ritum, neque Latinus ad Graecum sine auctoritate Sedis Apostolicae transire possit. Sed omnium celeberrima est *Constitutio Etsi pastoralis 57. Benedicti XIV. tom. 1. ejus. Bullar. p. 101. ed. Rom. seu Venet. 1754.* qua omnia, quae ad hanc rem pertinent, accurate explicata, ac definita sunt.

SECTION I.

DE BAPTISMO.

- | | |
|---------------------------|----------------------------|
| XXI. Baptismus Joannis. | XXXI. Genuflectentes, et |
| XXII. et XXIII. Baptismus | Competentes. |
| Christi, et ejus materia | XXXII. Catechistarum offi- |
| remota. | cium. |
| XXIV. et XXV. Materia | XXXIII. Catechumeni ad |
| proxima, ablutio; eaque | Baptismum accedentes. |
| triplex. | XXXIV. et XXXV. Caere- |
| XXVI. Baptismi forma. | moniae in Baptismo adhi- |
| XXVII. Minister. | bitae. |
| XXVIII. Baptizantur tam | XXXVI. Sponsores, seu Pa- |
| infantes, quam adulti. | trini. |
| XXIX. Catechumenorum | XXXVII. Qui eo munere |
| gradus. | fungi possint? |
| XXX. Audientes. | |

§. XXI.

Primus ex Christianis sacramentis Baptismus est; qui ita dicitur a graeco verbo βαπτίζω latine *mergere, abluere* itaque Baptismus ablutio est. Prophetarum ultimus Joannes Baptista ante Christum missus, ut baptizaret in aqua (1), praedicavit Baptismum poenitentiae, et qui sua confitebantur crimina, baptizavit, in remissionem peccatorum proxime futuram in Christo Jesu (2). Verum hic Baptismus neque gratiam conferebat, neque imprimebat characterem (3), neque erat *per se sacramentum*, sed quasi quoddam sacramentale disponens ad Baptismum Christi (4), cui decebat homines assuefacere, eosque ad hoc sacramentum rite, et recte suscipiendum per poenitentiam praeparare (5).

(1) Joan. I. 33., Marc. I. 8.

(2) Agebatur itaque a Joanne, inquit Tertullianus de Baptism. cap. 10. p. 228. ed. Venet. 1744. Baptismus poenitentiae, quasi candidatus remissionis, et sanctificationis in Christo subsequatur. Nam quod praedicabat Baptismus poenitentiae in remissionem delictorum, in futuram remissionem enuntiatum est: siquidem poenitentia antecedit, remissio subsequitur, et hoc est vitam praeparare: qui autem praeparat, non idem ipse perficit, sed alii perficiendum procurat. Vide S. Hieronymum Ep. 69. ad Oceanum n. 6. opp. tom. 1. col. 418., et Contr. Luciferian. num. 7. col. 179. tom. 2. edit. Vallarsii Veronae 1735., S. Jo. Chrysostomum in Math. hom. 11. cap. 4. t. 7. p. 154. ed. cit. S. Cyrillum Alex. in Joan. cap. III. vers. 22. et cap. IV. vers. 1. opp. tom. 4. p. 156. et 175. edit. Paris. 1637., S. Augustinum in Enchirid. cap. 49. col. 214. opp. tom. 6. ed. Venet. 1731, S. Ambrosium in Luc. lib. 2. num. 79. et lib. 10. num. 140. p. 784. et 1095. opp. tom. 2. ed. Maurin. Venet. 1748.

(3) Ego quidem, inquit ipse Joannes apud Matthaeum III. 11., baptizo vos in aqua in poenitentiam: qui autem post me venturus est, fortior me est, cujus non sum dignus calceamenta portare: ipse vos baptizabit in Spiritu Sancto, et igni. Eadem habentur apud Marcum I. 8., Lucam III. 15., Joannem I. 26. seq. Quare Paulus Apostolus eos, qui Joannis Baptismum acceperant, denuo baptizatos in nomine Christi voluit, Act. Apostol. XIX. 1. et seq. Itaque non renascebantur, inquit Augustinus loc. cit., qui Baptismo Joannis baptizabantur, sed Christo, in quo solo renasci poterant, parabantur.

(4) S. Thomas in Summa part. 3. quaest. 38. art. 1. ad 1.; ac vide totam hanc quaestionem 38, ubi de Joannis Baptismo solide disputatur.

(5) Petilianum Donatistam, qui unum Christi, et Joannis Baptismum esse putabat, cujus tres faciebat gradus, cum aquam a Joanne, Spiritum Sanctum a Christo, ignem a Spiritu Sancto datam diceret, acriter refellit Sanctus Augustinus contr. liter. Petilian. lib. 2. cap. 32. et seq. col. 239. opp. tom. 9. ed. Ven. Bucerum autem, Melanctonem, Zainglium, Calvinum, ceteros

haereticos, qui utriusque Baptismi vim eandem esse arbitrabantur, profligavit Synodus Tridentina *Sess. 7. de Baptismo Can. 1.* his verbis: *Si quis dixerit, baptismum Joannis habuisse eandem vim cum Baptismo Christi, anathema sit.* Confer Tournelyum *Praelect. theolog. de Sacram. Baptism. quaest. 1. art. 5.*, ac vide etiam Drouvenium *de Re Sacram lib. 2. quaest. 5. cap. 1, §. 4.* ubi quaeritur, num Baptismus Joannis peccata dimitteret.

§. XXII. Verum ac proprium sacramentum est Christi Baptismus, a quo incipit omnis fidei origo, et ad spem vitae aeternae salutaris ingressio (1). Definitur in catechismo Romano (2): *Sacramentum regenerationis per aquam in verbo.* Triplex baptismus distinguitur, *aquae, sanguinis, et flaminis, seu desiderii.* Baptismus *aquae* vere sacramentum est, reliqui duo *flaminis* scilicet, atque *sanguinis*, vicem baptismi praestant, et ideo per similitudinem ejus nomen acceperunt. Nam qui pro Christo martyrium patitur, qui *sanguinis* baptismus est, et qui moriens, ubi copia baptismi non est, peccata dolet, ac baptismum desiderat, qui *flaminis* baptismus dicitur, ipsos sacramenti fructus, etiam sine sacramento, consequuntur (3). Remota baptismi materia est aqua naturalis, quae cum ubique praesto sit, maxime est idonea ad sacramentum omnibus necessarium, quaeque demonstrat ejus virtutem, per quam Animae sordes eluuntur (4). Quaevis autem aqua naturalis, quae mixtione, aut artificio in aliam naturam non migraverit, apta Baptismo erit, sive ea maris sit, sive fluvii, sive putei, aut paludis, aut fontis (5).

(1) S. Cyprianus *Ep. 73. ad Juboianum p. 125. ed. Rigaltii Paris. 1666.*

(a) *Catechismus Romanus* part. 2. §. 5. *Quid est Baptismus Christi?* inquit *Augustinus Tract. 15. in Joan. n. 4. col. 408. tom. 3. opp. par. 1. ed. Maurin. Ven. indic. Lavacrum aquae in verbo. Tolle aquam, non est baptismus: tolle verbum, non est baptismus.*

(3) *Conc. Trident. Sess. 6. de Justificat. c. 4., S. Ambrosius in Orat. de obitu Valentin. Imperat. num. 51. col. 265. opp. tom. 4. edit. Venet. 1751., S. Augustinus de Baptism. contr. Donatist. lib. 4. cap. 22. col. 139. tom. 9. indic. edit., S. Basilius de Spiritu Sancto cap. 1. p. 30. tom. 3. opp. ed. Paris. cit. S. Cyprianus de Exhortat. martyr. p. 118. opp. ed. Amstelaedami 1700., S. Thomas in Summa par. 3. quæst. 66. art. 12.*

(4) *Catechismus Romanus loc. cit. §. 10.*

(5) *Idem Catechismus ibid. §. 7. Quod si Joannes Baptista apud Matthaeum III. 11. Christi Baptismum Spiritu Sancto, et igne constare prædixit, id non de materia hujus sacramenti intelligendum est, sed vel ad intimum Spiritus Sancti effectum, ut inquit idem Catechismus loc. cit. §. 8., vel certe ad miraculum referri debet, quod die Pentecostes apparuit, cum Spiritus Sanctus e caelo in Apostolos ignis specie delapsus est. Synodus Tridentina Sess. 7. de Baptismo Can. 2. Si quis dixerit, inquit, aquam veram, et naturalem non esse de necessitate Baptismi, atque ideo verba illa Domini nostri Jesu Christi, nisi quis renatus fuerit ex aqua, et Spiritu Sancto, ad metaphoram aliquam detorserit, anathema sit. Quibus verbis Synodus execratur Calvinum, qui ad metaphoram detorquebat ea, quæ de aqua naturali a Christo dicta sunt, ac Lutherum, qui vinum etiam Baptismo aptum putabat. Neque ulla habenda ratio est cujusdam rescripti, quod editum ferunt a Stephano III. Pontifice apud Siemondum *Conciliorum Galliae tom. 2. p. 16. ed. Paris. 1629.*, et quo probatur baptismus, qui in vino datus fuerat puero, qui in vitæ discrimine versabatur; nam falsum hoc rescriptum esse omnes norunt, primum quod nullus Patrum ejus rescripti meminit, deinde quia verisimile non est, Summam Pontificem in re proposita tam graviter errare potuisse, postremo quia de ejus rescripti auctore non constat, atque illud duo Mss. Codices Stephano II., ter-*

tius Siricio adscribit. Consule Anton. Augustinum *de Emend. Gratian. lib. 1. dialog. 18. opp. t. 3. p. 90. ed. Lucæ 1767.* ibique Balutium in *Notis*, et Natalem Alexandrum *Histor. Eccl. sæc. 8. capit. 1. art. 6. p. 7. ed. Venet. 1776.*

§. XXIII. Aquam benedici vetus Ecclesiae disciplina est (1); atque hæc quidem est benedictio, quam Patres aquae *sanctificationem*, et *consecrationem* appellarunt (2). Duobus diebus a Latinis, nempe sabbatis sancto, et Pentecostes (3), a Graecis autem in singulis baptismis aquae benedicuntur. Signatur signo crucis (4), et certae ab Ecclesia institutae preces in ea benedictione adhibentur (5); quod utrumque antiquissimae consuetudinis est. Aquae adjicitur chrisma, quod magis explicat vim sacramenti; sed tamen hoc valet etiã collatum in aqua naturali, quae nihil aliud admixtum habet (6). Multitudo baptizandorum saepe olim faciebat, ut ad omnes abluendos satis aqua non esset, et ideo nova per canales in baptisterium infundebatur (7).

(1) S. Basilii de Spiritu Sancto *cap. 27. p. 55. t. 3. opp. ed. laudat.*, S. Gregorius Nyssenus de *Baptismo Christ. p. 803. opp. tom. 2. ed. Paris. 1615.* S. Cyrillus Hierosolymitanus *Cathec. 3. n. 3. p. 40. et seq. ed. Paris. 1720*, S. Ambrosius de *Sacram. lib. 1. cap. 5. col. 443. et 444. opp. tom. 3. , et de Spirit. Sanct. lib. 1. c. 7. n. 88. col. 25. edit. Maurin. Venet. 1752.* Theophilus *Epistol. pasch. I. Biblioth. PP. tom. 5. p. 846. ed. Lugdun. Victor. Viten. de Persecut. Vandal. lib. 2. pagin. 683. t. 8. indic. Biblioth.* Neque vero extra casum necessitatis conferre licet Baptismum cum aqua communi, vel ea, quae pro lastrationibus benedicatur, Benedictus XIV. *Constit. inter omnigenas 89. §. 20.*

tom. 1. ejus *Bullar.* p. 186. ed. Rom. seu Venet. 1754.

(2) Tertullianus de *Baptism.* cap. 4. p. 225. edit. Venet. 1744. S. Cyprianus *Epist.* 70. p. 300. ed. Amstelædami 1700. S. Ambrosius de *Myster.* cap. 3. n. 8. col. 409. opp. tom. 3. *laudatae* ed. S. Augustinus de *Baptismo* lib. 6. cap. 25. col. 175. opp. tom. 7. indic. ed. Auctor operis de *Hierarch. eccles.* cap. 2. §. 7. p. 253. opp. tom. 1. ed. Antwerp. 1634.

(3) Confer S. Carolum Borromaeum *Instruct. de Baptism. Act. Eccl. Mediolam.* part. 3. t. 1. pag. 421. ed. Patavii 1754.

(4) Auctor operis de *Eccl. hierarch.* l. c. S. Augustinus *Serm.* 352. num. 3. col. 1364. opp. tom. 5. ed. Maurin. Venet. 1731.

(5) Preces ad sanctificandam aquam olim adhibitas describit Auctor *Constit. Apostol.* lib. 7. cap. 43. apud Cotelerium *PP. Apostol.* tom. 1. pag. 384. ed. Amstelædami. 1724. Hinc deprecari super aquam Baptismi, apud Augustinum lib. 5. cap. 20. de *Baptism.* col. 155. opp. tom. 9. ed. Maurin. Venet. ind.

(6) Catechismus Romanus par. 2. cap. 2. §. 11.

(7) Gonsule Martenium de *Antiq. Eccles. rit. lib.* 1. cap. 1. art. 14. §. 3. tom. 1. p. 48. ed. Antuerpiae seu Venet. 1765. Atque ad hanc consuetudinem aquam vivam blando murmure decurrentem, quam memorat S. Zeno *Tract.* 35. lib. 2. p. 246. tom. 1. opp. ed. August. Vindelic. ann. 1758., referendam putant Fratres Halleritii *ibid.* not. 3.

§. XXIV. Proxima materia est ipsa ablutio, cujus triplex est modus, *aspersio*, *effusio*, *immersio*. Fuerunt olim, qui dubitarunt de vi Baptismi per *aspersionem*, aut *effusionem* dati (1); sed eum valere certum est, eum *immersio*, *aspersio*, *effusio* diversi quidem sunt ablutionis modi, revera tamen nihil distent (2). Dubitatio haec de Baptismo per *aspersionem*, *effusionem*ve collato satis claro argumento est, olim Baptismum per immersionem con-

ferri consuevisse. Et certe fuit haec vetus Ecclesiae disciplina, ut Baptismum suscepturi, sive mares essent, sive foeminae, sive adulti, sive infantes, vestibus exuti, atque omnino nudi (3) ter in aqua toto corpore mergerentur, et inde educerentur (4).

(1) Confer Cornelium Pap. *Epist. 9. ad Fabium Antiochen. num. 5. et 6. col. 154. et 155. apud Constantium Epist. Roman. Pont. et S. Cyprianum Ep. 76. ad Magnum p. 368., et seq. ed. Venet. 1758.*

(2) Vide Catechismum Romanum *par. 2. cap. 2. §. 17.* Antiquitus etsi Baptismus immersione dari soleret, tamen interdum effusionem etiam, atque aspersionem adhibitam fuisse constat; quod luculentissimo argumento est, Ecclesiam semper firmum ratum habuisse Baptismum, sive per immersionem, aut aspersionem, aut effusionem ablutio fieret. Ita cum Petrus, ceterique Apostoli hominum ter millia baptizarunt, sicuti narratur in *Act. Apostol. II. 37. et seq.* videtur dedisse baptismum per aspersionem, aut effusionem, cum verisimile non sit, tantam hominum multitudinem tam brevi tempore in aquam immergi potuisse. S. Cyprianus *loc. cit.* multis ostendit, valere baptismum, quem aegri aspersione, aut effusione susceperant; quam sententiam veluti sua aetate certissimam approbat, et sequitur S. Augustinus *de Baptismo contr. Donatist. lib. 6. cap. 7. col. 165. opp. tom. 8. ind. ed. Venet.* Eadem est sententia Concilii Neocaesariensis *Can. 12. apud Labbaeum tom. 1. Concil. col. 1516. ed. Vep.* Antisiodorensis *Can. 18. tom. 6. col. 544.* Matisconensis II. *Can. 3. col. 674. dict. tom. 6.,* Parisiensis VI. *Can. 7. col. 714. tom. 9.,* et idem saeculo IX. tradidit Walfridius Strabo *De Reb. Eccl. cap. 26. col. 692. Bibl. PP. tom. 10. ed. Paris. 1624.* Huc etiam spectant acta S. Laurentii apud Surium *de Vitis Ss. mensis augusti p. 96. ed. Coloniae 1718.,* ubi agitur de baptismo per effusionem dato; et huc similia exempla, quae refert Martenius *de antiq. Eccl. rit. lib. 1.*

cap. 1. art. 14. §. 5. tom. 1. p. 49. ed. *Antwerp. seu Venet.* 1763. Ex quibus manifestum est, etiam Baptismum aspersione, aut effusione collatum semper validum habitum fuisse; licet antiquitus in eo conferendo immersio adhiberetur.

(3) S. Joan. Chrysostomus *Homil.* 6. in *Coloss.* n. 4. opp. tom. 11. p. 369. ed. *Paris.* S. Cyrillus Hierosolymitan. *Catech. Mistagog.* 2. pag. 311. ed. *Paris.* 1720., S. Ambrosius, seu potius Auctor *Serm.* 19. n. 3. tom. 4. opp. *Ambros. col.* 514. ed. *Ven.* 1751., S. Zeno *Tract.* 35. lib. 2. p. 248. tom. 1. opp. ed. *Ballerin. Augustae Vindelic.* 1758. Verum ne quid in rei tam sanctae administratione aspiceretur non decere, duo praesertim erant antiquis regulis constituta. Primum erat, ut viri, ac mulieres separatim baptizarentur, et ideo vel in baptisteriis duo erant conclavia, alterum pro viris, alterum pro foeminis, vel alio tempore mares, alio foeminae baptismum suscipiebant, S. Augustinus de *Civitat. Dei* lib. 22. cap. 8. col. 665. opp. tom. 7. ed. indic., Hugo Menardus in *S. Gregorii Sacramentar.* col. 382. tom. 3. ed. *Maur. Paris.* 1705, Albinus Flaccus de *Divin. Offic. de Sabbato S. Paschae* col. 258. *Bibl. PP.* tom. 10. ed. *Paris.* 1624. Alterum erat, ut Diaconissae praesto essent foeminis baptismum suscepturis, ac per eas muliebri verecundiae consuleretur. S. Epiphanius *Haeres.* 59. sive 79. *advers. Collyrid.* num. 3. tom. 1. pag. 1060. ed. *Coloniae* 1682.

(4) Trinam hanc immersionem memorant omnes antiqui Patres, inter ceteros Tertullianus de *Coron.* c. 3. p. 102. et *advers. Praxeam* cap. 27. p. 516. ed. *Rigaulti Paris* 1675., S. Jo. Chrysostomus *Hom.* 25. in *Joan.* num. 2. opp. tom. 8. pag. 146. ed. *Paris.* cit., S. Cyrillus Hierosolymitanus *Catech.* 2. num. 4. n. 312. ed. *Paris.* 1720., S. Gregorius Nyssenus de *Baptism. Christ.* p. 804. t. 2. ed. *Paris.* 1615., S. Ambrosius de *Sacram.* lib. 2. cap. 7. n. 20. col. 452, opp. t. 8. ed. *Maur. Ven.* 1751. Hinc autem aquam aliquantulum calefactam fuisse, ne qui toto corpore mergebantur, ac praesentium pueri, aliquid ex nimio frigore caperent detrimenti, non obscure demonstrat S. Zeno *Tract.* 35. l. 2. p. 246. ind. ed., cum memorat aquam in baptisterio igne

dulcissimo temperatam. In unaquaque immersione non integra baptismi forma pronunciabatur, sed unius personae nomen appellabatur, ut colligitur ex Tertulliano *lib. advers. Praxeam cap. 27. p. 516. ed. Ven. 1744*, ex S. Ambrosio *de Sacram. lib. 2. cap. 7. opp. tom. 3. col. 452. ed. Maurin. Venet. 1751*, et ex Rituali Romano, ubi praescribitur: *Puerum baptizet dicendo: Ego te baptizo in nomine Patris, et semel immergat, et Filii, et secundo immergat, et Spiritus Sancti amen, et tertio immergat*. Idem patet ex Euchologia Graecorum.

§. XXV. Quae immersio, et eductio repraesentabat Christi mortem, et resurrectionem (1); eaque triplex erat, ut triduana Christi sepultura, fideique professio in Sacrosancam Trinitatem indicarentur (2). Erat tamen haec trina immersio praeccepti ecclesiastici, cuius violati poenas dabat, qui eam neglexisset (3); verum ad vim, ac necessitatem sacramenti non pertinebat (4). Graeci nunc etiam in conferendo baptismo immersionem retinent; sed Latini post saeculum XII. effusionem adhibere coeperunt, cum illa nudati corporis immersio, praesertim infantibus, gravis, et periculosa deprehenderetur (5). Abluendum est autem praesertim caput (6), ac tanta effundenda est aquae copia, quanta opus est, ut baptizandus vere ablutus dici possit.

(1) S. Ambrosius *loc. cit. num. 23.*, S. Joan. Chrysostomus *Hom. 40. in I. ad Corinth. num. 1. p. 379. t. 10. ed. Paris. cit.*, Concilium Toletanum IV. *Can. 6. apud Libbaeum tom. 6. col. 1452. ed. Venet.*

(2) S. Cyrillus Hierosolymitanus *Cathec. 2. mistag. n. 4. p. 312. ed. ind.*, S. Gregorius Mag. *lib. 1. Epist. 43. opp. tom. 2. col. 532. ed. Paris. cit.*

(3) Canon Apostol. 50. *p. 449. apud Cotelierium*

PP. *Apostol.* tom. 1. ed. *Amstelæd.* 1724, D. Thomas in *Summa* part. 3. *quaest.* 66. *art.* 8.

(4) Ita cum in Hispania nonnulli unam tantum immersionem adhibuissent, ne Arianos imitari viderentur, qui triplici immersione triplicem in Trinitate substantiam indicabant, eorum factum probavit S. Gregorius M. lib. 1. *Epist.* 43. ad *Leandr.* t. 2. *opp.* col. 532. *edit. cit.*, quod Gregorii decretum cum laude memorant Patres Concilii Toletani IV. *Canon.* 6. loco mox ind. Praeclare S. Thomas loc. cit., *Utrumque licite fieri potest*, inquit, *scilicet et semel, et ter immergere*, quin unica immersione significatur unitas mortis Christi, et unitas Deitatis, per trinam autem immersionem significatur triduum sepulturae Christi, et etiam Trinitas personarum. Vide etiam S. Hildephonsum *Ad not. de Cognit. Baptism.* cap. 117. apud *Balutium Miscel. sacr.* tom. 2. p. 34. ed. *Lucae* 1761.

(5) Saeculo XIII., quo D. Thomas vitae usura fruebatur, jam in locis quibusdam apud Latinos immersio desuescere coeperat, et ipse Thomas docet, uno aut altero ex tribus illis modis recte baptismum conferri, quamquam tutius esse dicat, eum dare per immersionem, qui sua adhuc aetate communior erat baptismi conferendi modus. Ait enim in *Summa* loc. cit. *art.* 7. *Ablutio autem fieri potest per aquam, non solum per modum immersionis, sed etiam per modum aspersionis, vel effusionis; et ideo quamvis tutius sit baptizare per modum immersionis (quia hoc habet communior usus) potest tamen fieri baptismus per modum aspersionis, vel etiam per modum effusionis.* Quo ex loco perspicuum meo quidem iudicio est, ea tempestate, qua D. Thomas florebat, communioem quidem fuisse usum immersionis; sed tamen quibusdam etiam usitatam fuisse aspersionem, aut effusionem. Guilelmus Beveregius in *Not. ad Canon.* 50. *Apostol.* p. 472. apud *Cotelerium PP. Apostol.* tom. 1. ed. *Amstelæd.* indic. putat meritis loco aspersionem, sive profusionem aquae, in Occidentali praesertim Ecclesia, plusquam mille ab hinc annis, Gregorii videlicet I. aetate, substitutam esse. Sed certa desunt antiqua monumenta quibus haec Beveregii opinio niti posse videatur. Illud tamen ani-

madvertam, quod etiam antiquior aspersionis in baptismo, et eo quidem solemniori, ut videtur, adhibitae mentio est in opusculo de *Ecclesiasticis Dogmatibus*, quod inter opera falso Augustino adscripta PP. Maurini rejiciant ad *Appendic. tom. 8*, et plerique tribuunt Gennadio Massiliensi Gallicanae factionis, contra quam Prosper, et Hilarius Augustino scripserunt. Nam. c. 41. *ejus oper. col. 79. tom. 8. opp. Augustin. ed. Maur. Ven. indic.* Baptismus, et Martyrium inter se comparantur, atque haec habentur: *Baptizandus confitetur fidem suam coram sacerdote, et interrogatus respondet; hoc Martyr coram persecutore facit, qui et confitetur fidem suam, et interrogatus respondet. Ille post confessionem vel adspersgitur aqua, vel intingitur; et hic vel adspersgitur sanguine, vel intingitur igne.* An non hic locus argumento esse potest, quod in ea regione, in qua Gennadius scripsit, immersionis loco aspersione adhiberetur? Utut ea de re sit, certe generatim tum apud Graecos, tum apud Latinos ubique obtinuit immersio, quae alicubi vigeat saeculo XIV., uti ostendit Codex membranaceus, qui cum alijs compluribus extat in museo Alberti Fratris mei Canonici Basilicae S. Mariae, trans Tyberim; et in quo habentur haec: *et baptiza infantem in nomine Trinitatis sub trina mersione dicens etc.* Codex hic liber Ritualis est, neque certe est antiquior saeculo XIV., uti demonstrat character, quaeque in eo describitur, oratio S. Thomae de Aquino, qui tantum saeculo XIV. a Joanne XXII. Ss. albo adscriptus fuit. Quin monet Chardonius *Histor. sacram. lib. 1. cap. 9.* immersionem adhuc saeculo XV. obtinuisse.

(6) Catechismus Rom. *part. 2. cap. 2. §. 19.*

§. XXVI. Baptismi formam constituunt verba, quae apud Latinos sunt: *Ego te baptizo in nomine Patris, et Filii, et Spiritus Sancti*: apud Graecos: *Baptizatur* (1) *Servus vel Serva Dei N. in nomine Patris, et Filii, et Spiritus Sancti.* Vetus est haec formula, quam Graeci usurpasse videntur, ut occurrerent Novatianis, quorum error late

erat in Oriente diffusus, scilicet ad vim sacramenti ministri fide opus esse (2). Utraque forma vim eandem habet (3); quamquam ministri suae Ecclesiae ritum servare debeant: et utraque continet expressam invocationem trium Personarum Sanctissimae Trinitatis, atque actum ipsum baptizandi. Invocatio illa Trinitatis divinae institutionis est, atque ad vim sacramenti necessaria (4); sed et verba *ego te baptizo* omissa nullum baptismum reddunt (5).

(1) Ita habet Arcudius *Concord. Eccles. Orient. et Occidental. lib. 1. cap. 3. et cap. 8. p. 9. et 14. ed. Paris. 1672.*, et Graecorum *Euchologion* apud Goariam p. 358. *ed. Paris. 1647.*, quamquam non desint, qui graeci sermonis ignari legendum putent *baptizetur*. Aliquando tamen Graecos verbo indicativo in prima persona utos fuisse colligi potest ex S. Gregorio Nazianzeno *Orat. 40. num. 51. p. 670. opp. tom. 1. ed. Coloniae 1690. Baptizo te*, inquit, *in nomine Patris, et Filii, et Spiritus S.*

(2) Verbum illud *Ministri ego te baptizo* quosdam in errorem induxit, ut crederent, vim sacramenti ex ministri persona aestimandam; quo multi referunt illud Corinthiorum dissidium, *ego sum Pauli, ego Cephae* etc. quasi a ministro vim repeteret sacramentum, qui error non tantum in Graeciam, sed et in Africam pervaserat.

(3) Eugenius IV. *Instruct. pro Armen. t. 18. Conc. collect. Labbaei col. 547. ed. Ven.*

(4) Matthaeus XXVIII. 19. Confer S. Justinum M. *Apolog. 1. p. 80. opp. ed. Paris. 1740.*, Tertullianum *advers. Praxeam cap. 26. p. 561. ed. Rigaltii Paris. 1755.*, Origenem in *cap. 6. Epist. ad Roman. lib. 5. p. 561. t. 4. opp. ed. Maur. Paris. 1759.*, S. Cyprianum *Epist. 73. p. 123. ed. Rigaltii Paris 1666.*, Sanct. Augustinum *de Baptism. contr. Donatist. lib. 3. c. 15. et lib. 6. cap. 25. col. 15. et 176. opp. t. 9. ed. Maurin. Venet. 1733.*, S. Innocentium Pap. *Epist. 17. ad Episcop. Macedon. c. 5. col. 636. apud Constantium*

Epist. Rom. Pontif., S. Basilium *de Spiritu Sancto* cap. 12. p. 23., et 24. t. 3. opp. ed. laudatae, S. Thomam in *Summa* par. 3. quæst. 66. art. 5. Existit autem hoc loco quæstio, num aliquando valuerit, ac revera ab Apostolis in solo Christi nomine, sine mentione Trinitatis, baptismus collatus fuerit. Nam Act. Apostolorum II. 38. X. 48. et seq., et XIX. 5. traditum est, Apostolos in solius Christi nomine baptizasse. Ea de re magna animorum contentione nostro hoc sæculo inter se disputarunt duo celeberrimi Theologi ex Dominicanorum familia Renatus Hyacinthus Drouvenius *de Re sacramentar. lib. 2. quæst. 3. cap. 2.* et Augustinus Orsius Cardinalis edita ann. 1733. Mediolani dissertatione *de Baptismo in nomine Jesu Christi*: atque hic quidem Apostolos aliquando in solo Christi nomine baptismum contulisse defendit, Drouvenius autem negat. Verum si aliquando Apostoli in solo Christi nomine baptizarunt id *Spiritus S. offlatu*, inquit Catechismus Romanus par. 2. cap. 2. §. 15. et 16., eos fecisse exploratum nobis esse debet, ut initio nascentis Ecclesiae Christi nomine prædicatio illustrior fieret, divinaque, et immensa ejus potestas magis prædicaretur; aut potius iis verbis Apostoli baptismum a Christo institutum significare voluerunt, sed tamen retinuerunt formam, quæ distincta continet trium personarum nomina. Et certe verba Christi ad baptizandum Apostolos mittentis eam formam expresse comprehendunt, atque ita loca illa Sac. Scripturae explicarunt S. Cyprrianus *Ep. 73. ad Jubajan. p. 123. ed. Paris. 1666.*, Origenes in *Epist. ad Rom. lib. 3. p. 561. tom. 4. ed. Paris. 1759.* S. Athanasius *de Trinit. num. 7. p. 775. tom. 2. opp. ed. cit.*, S. Bisilius *de Spiritu Sancto cap. 12. p. 23. tom. 3. opp. ed. Maurin. Paris. 1730.* S. Joannes Damascenus *de Fid. Orthod. lib. 4. cap. 9. opp. tom. 1. pag. 260. ed. Le-Quenii Paris. 1712.*, S. Augustinus *Contr. Maximin. Arian. Episc. cap. 17. lib. 2. col. 715. opp. tom. 8. ed. Maurin. Venet. laudat.* Locum auctoris libri *de Sacram.*, seu verius S. Ambrosii *de Spiritu S. lib. 1. cap. 3. num. 24. col. 12. seq. tom. 4. ed. cit.*, et Nicolai I. in *Can. 24. de Consecr. dist. 4.* ubi probatus videtur baptismus in solo Christi nomine collatus, diligenter explicat Carolus

Gagliardus *Instit. Jur. Canonic. lib. 2 tit. 4. §. 20. et seq.* Vide etiam Natalem Alexandrum *Hist. Eccl. diss. 13. tom. 4: p. 101. seq. ed. ind.*

(5) Petri Cantoris, Praepositivi, atque aliorum opinio fuit, omitti impune posse ea verba: *Ego te baptizo*, quoniam illis Christi verbis *baptizantes eos in nomine Patris, et Filii, et Spiritus Sancti* ~~to~~ *baptizantes* factum ipsum ministri designat. Sed haec verba, salvo sacramento, omitti non posse, rescripsit Alexander III. in c. 1. de *Baptismo*: Alexander VIII. die 7. Dec. ann. 1690 inter ceteras propositiones hanc quoque damnavit num. 27. *Valuit aliquando Baptismus sub hac forma collatus*, in nomine Patris etc. *praetermissis illis*, *ego te baptizo*, uti patet ex *Bullar. Roman. tom. 9. p. 97. ult. ed.* Consule Martenium de *Antiq. Eccles. rit. lib. 1. cap. 1. art. 13. num 14. seqq.* Verum constat sacramenti ratio, si desit vox illa *ego*, cujus vis in verbo *baptizo* continetur. Catechismus Romanus par. 2. cap. 2. §. 14. S. Thomas in *Summa* par. 3. quæst. 66. art. 5. ad 1. et 2.

§. XXVII. Ordinarius baptismi Minister est Episcopus, et Sacerdos; extra ordinem etiam Diaconum cum Episcopi, aut Sacerdotis concessu hoc sacramentum administrant (1). Cogente necessitate, omnes et mares, et foeminae recte baptizant (2); verum neque mulier praesente viro, neque laicus praesente clerico, neque clericus, cum adest sacerdos, sibi sumere hoc munus debent (3). Recte inquam, hoc est sine culpa; ceterum, etiam absente necessitate, baptismus a laicis collatus valet, sed nec ii contra Ecclesiae disciplinam peccant (4). De Baptismo ab haereticis, aut infidelibus dato magna olim disputatio fuit, num valeret, sed eum valere certum est, si tamen id efficere propositum eis fuerit, quod catholica Ecclesia facit (5).

(1) Confer Catechismum Romanum par. 2. cap. 2. §. 23., et S. Thomam in Summa par. 3. quæst. 67. art. 2. Quod si a Tertulliano de Baptism. cap. 17. p. 230. ed. Rigaltii Paris. 1675., S. Hieronymo Dial. advers. Luciferian. num. 9 col. 182. opp. tom. 2. ed. Veronæ 1735., aliisque Patribus scriptum est, baptismum sine auctoritate, aut jussione Episcopi a Presbytero non esse conferendum, id referri debet ad solemnem baptismum, qui certis anni diebus administrari consueverat. Non omnis tamen Presbyter, sed tantum proprius, hoc est Parochus, jure ordinario baptizat.

(2) Can. 21. dist. 4. de Consecr., Tertullianus loc. cit. pag. 231., S. Augustinus Contr. epistol. Parmen. lib. 2. cap. 13. col. 44. opp. tom. 9. ed. Venet. indic., Concil. Eliberitanum Can. 38. apud Labbaeum tom. 1. col. 996. ed. Venet. Quo in canone videtur excludi bigamus, etiam necessitate cogente, a baptismi administratione. Statuit enim, posse fidelem, qui lavacrum suum integrum habet, nec sit bigamus baptizare in necessitate. Mirum id videtur Dionysio Petavio in Not. ad Epiphan. tom. 2. p. 341. ed. Paris. 1722, quod bigamis baptizari in tanta necessitate non licuit. Verum, uti observant Albaspinæus in Not. p. 175. ed. Neap. 1770., canon non omnino excludit bigamum a baptismi administratione, sed in eo manere bigamo vult præferri laicum, qui bigamus non sit.

(3) Vide Catechismum Romanum loc. cit. §. 25.

(4) Apposite Augustinus Contra epistol. Parmen. citat. cap. 13. Nulla, inquit, necessitate si fiat, alieni muneris usurpatio est.

(5) Concilium Tridentinum Sess. 7. Can. 4. de Baptism. Primus Agrippinus Carthaginensis Episcopus in exitu sæculi II. hæreticorum baptismum irritum judicavit, Sanct. Augustinus de Baptism. Contr. Donatistas. lib. 2. cap. 7. col. 102. opp. tom. 9. ed. Maurin. Venet. ind., S. Vincentius Lirinensis Commonit. cap. 6. p. 306. ed. Balutii Pedeponti 1743. Agrippini sententiam sæculo III. S. Cyprianus, atque alii tum in Asia, tum in Africa Episcopi sequuti sunt. Consule Natalem Ale-

xandrum *Hist. Eccl. saec. 3. diss. 12. p. 92. ed. Venet. 1776.* Sed S. Stephanus Pontifex ratum habuit baptismum haereticorum, modo esset collatus secundum catholicae Ecclesiae leges, atque hoc Stephani iudicium universa Ecclesia sequuta est in *plenario*, hoc est oecumenico Concilio, quod mortuo Cypriano, se tamen nondum nato habitum testatur Augustinus *de Baptism. lib. 2. cap. 4. et 6. col. 98. et 104. tom. 9. opp. ed. Venet. cit.* Spectat Augustinus (quod mihi quidem verisimilibus videtur, licet non eadem omnium sententia ea de re sit, ut ostendunt Tournelyus *Praelect. theol. de Sacram. in gener. quaest. 7. art. 2. concl. ult.*, et Jueninius *de Sacram. diss. 2. art. 3. §. 5.*) ad Nicaenam Synodum, quae uti loquitur Hieronymus *loc. cit.*, omnes haereticos suscipit (Can. 8.) exceptis Pauli Samosatani discipulis, de quibus agitur Can. 19., quoniam hi praescriptam ab Ecclesia formam non observabant. Probavit inquam Stephanus haereticorum baptismum, modo secundum catholicae Ecclesiae ritus collatus fuisset. Nam calumnia est, quam inter ceteros refellunt Natalis Alexander *Histor. ecclesiast. Saec. 3. dissert. 14. art. 1. tom. 4. p. 104. ed. ind.* et Tournelyus *Praelect. Theol. de Sacram. in general. quaest. 7. artic. 2.*, Blondelli, Basnagii, et aliorum amentium, Stephanum probasse etiam baptismum haereticorum, qui in eo conferendo leges, ritusque Ecclesiae despexerant. Quod si non baptizatus ritum Ecclesiae servet, atque id velit facere, quod illa facit, ejus quoque baptismum valere, respondit Nicolaus I. in Can. 24. *de Consecr. 4.* Augustinus ea in re ancipiti contentione distractus nihil affirmandum dixit *Contr. epist. Parmen. lib. 1. cap. 13. col. 45. tom. 9. opp. ed. Venet. cit. sine auctoritate tanti concilii, quantum tantae rei sufficit.*

§ XXVIII. Baptizantur tam infantes, quam adulti; in illis originale peccatum tollitur, in his universa. Infantes rationis usu carentes baptismo donandos non esse, haereticorum quorundam opinio fuit: sed eos recte in fide Ecclesiae baptizari, cer-

tum est (1). Ut vero eorum baptismus valeat, ex utero matris in lucem editi esse debent; quoniam inutilis est baptismus eorum, qui cum intus in utero inclusi lateant; aqua tingi non possunt (2). Quod si ex eo non totum corpus, sed ejus partem eduxerint, ea pars abluitur (3), cum mors imminet, atque in primis caput, si prodierit. Infantes filios infidelium baptismo donari vetat Ecclesia, nisi vel mors immineat, vel a parentibus expositi, ac relictii sint, vel saltem eorum alter assentiatur (4).

(1) Concilium Tridentinum *Sess. 7. Can. 12. et 13. de Baptism.*, Catechismus Romanus *p. 2. cap. 2. §. 33.* et appositè Origenes *Hom. 8. in Levitic. tom. 2. opp. p. 230. ed. Paris. 1733. secundum Ecclesiae observantiam baptismum etiam parvulis dari inquit.* Anabaptistarum error, qui parvulos baptizari posse negabant, jam explosus, atque rejectus ab Ecclesia est, lateque adversus illos disputant scriptores rerum Theologicarum, praesertim Drouvenius *de Re Sacrament. lib. 2. quaest. 6. cap. 2.* Sunt qui paedobaptismum recentiori aetate inductum putant, ac negant, Ecclesiam duobus prioribus saeculis baptismum infantibus dare consuevisse. Sed eos late refellit Binghamus *Origin. Eccl. lib. 11. cap. 4. §. 5. et seq. tom. 4. p. 192. ed. Halae Magdeburg. 1755.* testimoniis Clementis Romani, Hermæ Pastoris, Justin Martyris, Irenaei, Tertulliani, Origenis, Cypriani, omnium denique Patrum, qui duobus, tribusque prioribus Ecclesiae saeculis floruerunt. Constat enim, Ecclesiam semper certam, ac fixam habuisse doctrinam de peccato originali, atque ejus delendi causa baptismum infantibus tribuisse.

(2) Vide S. Augustinum *Contr. Julianum lib. 6. capit. 5. num. 13. col. 666. opp. tom. 10. ed. indic.* S. Thomam in *Summa par. 3. quaest. 68. art. 11.* Quaestio tamen est, num recte baptizetur infans adhuc latitans in utero matris, cum ejus corpus aqua per ostium uteri immissa tingi potest. Late ea de re agit Benedictus XIV. *de Synod. dioec. lib. 7. cap. 5, ac*

puerum in eo rerum discrimine ita baptizandum monet sub conditione, sub qua similiter baptizandus erit, si in lucem prodeat. Ceterum non ambigitur, quin recte baptizetur infans, qui secto matris utero in lucem eductus est; quin etiam, mortua matre, ejus uterum reserandum esse per sectionem caesaream, ut inde extrahatur infans, ac baptizetur, docent S. Thomas *loc. cit.* *Rituale Romanum tit. 7. de baptizandis pueris §. 3.* *Instructio edita a S. Carolo Borromaeo pro recta administratione baptismi tit. de Iis, quae Parochus curet, cum timetur de partu. Actor. Eccl. Mediolan. par. 4. p. 502.* Multa enim sunt exempla infantum, qui ex mortuae matris utero vivi prodierunt, qui adoleverunt, et qui etiam ad senectutem aetate processerunt. Confer Theophilum Raynandum *de Orat. infant. per section. caesar. cap. 2. opp. t. 14.* Auctorem *Lexici universalis rei medicae verb. Caesarea sectio tom. 2.* Heisterum *Instit. chirurgic. par. 2. sect. 5. cap. 3. tom. 3;* et Franciscum Emmauelem Cangiamilam, qui peculiari libro Panormi edito *an. 1745.* materiam hanc fuisse pertractavit.

(3) *Expectanda est*, inquit S. Thomas *cit. quae-st. 68. art. 12. ad 4.* *totalis egressio pueri ex utero ad baptismum, nisi mors immineat. Si tamen primo caput egrediatur, in quo fundantur omnes sensus, debet baptizari, periculo imminente, et non est postea rebaptizandus, si eum perfecte nasci contigerit. Et videtur idem faciendum, quaecumque alia pars egrediatur periculo imminente. Quia tamen in nulla exteriorum partium integritas vitae ita consistit, sicut in capite; videtur quibusdam, quod propter dubium, quaecumque alia parte corporis abluta, puer post perfectam natiuitatem sit baptizandus sub hac forma: si non es baptizatus, ego te baptizo. Consentiant Rituale Romanum *ut. de Baptizand. parvul.:* et *Instructiones S. Caroli Borromaei, Actor. Eccl. Mediolan. part. 3. p. 422. §. Si vero foetus, tom. 1. ed. Patavii. 1754.* Consule Benedictum XIV., qui ea de re copiose disputat *de Synod. Dioec. lib. 7. cap. 5. num. 7. et seq.**

(4) Quod de parentibus dico, idem etiam dictum volo de tutoribus, qui cum parentum locum obtineant,

eorum quoque consensus requiritur, ut Hebraeorum infantes baptizentur. Quaesitum est, num avus paternus puerum hebraeum, invitis parentibus, baptismo offerre possit. Constat id recte fieri, si puer patrem amiserit, ac matrem habeat dissentientem; quin etiam multi sunt, qui idem fieri posse defendunt, cum ambo parentes sospites sunt, et ambo dissentiunt. Gravior de avia paterna controversia fuit, quam definivit Benedictus XIV. literis datis ad Petrum Hieronymum Guilelmum, quae extant in ejus *Bullario Constitut.* 54. tom. 3. p. 239. ed. Romae seu Venet., et quibus statutum est, aviam paternam puerum hebraeum baptismo offerre posse, quamquam mater, tutoresque dissentiant. Vide laudatam *Constitutionem* 54., et alteram ejusdem Benedicti *Constitutionem* 28. pag. 113. ejus *Bullarii* tom. 2. indic. edit., ubi de baptismo Hebraeorum tum infantum, tum adultorum late agitur, et omnia, quae ad hanc materiam pertinent, accurate evolvuntur.

§. XXIX. Adulti baptismo non donantur, nisi illum sua sponte petant, quoniam nemini ad credendum vis inferenda est (1); neque cum petunt, statim baptismum obtinent; sed primum fidei rudimenta edocentur; unde factum catechumenorum nomen a graeco verbo *κατηχουμαι* docere, erudire. Vetus haec est Ecclesiae consuetudo, ut adulti ad baptismum accedant, posteaquam in re Christiana eruditi sunt, eorumque animus diligenter cognitus, atque exploratus est. Ea de causa instituta est catechesis, divisaque, ut rectius procederet, in gradus tres, aut quatuor, nimirum in *audientes*, *genusfcentes*, et *competentes*, sive *electos* (2).

(1) Concilium Toletanum IV. *Can.* 57. tom. 3. *collect.* Harduini, S. Gregorius Magn. *lib.* 1. *Epist.* 47. col. 542. tom. 2. *opp.* ed. Paris. 1705.

(2) Initio Ecclesiae, nulla interposita mora, baptismus dari consuevisse videtur, cum eum suscepturus suum

jam satis patefecisset animum pietatis , et religionis plenum , fideique mysteria percepisset. Ita a Petro , et Philippo factum constat ex Act. Apostol. VIII. 38. X. 47. Verumtamen cum experimento plane compertum esset , non satisfuturam esse fidem eorum , qui sine periculo baptismo donati fuerant , institutus est catechumenatus , ut ita singulorum fides , et vita diligenter probaretur. Habebat autem catechumenatus certos gradus , quos singillatim excurrere oportebat , ut ita catechumenus ad rem christianam diligentius institueretur. Graeci canonum interpretes Theodorus Balsamon , Alexius Aristinus , Joannes Zonaras in *Not. ad Concilium Neocaesar. Can. 3.* apud Beveregium *Pandect. Canon. tom. 1. p. 405. , et 406. ed. Oxonii 1672.* duos fecere gradus catechumenorum , alterum eorum , quos ἀτελειστέροις imperfectiores , alterum eorum , quos τελειωτέροις perfectiores vocant. Duos etiam fecere gradus Beveregius *loc. cit.* Caveus *Primit. Christ. lib. 1. cap. 8* , Svicerus *Thesaur. tom. 1. verb. κηρυχέω.* Basnagius *de Reb. Sac. et Ecclesiast. cont. Baron. p. 485. ed. Ultraject. 1692.* Sed eos plerique rejiciunt , quod ex ecclesiasticis monumentis compertum est , tres , aut quatuor fuisse catechumenorum gradus. Confer Ducangium *Glossar. verb. Catechumeni* , Card. Bonam *Rer. liturg. lib. 1. cap. 15. §. 4. ibique Salam in not. p. 343. et seq. tom. 1. cap. 1. art. 6. tom. 1. p. 12 ed. Antuerpiae seu Venet. 1763.* aliosque complures. Thiersius tamen *Exposit. Sacram. cap. 8. , et Martenius loc. cit. a competentibus electos discriminant* : sed Morinus *de Poenit. lib. 6. cap. 1. , quem plerique sequuntur , unum et eundem facit competentium , atque electorum gradum.* Forte non ubique , nec semper una , et eadem obtinuit disciplina. Certe duo tantum gradus , alius videlicet eorum , qui proprie Catechumeni , et alius eorum qui competentes vocabantur hoc est imperfectiores , et perfectiores , memorantur ab Origene *Contr. Celsum lib. 2. p. 487. num. 69. et seq. tom. 1. edit. Paris. indicat. S. Zenone lib. 2. tract. 1. opp edit. August. Vindelic. 1758. ; S. Isidoro de Offic. Eccles. lib. 2. tom. 20. et 21. pag. 609. et 610. edit Paris. 1601. ; Rabano de Instit. cleric. lib. 1. cap. 26. opp. tom. 6 pag. 9. edit. Coloniae 1662. Leidrado Lu-*

gdunen. *de Sacram. Baptism. cap. 1.* apud Mabilonium *Veter. analect. pag. 78. edit. Paris. 1743.* Contra plerique ecclesiastici scriptores passim recensent tres, aut quatuor catechumenorum gradus; quae diversitas ad temporum, et locorum usus referenda videtur. Probari tamen nequit opinio Josephi Binghami, qui *lib. 10. Origin. Eccles. cap. 2. §. 2. p. 17. tom. 4. ed. Halae Magdeburg. 1755.* alium invenit gradum catechumenorum, eorum scilicet qui cum in imo catechumenorum gradu peccassent, ab ecclesia expellebantur, quos ipse ἐξωδοῦμενους vocat, sumpto vocabulo a Concilio Neocaesariensi *Can. 5. col. 824. t. 1. collect. Harduini ed. Paris.;* ubi sancitum est quod si audiens peccaverit ἐξωδοῦται. Non erat hic catechumenorum gradus, sed erat expulsio et ejectio ab omni gradu catechumenorum, quae eadem de poenitentibus, qui peccassent, disciplina obtinebat. Hoc tamen erat discrimen inter catechumenos, et poenitentes, quod ii suum etiam habebant gradum extra ecclesiam, quo loco erant *flentes*, sed catechumeni nullum huiusmodi gradum obtinebant, et ideo cum ab Ecclesia expellebantur, arcebantur a Catechumenatu, mittebanturque ad illos, quos Ecclesia a se prorsus alienos habebat. Simili ratione Synodus Eliberitana catechumenas, quae haberent *comatos*, aut viros *cinerarios*, arcet a *communione*, videlicet ab Ecclesia, et a Catechumenatu, uti eum canonem recte explicat Alaspinaeus *p. 185. ed. Neap. 1770.*

§. XXX. In imo gradu erant *Audientes*, ii nimirum, qui in ecclesia sermones, sacrasque scripturas audiebant, unde eorum nomen factum est. Qui se Baptismi desiderio teneri significaverant, signabantur signo crucis (1), ac manuum impositione (2), certisque precibus (3) catechumeni fiebant. Hi praesentes non erant, cum sacrificium peragebatur; sed finita Scripturarum explicatione cum ethnicis abiebant, clamante Diacono: *ne quis audientium, ne quis infidelium* (4).

(1) S. Augustinus de *Catech. rud. cap. 26. opp. t. 6. col. 293. ed. Venet. cit. Theodoretus Histor. Eccles. lib. 4. cap. 18. p. 169. ed. Valesii Cantabrig. 1720.* In antiquo Codice Monasterii Robiensis, quem Mabillonius dedit in *Mus. Italic. tom. 1.*, tum in fronte, tum in corde signum crucis fieri jubetur. Alius est ritus Missalis Gofici editi a Josepho Thomasio. Utrumque cum alijs libris ritualibus descripsit Martenius de *Antiq. Eccles. ritib. lib. 1. cap. 1. art. 7. tom. 1, p. 15. ed. Amuerp. seu Ven. 1763.* Illud in Bobiensi Codice, quem Mabillonius edidit, animadvertendum est, quod non tantum signum crucis fieri, sed etiam *symbolum* dici jubetur: quod est contra arcani disciplinam, quae symbolum coram catechumenis recitari vetabat. Forte illae preces ad catechumenos non pertinebant, antequam mos generatim obtineret baptizandi pueros, cui simul catechumeni fiebant, et baptismum accipiebant.

(2) Severus Sulpitius *Dial. 2. de virt. Sancti Martini cap. 4. p. 107. tom. 1. ed. Veronae 1741.*, Eusebius in *Vit. Constantini lib. 4. cap. 61. pag. 661. ed. Valesii Cantabrig.*, Concilium Arelatense I. *Can. 6. apud Labbaeum tom. 1. col. 1451. ed. Venet.* Ex hoc ritu explicandi sunt *Can. 39. Concilii Eliberitani tom. 1. col. 997. canon. 7. Concilii Constantinopolitani I. tom. 2. col. 1129. et Can. 95. Trullani apud citat. Labbaeum tom. 7. col. 1387.*, quibus locis *Christianum facere* idem est atque aliquem manuum impositione, certisque precibus in imo catechumenorum gradu collocare. Confer Hugonem Menardum in *Sacrament. S. Gregorii Magni Not. 334. opp. tom. 3. col. 361. seq. edit. Maurin. Paris. 1705.*, a quo cuncta, quae ad hanc materiam pertinent, accurate describuntur.

(3) Consule Martenium *loc. cit.*

(4) Auctor *Constit. Apostolic. lib. 8 cap. 5. apud Cotelierum PP. Apostolic. tom. 1. p. 369. edit. Amstelredami 1724.*

§. XXXI. Proximus erat locus *Genuflectentium*, quibus in genua prevolutis imponebantur manus, atque hi proprie catechumeni dicebantur, quaeque

ad eos pertinebat, liturgiae pars, catechumenorum oratio vocabatur (1). Ad eos referebatur ea Diaconi proclamatio: *Quicumque catechumeni discite*. Summus erat gradus eorum, qui cito baptismum erant suscepturi, quique appellabantur *Competentes*, quod jam baptismum peterent (2), et *Electi*, quod ad baptismum proxime accipiendum eligerentur (3). Hi sua dabant baptismi nomina, quae Diaconus viventium diptycis inserebat (4); et pro ipsis certae fundebantur preces, posteaquam reliqui catechumeni e templo discesserant (5).

(1) Concilium Nicaenum *Can. 14.* apud Labbaeum *tom. 2. col. 39.* Post Episcopi sermonem catechumenorum oratio peragebatur, uti patet ex Concilio Laodicensi *Can. 19.* apud eundem Labbaeum *tom. 1. col. 1534.* Harum autem precationum formulae in *Constitutionibus Apostolicis loc. ind. cap. 6. p. 399.*, atque a Chrysostomo *Hom. 2. in 2. ad Corint. num. 8. p. 449. t. 10. ed. ind. recitantur.*

(2) Sanct. Augustinus *de Fide et oper. cap. 6. col. 169. tom. 6. opp. edit. Maurin. Venet. citat., et Serm. mon. 216. col. 853. tom. 5. S. Hidelfonsus Adnot. de cognit. baptism. cap. 30. apud Balutium Miscellan. sacr. p. 22. tom. 2. ed. Lucae 1761.*

(3) S. Leo M. *Ep. 16. ad Episcop. Sicul. cap. 54 opp. tom, 2. p. 80. ed. Romae 1756.* Extat in *Constitutionibus Apostolicis lib. 8. cap. 7. p. 399. loc. citat.* oratio pro his catechumenis, qui βαπτίζομενοι, hoc est jamjam baptizandi appellantur.

(4) S. Augustinus *de Cur. gerend. pro mort. c. 12. col. 525. opp. t. 6. laud. ed. Venet. Auctor operis, quod Dionysii nomine circumfertur, de Hierarch. Eccl. cap. 2. §. 5, ibique Pachimeres p. 753. et 276. t. 1. ed. Antwerp. cit., Concilium Constantinopolitanum sub Menna habitum act. 5. col. 1323. tom. 1. coll. Harduini.*

(5) Graecam Ecclesiam certas pro catechamenis, energumenis, et poenitentibus preces habuisse constat,

quae quidem diverso tempore fundebantur; sed non ita exploratum est, num eadem etiam fuerit Latinae Ecclesiae disciplina. Eandem prorsus fuisse, verisimile est, uti observat Binghamus *Origin. eccles. lib. 14. cap. 5. t. 6, p. 227. ed. ind.*

§. XXXII. Statim ac catechumeni inter audientes erant relati, incipiebant catecheses, quibus fidei rationes, vitaeque christianae officia edocebantur. Quo munere instituendi catechumenos Episcopi, aut Presbyteri, Diaconique, minoresve etiam clerici, et interdum laici, fungebantur (1). Docebant autem catechistae in exedris Ecclesiae (2); magnaue erat in catechumenis instituendis eorum cura,, et diligentia; quasi qui formarent animos puerorum, qui primum imbuuntur iis, quae cognitu facilia sunt, ut ad graviora, et difficiliora paratiores accedant. Quare primum veritates simplices, et apertas proponebant, officiaque explicabant vitae christianae (3); sed de mysteriis religionis, ac ritibus sacramentorum nullum faciebant verbum, antequam proxime adesset Baptismi suscipiendi tempus; qua in re catechumeni pares erant ceteris profanis, qui mysteria nostra ignorabant. Atque haec celebris est arcani disciplina, quam ab ipso Christo, et Apostolis acceptam diu Christiani retinuerunt (4), quaeque demum sua veluti sponte desiit, postquam ethnica superstitio fere ubique extincta, et sublata fuit (5).

(1) Episcopum catechistae officio sanctum testatur S. Augustinus *Epist. 20. col. 901. num. 4. tom. 3. ac Theodorus lector Coll. lib. 2. in Biblioth. PP. t. 26. p. 86. ed. Lugdun.* Presbyterum constat ex Chrysostomo *Cateches. ad illuminandos opp. tom. 2. p. 225. cit. ed. Paris.,* quam ipse habuit, cum esset Presbyter An-

trōchia. Diaconum ostendit Augustinus de *Catechiz. rudib.* cap. V. col. 623. *app. tom. 6. ed. Maurin. Venet. cit.*, Lectorem Cyprianus *Epist. 24. p. 35. ed. Rigaltii Paris. 1666.*, neque majorem ordinem in ecclesia habuisse videtur Origenes, quem Eusebius *Histor. lib. 6. cap. 3. p. 260. ed. Cantabrig. 1720.*, et Sanct. Hieronymus de *Vir. illustr. in Origene cap. 54. opp. tom. 2. col. 877. ed. Veronae cit.*, Catechistam Alexandriae fuisse narrant, cum decem atque octo annos natus esset. De laico vide Auctorem *Constit. Apost. lib. 8. cap. 32. apud Cotelierium p. 419. ed. ind.*

(2) S. Ambrosius *Ep. 20. ad Marcellinam n. 4. col. 901. ed. Venet. cit. 1. 3.* se competentibus in Baptisterio symbolum tradidisse scribit. Erant autem, ut plurimum distincta, sed ecclesiae conjuncta aedificia in quibus catechumeni instituebantur, quaeque *catechumenia*, sive *catechumenorum mansiones* dicuntur a Leone *Novell. 73*, atque a Concilio Trullano *Can. 97. apud Labbaeum tom. 7. col. 1390. ed. Ven. Balsamone*, ac Zonara in *eum Can. apud Beveregium Pandect. Canon. tom. 1. p. 275. ec. Oxonii 1672.* Cum Episcopus aut Presbyter catecheses habebant, eas habebant etiam in Ecclesia, ceteri extra eam: atque hinc Demetrius Alexandrinus graviter reprehendit Alexandrum Episcopum Hierosolymitanum, et Teoctistum Episcopum Caesareensem, quod Origeni, cum nondum esset Presbyter, publice in Ecclesia concionandi facultatem dedissent. Confer Valesium in *Euseb. lib. 6. cap. 19. p. 283. num. 3. ed. Cantabrigiae 1720.* Multa de catechesibus habes *Dissect. 2. in Sanct. Cyrillum Hierosolymitan. capit. 4. et 5.*

(3) Sanct. Augustinus singulari libro, quem edidit, de *Catechizantibus rudibus*, et cujus veluti summam edidit Alcuinus *Epist. 7. ad Carolum Magn. pag. 1487. ed. Paris. 1617*, ritus tradit in catechumenorum institutione servandos. Consule Chardonium *Histor. Sacram. lib. 1. cap. 3.*

(4) Arcani disciplinam ab ipsa Christi, et Apostolorum memoria repetunt Antonius Pagius in *Baron. ad ann. 118. num. 4. seq. p. 95. tom. 2. ed. Lucae. Chardonius Histor. sacrament. lib. 1. cap. 3. Emanuel Schelestratus, qui peculiari dissertatione de Disciplina arca-*

ni egregie, praeter ceteros, materiam hanc illustravit. Huc sane spectat illud Christi, qui cum a discipulis interrogatus fuisset, quomobrem Judaeos parabolis alloqueretur, respondit apud Matthaeum XII 13. *quia vobis datum est nosse mysteria regni caelorum; illis autem non est datum*: et huc similiter ea verba ipsius Christi ad Apostolos Matth. VII. 6. *nolite sanctum dare canibus, neque mittatis margaritas vestras ante porcos*, quemadmodum verba ipsa interpretantur Clemens Alexandrinus *Stromat. lib. 1. p. 348. cap. 12. tom. 1. ed. Oxonii 1715.*, Tertullianus *de praescript. advers. haetic. cap. 41. pag. 217. ed. Regaltii Paris. 1675*, Chrysostomus *de Compunct. lib. 1. cap. 6. opp. tom. 1. pag. 231.*, et *Homil. 22. in Matth. num. 3. p. 287. tom. 7. ed. Paris. cit.* Quod a Christo acceperant, Apostolos, atque Ecclesiae Patres fecisse, manifestum est. Nam Apostoli in orationibus ad Judaeos, atque Ethnicos nullum de abditiis fidei mysteriis, verbum habent Act. II. IV. X. XVII, nominatim autem Paulum Christi legem observasse, tradit Clemens Alexandrinus *Stromat. lib. 5. cap. 10. p. 685. tom. 2. ed. citat. ex eo Pauli verbo: ut aliquid impartiar vobis gratiae spiritualis*, itemque ex eo sapientiam loquimur inter perfectos. Apostolorum exemplo Ecclesiae Patres reticentiae legem, arcanique disciplinam servasse diligenter, constat ex Tertulliano *loc. cit.* Cyrillo Hierosolymitano *Catech. 6. num. 29. pag. 106. edit. Paris. cit.*, Nazianzeno *Orat. 40. de Baptism. pag. 647. tom. 1. opp. ed. Paris. cit.*, Chrysostomo *Hom. 46. in Act. cap. 3. opp. tom. 9. p. 349. ed. ind.*, Cyrillo Alexandrino *Adv. Julian. lib. 7. p. 245. opp. Julian. ed. Lipsiae 1696.*, Ambrosio *Offic. lib. 2. cap. 50. num. 260. opp. tom. 3. col. 79. ed. indic.*, Augustino in *Psalm. 109. n. 17. opp. t. 4. col. 1241. ed. ind.* Innocentio I. *Epist. 25. ad Decent.* apud Constantium *Ep. Roman. Pontif. col. 859* Quod etiam confirmat reprehensio illa Ethnicorum adversus Christianos, quod clancularia esset eorum doctrina, et confirmat id, quod Athanasii aetate ab Arianis factum est. Hi enim, ut sibi Ethnicorum patrocinium adsciscerent, fracta arcani lege, rem totam patefacere non dubitarunt tum editis tractatibus, quibus Trinitatis mysterium ex-

plicabatur, tum etiam Ethnicis in ecclesiam admissis ubi magis abdita, et secreta perspicerent. Hinc Athanasius *Apolog. cont. Arian. p. 118. num. 31. tom. 1. opp. ed. Maur. Patav. 1777.*, queritur de Praefecto Aegypti Philagrio apostata, ethnicisque militibus admissis ad ea disquirenda, quae ne catechumenos quidem conspici-
re licuit. *Sacra mysteria ab Ethnicis direpta, et in terram projecta in ordinatione Gregorii Alexandrini contra Athanasium memorat Epistola I Julii Pap. ad Eusebianos apud Constantium Epist. Roman. Pontific. col. 378. Profanos sanctorum, idest fidelium, iudices, et novam, ac inusitatam mixtionem, mysticas nempe quaestiones spectante vulgo tractatas dolet Gregorius Nazianzenus in Orat. 21. de Laud. Athanasii num. 30. p. 387. opp. tom. 1. Coloniae 1690.*, ex quo magnam tum catechumenorum, tum ethnicorum fuisse offensionem, constat ex Athanasio *de Synodis num. 2. opp. tom. 1. par. 2. pag. 537. ed. Patav. 1777.* Ex quibus intelligimus, cur in publicis Patrum concionibus, praesertim cum de sacramentis agitur, frequenter occurrat ea formula: norunt initiati, norunt fideles, quod dicitur; atque etiam intelligimus, quanta sit ad Religionem tuendam necessitas traditionis, per quam multa accepimus, quae ne profanis paterent, Ecclesiae Patres literis consignare noluerunt. Haeretici Scriptores Dallaeus *de Scriptis Ignat. lib. 1. cap. 22.*, et Binghamus *Orig. lib. 10. cap. 5. §. 3. tom. 4. pag. 123. seq. edit. Halae Magdeburg. 1755.*, hanc disciplinam Apostolis ignotam, multoque serius in Ecclesiam inductam putant. Sed eos refellunt, quae de Christo, et Apostolis memoriae sunt prodita; refellit Bisilius *de Spiritu Sancto cap. 27. p. 55. t. 3. opp. ed. cit.* qui eam disciplinam ab Apostolis, atque antiquis Patribus servatam tradit; refellit Tertullianus *loc. cit.*, qui eam repetit a Christi praecepto: nolite sanctum dare canibus, neque mittatis margaritas vestras ante porcos.

(5) Confer Pagium in *Baronium ad ann. 120. n. 4. et seq. p. 95. et seq. ed. Lucue 1738. tom. 2.*

§. XXXIII. Cum satis erant probati, et satis

in re christiana eruditi (1), appropinquante solemnī die (2), catechumeni baptismum petebant; et ideo sua dabant nomina (3), per quae sese quasi candidatos baptismi declarabant. Ergo accipiebant symbolum. et orationem dominicam (4), sua confitebantur crimina (5), agebant poenitentiam (6), manuum impositioni, exorcismis, exsufflationibus (7), precibus subiciebantur; atque etiam sal benedictus in eorum os inserebatur (8). Baptismum etiam antecesserant lotiones duae, altera capitis, altera pedum (9), praeterea caput catechumeni sacro oleo ungebatur (10). Sed Ecclesia in primis curabat, ut qui baptismum petebant, tanto munere essent digni; et ideo post data a competentibus nomina plura adhibebat scrutinia, per quae eorum corda scrutabantur, videbatque *quanta vigilantia convenirent, quo studio ferverent, qua cura penderent* (11).

(1) De tempore catechumenatus non una, atque eadem semper fuit ecclesiae disciplina. Synodus Eliberitana *Can. 42.* apud Labbaeum *tom. 1. col. 997. edit. Venet.*, et Justinus *Novell. 144. cap. 3.* apud Dionysium Gothofredum *bleonium*; Auctor *Constit. Apostol. lib. 8. cap. 32. pag. 418. tom. 2.* apud Cotelierum *loc. ind.*, et Nicæni Patres *Can. 14. tom. 2. col. 39.* apud citatum Labbaeum *triennium* constituunt, Synodus Aegathensis *Can. 34. tom. 5. col. 527.*, menses octo Judaeis; Synodus Eliberitana *Can. 4. col. 992. loco mox citato*, annos tres Flaminibus praescribit. Si quis in catechumenatu peccaret, tempus producebatur, ac de superiore ad inferiorem gradum catechumenus dejiciebatur, et cum in imo erat gradu extrudebatur, Concilium Neocaesariense *Canon. 5. tom. 1. col. 1514.* apud eundem Labbaeum. Interdum tempus ipsum contraheretur, cum id iuxta aliqua causa postulabat; atque ita S. Gregorius Magn. *lib. 8. Epist. 23. col. 912. t. 2. ed. Paris. cit. cuidam Episcopo permisit, ut Judaeos in*

Agro Agrigentino baptizari cupientes, post indictum quadraginta dierum jejunium, baptismo donaret.

(2) Solemnis Baptismi tempus erat olim Pascha, et Pentecostes, Tertullianus *de Baptism. cap. 19. p. 232. ed. Paris. 1673*, Siricius *Epist. 1. ad Himer. Tarracon. cap. 2. apud Constantium loc. cit. col. 626*. Leo Magn. *Epist. 16. ad Episcop. Sicil. cap. 5. pag. 80. app. tom. 2. ed. Romae 1755*, Gelasius *Deeret. cap. 10. apud Pithoeum Cod. Can. p. 266. Paris. 1687*. Postea dies Natalis Christi, aliique festi dies accesserunt. Graeci etiam die Epiphaniae, Galli quinque quotannis diebus, Hispani etiam diebus festis Apostolorum, ac Martyrum solemnem baptismum conferre consueverunt. Quae omnia pluribus collectis antiquis monumentis accurate explicat Martenius *de Antiq. eccles. rit. lib. 1. cap. 1. art. 1. tom. 1. p. 1. ed. Antuerpiae Venet. 1763*. Verum non hoc ita intelligendum est, quasi non omni die baptismum conferre liceret, praesertim cum id iuxta aliquam causam postularet, Augustinus *Serm. 210. num. 2. col. 927. tom. 5. opp. edit. Maurin. Venet. 1731*; et Siricius *P. citat. Epist. 1. ad Himer. Tarracon. cap. 2. col. 627. Epist. 10. ad Gal. Episc. cap. 4. col. 692. apud eundem Constantium*.

(3) Semper ante baptismum, sed non uno ubique tempore catechumeni sua dabant nomina. Novum sumebant ethnici nomen; Christianorum liberi ante baptismum nullum, ut plurimum, habebant, ac si haberent, plerumque mutabant, Socrates *Hist. lib. 7. cap. 8. p. 368. edit. Cantabrig. cit.*, Gregorius Turenensis *Hist. Franc. lib. 8. cap. 22. col. 395. et Vit. Patr. cap. 8. num. 1. col. 1184. tom. 3. ed. Lucae. Consule Concilium Cathaginense IV. Can. 85. apud Labbaeum tom. 2. col. 1444. edit. Venet. Sanct. Gregorium Nyssenam in Orat. advers. eos qui differunt baptismum pag. 956. tom. 1. opp. edit. Paris. cit.*, S. Cyrillum Hierosolymitanum *Catech. 1. pag. 18. n. 4. edit. citat.*, S. Augustinum *Confess. lib. 9. col. 162. tom. 1. edit. Venet. cit.*

(4) Generatim definiri non potest, qua die competentibus symbolum traderetur, cum in ecclesiis quibusdam id fieret Dominica Palmarum, in alijs feria quarta

post quartam Dominicam Quadragesimae; in aliis denique aliis ante Pascha diebus; quin alij semel, alii bis, ter alii symbolum tradebant, sicuti observat Martenius *loc. cit. art. 11. §. 10. & seq. pag. 23.* Antequam symbolum traderet Episcopus, aliquem ab eo tractatum habitum fuisse, indicat non obscure S. Ambrosius *Epist. 20. n. 4. col. 901. opp. tom. 3. edit. Maurin. Venet. 1751.* Dominica quoque oratio tradebantur, uti patet ex S. Augustino *Serm. 58. col. 337. opp. tom. 5. ed. Venet. ind. et in Romana quidem Ecclesia eadem die Symbolum, ac Dominica Oratio tradebatur.*

(5) Tertullianus *de Baptism. cap. 20. p. 132. edit. Paris. 1776.*; Gregorius Nazianzenus *Orat. 40. de Baptism. n. 26. opp. tom. 1. pag. 657. ed. Coloniae 1690.* S. Cyrillus Hierosol. *Catech. 1. p. 18. n. 5. ed. Par. cit., Eusebius de Vit. Constantin. lib. 4. cap. 61. pag. 661. ed. Valésii Cantabrig. 1720.* Non erat tamen haec confessio ad Baptismum necessaria, sed eam catechumeni emittebant, ut antiquam vitam in scrutiniiis exponentes, quaerent, quid deserere, quid sequi, et quod vitae institutum amplecti deberent, ut se vere christianos ostenderent. Hujus confessionis rationem non obscure indicat antiquus Auctor *Serm. in psalm. 41. ad Neophytos in append. tom. 6. opp. Augustini col. 287. ed. ind.,* cum de catechumenis dicit haec: *per omnem quadragesimam vacaverunt orationi, atque jejuniis, in sacco, et cinere dormierunt, futuram vitam peccatorum suorum confessione quaerentes.*

(6) Consule Martenium *loc. cit. art. 10. pag. 28.,* ubi multa ea de re testimonia colliguntur. Ab hac poenitentia solos parvulos immunes fuisse, docet Augustinus *Serm. 351. cap. 2. col. 1351.; ac Serm. 352. cap. 1. col. 1363. opp. tom. 5. p. 2. ed. Venet. cit. negat ad baptismum Christi, in quo omnia peccata delentur, quemquam bene accedere, nisi agendo poenitentiam de vita pristina.* Ejus autem institutionem quidam repetunt a Petri praecepto, uti constat ex epistola Herivei Rhemensis *ad Willonem Rothomagensis cap. 6. Biblioth. PP. tom. 17. pag. 248. ed. Lugdun.,* ubi Clodoveum aliquot ante baptismum diebus commoratum tradit, ut poenitentiae, secundum Apostolicum praeceptum, prius

abflueretur lacrymis, dicente B. Petro Principe Apostolorum: poenitentiam agite, et baptizetur unusquisque vestrum. Auctor *Recognitionum* lib. 3. cap. 67. et lib. 7. cap. 36. pag. 537. et 564. apud Cotelierium PP. *Apostolic. ed. ind.* jejunium memorat, cui baptismum suscepturi vacare debebant; et hujus quidem jejunii mentio etiam est apud Justinum M. *Apol.* 1. num. 61. pag. 79. ed. Maurin. Paris. 1742., in Concilio Carthaginensi IV. Canon. 85. col. 1444. tom. 2. collect. Labbaei, apud Tertullianum *de Baptism.* cap. 20. pagin. 232. edit. Venet., Sanct. Augustinum *de Fid. et op.* cap. 6. col. 169. opp. tom. 6. edit. Maurin. Venet. 1731. ubi, et cetera, quae Catechumenos praestare oportebat, describuntur.

(7) S. Augustinus *loc. mox citat.* Apud Latinos exsufflationes in faciem catechumeni fiebant, uti constat ex Libris Ritualibus; apud Graecos etiam in aures. Concilium Constantinopolitanum I. *Can.* 6. apud Labbaeum tom. 2. col. 1129.

(8) S. Augustinus *Confess. lib.* 1. cap. 11. col. 75. opp. tom. 1. ed. Maurin. Venet. citat., quem salem Augustinus *de Baptism. contr. Donatist. lib.* 4. cap. 21. c. 138. tom. 9., et *ad Peccat. merit. lib.* 2. cap. 16. col. 62. tom. 10. sacramentum catechumenorum appellat. In *Can.* 65. *Consecr. dist.* 4. dicitur *Sal caelestis sapientiae.* Vide etiam Concilium Carthaginense III. *Canon.* 8., ibique Alaspinaeum in *Not. pag.* 226. opp. var. ed. Neap. 1770.

(9) Capitis lotio die Dominica Palmarum absolvetur; ideoque hic dies in antiquo Ordine Romano *Capitolavium* dicitur, Isidorus *etymol. lib.* 6. cap. 18. *de Eccl. Offic. lib.* 1. cap. 27. p. 80. et 589. edit. Paris. 1605., Rabanus *de Instit. Cleric. lib.* 1. cap. 35. opp. tom. 6. p. 23. ed. Colon. 1626. Pedum lotionis, praeter ceteros, mentio est apud Augustinum *Epist.* 34. *ad Januar.* num. 10. opp. tom. 2. col. 127. edit. Venet. citat., et Ambrosium *de Sacram.* lib. 3. cap. 1. num. 4. tom. 3. col. 445. ed. ind. eaque feria v. in coena Domini peragebatur. In quibusdam tamen locis post baptismum hanc lotionem fieri consuevisse, monet Cardonius *Histor. sacram.* lib. 1. cap. 18.

(10) Uctionem hanc capitis, quae baptismum anteibat, quaeque alia erat ab unctione verticali, quae illum sequebatur, memorant Auctor *Recognit. lib. 3. c. 67.* apud Cotelierium *PP. Apostolic. tom. 1. p. 537. ed. ind.* Ambrosius de *Sacram. lib. 1. cap. 2. opp. tom. 3. col. 440. ed. Paris. citat.*, Chrysostomus *Homil. 6. in Epist. ad Coloss. opp. tom. 11. col. 369. ed. cit.*, Siricius *P. Epist. 10. num. 11.* apud Constantium *Ep. Rom. Pont. col. 693.* Ungebatur autem initio in Ecclesia latina tantum caput, deinde etiam inter humeros, ac supra pectus unctio fieri coepit. Graeci totum corpus ungebant, uti ostendit Auctor *Eccles. Hierar. capit. 2. §. 7. pag. 253. ed. Antwerp. 1634.* Oleum, quo baptizatus ungebatur, *unguentum* vocant, ac distinguunt ab oleo, quod ante baptismum adhibebatur. Auctor *Constit. Apostol. lib. 7. cap. 22.* apud Cotelierium *loc. cit. pag. 371*, et Auctor, qui Justinii nomine scripsit *Resp. ad Orthodox. quaest. 137. pag. 501. in append. opp. Justin. ed. Paris. 1742.*

(11) S. Augustinus de *Fid. et oper. cap. 6. col. 169. tom. 6.*, atque hinc ipse Augustinus de *Symbol. lib. 2. cap. 1. col. 155. d. tom. 6.* scrutinium, examen appellat Theodulphus de *Ordin. baptism. cap. 8. in Biblioth. PP. tom. 14. p. 10. ed. Lugdun.* Hunc enim morem, inquit, *Ecclesia servare consuevit, ut per aliquot dierum spatium hi, qui in solemnitate paschali baptizandi sunt, scrutentur, ut instructis, et doctis, et simplici corde ad fidem veram venientibus vitae sacramenta imperiantur.* Plura ante baptismum scrutinia adhibebantur, de quibus late agit Martenius *loc. cit. art. 11. pag. 29*, S. Zeno *lib. 2. tract. 27. pag. 133. opp. tom. 1. ed. August. Vindel 1758.*, memorat legitimum examinis, aut scrutinii numerum, quibus rebus intelliguntur septem scrutinia, quae fiebant antequam competentes baptismi donarentur. De his Amalarius Archiepiscopus Trevirensis, seu potius Alcuinus in *Epist. ad Carolum Magn. cap. 12.* apud Canisium *Thesaur. monument. Eccl. tom. 2. par. 1. pag. 545. edit. Antwerp.* habet haec: *scrutinium finitur sabbato ante Pascha. Ipsa die facimus scrutinium septimum, sicut in Romano Ordine invenimus scriptum.*

§. XXXIV. Solemni adveniente die , catechu-
meni ad Baptisterium adducebantur (1), qui locus,
ut plurimum , erat ab ecclesia distinctus , ac sepa-
ratus (2); atque ibi tria maxime praestabant, ante-
quam baptismum acciperent. Scilicet renuntiabant
Satanae , pompisque , et operibus ejus (3), quam
renunciationem ter emittebant conversi ad occiden-
tem (4), atque in Satanam tamquam praesentem
exsufflabant, et expuebant, aliasque edebant aver-
santis animi significationes (5). Deinde versa ad
Orientem facie (6) , sese adscribebant Christo , cui
deinceps sese perpetuo servire promittebant (7). De-
nique manibus, oculisque ad caelum sublati fidem
profitebantur, secundum verba symboli, quod ba-
ptismum accepturi ter solemniter repetebant (8).

(1) Initio baptismum nullo certo loco datum osten-
dit exemplum Eunuchi , quem Philippus Diaconus in
via , et custodis carceris , quem Paulus domi suae ba-
ptizavit. Tertullianus *de Baptism. cap. 4. pag. 225 ed.*
Rigolui Paris. 1675. , et Auctor *Recognitionum* sub
nomine S. Clementis Romani lib. 4. cap. 32 et tom. 6.
cap. 15. apud Cotelerium PP. *Apostol. p. 546. et 558.*
tom. 1. ed. ind. multos in fluminibus , stagnis , fontibus
baptizatos memorant. Constantinus in memoriam
Christi Servatoris baptismum in Jordane accipere ve-
hementer cupiebat , uti narrat *Eusebius de Vit. Con-*
stantini lib. 4. cap. 62. p. 662. ac Theodoretus *Hist.*
lib. 1. cap. 32. pag. 64. edit. Cantabrig. 1720. Plures
in loco Bethabarae , ubi Joannes baptizabat , trans Jor-
danem baptizari voluisse , tradit S. Hieronymus *de Loc.*
hebr. col. 182 tom. 3. edit. Vallursii citat. Sed dein-

ceps pace Ecclesiae reddita, constituta sunt baptisteria, quae erant sacrae aedes juxta ecclesiam, in quibus unicuique tribueretur baptismus, nisi qua necessitas facere secus cogeret. Justinianus *Novell.* 58. priscis legibus sancitum inquit, ut nemini liceat, quae sacratissima sunt, domi agere; et Concilium Constantinopolitanum sub Menna *Act.* 1. col. 1194. et 126. tom. 2. collect. Harduini edit. Paris. Zonaram Monachum reprehendit, quod domi baptismum administrasset. Hujusmodi baptismi domi collati antiquis conciliis nomine παραβαπτισματων improbantur. Novo jure cautum est, ut in cathedralibus, et parochialibus Ecclesiis tantum extet fons baptismalis, ut a suo quisque Parocho in ecclesia baptizetur, nisi aliud postulet vel necessitas, vel magna dignitas ejus, qui baptismum suscipere debet. *Clemen. unic. de Baptismo, Rituale Romanum de Baptismo.*

(2) Consule Martenium *loc. cit.* art. 2 p. 3.

(3) Auctor *Constit. Apostol.* lib. 7. cap. 41. apud Cotelierum *loc. ind.* pag. 383. describit formulam, qua catechumenos renunciabat Satanæ, et operibus ejus, et angelis ejus, et inventis ejusdem, ac omnibus, quae sub eo sunt. Ejusdem formulae sententiam habent Hieronymus in *Matth.* lib. 1. c. 5. opp. tom. 7. c. 28. ed. Vallarsii Veron. 1737. Tertullianus de *Spectac.* cap. 4. pag. 74. ed. Paris. citat., Cyprianus *Epist.* 6. pag. 16. ind. edit. Paris. Ambrosius de *Myster.* eap. 2. num. 7. opp. tom. 3. col. 409. ed. ind. Interdum etiam spectacula in hac renunciandi formula diserte memorantur, ut in illa Salviani de *Gubernat. Dei* lib. 6. num. 6. pag. 121. edit. Pedeponti 1743. Abrenuntiatio diabolo, pompis, spectaculis, et operibus ejus. Atque hujus quidem renunciationis usum tam vetustum facit Basilus de *Spiritu S.* eap. 27. num. 66. pag. 55. edit. Paris. 1730., ut ejus originem ab Apostolica traditione repetat.

(4) Occidentem spectare idem erat atque ipsam spectare Satanam, qui princeps dicitur tenebrarum, ut inquit Cyrillus Hierosolymitanus *Catech.* 1. *mystag.* p. 307. num. 4. ed. cit. Trina est renuntiatio, uti testatur Auctor *Eccles. hierarch.* cap. 2. §. 3. et seq. t. 1. ed. Antuerpiae 1634. Hujus autem trinae renunciationis

mysteria explicat Vicecomes de Rit. *Baptism. lib. 2. cap. 20.*

(5) Vide Auctorem *Hierarch. Eccles. loc. cit.* Haec autem renunciatio in porticu, seu vestibulo emittebatur. Nam baptisteria duo, ut plurimum, habebant distincta conclavia, porticum, aut vestibulum, in quo catechumeni Satanae renunciabant, fidemque profitebantur; atque interiorem domum, in qua baptismi caeremonia peragebatur.

(6) In *mysteriis*, inquit Hieronymus in *Amos l. 1. cap. 6. col. 322. opp. tom. 6. ed. Vallarsii Veronae 1736. primum, renuntiamus ei, qui in occidente est, nobisque moritur cum peccatis; et sic versi ad orientem pactum inimus cum sole justitiae, et ei servituros nos esse promittimus. Eadem habet S. Ambrosius lib. mor. indic.*

(7) Sponsionem, qua catechumenus sese Christo perpetuo servire promittebat, *promissum, pactum et vovum* a Latinis appellatur. Formulam tradit Auctor *Constit. Apostolic. cit. cap. 41. Post renunciationem vero, dum adscribit se, dicat: et adscribor Christo, et credo, et baptizor.* Similem habet Chrysostomus *Homil. 6. in Epistol. ad Coloss. num. 4. opp. tom. 11. p. 369. ed. Paris.* Augustini aetate quidam fuerunt, qui fidei in Christum, non vero universalis obedientiae professionem emittere parati erant; et tamen baptismum petere non dubitabant. Contra hos ipse Augustinus scripsit egregium librum *de Fide, et operibus*, quo Christiano homini tum fidem, tum bona opera necessaria esse demonstravit.

(8) Pluries quidem catechumeni traditum symbolum reddere debebant; sed cum instaret baptismus, ter, ac solemniter, et coram multis testibus, manibusque, et oculis ad caelum sublati fidei professionem emittebant, et rogati respondebant. Cyrillus Alexandrinus *lib. 12. in Joan. cap. 21. p. 1119. ed. Paris. 1639, Auctor Eccles. hierarch. cap. 2. p. 258. tom. 1. ed. Antwerp. cit., Leo Magn. Serm. 23. in Nativit. Domini 4. cop. 6. p. 54. tom. 1. ed. Romae 1753, Augustinus de Fid. et oper. cop. 9. col. 172. opp. tom. 6. indic. ed., Ambrosius de Spiritu Sancto lib. 2. cap. 10. col. 70. opp. tom. 4. ed.*

indic. Narrat autem Augustinus *Confess. lib. 8. cap. 2. col. 246. tom. 1.* Romae ex edito loco in conspectu populi, nisi nimia catechumeni verecundia obstaret, hanc fidei professionem emitti consuevisse.

§. XXXV. Baptizati in vertice ungebantur (1), tum albis induebantur vestibus (2), eorum capiti mysticum velamen, et corona imponebatur (3), iisque tradebantur cereae faces (4), ac porro dabatur confirmatio, et Eucharistia (5), postremo lac, et mel benedictum ad infantiae significationem (6). Nunc non omnes, qui olim in usu erant, ritus, et caeremoniae ab Ecclesia retineantur. Desiit sollemnis illa catechesis, et antiqui desierunt gradus catechumenatus; sed nunc etiam adulti, antequam baptismum suscipiant, in fide, et bonis operibus instituendi sunt, ne rudes, et ignari, ac minus recte probati sanctissimam religionem amplectantur.

(1) Innocentius I. *Epistol. 25. ad Decem. Eugubinum Episc. cap. 3. col. 858. apud Constantium Episc. Roman. Pontific.*, Ambrosius *de Sacram. lib. 2. cap. 7. num. 14. col. 453. opp. tom. 3. ind. ed. Isidorus de Offic. eccles. lib. 2. cap. 25. et 26. p. 623. et 624. ed. Paris. 1061.* Hujus unctionis originem a Silvestro Pontif. repetunt Amalarius *de Eccles. offic. lib. 1. cap. 27. in Biblioth. PP. tom. 14. p. 957. ed. Lugdun.* Walfridus *de Reb. eccles. cap. 26. p. 690. tom. 10. in Bibl. PP. Paris. 1624.*, Rabanus *de Instit. cleric. lib. 1. cap. 28. tom. 6. p. 9. ed. Coloniae 1626.*, ex quo colligit Hugo Menardus *in Not. ad lib. Sacram. S. Gregorii Magn. not. 334. col. 385. opp. t. 3. ed. cit.*, scriptores omnes Silvestro antiquiores, qui unctionem memorant, de sacramento confirmationis intelligendos esse. Multi tamen

vetustissimam quidem hanc unctionem faciunt, sed negant, alio certo monumento confici posse, eam a Silvestro fuisse institutam. Illud inter omnes constat, quod haec verticalis unctio sacro chrismate peragebatur, eaque diversa erat ab unctione frontis, hoc est a sacramento confirmationis. Illam Sacerdoti permittit, hanc vero uni Episcopo servat Innocentius I. in *Epist. ad Decent. Eugubini. cap. 3. col. 858.* apud Constantium. Atque ad hanc frontis unctionem pertinet Auctor *Constit. Apostol. lib. 3. cap. 16.* apud Cotelierium *laud. l. p. 291.* Verisimile autem est, verticalis unctionis ministrum alium fuisse a ministro baptismi, cum nunc sacerdos tantam illam hominum multitudinem baptizare, ac simul ungere non posset. Ante unctionem Sacerdos baptizatis osculum dabit, quem ritum memorant S. Cyprianus *Epist. 59. ad Fidum pag. 95. ed. Rigaltii Paris. 1666.*, et S. Joau. Chrysostomus *de Util. legen. scriptur. opp. tom. 3. cap. 6. p. 81. c. ed. Paris.*

(2) S. Augustinus *Serm. 223. qui 5. est in vigil. Pasch. col. 966. tom. 1., et Ep. 34. num. 2. opp. t. 2. col. 64. ed. Maurin. cit. S. Ambrosius de Myster. c. 7. num. 34. col. 417. opp. tom. 3. ed. ind., Eusebius in Vita Constantini lib. 4. cap. 62. pag. 662. ed. cit. S. Gregorius Magn. in Sacram. opp. t. 3. col. 73., ibique Menardus in Not. col. 356. ed. ind.* Gerebantur eae vestes per dies octo; quo factum, ut dominica post pascha dominica in albis diceretur, quoniam usque ad eam diem baptizati vestes albas gerebant. Usurpatur hodie etiam ritus albae vestis, sed ea neophyti eodem tempore induuntur, atque exuuntur. Infantibus, qui vestitu non utuntur, album sadariolum datur, Catechismus Romanus *par. 2. cap. 2. §. 37.*

(3) S. Joau. Chrysostomus *Catech. 1. ad illuminan. opp. tom. 2. num. 1. p. 226. ed. Paris, Theodolphus Aurelianensis de Ordin. Baptism. cap. 16. p. 13. tom. 14. Bibl. PP. ed. Lugdun., Rabanus de Instit. cler. lib. 1. cap. 29. tom. 6. p. 10. ed. Coloniae 1620.* In Ecclesiis quibusdam etiam lotio pedum adhibebatur, de qua vide Martenium *loco cit. art. 15. num. 8. pag. 54.*

(4) S. Gregorius Nazianzenus *Orat. de Baptism. 40. p. 672. ed. Coloniae 1690. S. Ambrosius de Lapsu*

virgin. consecr. cap. 5. col. 386. num. 1. tom. 3. ed. cit. S. Gregorius Taronensis *Histor. Franc.* lib. 5. cap. 41. p. 213. ed. Paris. 1699. Dabantur autem catechumenis extincti cerei, quos ipsi deinceps in fine Litaniarum accendebant. Nunc baptizatis datur cereus ardens, de quo vide Catechismum Romanum loc. cit. num. 74.

(5) Confer Martenium loc. cit. 11. et seq. p. 55.

(6) S. Hieronymus in *Isaiam* cap. 56. col. 644. opp. tom. 4. ed. Vallarsii Venet. 1735., lac tantum, non item mel nominat, quamquam in *Dialog. contr. Luciferian.* nam. 8. tom. 1. col. 180. utrumque memoret: multa alia, inquit, quae per traditionem in ecclesiis observantur, auctoritatem sibi scriptae legis usurpaverunt, velut in lavacro ter caput mergitare, deinde egressos lactis, et mellis. praegustare concordiam ad infantiae significationem. Quae verba lactis et mellis concordiae evidenter ostendant, non lac, et mel distincte, sed mel cum lacte commixtum catechumenis dari consuevisse. Similiter et Tertullianus de *Coron. Milit.* cap. 3. p. 102. et *Advers. Marcion.* lib. 1. cap. 14. p. 372. ed. Paris. 1675., lactis et mellis concordiam, ac societatem vocat, atque hinc in libris ritualibus una extat mellis, et lactis benedictio, et una item utriusque tradendi formula. Lac etiam una cum vino baptizatis in Occidente tributum, ostendit Hieronymus in *Isaiam* cap. 55. col. 644. cit. tom. 4. Ceterum quamquam Ethnici etiam vix natos pueros lacte, et melle enutrent, quod ex pluribus antiquis Scriptoribus manifestum est, ut videri potest apud Cotelierum in *Epistola Barnabae* cap. 5. adnot. 52. p. 29. tom. 1. ed. Amstelaedami 1724, non tamen ex iis consuetudinem illam suam Christiani arripuisse videntur, sed ex veteri Testamento, ubi reprobationis terra lacte, et melle saepe recipitur, cujus iter (baptizati) inchoantes tamquam parvuli lacte nutriuntur, et melle, ut inquit Joannes Diaconus in *Epist. ad Senatorium* tom. 1. *Musei Ital.* p. 75.

§. XXXVI. Plures hodie etiam, antequam suscipiatur, cum item suscipitur, cum denique susce-

ptus est baptismus, adhibentur caeremoniae, quae in libris Ritualibus, atque in Catechismo Romano (1) describuntur. In primis autem baptizandus ter Satanae abrenunciat, fideique professionem emittit; tum in baptismo nomen accipit, quod Parochus una cum ceteris baptizatorum nominibus peculiari libro describit (2). Dum datur baptismus, adsunt *Patrini*, hoc est *Sponsores*, aut *Fidejussores*, qui pro baptizato spondent, ac fidejudent, unde eorum nomen ductum est (3). In antiquis monumentis saepe etiam vocantur *susceptores*, quod ex aqua prodeuntes susciperent. Eorum est baptizandos ministris offerre, eosque ex sacro fonte suscipere, pro infantibus ministro interroganti respondere, adultos edocere, quod ministro respondere ipsi debeant, curam gerere eorum, quos susceperunt, atque ipsos in re christiana erudire (4).

(1) *Part. 2. cap. 2. §. 60. et seq.*

(2) Nomen sumendum est ab aliquo, qui propter excellentem animi pietatem, et religionem in Sanctorum numerum relatus est, inquit Catechismus Romanus loc. cit. §. 75., rejiciendaque falsarum religionum, idolorumque nomina. Confer Benedictum XIV. *Constit. Omnium sollicitudinum. 107. §. 3. et 14. ejus Bullar. tom. 1. p. 243. et 248. ed. Rom. seu Venet. 1754.* Describitur hoc nomen una cum natali die ac nominibus parentum, et patrinorum in libro, quem unusquisque parochus habere debet, *Rituale Romanum tit. de Baptism.*

(3) Patrinorum, seu Sponsorum origo ab ipsis fere Ecclesiae incanabulis repetenda est, uti monet Martenius de *Antiq. Eccles. rit. lib. 1. cap. 1. art. 16. n. 11. tom. 1. pag. 59. ed. Antwerp. seu Venet.* Eorum meminere Tertullianus de *baptism. cap. 18. pag. 231. ed. Venet. 1744, Auctor Respons. ad Orthodox. quaes. 56.*

inter. opp. S. Justini M. p. 460. edit. Paris. 1742, Auctor Eccles. hierarch. cap. 2. §. 2. tom. 1. pag. 168. edit. Venet. 1755., Auctor Apostol. Const. lib. 3. cap. 16. apud Cotelierum PP. Apostol. p. 291. tom. 1. ed. Amstelædami 1724, S. Augustinus multis in locis, aliisque complures.

(4) Officia sponsorum describit Augustinus, seu potius Auctor *Sermonis* 168. num. 3. in *append. tom. 5. opp. Augustini col. 293. ind. edit. Venet., et Hildefontis, Adnotat. de ordin. Baptism. cap. 114., apud Balutium Miscell. sacr. t. 2. p. 34. ed. Lucæ 1761. Quod infantes per se ipsos non possent, pro iis sponsores respondere voluit Ecclesia, Cyrillus Alexand. in Joan. cap. 11. vers. 26. opp. tom. 4. p. 883. ed. Paris. 1638. Auctor *Serm. 267. num. 5. col. 441. in append. tom. 5, opp. Augustini ind. edit. Maurin. Venet. Adultis etiam morbo impeditis vocem suam commodare, inquit Cyrillus Alexand. loc. cit. Verum pro ipsis etiam adultis, qui per se respondere poterant, sponsores adhiberi voluit Ecclesia; sed ipsi tamen respondere debent. Augustinus de Baptism. lib. 4 cap. 24. col. 141. tom. 9. edit. ind. Primam exemplum sponsorum, qui his adultis dati sunt, praebere videtur Rufinus Praefectus Praetorio, qui anno 395. cum a sacro fonte eductus fuisset, traditus est Ammonio, qui magna pietatis fama florebat. Confer Tillemontius *Histoire Ecclesiast. vie de S. Gregoir, de Nysse art. 22. tom. 9. p. 593. ed. Venet. 1732, et Orsium Hist. Eccles. lib. 22. n. 88. t. 9. p. 241. edit. Rom. 1762.***

§. XXXVII. Unus tantum in baptismo patrîus adhibendus est, aut ad summum vir unus, unaque mulier (1); neque id munus unicuique committi indiscriminatim debet, sed ei, qui sit catholicus, et sana doctrina, bonisque moribus imbutus; maximeque convenit, eundem saltem puberem, et confirmatum esse (2). Repelluntur ab hoc officio infideles, aut haeretici, publice excommunicati, aut interdicti,

publice criminosi, aut infames, et qui sana mente non sunt, et qui fidei rudimenta ignorant, ita ut ea docere non possint, quem e sacro fonte suscepunt (3). Vetantur etiam parentes offerre filios suos propter spirituales cognationem (4); quae inter patrinum, ac baptizatum contrahitur, et vetantur etiam hoc munus gerere monachi, quos solitudini addictos esse oportet (5).

(1) Concilium Tridentinum *Sess. 24. cap. 2. de Reform. matrim.* Atque haec quidem disciplina Tridentino Concilio antiquior est. Nam plures numero patrilos excludere videtur Auctor *Apostol. Const. lib. 3. cap. 16. cit.* cum statuit, ut vir a Diacono, mulier a Diaconissa suscipiatur. Sed explicatius, atque disertius unum patrinum constituunt Leo P. in *Can. 101. de consecr. dist. 4*, Concilium Metense an. 888. *Can. 6. tom. 11. collect. Labbaei ed. Venet.*

(2) *Can. 102. dist. 4. de Consecr. Rituale Romanum tit. de Patrinis.* Confer Giraldum *Exposit. Jur. Pontif. par. 1. sect. 719. tom. 2. p. 524.*

(3) Confer *Rituale Romanum loc. cit.*, et Marteniam *de Antiq. Eccles. rit. lib. 1. cap. 1. art. 16. n. 14. p. 60. ed. ind.*

(4) Olim parentes infantes filios offerebant. S. Augustinus *Epist. 98. ad Bonif. num. 6. col. 266. opp. t. 2. laud. ed.* Sed deinceps parentes id praestare vetiti sunt. Concilium Moguntinum an. 813. *Can. 55. col. 1016. t. 4. collect. Harduini.* Quod factum videtur ob cognationem spirituales, quae inter suscipientem, et suscepti parentes induci coepit.

(5) *Can. 103. dist. 4. de Consecr.*

S E C T I O II.

D E C O N F I R M A T I O N E .

XXXVIII. Effectus sacramenti confirmationis.

XXXIX. Materia hujus sacramenti.

XL. Forma, et Minister.

XLI. Qui confirmationem suscipiant?

XLII. Hujus sacramenti conferendi tempus, ejusque ritus.

§. XXXVIII.

Qui baptizatus est novae virtutis robore firmior, ac perfectus Christi miles efficitur per confirmationem. Itaque confirmatio sacramentum est (1), quo homines robur, et virtutem accipiunt tum ad firmiter credendum, tum ad firmiter propugnandum pro fide, quam in baptismo susceperunt. Nimirum qui per baptismum Christiani evaserunt, quasi infantes pueri sunt, quos corroborare oportet aliis adjumentis, ut comprimant impetus hostium, cum quibus nobis pugna est, quandiu haec vivitur vita, et firmitus ad fidem adhaerescant. Itaque Christus confirmationis instituit sacramentum, quo id in nobis confirmat quod baptismo efficere coepit; imo vero non confirmat solum, sed etiam auget ratione quadam admirabili et singulari (2). Vocatur etiam hoc sacramentum *chrisma*, *unctio*, et *signaculum Domini*, et *manuum impositio*.

(1) Concil. Trident. Sess. 7. de Sacram. in gen. Can. 1., et Sess. 7. de Confirmat. Can. 1. Si quis dixerit, inquit, confirmationem baptizatorum otiosam

caeremoniam esse, et non potius verum, et proprium sacramentum, aut olim nihil aliud fuisse, quam catechesim quamdam, qua adolescentiae proximi fidei suae rationem coram Ecclesia exponebant, anathema sit. Quibus verbis a Synodo damnantur haereses Lutheri, et Calvini, quorum alter meram caeremoniam, non sacramentum confirmationem habebat, alter catechesim, qua baptizati, ineunte adolescentia, fidei suae rationem, coram Episcopo exponebant. Cum Luthero, et Calvino sentiunt Dallaeus *de Confirm. lib. 1. cap. 8. et lib. 3. cap. 13*, ac Binghamus *Orig. eccl. lib. 12. capit. 1. §. 4. et 5. pag. 350.*, et seq. tom. 4. edit. *Halae Magdeburg. 1755.*, qui confirmationem Sacramentum a Baptismo distinctum esse negant, sed ajunt meram esse caeremoniam, quae baptismum aqua inchoatum perficit. Sed horum, aliorumque haeticorum commenta late refutantur a Theologis, ac praeter ceteros a Natali Alexandro *Histor. Eccles. saec. 2. diss. 10. pag. 378. t. 3. edit. cu. Card. Orsio Dissert. de Chrismat confirmat. cap. 2. et seq.*, Drouvenio *de Re sacrament. lib. 5. quaest. 1. per. tot.*

(2) Consule Catechismum Romanum *part. 2. capit. 3. §. 21. et 22.*

§. XXXIX. De materia hujus sacramenti non eadem omnium catholicorum sententia est. Sunt enim qui eam in manuum impositione constituunt; sunt qui materiam remotam statuunt unguentum, quod ex oleo, et balsamo solemnī Episcopi consecratione conficitur (1), proximam ipsam frontis unctionem: sunt denique, qui manuum impositionem, et frontis unctionem confirmationis materiam esse arbitrantur (2) Chrisma ab Episcopo consecrari, vetus est Latinae, et Graecae Ecclesiae consuetudo (3): et vero id ab eo quotannis efficitur feria V. in coena Domini (4); sed Latinorum chrisma ex oleo tantum et balsamo, Graecorum ex aliis praeterea triginta

quinque aromatibus conficitur (5). Est et hoc ipse Graecos, Latinosque discrimen, quod hi solam frontem, illi etiam aures, nares, pectus, oculos, et pedes ungunt (6).

(1) Catechismus Romanus par. 2. c. 3. §. 8. et seq. S. Thomas in Summa par. 3. quaest. 71. art. 2. Et chrismatis quidem usum in confirmandis neophytis ab ipsis Christianae Religionis primordiis esse repetendum, contra Basnagium, ac ceteros ostendit Cardinalis Orsius peculiari dissertatione de Chrism. confirm.

(2) Confer Jueninium de Sacr. diss. 3. de confirm. quaest. 3. Drouvenium de Re Sacram. lib. 3. quaest. 3., et Tournelyum Praelect. Theolog. de Sacram. confirm. quaest. 1. art. 3.

(3) S. Basilius de Spiritu S. cap. 27. p. 55. tom. 3. opp. edit. Paris. 1730., S. Cyrillus Hierosol. Catech. 3. pag. 19. num. 4. ed. cit., S. Gregorius M. in Sacram. col. 67. opp. t. 3. edit. Paris. 1705. Nullam autem in sacris literis hujus disciplinae vestigium extat, sed eam per manus traditam inquit Basilius, cumque ejus initium ignoretur, ab Apostolis repetenda est, secundum Augustini regulam Ep. 54. col. 124. tom. cit. ed. Venet.

(4) Concilium Toletanum I. Canon. 20. col. 992. tom. 1. Collect. Harduini edit. Paris. statuit Episcopo omni tempore licere chrisma conficere: ex quo patet, ex aetate nondum obtinuisse disciplinam, quae nunc obtinet, conficiendi quotannis Chrisma feria V. in coena Domini. Verum haec antiquissima est, atque ejus origo a saeculo V. repetenda videtur. Nam ea aetate Episcopus feria V. in coena Domini tres Missas celebrabat, quarum una erat pro reconciliatione poenitentium, altera pro conficiendo chrismate, tertia serotina de ipsa diei solemnitate. Id ex vetustis sacramentariis sese deprehendisse testantur Menardus in Not. ad lib. sacrament. S. Gregor. not. 263. tom. 3. opp. S. Gregor. col. 327. edit. Paris. Bona Rer. liturg. lib. 1. cap. 18. §. 6. pag. 15. tom. 2. edit. Taurin. 1749., et Martenius de Antiq. eccles. rit. lib. 1.

cap. 3. art. 3. §. 8. p. 104. tom. 1. laud. edit. Fabiani P. ea de re epistola in *Canon. 18. de Consecr. dist. 3.* ab Isidoro Mercatore conficta est.

(5) Graecorum ritum in praeparando unguento chrismatis ex 35. aromatibus in vino decoctis describit Goarins in *Eucholog. Graecorum pag. 637. et seq. edit. Paris. 1647.*

(6) Confer Goarium *loc. cit. pag. 356.* Sed S. Cyrillus Hierosolymitanus *Catech. 3. mystag. cap. 4. p. 317. ed. Paris. cit.* tantum memorat frontem, nares, pectus: ex quo patet, has tantum partes ea aetate a Graecis inungi consuevisse.

§. XXXX. Quae de materia, eadem de forma hujus sacramenti disputatio est. Nam alii eam ponunt in oratione, qua Episcopus neophyto manus imponens invocat Spiritum Sanctum, alii in verbis: *signo te signo crucis, et confirmo te chrismate salutis, in nomine Patris, et Filii, et Spiritus Sancti* (1); alii denique tum in his verbis, tum in illa oratione formam ipsam positam esse arbitrantur (2). Ordinarius minister non nisi Episcopus est (3); extra ordinem, atque ex supremæ ecclesiasticæ Potestatis delegatione etiam Presbyteri hoc sacramentum recte administrant (4). Graecorum Sacerdotes omnes generatim habent hanc delegatam potestatem, per quam sacramentum confirmationis rite, et recte conferunt (5).

(1) Catechismus Romanus *part. 2. cap. 3. §. 12. et 13.*

(2) Confer Drouvenium *loc. cit. quaest. 4. per tot.* Quamquam autem ea res nondum ab Ecclesia sit definita, tamen certissimum est, eam semper certis quibusdam verbis hoc sacramentum administrare consuevisse, ut proinde in hoc etiam locum habeat illud Augustini: *accedit verbum ad elementum, et fit sacramentum. Sa-*

DEP. Instit. Can. Tom. II.

ne Apostolos verbis usos esse, testantur sacrae Litterae Act. VIII. 15., atque idem annis consequentibus ab Ecclesia factum fuisse, constat ex plurimorum Patrum testimoniis, ac inter alios id disertissime tradit Innocentius I. in *Epist. 25. ad Decent. Eugubinum cap. 3. col. 859*, apud Constantium *Ep. Roman. Pontific.*, quamquam ob arcani disciplinam non ipsa describat verba, quibus confirmationis forma constabat. Varias hujus sacramenti formas habet Martenius *de Antiq. eccles. rit. lib. 1. cap. 2. art. 3. §. 11. pag. 91. ind. ed.*

(3) Petrum, et Joannem Apostolos missos legimus in Act. VIII. 14. et seq., ut a Philippo baptizatos confirmarent. Concilium Tridentinum Sess. 7. de *Confirm. Can. 3. Si quis dixerit*, inquit, *sanctae confirmationis ordinarium ministrum non esse solum Episcopum, sed quemvis simplicem sacerdotem, anathema sit.* Confer etiam S. Cornelium *Epist. 9. ad Fabium Antiochenum cap. 4. col. 153*, apud Constantium *Ep. Roman. Pontific. Sanct. Cyprianum Ep. 73. ad Jubajan. pag. 124. edit. Paris. 1666.* Innocentium I. *Epist. ad Decent. Eugubin. cap. 3. num. 3. col. 858.* apud eundem Constantium, S. Hieronymum *Contr. Luciferian. num. 9. col. 181. opp. tom. 2. ed. Venet. 1735.* S. Gregorium Magn. *lib. 4. Epist. 9. col. 689. opp. tom. 2. ed. Paris.*, Innocentium III. in *cap. 4. de Consuet.* Quae haeretici objiciunt, refelluntur a Theologis, praesertim Juvenio *de Sacram. diss. 3. de Confirm. quaest. 5. artic. 2*, et Drouvenio *de Re sacram. lib. 3. quaest. 7. per tot.*

(4) Ita Gregorius M. *lib. 4. Epist. 26. col. 705. laud. edit. tom. 2.* Presbyteris in Sardinia degentibus extra ordinem confirmandi tribuit facultatem. Consule S. Thomam in *Summa par. 3. quaest. 72. art. 11. ad 11.*, et Benedictum XIV. *de Synod. dioec. lib. 7. cap. 7*, qui de hac Summi Pontificis delegatione copiose disserit, et diligenter. Verum chrismatis benedictio adnumerata semper fuit inter propria Episcopalis ordinis munera; et ideo confirmandi privilegium a Sede Apostolica Presbyteris concessum adjunctam legem habere solet, modo ipsi chrismate utantur ab Episcopo consecrato. Disputat Benedictus XIV. *l. c. num. 1. et 2*, num Sum-

mus Pontifex etiam chrismatis consecrandi facultatem Sacerdoti tribuere possit. Quae etiam est etiam, num Episcopus Sacerdoti concedere possit confirmandi facultatem; sed cum Sedes Apostolica, quae arctare potest Episcoporum jurisdictionem, sibi uni hanc facultatem reservaverit, irrita est confirmatio, quae per solam Episcopi delegationem a Presbytero collata est. Confer Benedictum XIV. *loc. cit. num. 3. et seq.*

(5) Graecorum Sacerdotes ante Photianum schisma confirmationis sacramentum conferre solitos fuisse ostendunt Morinus *Dissert. 2. de Sacram. confirmat.*, et Lucas Holstenius *Diss. 1. de Ministr. confirm. apud Graecos*. Dubitari autem non potest, quin il non solum valide, sed etiam licite confirmet ex tacita saltem delegatione Sedis Apostolicae, quae hanc eorum consuetudinem ratam habet, uti observant Arcadius *de Concord. Eccles. Occident., et Orient. lib. 2. de Confirm. cap. 15. pag. 96*, et Benedictus XIV, *loc. c. t. 8*. Certe in Concilio Florentino *tom. 9. Coll. Harduini col. 430*. Eugenius IV. inter alias quaestiones, hanc ordine sextam Graecis proposuit: *quare Pontifices non inungerent sacro chrismate, sed Sacerdotes, cum hoc Pontificibus sit datum?* Verum ut habetur in actis ejusdem Concilii *loc. cit. haec a Latinis objecta Mytylenensis Episcopus canonice legitimeque dissolvit*. Confer Holstenium *de Ministr. confirmat. apud Graecos*. Ex quo patet, a Graecis canonicas suae disciplinae rationes allatas fuisse, per quas Latinis satisfactum est, atque has rationes Concilio fuisse probatas. Sacerdotibus tamen Italo-Graecis confirmare vetitum est a Clemente VIII. *Constit. Sanctissimus 107. Bull. ed. ult. tom. 5. par. 2. pag. 72*, et a Benedicto XIV. *Const. 57. §. 3. pag. 104. et Const. 129 §. 4. pag. 322. tom. 1. ejus Bullar. edit. Romae seu Venet. 1754*. Unus hic amovendus est obex. Innocentius III. in *cap. 4. de Consuet.* Presbyteros, qui *apud Constantinopolim* per abusum confirmabant, confirmare in posterum vetat; ex quo confici videtur posse, Graecis Presbyteris vetitum esse Confirmationis sacramentum administrare. Verum Innocentius loquitur de Latinis Presbyteris qui Constantinopoli morabantur; et vero in integra decretali, quae extat apud Balutium *tom. 1.*

Ep. Innocentii III. pag. 480., nominatim agitur de Latinis Presbyteris, sed verbum illud Latinis in decretalium collectione Raymundus omisit.

§. XXXXI. Nonnisi baptizati confirmandi sunt, cum fieri non possit, ut adolescat, qui nondam natus est (1) Suscipere confirmationem possunt omnes tum infantes, tum adulti; et diu quidem viguit consuetudo, ut statim post baptismum confirmatio tribueretur (2). Graeci nunc etiam retinent hanc consuetudinem (3), sed ab ea jampridem recesserunt Latini (4), apud quos pueri ante septimum aetatis annum non confirmantur (5). Et quamquam hoc sacramentum non ejusmodi habeat necessitatem, ut sine eo salvus quis esse non possit, tamen qui illud negligunt, aut contemnunt, salutem suam in discrimen adducunt, gravisque criminis reusunt, quoniam omnes eniti debent, ut christianae vitae perfectionem acquirant (6). Adulti, qui hujus sacramenti gratiam, et dona consequi cupiunt, non solum fidem, et pietatem afferre, sed etiam graviora, quae admiserunt, crimina delere ex animo debent. Quare elaborandum est, ut primum peccata confiteantur, ac jejunia, aliaque pietatis opera suscipiant, curentque, ut jejunii ad hoc sacramentum accedant (7).

(1) Confer D. Thomam in *Summa par. 3. quaest. 72. art. 6.* Presbyterum quemdam Scotum, Samsonem nomine, qui non baptizatos confirmari posse putabat, damnavit Zacharias Pont. *Epist. 10. ad Bonifacium* apud Labbaeum *Collect. Concil. tom. 8. col. 255. ed. Venet.* Iis, qui post baptismum flagitiosam vitam duxerant, ac morientes confirmationem petebant, denegatum

hoc sacramentum ex *Canon. 39. Concilii Eliberitani colligit Albaspinæus in Not. pag. 175. ed. Neap. 1770*, quem Jueninius sequitur de *Sacramen. diss. 3. qu. 6. capit. 2.*

(2) Tertullianus de *Baptismo cap. 7. pag. 226. ed. Rigaltii Paris. 1675*, S. Cyprianus *Epist. 70. ad Januar. et Ep. 73. ad Jubajonum pag. 117. et 124. edit. Paris. 1666*, S. Cyrillus Hierosolym. *Catech. 3. mystagog. pag. 316. num. 1. edit. cit.*, S. Dionysius seu potius Auctor *lib. de Eccles. hierarch. cap. 2. pag. 254. opp. tom. 1. edit. Antwerp. 1634.*, Concilium Laodiceum *Canon. 48. col. 789. tom. 1. collect. Harduini.*

(3) Consule Leonem Allatum de *perpet. consens. eccles. occident. et orient. lib. 1. cap. 17.*, Goarium in *Not. ad Ritual. Graecor. pag. 367. Naironum Evopl. catholic. fid. pag. 2. cap. 3*, Vanslebium *Histor. eccl. Alexandr. pag. 2. cap. 21.*

(4) Incertum est, quo primum tempore confirmatio multo post baptismum conferri coeperit; et forte id factum est, cum rarior evasit baptismus adultorum. Confer Martenium de *antiqu. eccles. rit. lib. 1. cap. 2. art. 1. §. 3. pag. 86. tom. 1. laud. edit.* Ceterum nunc etiam cum adulti baptizantur, Latinae Ecclesiae sententia est, confirmationem a baptismo, si fieri commode potest, non esse separandam. *Rituale Romanum tit. de Bapt. adult.*

(5) Catechismus Romanus *pag. 2. cap. 3. §. 19.* Sed quamquam ipse Catechismus non expedire dicat, quod pueris confirmatio ante septennium conferatur, non tamen id ita est intelligendum, quasi nunquam his pueris hoc sacramentum conferri possit. Nam pueri, qui in vitae discrimine versantur, etiam ante septennium sunt confirmandi. S. Thomas *loc. cit. art. 8. ad 4.*, et alia similiter justa causa esse potest, propter quam pueris ante illam aetatem hoc sacramentum detur. Consule Catalanum in *Pontific. Roman. tit. 21. §. 7. num. 19. et 22. tom. 3. pag. 227. edit. Rom. 1740.*

(6) Consule Catechismum Romanum *loc. cit. num. 17. et 18.*, et D. Thomam in *Summa part. 3. quaest. 72. art. 1.*

(7) Olim nonnisi jejunis dabatur hoc sacramentum, quod multis collectis monumentis ostendunt Martenius *loc. cit. num. 1. pag. 88.*, Jueninius de *Sacram. diss.*

3. *de Confirm. quaest. 9. cap. 2.* Veram haec consuetudo aetate D. Thomae coeperat obliuiscere, uti ipse testatur *quaest. ind. art. 12. qd 1.* De hac laudabili antiquae Ecclesiae consuetudine Christianos moneri jubet Catechismus Romanus *loc. cit. §. 20. et recte ubi congrue observari potest*, inquit D. Thomas *loc. cit. convenientius est, ut a jejunis (confirmatio) detur, et accipiatur.*

§. XXXXII. Confertur hoc sacramentum potissimum in Pentecoste, quoniam hoc maxime die Apostolos Spiritus Sancti virtute roboratos, et confirmatos fuisse constat (1). Offeruntur autem confirmandi a sponsoribus, sive patrinis, quos probos christianos, et confirmatos esse oportet (2): debentque pro sacri chrismatis reverentia frontem eluere, decidentesque in eam capillos attondere. Episcopus confirmato alapam impingit (3), ut discat, se paratum esse oportere ad omnia adversa pro Christi nomine invicto animo toleranda, eique pacem impertitur (4); denique ejus frons bombyce diligenter abstergitur (5).

(1) Catechismus Romanus *loc. ind. §. 26.*, S. Carolus Borromeus in *V. Concil. Mediolan.*

(2) Proprios confirmationis patrilinos adhibuit Ecclesia cum seorsum a baptismo dari coepit hoc sacramentum; atque hinc ab antiquioribus Patribus soli baptizatorum patrini memorantur. Eadem fere de utrisque sunt constituta, et qui in baptismo patrini esse nequeant, iidem etiam in confirmatione hoc munus gerere prohibentur.

(3) Hujus alapae nulla mentio est in sacramentario S. Gregorii Magni, aut in iis, qui IX et X saeculo de ritibus scripserunt. Primus forte eam memoravit Durandus Mimatensis Episcopus; ejus vere mysteria explicat S. Carolus Borromeus *Instruct. de Sacram. confirm. pag. 4. act. Eccles. Mediolanen. tom. 1. pag. 432. ed. Patavii 1554.*

(4) Catechismus Romanus *loc. cit.* §. 26.

(5) Olim confirmandorum frontes bandellis, seu vittis lineis cingebantur, quas usque ad saeculum XII. gestabant per dies plures, Amalarius *de Divin. Offic. lib. 1. cap. 4 in Biblioth. PP. tom. 14. pag. 966. ed Lugdun.* Deinde in nonnullis Ecclesiis obtinuit, ut lineae vittae tantum per triduum gererentur.

SECTIO III.

DE EUCHARISTIA.

- | | |
|--|--|
| XLIII. Eucharistia quid? | absolvenda sit. |
| XLIV. Ejus materia. | LVII. Quibus diebus olim Missa celebraretur? |
| XLV. Qualis adhibeatur panis. | LVIII. Plures olim Missae ab uno Sacerdote celebratae. |
| XLVI. et XLVII. Forma, et minister. | LIX. Qua hora celebrantur? |
| XLVIII. Quibus Eucharistia tribuitur. | LX. et LXI. Missa publica et privata |
| XLIX. A jejunis sumenda est. | LXII. Quo loco Missa celebranda sit. |
| L. Quo tempore omnes fideles eam sumere debeant? | LXIII. Dominicis. festisque diebus fideles Missae sacrificio interesse debent. |
| LI. Eucharistiae conferendae ritus. | LXIV. Mos antiquus offerendi panem, et vinum. |
| LII. Dies festus corporis Christi, processio, expositio. | LXV. Missae honorarium. |
| LIII. Eucharistia novae legis sacrificium. | LXVI. Pro eo qui honorarium dedit sacrificium speciatim offerendum est. |
| LIV. et LV. Liturgiae. | |
| LVI. Quo sermone liturgia | |

§. XXXXIII.

Sacramentum omnium nobilissimum est Eucharistia, per quod ipsum Christi corpus, et sanguinem sub

specie panis , ac vini sumimus , Deique gratia miris modis augemur , modo illud rite , recteque suscipiamus. Eucharistiae vocabulum Graecum est , quod Latine reddi potest bona gratia , sive gratiarum actio , quod nomen huic sacramento tributum est , tum quod ipsum gratiarum omnium fontem continet , tum quod in ejus institutione Christus Patri gratias egit. Communionis nomine , quo saepe appellatur , significatur conjunctio fidelium cum Christo , cui nos hoc sacramentum copulat , et vinculum charitatis , quo nos inter nos in eodem Christo conciliamur , et jungimur (1). Dicitur etiam coena , quod in illo novissimae coenae salutari mysterio Christus Dominus hoc sacramentum instituit (2).

(1) Apostolus I. ad Corinth. X. 16. S. Joannes Damascenus *de Fid. orthodox. lib. 4. cap. 13. opp. tom. 1. pag. 2. 273. edit. Le-Quenii Paris. 1712.*, et Dionysius , sive potius Auctor operis *de Eccles. hierarch. cap. 3. n. 1. tom. 1. pag. 282. edit. Antwerp. 1634. Coussale Albaspinæum Observ. lib. 1. et seq. edit. Neap. 1770.* , et *de Eucharist. lib. 2. cap. 4. pag. 360.*

(2) Alia quibus Eucharistia appellatur nomina , vide apud Bonam *Rer. Liturg. lib. 1. cap. 3. tom. 1. pag. 17. et seq. edit. Taurin. 1747.* , Drouvenium *de Re sacram. lib. 4. quaest. 1. §. 1. aliosque complures. Confer etiam Ballerinius Not. 6. in tract. 38. S. Zenonis tom. 1. pag. 251. edit. August. Vindel. 1758.*

§. XXXXIV. Duplicem habet materiam , panem , et vinum , quorum alter Christi corpus , alterum sanguis efficitur , conversione mirabili , quam *transubstantiationem* vocamus (1). Vinum ex uvis esse debet , panis ex tritico ; azymo vitur Ecclesia Latina , Graeca fermentato (2). Utrumque recte

consecrari non ambigitur (3); sed propriae ecclesiae consuetudo ab unoquoque servanda est (4).

(1) Catholica Fides docet, verum Christi corpus, et sanguinem in Eucharistiae sacramento contineri, inque eo neque panem, neque vinum remanere, sed hoc totum in Christi sanguinem, et illum similiter in corpus converti. Sunt haec catholica dogmata a Synodo Tridentina Sess. 2. de Sacram. Euchar. Canon. 1. et 2. definita adversus Calvinum, et Lutherum, quorum alter veram, ac realem Christi praesentiam in Eucharistia negabat, alter una cum Christi corpore et sanguine panis, vinique substantiam in eo sacramento remanere contendebat. Similiter catholica veritate, constat, Christum in Eucharistia esse per veram transubstantiationem, per quam totus panis Christi corpus, et totum vinum Christi sanguis efficitur, non per impanationem, quae esset unio hypostatica Verbi Divini cum substantia panis, aut per consubstantiationem, quae esset conjunctio substantiae panis, et vini cum substantia carnis et sanguinis Christi, adeo ut Eucharistia non solum Christi corpus, ac sanguinem, sed simul etiam panem, vinumque contineret. Late catholicam veritatem demonstrant Theologi, quos inter consule Drouvenium de Re sacrament. lib. 4. quæst. 6. cap. 4. sect. 2.

(2) De usu azymi, atque fermenti magna est inter eruditos disputatio, cum certo statui non posse videatur, num Latini semper azymo, Graeci autem fermentato pane semper usi sint. Antiquiores Theologi Scholastici putarunt, Latinam Ecclesiam ab initio azymum panem adhibuisse usque ad haeresim Ebionitarum, quae anno Christ. 74. erupit; sed cum ipsi Ebionitae antiqua legalia simul cum Evangelio servanda esse contenderent, Ecclesiam, ne haereticos imitari videntur, rejectis azymis fermentum instituisse, ea vero extincta haeresi ad azymum rediisse. Ita nimirum sentiunt Joannes Scotus in 4. dist. 11. quæst. 5., Alexander Alensis quæst. 32. membr. 3. ad ult. et par. 4. de sacram. Euchar. quæst. 10. membr. 4. artic. 1. §. 3., S. Bonaventura

in 4. dist. 11. artic. 2. *quaest.* 1., Sanct. Thomas, *ib.* *quaest.* 2. artic. 2. Verum haec opinio nullum habet idoneum fundamentum, quo niti posse videatur, neque ejus rei verbum unum est apud antiquos scriptores, qui per decem priora saecula res Ecclesiae scriptis illustrarunt. Nechites Archiepiscopus Nicomediae apud Anselmum Havelbergensem *Dial. lib. 3. cap. 13. Spicilegii Dacherii tom. 1. pag. 200. ed. Paris. 1723.* putavit Melchiadem, ac Siricium Pontifices fermentum apud Latinos instituisse; verum haec sententia ducta est ex libro Pontificali Damasi Pontificis, cujus, omnes norunt, suspecta fides est. E recentioribus tres potissimum ea de re doctorum hominum sententiae circumferuntur, nimirum Jacobi Sirmondi, Jc. Mabillonij, Jo. Bonae Card. Contendit Sirmondus in *Disquisit. de Azymo*, Latinos ab initio fermentum consecrasse usque ad saeculum IX, deinceps vero medio illo tempore, quod excurrit inter Photianum schisma, et Michaëlem Cerularium, hoc est inter annum circiter 867, et 1054., azymum adhibere coepisse. Contra vero Mabillonius *Praefat. 1. ad saec. III. Benedictin. num. 64. p. XXVIII. edit. Venet. 1734., et Dissert. de Azymo et fermentat.* perpetuum in Ecclesia Latina azymorum usum ab ipsa Apostolorum aetate fuisse arbitrat. Quae eadem sententia est Joannis Cabassutii in *notit. Eccles. saec. 2. diss. 2.*, Christiani Lupi *Schol. in Canon. Concil. diss. de actis Leonis IX. cap. 5. et seq. opper. tom. 4. pag. 312. seq. ed. Venet.*, Edmundi Martenii *de Antiq. eccles. rit. lib. 1. cap. 3. art. 7. §. 5. et seq. pag. 114 tom. 1. ed. Antwerp. seu Venet. 1763*, Antonius Sandinii *Diss. 11. de perpetuo azymor. usu in Eccle. Latin.* et Joannis Ciampini *de Azym. fermentat. conjectur.*, qui tamen in hoc a Mabillonio dissentit, quod Apostolis indiscriminatim utriusque panis usum tribuere videtur. Sed Joannes Bona *Rer. liturgic. l. 1. c. 23. per tot. pag. 150. et seq. tom. 2. ed. Taurin. 1749.*, quasi mediam sequitur viam inter has duas Sirmondi, et Mabillonij opiniones. Nimirum late demonstrat, Latinos per novem, aut octo saltem Ecclesiae saecula nullum posuisse discrimen inter azymum, atque fermentum, sed modo unum, modo alterum paucum sine delectu consecrare solitos fuisse Sententia haec ce-

teris probabilius esse videtur, atque firmissimis nititur argumentis, quae late ab ipso Bona loc. cit. exponuntur. Eam vero, praeter ceteros, sequuntur Gravesonius *Histor. Eccles. tom. 3. saec. 9. colloq. 3. pag. 99. edit. August. Vindelic. ann. 1756.*, Tournelyus *Praelect. Theolog. tom. 9 in 4. de Sacram. Euchar. quaest. 4. art. 5. concl. 3.*, Jueninius *de Sacram. diss. 4. quaest. 2. cap. 2. artic. 4. §. 5.*, Drouvenius *de Re sacrament. lib. 4. quaest. 2. cap. 1. §. 3.* Armeni, et Maronitae Latinorum more azymum consecrant; sed a ceteris Orientalibus fermentum adhibetur. Michael Cerularius Patriarcha Constantinopolitanus duabus literis, quarum alteram dedit ad Joannem Tranensem in Apulia Episcopum, alteram ad Petrum Patriarcham, Antiochenum, Latinos increpare ausus est, quod azymo uterentur, et nullam esse eorum consecrationem demonstrare conatus est. Sed insanum, atque impium hominem refutarunt Leo IX praeclara epistola, et Cardinalis Humbertus Silvae Candidae Episcopus egregio Dialogo, quae, quique extat tom. 17. *Annalium Baronii pag. 92. et seq. ed. Lucae.*

(3) Concilium Florentinum in decreto Eugenii IV. col. 986. tom. 9. collect. Harduini.

(4) Catechismus Romanus par. 2. cap. 4. §. 14.

§ XXXXV. Prioribus Ecclesiae saeculis panis a Fidelibus oblatur cujuscumque molis, ac figurae consecrari, sectusque in partes populo tribui solebat. Sed pace Ecclesiae data, diligenti cura paratus est (1), atque in modum coronae compactus (2), eique impressae cruces, et characteres, qui Christum exhiberent, licet non iidem semper et ubique fuerint (3). Erat autem panis non ita tenuis, ut deinceps esse coepit, eratque tantae magnitudinis, ut ex uno, qui consecratur, pane cuncti fideles sacramentum acciperent (4) At deinceps oblatae in tenuem abierunt formam instar denarii, et tunc apud

Latinos plures oblatae consecratae sunt, grandior una pro sacerdote, minores aliae pro populo, quae minores oblatae adhuc *particulae* appellantur. Vino aliquantulum aquae admiscetur (5), idque ex Apostolica traditione, et exemplo Christi, qui vinum cum aqua commixtum praebeuit (6).

(1) Concilium Toletanum XVI. cap. 6. tom. 8. col. 62. collect. Labbaei edit. Venet. Explicat autem Martenius de *Antiq. eccl. rit.* lib. 1. cap. 2. art. 7. §. 23. et seq. pag. 116. laud. edit., quo ritu, qua diligentia, et a quibus conficeretur panis, quem Sacerdos consecrabit.

(2) Epiphanius in *Ancorato.* n. 57. opp. tom. 2. p. 60. ed. Paris. 1622., Caesarius, et S. Gregorii Nazianzeni frater dial. 3. de *Fid. cathol.* p. 797. *Bibl. PP.* tom. 6. ed. Lugduni 1677., Gregorius Magn. *Dial.* l. 1. c. 55. col. 404. opp. t. 2. ed. Maurin. Paris. 1705. Hinc a quibusdam oblata *circulus*, et *rotula panis* appellatur. De forma panis, quo utuntur Graeci, videndus Leo Allatius de *Consens. Occident. et Orient. Eccl.* lib. 3. cap. 15. n. 18.

(3) Consule Goarium in *Not. ad Eucholog. Graecor.* p. 117. Arcudium de *Sacram.* lib. 3. capit. 38. Card. Bonam *Rer. liturgic.* lib. 1. cap. 23. §. 18. pag. 209. et 210. ed. Taurin. 1749.

(4) Confer Juvenium de *Sacram.* diss. 4. quaest. 2. art. 3.

(5) Aliquantulum, inquam, aquae vino admiscendum est, quoniam multo plus vini, quam aquae calici infundere oportet, cap. 13. de *Celebr. miss.* Concilium Triburiense *Can.* 19. tom. 6. collect. Harduini, col. 445., duas ex vino partes, unam ex aqua esse jubet. Sed cetera Concilia modicum aquae infundi volunt, ne vini natura immutetur, neque definiunt, quanta pars calicis ex aqua esse debeat. Causas autem commiscendae aquae cum vino explicat Concilium Tridentinum *Sess.*

22. cap. 7. de *Sacrific. miss.*, et Catechismus Romanus loc. cit. §. 16.

(6) Nullum quidem est in sacris literis expressum testimonium, quod Christus aquam vino admiscuerit, sed ita tamen ab eo factum esse *Conciliorum auctoritate*, inquit Catechismus Romanus par. 2. c. 4. §. 14., et Sanct. Cypriani testimonio comprobatur. Revera in antiquis Liturgiis Ss. Basilii, et Cyrilli hujus a Christo factae commixtionis, disserta mentio est: eamque etiam memorant S. Irenaeus *Contr. haeres. l. 4. c. 53. n. 2. pag. 270. ed. Paris. 1710.*, S. Cyprianus *Epist. 33. ad Caecil. p. 100 ed. Rigaltii Paris. 1666.* Sanct. Hieronymus *Comm. in c. 14. Marci col. 823. opp. tom. 11. edit. Vallarsii Veronae*, S. Caesarius Arelatensis *Hap. 7. in Biblioth. PP. t. 8. p. 826. edit. Lugdun.* Concilium Carthaginense III. *Canon. 24. tom. 2. col. 1403*, Aurelianense IV. *Canon. 4. t. 5. col. 1365.* Trullanum *Can. 32. tom. 7. col. 1362*, apud Labbaeum *ed. Venet.* Ex quo intelligitur, quam graviter desipiant Calviniani, et Lutherani, qui hunc ritum aquae vino admiscendae in Eucharistia inter humana commenta, ac recentes traditiones referunt. Quamquam tamen aquae cum vino commixtio sine mortali peccato praetermitti non possit, ea tamen si desit, constare sacramentum docet Catechismus Romanus loc. cit. c. 17. Ceterum quaestio est, quae saeculo XII. excitari coepit; num aqua in Christi sanguinem convertatur. Vide Drouvenium de *Re Sacrament. lib. 4. quaest. 2. cap. 3. §. 4.*

§. XXXXVI. Verba, quibus consecratur, panis, haec sunt: *hoc est corpus meum*: vinum autem consecratur his verbis: *hic est calix sanguinis mei, novi, et aeterni testamenti, mysterium fidei, qui pro vobis, et pro multis effundetur in remissionem peccatorum* (1). Munus Ministri, qui Eucharistiam administrat, in ea consecranda, ac distribuenda positum est. Eucharistiam consecrant soli Sacerdotes, non item inferiores clerici, multoque

minus laici; quoniam Christus hanc potestatem tantum Apostolis, eorumque in sacerdotio successoribus concessit (2). Num plures simul Sacerdotes conficere Eucharistiam possint, ab antiquis Scholasticis disputatum est; sed id diu a Latinis factum, et nunc etiam a Graecis fieri constat (3) Quin apud nos manent adhuc vestigia antiquae consuetudinis in Presbyterorum, atque Episcoporum ordinationibus.

(1) Num in forma, qua consecratur calix, ad vim sacramenti tantum necessaria sint verba *hic est calix sanguinis mei*, an etiam cetera requirantur, vetas quaestio est, de qua vide Jueninium *de Sacram. Diss.* 4. qu. 3. c. 3., Drouvenium *de Re sacrament.* t. 4. q. 3. c. 3. Quamquam autem Christas voluntatis imperio Eucharistiam consecrare potuisset, revera tamen evangelicis verbis ex pane, et vino suum corpus, et sanguinem confecisse docet D. Thomas in *summa* par. 3. quaest. 78. artic. 1. ad 5., quem Theologi fere omnes sequuntur.

(2) Concilium Lateranense IV. cap. 1. tom. 7. col. 17 coll. Harduini, et Tridentini Sess. 22. capit. 1., ex Canon. 2. de *Sacrific. miss.* Lutheri somnium est, omnes, praesertim cum id necessitas postulat, Eucharistiae conficiendae habere potestatem. Absurdam hanc doctrinam et ceteros, qui ab ea dissimiles non sunt, errores Gnosticorum, Montanistarum, Collyridianorum, Waldensium, Calvinianorum late refutant Theologi, atque inter ceteros Drouvenius *loc. cit.* quaest. 4. c. 1. Celebrem Tertulliani locum, in quo omnes Christiani Sacerdotes esse et omnes offerre dicuntur, accurate inter ceteros expendunt Albaspinæus *de Administrat. Eucharist.* l. 1. c. 8. Herminerus *de Sacrament.* t. 2. c. 19. Benedictus XIV. *de Sacrific. miss. sect.* 1. cap. 13.

(3) Vetustas sane haec erat Latinae, et Graecae Ecclesiae consuetudo, quam pluribus monumentis confirmant Mo-

rinus de *Sacr. Ordinat. lib. 3. exerc. 8. c. 1.* Card. Bona *Rer. liturgic. lib. 1. c. 18. § 9 p. 21. t. 1. edit. Taurin. 1749.* Martenius de *Antiq. eccles. rit. lib. 1. cap. 3. art. 8. §. 1., et seq. p. 116. tom. 1. edit. Antuerp. seu Venet. 1763.* Eam apud Latino desuisse suspicatur Bona *loc. cit. p. 22.,* cum late diffusis Ordinibus mendicantium, multiplicatae sunt onera missarum, atque ideo necesse fuit singulos Sacerdotes, ut iis satisfacerent, singulis diebus privatim celebrare. Nimirum ea res tota pertinet ad disciplinam, quam, salva fide, ab Ecclesia mutari posse, nemo catholicus inficiabitur. Vide etiam Dominicum Georgium de *Liturg. Roman. par. 1. tit. 12. §. 17. pag. 140. et seq.*

§. XXXXVII. Eucharistiam a Sacerdote consecratam etiam Diaconi distribuere possunt. Quamquam enim jus ordinarium eam distribuendi sit penes ipsum, qui consecrat, non id tamen ita necessario pendet ab ordine sacerdotali, ut non etiam aliis committi possit. Et olim quidem Diaconi Eucharistiam populo tribuebant (1): verum id in Occidente praestabant, si necessitas urgeret, atque abesset Praesbyter, aut juberet (2). Nunc soli Sacerdotes Eucharistiam administrant; et ejus quidem rei jus proprium, atque ordinarium Episcopi, ac Parochi est; ceteri Sacerdotes ex alterutrius delegatione id praestant (3). Sed jampridem eo jure utimur, ut omnes Presbyteri Eucharistiam praebeant, atque ita jus Parochorum ad viaticum, et paschalem communionem redactum est.

(1) S. Justinus *Apol. 1. num. 56. pag. 83. edit. Paris. 1741.* Concilium Nicaenum *Can. 18. tom. 1. cap. 1331. coll. Harduini.*

(2) Auctor *Constit. Apostolic. lib. 8. c. 28.* apud Cotelierium *PP. Apostolic. tom. 1. p. 16. edit. Amstelædamii 1724.* Concilium Carthaginense IV. *Can. 38. col. 1440. tom. 2,* et Arelatense II. *Canon. 15. col. 4. tom. 5. coll. Labbaei. Gelasius I. Ep. 9. ad Episc. Lucaniae c. 8. col. 316. eod. t. 1.* Quia propter gravem aliquam necessitatem minores quoque clericos, atque etiam laicos Eucharistiam tribuisse constat ex martyrologiis Bedae, Adonis, Usuardi, atque ex Eusebio *Histor. l. 6. capit. 4. p. 318. edit. Valesii Cantabr. 1720.* Ac formidolosis illis temporibus, quibus Ethuici imperio potiebantur, laicos consecratum panem in domos suas detulisse, ut eo clam sumpto sese contra Tyrannos instruerent, testatur Tertullianus *l. 2. c. 5. p. 169. ed. Rigaltii Paris. 1675.* Quem morem etiam post pacem Ecclesiae redditam obtinuisse demonstrant S. Hieronymus *Epist. 48. ad Pammachium n. 15. col. 225. t. 1. edit. Vallarsii Veronae 1734.* S. Basilus *Epist. 99. ad Caesariam p. 186. opp. t. 3. edit. Muurin. Paris. 1730.,* S. Zeno *lib. 1. Tract. 5. p. 60. tom. 1. edit. August. Vindelic. 1758.* In suas autem domos Christiani deferebant Eucharistiam aut linea syndone, vel saeculo involutam, aut arca lignea inclusam, quod observant Fratres Ballerinii in *S. Zenon. lib. 1. tract. 14. p. 113 t. 1. cat. edit.* Nunc apud Latinos non modo Dominicum corpus, sed sacra etiam vasa laici contrectare prohibentur. Nemo tamen dubitat, quin nunc etiam laicis haec facultas dari ab Ecclesia possit: et certe S. Pius V. Mariae Stuartiae Scotorum Reginae, cum ab Elisabetha Anglorum Regina catholicis infensissima carceribus detineretur, concessit ut manu propria Eucharistiam sumeret.

(3) Hinc in *Clemen. 1. de Privileg. excommunicantur Regulares, qui sine speciali Patochorum venia Eucharistiam praebent.*

§. XXXXVIII. Suscipere Eucharistiam possunt Christiani omnes, qui justī, ac digni habentur; et olim quidem tum apud Latinos, tum apud Graecos

obtinuit consuetudo, ut etiam infantibus post Baptismum Eucharistia tribueretur (1). Sed quamquam id probabili ex causa factum fuerit, numquam tamen Ecclesia infantibus rationis usu carentibus Eucharistiam necessariam judicavit (2); et Latini jampridem ab ea consuetudine recesserunt (3), quam tamen Graeci adhuc retinent (4). Nunc igitur Latini Eucharistiae participes non faciunt pueros, nisi ea mente, atque aetate sint, ut vim intelligant sacramenti: quod Episcopi, et Parochi judicio aestimandum est (5). Perpetuo amentes Eucharistiam non sumunt; at si ante amentiam piam, et religiosam voluntatem ostenderint, in exitu vitae eo sacramento donantur, nisi periculum vomitus; vel alterius indignitatis, et incommodi timeatur (6).

(1) S. Cyprianus *de Lapsis* p. 94. edit. Amstelædami 1700. Auctor *Const. Apostol.* lib. 8. cap. 13., apud Cotelærium *PP. Apostol.* tom. 2. p. 409. edit. Amstelædami 1724. S. Dionysius, seu potius Auctor *Eccles. Hierarch.* cap. 7. §. 11. p. 417. ed. Antwerp. citat. S. Augustinus *Epist.* 98. ad Bonifac. tom. 2. col. 265. *de Peccator. merit.* lib. 2. cap. 29. col. 15. et 16. tom. 10. et *Serm.* 174. c. 6. col. 834. tom. 5. edit. Maurin. Venet. 1731., S. Innocentius I. *Epist.* 30. ad PP. Concil. Milevitan. num. 5. pag. 898. apud Constantium *Epist. Romanor. Pontificum.*

(2) Concilium Tridentinum *Sess. 21. cap. 4 de Communion et Canon. 4. ejusd. Sess.* Quod decretum impudenter haeretici carpunt, atque abutuntur potissimum Augustini et Innocentii locis, ut suadeant, eos infantibus necessariam Eucharistiam agnovisse. Ex horum haeticorum numero sunt Joannes Dallæus, quique ejus errorem sequenti sunt Josephus Binghamus

Origin. eccles. lib. 15. cap. 4. §. 7. pag. 391., et seq. tom. 6. edit. Halae Magdeburg. 1759: et Petrus Zornius Hist. Eucharist. Infant. Berolini edita an. 1736. Sed horum commenta graviter, et accurate sunt a catholicis, doctisque viris refutata. Consule D. Thomam Lect. 7 in c. 6. S. Joannis, Card. Toletum ad dict. cap. Annot. 28., Natalem Alexandrum Histor. Eccles. saec. 5. capit. 4. artic. 3. §. 10. tom. 5. p. 109. ed. Venet. 1776. Card. Norisium Vindic. Augustin. §. 4.

(3) Vigebat haec consuetudo apud Latinos etiam XI. saeculo, uti patet ex Hugone a S. Victore de Sacram. lib. 1. capit. 20. p. 1376. Bibl. PP. t. 10. edit. Paris. 1754., qui duo scriptores ea aetate floruerunt. Sed jam aevo suo antiquum morem desinere coepisse, ipse Hugo tradit. Neque solum infantes statim post baptismum, sed et omnes innocentes pueri, tum in Oriente, ac praesertim Constantinopoli, tum in Occidente, potissimum vero in Galliis, Eucharistiae participes fiebant, si quando multae Domini corporis particulae superessent, Evagrius lib. 4. histor. Eccles. c. 36. p. 416 ed. Valesii Cantabr. 1720, Nicephorus Callistus Hist. eccl. lib. 17. cap. 25. tom. 1. p. 2. 772. ed. Paris. 1630. Gregorius Taronensis de Glor. Martyr. l. 1. c. 10. coll. 732 edit. Paris. 1699. Concilium Matisconense II. Canon. 6. apud Labbeum t. 6. collect. 675. edit. Venet.

(4) Consule Arcudium de Sacrament. Euchar. l. 3. cap. 11., et Janum Nicium Erythraeum Ep. 24. lib. 71.

(5) Catechismus Romanus par. 2. cap. 4. num. 52. et 63. Consule Benedictum XIV. Const. Et si minime 42. §. 9. pag. 68. tom. 1. ejus Bullar. edit. Romae, seu Venet. 1754. et de Synod. Dioec. lib. 7. c. 11. qui ea de re copiose disputat.

(6) Catechismus Romanus loc. cit. n. 64., S. Thomas in Summa par. 3. quaest. 80. art. 9.

§. XXXXIX. Eucharistia nonnisi a jejunis sumenda est (1), exceptis aegrotis, quibus non jejunis datur viaticum (2), cum in vitae discrimine ver-

santur. Nullum quidem ea de re divinum praeceptum est, quin Christus Apostolis coenatis suum corpus et sanguinem dedit. Verum id ipse fecit peculiaribus, gravibusque de causis, neque Ecclesiae ademit facultatem stabiliendi jejunii, quod stabilivit (3), et quo aliquem solvere unus Romanus Pontifex justis ex causis potest (4).

(1) De hoc jejuniis, quod a dimidia nocte usque ad tempus, quo Eucharistia sumitur, servandum esse constat, late agit Benedictus XIV. *de Synod. dioeces. lib. 6. cap. 8.*

(2) Viaticum ab antiquis Scriptoribus Ecclesiasticis appellatur quicquid Christianos munire posset, cum ex hac vita migrabant: ideo eo nomine non Eucharistia solum, sed etiam Baptismus, Confirmatio, Absolutio, Extrema unctio continebatur, uti ostendit Alaspinaeus *Observ. lib. 1. c. 11. pag. 27. et seq. ed. Neap. 1770.* Ita in Concilio Nicaeno *Can. 13. t. 1. col. 320. collect.* Harduini ultimum, et maxime necessarium viaticum, quod poenitentibus ex vita excedentibus tribuitur, est absolutio, non Eucharistia; et Concilium Vasense I. *Canon. 2. tom. 1. col. 1787. coll. Harduini ed. Paris.* memorat generatim sacramentorum viaticum. Sed nunc ejus vocabuli significatio angustior est, ac designat Eucharistiam, quae morientibus datur.

(3) Late hoc argumentum prosequitur Augustinus *Ep. 54. ad Januar. cap. 6. col. 126 tom. 2. ed. citat.* ubi postquam inquit: liquido apparet, quando primum acceperunt Discipuli corpus, et sanguinem Domini, non eos accepisse jejunos: postremo addit: numquid tamen propterea calumniandum est universae Ecclesiae, quod a jejunis semper accipitur? Ex hoc enim placuit Spiritui S., ut in honorem tanti sacramenti in os Christiani prius Dominicum corpus intraret, quam ceteri cibi. Vide etiam S. Thomam in *Summa par. 3. q. 80. art. 8.*

Nicolaum I. in *Respons. ad consult. Bulgar. cap. 65. tom. 5. Concil. col. 375. collect. Harduini, Card. Bonam Rer. liturg. lib. 1. cap. 21. §. 1; ibique Salam in Not. 2. pag. 108. edit. Taurin. 1749.*

(4) Confer Benedictum XIV. *Constit. 55. tom. 4. ejus Bullarii pag. 248. edit. Romae seu Venet. 1758, ubi Jacobo III. M. Britanniae Regi post tenuem cibum valetudinis causa sumptum facultas Eucharistiae suscipiendae conceditur. Ceterum in Sacramentario S. Gregorii col. 73. opp. tom. 3. edit. Paris. 1705. pueris, qui lac ob necessitatem suxerant, Eucharistia permittitur; quod etiam habet Ordo XV. Ecclesiae Apamiensis apud Martenium de *Antiq. Eccles. rit. lib. 1. cap. 1. art. 18. t. 1. p. 75. edit. indic* Ordo autem Romanus a Mabillonio descriptus tom. 2. *Musaei Italici n. 46. pag. 28, lactentes pueros tantum ante unam horam, quam Eucharistiam capiant, jejunos esse jubet. Quin etiam feria V in coena Domini Eucharistiam in Ecclesiis quibusdam a non jejunis sumi consuevisse, constat ex Canon. 29. Concilii Carthaginens. III. apud Labbaeum tom. 2. col. 1403. ed. Venet. qua de re rogatus S. Augustinus Ep. 54. ad Januar. c. 5. col. 126. tom. 2. cit. edit. respondit servandam esse locorum consuetudinem. Verum mos ille dandae pueris Eucharistiae jampridem antiquatus est, et illa, quam memoravi, consuetudo quarundam Ecclesiarum, dandae non jejunis Eucharistiae feria V in coena Domini, Ecclesiae lege sublata est. Vide Jueninium de *Sacrament. diss. 4. quaest. 8. art. 2. §. 3.***

§. L. Olim fideles, qui sacrificio intererant, quotidie (1), atque ut plurimum, sub utraque specie panis, et vini, Eucharistiam accipiebant (2). Sed nullum umquam ea de re praeceptum fuit; et certe sub una tantum specie integrum sacramentum suscipi catholica fides docet (3). Imminuta etiam christianorum charitate quotidiana illa communio sensim desiit; ac denique necessitas suscipiendae Eucharistiae praecipuis quibusdam anni diebus ab Ec-

clesia imposita est. Primum ter in anno, hoc est in Natale Domini, in Paschate, in Pentecoste (4), postremo semel, hoc est saltem in Paschate, Christiani omnes Poenitentiae, et Eucharistiae sacramenta accipere jussi sunt (5).

(1) Quod ostendit illud Lucae *Act. II. 41.* de primis Christianis: *erant autem perseverantes in doctrina Apostolorum, et communicatione fractionis panis, et orationibus*; quod de Eucharistica Communionem Patres intelligunt. Omnes qui sacris mysteriis intererant, Eucharistiam suscipiebant. Justinus *Apol. 11. num. 65. p. 83. ind. ed. Paris.* Cyprianus *de Orat. p. 192. ed. Paris. 1666.*, Auctor *lib. de Eccles. hierarch. cap. 3. §. 12. pag. 290. tom. 12. ed. ind.* et canone 10. Apostolorum apud Cotelierum *PP. Apostolic. p. 443. tom. 1. cit. ed.* damnantur fideles, qui ingrediuntur Ecclesiam, et scripturas audiunt, non autem perseverant in oratione, nec sanctam communionem percipiunt, quem canonem explicans de frequentii communione late disputat Beveregius in *Cod. canon. Eccles. primit. lib. 2. cap. 3. pag. 80. t. 2.* apud eundem Cotelierum *loc. cit.* Quin sua etiam aetate quotidianam communionem Romae viguisse testatur Hieronymus *Epist. 44. ad Pammachium num. 15. col. 25. opp. tom. 1. edit. Vallarsii Veronae 1734.* quod, ipse inquit, non reprehendo, nec probo. Hieronymo antiquior Didymus Alexandrinus *de Trinit. lib. 3. cap. 21. pag. 398. edit. Bononiae 1769.*, morem eundem memorat Ecclesiae Alexandrinae, vocatque Eucharistiam desideratissimum Pascha, quoniam fideles hoc sacramentum summo desiderio appetebant. Augustinus autem *Ep. 521. col. 125. tom. 2. edit. Venet. cit.* variam ea de re ecclesiarum consuetudinem demonstrat.

(2) Antiquitus Christianos, ut plurimum, sub utraque specie Eucharistiam accepisse patet ex Apostolo I. *ad Corinth. XI. 26. seq.*, Justino Martyre *loc. cit.* Cypriano *Ep. 57. pag. 253. edit. Amstelædami*, Cyrillo *Catech. 523. n. 21, et 22. pag. 332. ed. Paris. 1710*, Chrysostomo *Hom. 82. in Matth. pag. 788. tom. 7. ed. Montfauconii Paris. Leone M. Sermone 41. ca.*

pit. 5. pag. 111. opp. tom. 1. ed. Romae 1753., Zenone lib. 2. Tract. 38. pag. 251. et tract. 53. pag. 280. tom. 1. edit. August. Vindelic. 1758., aliisque compluribus. Ut plurimum, inquam, nam saepe sub una tantum specie Eucharistiam datam constat, unde intelligitur, id semper Ecclesiam ratum habuisse, quod nullum sit praeceptum, quo laici, et clerici sacrificium non conficientes Eucharistiam sua utraque specie accipere compellantur. Révera ad aegrotos in lecto decumbentes sub una tantum specie Eucharistia plerumque deferebatur; atque ita eam Serapionem, et Ambrosium accepisse tradunt Dionysius Alexandrinus apud Eusebium *Histor. eccl.* l. 6. cap. 44. pag. 318. edit. Valesii Cantabrig. 1720., et Paulinus in *Vit. Ambros.* num. 47. opp. *Ambros.* tom. 4. col. XIII. edit. Venet. indic. Similiter pueris infantibus, ut plurimum, sub una specie dabatur sacramentum, et fideles, qui, ethnicis dominantibus, Eucharistiam domi servabant, solum accipiebant panem, quem unum memorant Patres, ac nominatim Tertullianus l. 2. c. 5. ad *Uxor.* non autem vinum, quod facile corrumpitur. Quin etiam in publicis conventibus diu fideles sub una panis specie Eucharistiam suscepisse die Parasceves ex Ordine Romano manifestum est. Fusc, ac diligenter ea de re contra Protestantes disserit Bossuetus duobus libellis, quorum alteri titulus est *de Communione sub utraque specie*, alteri *Defensa traditio de Communione sub una specie*. Vide etiam Selvagium *Antiquit. Christ.* lib. 3. c. 9. Drouvenium *de Re sacrament.* lib. 6. quaest. 8. cap. 2. Jueninium *de Sacram.* diss. 4. quaest. 9. art. 2. In primis autem consulendus est doctissimus Cardinalis Garampius, qui in egregio opere, cui titulus *Memorie della B. Chiara di Rimini* diss. 5. p. 177. et seq. cum de quotidiana communionis, tum de Eucharistiae sub utraque specie accipiendae usu copiose, et praeclare disputat. Ac gravissimus quidem habuit Ecclesia causas propter quas communicandi consuetudinem sub altera tantum specie non solum approbaret, sed etiam decreti auctoritate firmaret, easque numerat Cat. Rom. p. 2. c. 4. §. 66. Aetate S. Thomae adhuc in quibusdam Occidentis Eccl. consuetudo accipiendi sub utraque specie Eucharistiam perseverabat; uti patet ex ejus *Summa* par. 3. q. 80. art. 12. Graeci tamen hanc

consuetudinem nunc etiam retinent, atque eam permit-
tendam censuerunt Conc. Florentinum, Leo X. in *Const.*
Accepimus, et Clemens VII. in *Const. Provisionis nostrae*
apud *Guerram Pontificiar. Const. epit. t. 2. p. 506.* Con-
fer Leonem Allatium. *Adnot. 1. de Eccles. Occid. atque*
Orient. consens. ; et Arcudium Concord Occid. et O-
rient. l. 3. c. 4. Italo-Graecis haec consuetudo integra
relinquitur a Benedicto XIV. in *Const. Et si pastoralis*
57 §. 6. p. 106. n. 15. t. 1., et *Constit. Allatae sunt*
47. §. 51. tom. 4. ejus *Bullar. pag. 183. ed. Rom. seu*
Venet. 1758.

(3) Conc. Trid. Sess. 12. c. 1. et 2. de *Commun.*
Quod etiam antea docuerat Synodus Constantien. Sess.
13. apud Labb. t. 16. *Conc. col. 318.*, quae jam ante
istud tempus diutissime illam consuetudinem communi-
candi sub una specie, ab Ecclesia observatam fuisse
testatur.

(4) Conc. Agath. habitum VI. saeculo *Can. 18. col.*
1000. tom. 2. coll. Hard. ed. Paris. Saeculares, inquit,
qui *Natale Domini, Pascha et Pentecoste non commu-*
nica-verint, catholici non credantur, nec inter catholi-
cos habeantur. Eadem habet Synodus Turonensis III.
habita IX. saeculo *Can. 50. col. 1030. t. 4. coll. Har-*
duini. Falso Gratianus Agathensem canonem Concilio
Eliberitano, ac Turonensem Fabiano Pontifici, adscribit
Can. 19. et 21. dist. 2. de Consecr. : nam haec discipli-
na multo post Eliberitanum Concilium, ac Fabianum
Pontificem inducta est.

(5) Conc. Trid. Sess. 13. *Can. 9. de Eucharist.*,
quo decreto confirmatus est canon Concilii Lateranensis
in cap. 12. de *Poenit. et remiss.* Hic autem canon omnes
utriusque sexus fideles saltem semel in anno proprio
Sacerdoti sua peccata confiteri, et Eucharistiam suscipe-
re jubet. Quaesitum est, quis proprius Sacerdos haberi
debeat, et omnes fere consentiunt, proprium Sacerdotem
cui sua quisque crimina semel in anno aperire debet,
et a quo sacramentaliter absolvendus est, esse Parochum;
salva tamen Summi Pontificis in toto orbe Christiano, et
Episcoporum in suis dioecesibus auctoritate, qui et eam
exercere ipsi possunt, et aliis sacerdotibus exercendam
committere. Quare non tantum qui proprio parochi, sed

etiam qui aliis Sacerdotibus a Summo Pontifice, aut Episcopo delegatis sua confitentur crimina, Ecclesiae praecepto satisfaciunt. Confer Nat. Alex. *Diss. de Sensu Canonis Utriusque sexus in Thes. Theolog. t. 2. opusc. 9. p. 548. seq.* Quod autem dicitur ab omnibus Christianis Eucharistiae sacramentum in Paschate esse accipiendum, id de hebdomada sancta, et octava Paschatis accipiendum est, Eugenius IV. in *Bull. Fide digna 24. p. 33. t. 3. par. 3. Bull. ed. Rom. ult.*

§. LI. Certis autem verbis ab ipsis Ecclesiae primordiis Eucharistia dari consuevit, uti nunc etiam datur (1). Primum Episcopi, tum Presbyteri, deinceps Diaconi, ceterique inferiores Clerici, Monachi, Diaconissae, Virgines, ac tandem laici primum, viri, postea mulieres (2); et clerici quidem intra, laici extra sanctuarium (3), atque omnes non flexis genibus, uti nunc, sed stantes, prono tamen capite, ac demissis oculis (4), Eucharistiam accipiebant. Cuncti lotis manibus, et facie accedebant (5); manuque excipiebant Christi corpus (6), sanguinem aut calamo sugabant, aut ex calice ori admoto ebebant, quin etiam interdum corpus sanguine intinctum porrigebatur (7).

(1) Auctor *Const. Apostol. l. 8. c. 13.* apud Cotelierum *PP. Apost. p. 409. t. 1. ed. Amst.*, et S. Ambrosius *de Sacr. l. 4. c. 5. n. 25.* describunt formulam, quae ea tempestate adhibebatur, eaque erat: *Corpus Christi: sanguis Christi.* Aetate S. Gregorii, uti testatur Ioannes Diac. in *ejus Vit. l. 2. c. 41 opp. S. Greg. t. 4. c. 58. ed. Paris. 1705.* formula his erat concepta verbis: *C. D. N. J. C. conservet Animam tuam.* Denique aevo Alcuini, ut ipse tradit *de Sabb. S. Paschae col. 259. Bibl. PP. t. 10. ed. Paris. 1724*, facta est formula ad hunc modum: *C. D. N. J. C. custodiat te in vitam aeternam.* At non eadem omnino ubique fuit. Recitata a ministro formula, Eucharistiam accipientes, respondebant, amen. Auctor *Const. Apostol. loc. citat.*

Cornelius Pont. apud Euseb. *l. 6. c. 43. p. 315. ind. ed.*, Augustin *Contr. Faust. l. 12. c. 10. c. 231. t. 8. ed. Ven.*, Leo M. *Serm. 93. c. 3*, Cyrillus Hierosol. *Can. 23, n. 21*. Sed jam pridem apud nos receptum est, ut fideles Eucharistiam taciti accipiant.

(2) Auctor *Constit. Apostolic. loc. cit.*

(3) Conc. Tolet. IV. *Can. 18. t. 3 col. 584. coll. Hard.* sancitum est: ut *Sacerdotes et Levita ante altare communicent, et in choro clerus, extra chororum populus*. In Africa etiam laici ad caucellos, qui chorum a populo separabant, Eucharistiam accipiebant, quod colligitur ex August. *Serm. 392. c. 5*. Neophitis tamen, uti constat ex eodem *Ser. 224. c. 6. col. 969. t. 5*. beneficii loco permittebatur, ut ad altare accederent. In Mediolanensi Ecclesia laicos extra sanctuarium communicasse, demonstrat factum Ambrosii, qui Theodosium Imperatorem sibi intra illud locum arrogantem sanctuario prohibuit. Neque dissimilis fuit Graec. consuetudo, uti colligitur ex Conc. Laodic. *Can. 19. apud Labb. t. 1. col. 1534.*, verum Imperatori datus est intra sanctuarium locus. Conc. Trullan. *Can. 69. c. 1379. t. 7. apud eundem Lab.* Galli tamen etiam laicis ad altare communionem permiserunt, uti ostendunt Conc. Taron. II. *Can. 4. col. 536. t. 6. apud eundem, Gregorius Taron. Hist. Franc. l. 10. c. 8.*, Caesarius Arelat. *Serm. 289. in App. S. August. num. 3. opp. August. tom. 5. par. 2 col. 482. edit. Venet. ind.*

(4) Hanc quidem fuisse, et nunc etiam esse Graecorum consuetudinem, manifestum est ex Cyrillo *Catech. 123. n. 22. p. 332. ind. ed. Paris.* atque ex libris ritualibus. Idem de Latinis non audet affirmare Card. Bona *Rer. liturg. l. 2. 17. §. 8*. tantum monet, in missa solemni Summi Pont. Diaconum stantem communicare, omnino ex veteri ritu. Sed verisimile est, eandem Latinor. fuisse disciplinam. Confer Habert in *Not. ad Pont. Graecor. p. 270.*, Valesium in *Not. ad Euseb. hist. lib. 7. c. 9*, Thiersium in *Gallic. diss. de Altaribus, Salam ad Bonam l. c. not. 3.*

(5) S. Jo. Chrysost. *Hom. 3. in Epist. ad Ephes. p. 22. t. 11. ind. ed.*, S. August. *Serm. 17. c. 5. Ead. Dev. Inst. Can. Tom. II.*

dem ratione mundissimas quisque vestes sumebat, cum ad Eucharistiam suscipiendam accederet; quā in re singulare est illud, quod legitur in vita S. Jonae Monachi apud Bollandum 11. Feb. t. 2. p. 250., quod scilicet per annos octoginta quinque mundam servavit vestem, qua tantum Eucharistiam suscepturus induebatur.

(6) Dionysius Alexandrinus in *Ep. ad Xistum Pont.* apud Eusebium *Hist. eccles.* l. 7. c. 9. Cyprianus de *Lapsis* p. 176. ed. Paris. 1666., Basilius *Epist.* 93. ad *Caesarium Patric.* Chrysost. *Hom.* in diem *vatal. Domin.* n. 7. Damascenus de *Fid. orthodox.* l. 4. c. 13., Augustinus contra *liter. Petilian.* lib. 2. c. 25. col. 223. tom. 9. edit. Ven. ind. Ambrosius apud Theodoret. *Histor. eccl.* lib. 5. cap. 18. p. 215. ed. Valesii *Cantabrig.* 1720., Cyrillus *Catech.* 23. n. 21. concava manu et sinistra dexteræ subjecta Christi corpus suscipi jubet. Hoc autem viros inter, atque mulieres discrimen intercedebat, quod viri nudis manibus, mulieres linteo Eucharistiam excipiebant, uti patet ex Caesario Arelatensi *Serm.* 229. in *Append. August.* n. 5. opp. *Augustin.* tom. 5. par. 2. col. 376. cit. ed. et ex Concilio Antisiodorensi *Can.* 36. apud Labbaeum tom. 6. col. 645. ed. Venet. Atque huc etiam canon. 42. ejusdem Concilii Antisiodorensis referendum putant Cardinalis Bona *Rer. liturg. lib.* 2. 17. §. p. 369; t. 3. ed. cit., Martenius de *Antiq. Eccles. rit.* l. 1. c. 4. art. 10. p. 156. t. 1. edit. *Antuerp. seu Venet. cit.* alique complures. Nam eo canone sancitum est, ut unaquæque mulier, quando communicat, dominicalem suam accipiat. Illi autem dominicalem interpretantur linteum mundum, quo subjecto mulieres Eucharistiam accipiebant. Sed cum ea de re Antisiodorenses Patres satis egissent *can.* 36., neque verisimile sit, eos actum agere voluisse canon. 42., recte Balantius in *Gratian. can.* 19. *caus.* 23. *quaest.* 3. ostendit, dominicalem, cujus in eo concilio mentio est, fuisse tegmen, quo mulieres ad Eucharistiam accedentes caput operiebant. Porro non uno, et eodem tempore ubique desitit mos Eucharistiae manu excipiendae. In Ecclesia Romana jam inde a saeculo VI. in os injectam Eucharistiam colligitur ex eo quod narrat S. Gregorius M. *Dial.* l. 3. c. 3. col. 284. opp. t. 2. ed. Paris. 1705. Ibi enim re-

fertur communio cuidam muto, et clando distributa a S. Agapito qui anno 535. Summus Pontifex creatus est, ac dicitur corpus *Dominicum in os misisse*. Similiter Rothomagensi concilio sancitum est, ut *nulli laico, aut foeminae, Eucharistiam in manibus ponant* (Sacerdotes) *sed tantum in os ejus*. Integrum hujus concilii canonem describit Mabillonius *Praef. 12. 1. p. saec. 3. Benedictin. obser. 11. n. 76. p. XXXVI. t. 3 ed. Venet. 1734.*, quem editum putat circa annum 880. quo ex tempore, inquit, abrogari coepit mos illae Eucharistiae manu excipiendae, reservata tamen Diacono, et Subdiacono Dominici corporis tractandi facultate. Verum in Romana Ecclesia ante hanc aetatem Christi corpus in os mitti consuevisse, demonstrat Gregorii locus, quem paulo ante descripsi; nisi quis forte hoc singulare exemplum ducat, unde generalis consuetudo educi non potest. Consulte Franciscum de Besleudis de *Oblation. ad altar. commun. §. 5. p. 137.*

(7) Postremum hunc modum rejecit Synodus Bracarenensis IV. *can. 2. apud Labbaeum t. 7. col. 579. edit. Venet.* probavit autem Conc. Taron. apud Barchardum *Decret. l. 5. c. 9.* Et vero mos hic saeculo XII. omnibus fere ecclesiis communis erat, uti patet ex *epist. 2. Ernulfi Roffensis Episcopi ad Lambertum apud Dacherium Spicileg. t. 3. p. 471. ed. Paris. 1723.* Confer Martenium de *antiqu. eccles. rit. l. 1. cap. 4. art. 10. §. 13. p. 157. t. 1. ed. cit.*

§. LII. Eucharistia omnibus necessaria, qui eam suscipere possunt; atque in primis eos, qui ex hac vita migrant, tam salutari viatico instructos, et munitos esse oportet (1). Ergo hac praesertim de causa, ne quis subita vi morbi correptus sine hoc sacramento decedat, ejus in Ecclesia servandae usus ab antiquissimo tempore inductus est (2). Labentibus annis Ecclesia nova voluit accedere nostrae venerationis argumenta adversus admirabile sacramentum, quod cum vere contineat gratiarum fontem uberissimum Christum Jesum, eo modo, quo Deum, co-

lere, ac revereri debemus. Nam institutus est peculiaris dies festus Corporis Christi, et supplicationis genus, quod *processionem* dicimus, et mos inductus, ut Eucharistia publice fidelibus adoranda proponatur (3).

(1) *Duplex est modus*, inquit D. Thomas in *Summa par. 3. quaest. 80. art. 11. percipiendi hoc sacramentum, spiritualis, et sacramentalis. Manifestum est autem, quod omnes tenentur, saltem spiritualiter, manducare; quia hoc est Christo incorporari. Spiritualis autem manducatio includit votum, seu desiderium percipiendi hoc sacramentum, et ideo sine voto percipiendi hoc sacramentum non potest homini esse salus. Confer etiam Drouvenium de Re sacram. lib. 4. quaest. 8. capit. 1.*

(2) Samuel Basnagius Calvinianus homo *Annal. t. 2. ad an. 209. p. 255. num. 5.*, consuetudinem Eucharistiae in Ecclesia servandae recentiore esse arbitratur. Sed Basnagium solide, graviterque refutat Robertus Sala *ad Bonam Rer. liturgic. l. 2. c. 17. §. 6. not. 2. p. 379. et seq. tom. 3. ed. Taurin. 1753*; atque hujus quidem religiosae consuetudinis antiquitatem ipse etiam agnovit haereticus homo Josephus Binghamus *Origin. eccles. lib. 15. cap. 4. §. 11. p. 409. t. 6. ed. Halae Magd. 1754*. Mitto antiqua testimonia, quae pene innumera sunt, quaeque viri docti collegerunt, tantum indicabo praecellentem locum Cyrilli Alexandrini *Ep. ad Calosyrium Advers. Anthropomorphitas pag. 365. ed. Lutet. Paris. 1636*. Porro, inquit, alios etiam esse audio, qui mysticam benedictionem (hoc est consecrationem) nihil ad sanctificationem juvare dicant, si quid ex ea fiat reliqui in alium diem. Insanunt vero qui haec asserunt. Neque enim alteratur Christus, neque Sanctum ejus corpus immutatur (dum species manet), sed benedictionis eis, ac facultas, et vivificans gratia perpetuo in ipsa existit. Erat autem receptaculum spiritualis alimoniae, hoc est Eucharistiae, uti loquitur Ambrosius *Ep. 4. ad Felic. opp. t. 3. col. 792. ed. cit.*, vas ad instar columbae, vel

turris ut plurimum, elaboratum, quod aut in praecipuo, aut peculiari altari servabatur. Gregorius Turonensis de *Glor. martyr.* c. 86. col. 818. ed. Paris. 1699. Concilium Constantinopolitanum sub Menina *Act.* 5. col. 1319. tom. 2. collect. Harduini ed. Paris. Interdum etiam Eucharistia penes majus altare ad summum Ecclesiae parietem, ara non supposita, in vasculo patente retinebatur. Paulinus *Ep.* 22. ad Sever. col. 197. ed. Muratorii Veronae in Baptisteriis supra fontes in pixide, quae columbam repraesentabat, servatam docet Eucharistiam, quam recenter Baptizati accipiebant. Consule Mabillonium *Comment. ad ordin. Roman.* c. 20. p. 139. t. 2. ed. Paris. 1689., Martenium de *Antiq. Eccles. ritib. lib.* 1. c. 5. art. 3. p. 251. ed. laud. Chardonium *Histor. sacram.* l. 3. cap. 13. Supra altare autem Eucharistiam non imaginario ordine, sed sub crucis titulo, ut inquit Synodus Turonensis II. canon. 3, apud Labbaeum tom. 5. col. 536. ed. Venet. nimirum non quovis loco, et cujusvis arbitrio, sed in medio altaris, et sub crucis titulo posita esse debeat. Sic enim interpretor hunc canonem, qui eruditorum torquet ingenia, neque assentior doctissimis viris Sirmondo, et Mabillonio, qui alias hujus canonis interpretationes ediderunt. Illud hoc loco animadvertendum est, Eucharistiam in Ecclesiis non parochialibus sine venia Sedis Apostolicae retineri non posse, Benedictus XIV *Const. Quamvis justo* 7. §. 24. p. 38. t. 3. ed. Romae seu Venet. 1754. Confer Cardinalem Petram in *Constit. Apost. ad Const.* 1. *Urbani IV.* sect. num. 29. tom. 3. Et quoniam facta mentio est antiquissimae consuetudinis Eucharistiae in Ecclesia servandae, pauca dicenda videntur de celebri, quae non multis abhinc annis exarsit, controversia, num scilicet, recte administretur Eucharistia ex praeconsecratis, an omnino ex sacrificio cum praesentibus communicandum sit. Nam anno 1737, cum Cremae Episcopatum teneret Cardinalis Calinus, Josephus Guerrerius cathedralis Ecclesiae Canonicus contendere coepit, Fideles in ipsa Missa post Sacerdotem Eucharistiam accipere oportet, improbandam autem esse consuetudinem accipiendi extra sacrificium communionem ex praeconsecratis. Ut omnis haec controversia dirimeretur, a Benedicto XIV. die 13. Novembris an. 1742. edita est

constitutio Certiores 64. tom. 1. ejus Bullarii p. 129. ed. Romae seu Venet. 1754. In ea declarat Pontifex, quod pridem expresserat Synodus Tridentina, optandum quidem esse, ut in singulis Missis Fideles adstantes non solum spirituali affectu, sed sacramentali etiam Eucharistiae perceptione communicarent, quo ad eos sanctissimi hujus sacrificii fructus uberius perveniret; statuit tamen, nullam esse necessitatem, qua Sacerdotes Missam celebrantes Sacram Eucharistiam omnibus petentibus infra ipsam actionem ministrare cogantur, neque improbari posse consuetudinem communicandi ex praeconsecratis, cum id pro tempore, loco, et personis opportunum judicetur. Nihilotamen minus Michael Maria Nannaronius Dominicanus anno 1770. Neapoli catechismum edidit, quo Guerrierii sententiam defendere conatus est; sed eum refutavit Dominicanus alter Josephus Maria Elephantes, edita Neapoli anno 1774. de hoc argumenti genere peculiari dissertatione. Nannaronius tandem rediit in bonam mentem; sed adhuc adversus consuetudinem distribuendi fidelibus Eucharistiam praeconsecratam anno 1779. Patavii dissertationem edidit de incruenti novae legis sacrificii communione Carolus Maria Traversarius Ordin. Servor. B. M. V. Hanc Traversarii dissertationem, et Nannaronii catechismum damnavit sacra indicis Congregatio. Totum hoc argumentum accurate pertractavit Benedictus Vulpus libro Venetiis edito an. 1790, cui titulus: *Storia della celebre controversia di Crema sopra il pubblico divin diritto alla Comunione Eucaristica nella Messa, con una dissertazione sullo stesso argomento.* Consule Franciscum de Berlendis de Oblation. commun. §. 5. num. 8. p. 153. edit. Venet., R. Salom in notis ad Bonam Rer. Liturg. lib. 2. cap. 20. §. 2. not. 2. p. 130., et seq. tom. 3. ind. ed., Joann. Laurent. Bertium Theolog. diseipl. lib. 33. in App. c. 21., Jo. Bapt. Gatticum de Orator. domest.

(3) Diem festum corporis Christi instituit Urbanus IV in Bulla Transitus 19. tom: 3. par. 1. Bullarii p. 414. ed. Romae ult. Morem autem solemniter Taroneus de Glor. martyr. lib. 1. cap. 86. cit. col. 818, et Concilium Bracaraense IV. can. 6. apud Labbeum tom. 7. col. 582. ed. Venet. Cuncta haec accurate persequun-

tar Jueninius de *Sacram. diss.* 4. ar. 4. Thiersius de *Exposit. Venerabilis*, Chardonius *Histor. Sacram.* lib. 3. cap. 14. 15. 16. Confer etiam Martenium de *Antiq. Eccl. rit.* lib. 4. cap. 29. tom. 3. p. 196. ed. Antwerp. seu Venet. 1724. Benedictum XIV. *Instit. Eccles.* 5., Muratorium *Liturgia Romana diss. de Reb. liturg.* c. 24.

§. LIII. Non sacramenti solum rationem habet Eucharistia, sed etiam sacrificii; imo unum novae Legis sacrificium est. Nam quoties illud Sacerdos conficit, toties Christus Dominus sine cruore immolatur, reditque memoria immensae charitatis ejus, qui pro nostrum salute Deo Patri semetipsum in ara crucis obtulit. Differt sacramentum a sacrificio, quod illud consecratione perficitur, omnis vero sacrificii vis in eo est, ut offeratur (1). Deinde sacramentum, praeter ceteras utilitates, meriti causam affert iis, qui illud recte suscipiunt: sacrificium vim habet non merendi solum, sed etiam satisfaciendi (2). Nam quemadmodum Christus Dominus in passione sua pro nobis meruit, ac satisfecit; ita qui hoc sacrificium offerunt, quo nobiscum communicant, Dominicae passionis fructus merentur, ac satisfaciunt (3).

(1) Catechismus Romanus par. 2. c. 4. §. 71.

(2) Concilium Tridentinum Sess. 22. cap. 2., et canon. 3. de *Sacris. Missae*. Hinc catholica veritas de sacrificii, quod vere propitiatorium est, oblatione non solum pro vivis, sed et pro defunctis in Christo nondum ad plenum purgatis. Quarto saeculo Aerius preces pro defunctis fundendas esse negavit, quam nefariam haeresim ut everteret S. Ephrem Syrus S. Basilii discipulus multas de defunctis odas, cantus, et carmina, officia scilicet defunctorum omnia, ut inquit Abraham Ecchelensis ad *Catal. Ebedjesu* p. 45., composuit, de quibus vide Assemanum in *Bibl. orient.* tom. 1. p. 132., et seq. Errorem illum Aerii renovarunt protestantes; verum ea de re Ecclesiae doctrina ita certa est, atque omnium Patrum consentiente auctoritate firmata, ut plane desipiant

qui eam in discrimen revocare conantur. Nam ipsam testatissimam faciunt S. Cyprianus *Ep.* 66. p. 109. edit. Paris. 1666. Tertullianus de *Coron.* cap. 3. de *Exhortat. castit.* cap. 11. de *Monogam.* c. 10. p. 102. 523. 531. ed. Venet. 1744. , S. Zeno lib. 1. *Tract.* 16. p. 133. t. 1. ed. August. Vindel. 1758. , S. Cyrillus Hierosolymitanus *Catech. mystag.* 5. num. 9. et 10. ed. Paris. 1770. , S. Epiphanius de *Exposit. fid.* num. 23. tom. 1. opp. p. 1106. ed. Petav. Paris. 1622. , S. Ambrosius *Epist.* 39. ad *Faustin.* num. 4. opp. tom. 3. col. 1014. , et in *Orat. de Obiit. Theodos.* col. 293 t. 4. ed. Venet. cit. S. Augustinus *Confess. lib.* 9. cap. 12. col. 168. tom. 1. de *Civit. Dei lib.* 21. cap. 24. col. 641. tom. 7. de *Cur. geren. pro mort.* cap. 1. col. 515. tom. 6. c. ed. Venet. , Cassianus *Collat.* 19. cap. 1. p. 747. ed. Atrebat. 1628. , aliique complures, quos longum est referre. Auctor *Constit. Apost.* lib. 8. cap. 41. et 42. *PP. Apostol.* tom. 1. p. 423. , et 424. ed. Amstelæd. ind. orationem describit pro defunctis cum sacrificio fieri solitam. Confer Card. Bonam *Rer. liturg. lib.* 1. cap. 15. §. 4. p. 307. , et seq. ibique Salam in *Not.* 1. edit. Taurin. 1747. , *Drouvenium de Re Sacram.* lib. 5. quæst. 7. cap. 1. , *Jueninium de Sacrament.* diss. 5. quæst. 5. cap. 1. et seq. , *Benedictus XIV. de Sacrific. Miss. sect.* 1. cap. 17. §. 1. Atque ex hac quidem catholice Ecclesie doctrina de divino sacrificio, quod prodest non tantum vivis, sed etiam mortuis, qui nondum plane sint expiati, piæ Missarum fundationes repetendæ sunt. Quartum fundationum præclarum monumentum occurrit in testamento S. Remigii Episcopi Remensis apud Flodoardum *Histor. Eccles. Remen.* lib. 1. cap. 18. p. 92. ed. Duaci 1617. , qui ita Agricolam Presbyterum nepotem suum alloquitur: vineam quam Behrimodus fecit, tibi eatenus derelinquo, ut diebus festis, et omnibus diebus dominicis sacris altaribus mea inde offeratur oblatio. Ad hunc locum advertens Christianus Lupus Schol. in *Canonem* 69. *Concilii Trulani* opp. tom. 3. pagin. 126. edit. Venet. 1724. , adeo antiquum est, inquit, pro Anima sua missas fundere. Verum et alia sunt ejusdem rei antiqua monumenta; quin etiam octavo præsertim sæculo mutuae societates

pro vivis, ac praesertim mortuis commendandis institutae sunt, et perpetua anniversaria frequentiora fieri coeperunt. De his societatibus insignis est locus apud Ven. Bedam, qui in mercedem vitae S. Cuthberti a se conscriptae, haec rogat in I. Prologo ad Eadfridum Episcopum, et Monachum Lindisfarnensem tom. 3. praefat. pag. 152. edit. Colon. Agripp. 1612. *M. defuncto pro redemptione Animae meae, quasi familiaris, ac vernaculi vestri, orare, et Missas facere, et nomen meum inter vestra scribere dignemini. Nam et tu, Sanctissime Antistes, hoc te mihi promisisse jam retineis: in cujus etiam testimonium futurae conscriptionis religioso Fratri nostri Godfrido mansionario praecepisti, ut in albo vestrae sacrae congregationis meum nunc quoque nomen appareret.* Plures ea de re extant epistolae S. Bonifacii Episcopi Moguntini, quas inter digna praesertim est, quae legatur Ep. 106. ad Optatum Abbatem p. 150. ed. Mogunt. 1605. opp. ed. Maurin. Accesserunt etiam anniversaria perpetua, non quod ea tunc primum instituta fuerint, sed quod ea frequentissima facta sunt, et horum quidem multa collegit exempla Mabillonius *Acta SS. Ord. S. Benedicti praefat. in saec. III. par. 1. observ. 27. num. 101. pag. XLIX. cit. Venet. 1743.* Frequentissima inquam octavo praesertim saeculo perpetua anniversaria facta sunt; verum anniversariorum origo multo antiquior est, atque a primis Ecclesiae temporibus repetenda, ut ostendunt Patres, quos paulo supra commemoravi. Doctis tamen viris haud plane compertum, exploratumque est, perpetuo ne fierent, an semel anniversaria officia, quorum antiqui illi Patres meminerunt. Ego assentior iis, qui haec anniversaria magna ex parte perpetua fuisse arbitrantur, et huiusmodi esse puto anniversariam, cujus meminit Tertullianus *de Monogam. cap. 10. pag. 531. ed. Venet. 1744.*, cum inquit: *Enimvero et pro Anima ejus orat, et refrigerium interim adpostulat ei, et in prima resurrectione consortium, et offert annuis diebus dormitionis ejus.* Si semel tantum annuum officium persolutum fuisset, unum tantum annum diem, non plures Tertullianus indicasset.

(3) Catechismus Romanus loc. cit.

§. LIV. Sacrificium Eucharistiae *Missa* nuncupatur, quod vocabulum non Graecum, aut Hebraicum, sed Latinum est; verum, num a mittendis, seu transmittendis ad Deum populi precibus, atque oblationibus, an potius a mittendo, seu dimittendo populo, ea formula, quam Diaconus recitabat, *ite missa est*, non satis constat (1). Certae in *Missa* preces, ac caeremoniae adhibentur; atque ille earum ordo vocatur *Liturgia*, quod Graecum est verbum, ac Latine redditur publicum ministerium. Semper hi ritus, atque has preces, in quibus verba Christi Eucharistiam instituentis principem locum obtinent, adhiberi consueverunt; sed non eadem fuit ea de re Ecclesiarum omnium disciplina (2). Hinc plures pro varia temporum, ac locorum ratione exortae sunt *Liturgiae* (3): et in Oriente quidem celebriores fuerunt *Liturgiae* S. Basilii, ac S. Joannis Chrysostomi, in Occidente Romana, Ambrosiana, Gallicana, Hispanica, quae etiam Mozarabica appellatur (4).

(1) Confer Card. Bonam, qui de missae nomine, ejusque origine late disputat *Rer. liturg. lib. 1. cap. 1. pag. 1. et seq. tom. 1. ed. Taurin. 1747.*, praeterea Benedictum XIV. de *Sacros. Missae sacrific. l. 2. cap. 1. Natalem Alexandrum Histor. Eccles. saec. 13. et 14. diss. 13. num. 40. tom. 8. pag. 499. ed. Venet. 1776.*, Gerbertum *Princ. Theolog. Liturg. sect. 1. cap. 2. p. 37. seq.*

(2) Apostolos recitata oratione Dominica, et formula consecrationis rem divinam confecisse, scribunt Gregorius M. *lib. 9. Epist. 11. ad Joan. Syracus. col. 490. tom. 2. edit. Maurin. Paris. 1705.* Honorius Augustodunensis in *Gemma Anim. cap. 86. in Biblioth. PP. tom. 10. col. 1205. edit. Paris.* Walfridius Strabo de *Reb. eccles. cap. 22. col. 680. cit. Biblioth.*, Bertho Augiensis Abbas de *Quibusd. ad miss. spectan. cap.*

1. cit. *Biblioth. tom. 10. col. 697.* Contra Proculus Constantinopolitanus de *Tradit. divin. liturg. pag. 159. ed. Lugd. Batavor. 1617. fusissime, longoque verborum ambitu missam decantasse tradit, atque eos preces, et hymnos adhibuisse testatur Chrysostomus Hom. 27. in 1. ad Cor. num. 5. opp. tom. 10. col. 248. edit. cit.*

Has, quae inter se pugnare videntur, sententias conciliat Card. Bona loc. cit. cap. 5. §. 3. p. 75., inquit, brevem illam formulam Apostolos adhibuisse, cum gravis metus, aut justa alia urgeret causa, longiorem autem, cum per tempus, et occupationes licebat.

(3) Nullus quidem ambigendi locus esse potest, quin vivis ipsis Apostolis aliquis fuerit Liturgiae usus pluribus constans precibus, quae in conficiendo sacrificio fundebantur. Scriptum est in *Act. Apostol. cap. 2. v. 42.* fuisse Apostolos perseverantes in *communicatione fractionis panis, et orationibus*; et Paulus I. ad *Timot. c. II. vers. 1.* vult fieri *obsecrationes, orationes, interpellationes, et gratiarum actiones pro omnibus hominibus, pro Regibus, et omnibus, qui in sublimitate sunt.* Haec autem omnia in sacrificio peragebantur, uti testatur Justinus Martyr. *Apol. 1. num. 65. p. 82. edit. Paris. 1742.*, et huc etiam spectat Tertullianus ad *Scapulam num. 2. p. 69. ed. Venet. 1744.* Morem hunc ab Ecclesia observatum circa annum 347. describebat S. Cirillus Hierosolymitanus *Cateches. 23. n. 8. p. 327. ed. Ven. 1763.*, inquit, *super illam propitiationis hostiam (en sacrificium propitiatorium, quod negare ausi sunt impii homines, qui Missam abrogarunt) obsecramus Deum pro communi Ecclesiarum pace, pro recta mundi compositione, pro Imperatoribus, pro militibus, et sociis, pro iis, qui infirmitatibus laborant, pro his, qui afflictionibus premuntur, et universim pro omnibus, qui ope indigent, precamur, nos omnes, et hanc victimam offerimus.* Propterea S. Augustinus *Epist. 149. ad Paulin. num. 16. opp. tom. 2. p. 663. ed. Maurin. Venet. 1759.* considerans, quid a vetustis temporibus in Ecclesia ageretur, *obsecrationes, aut preces, quas Paulus memorat, interpretatur quas facimus in celebratione Sacramentorum, antequam illud, quod est in Domini mensa incipiat benedici. Orationes etiam significari ait, cum*

benedicitur, et sanctificatur, et ad distribuendum comminuitur, quam totam petitionem fere omnis Ecclesia Dominica oratione concludit. Habes his paucis expressum Missae canonem, qualis nunc etiam a nobis adhibetur. Praefationis nunc quoque usitatae diserta mentio est apud S. Cyprianum de *Orat. Dominic.* col. 501. ed. Venet. 1658. cum nimirum dicimus *Sursum corda*, et *Populus respondet habemus ad Dominum*. Evidens igitur, apertumque est, primis etiam Ecclesiae temporibus certum fuisse ordinem ritumque precum, qui in re divina conficienda adhibebatur. Verum Liturgias, quae Apostolorum Petri, Jacobi, Matthaei, Marci nomina praeseferebant, eorum revera non esse demonstrat Natalis Alexander *Hist. Eccl. saec. 1. cap. 12. art. 2. tom. 3. p. 33. ed. Venet. 1776*. Eadem de liturgiis Petri, Matthaei, et Marci sententia est Cardinalis Bonae *Rer. liturg. lib. 1. cap. 8. p. 122. et seq.*; ibique Salae in *not. laud. edit. Taurin.* Sed tamen ipse Jacobi Liturgiam multis tuetur *loc. cit. §. 3. p. 128*. Petrus Le-Brun *Explicat. Missae tom. 2. dissert. 1.* contendit, ante quintum saeculum nullam aut Graecam, aut Latinam Liturgiam scripto fuisse mandatam, sed preces omnes, ac ritus memoriae tradi consuevisse. Sed Le Brunio adversatur Maratorius *Liturg. Roman. dissert. de Reb. liturgic. c. 1.*, cujus ego sententiae assentior. Illud praeclare ab ipso Cardinali Bona *lib. 1. cap. 9. §. 8. p. 162.* animadversum est, quod *discors concordia in omnibus liturgiis* manifestum facit, ordinem sacrificii ab Apostolis traditum esse, atque in omnem terram diffusum. Quamvis enim non eadem sint verba omnium liturgiarum, neque in omnibus singulae earum partes eodem modo locatae sint, tamen omnes iisdem membris coalescunt, quae sunt peccatorum ante omnia confessio, tum introitus, sive quoddam quasi prooemium, deinde Psalmi, ac lectiones Sac. Scripturae, et potissimum Evangelii, Symboli recitatio, lotio manuum, commemoratio, et invocatio Sanctorum, preces pro omnibus vivis, et defunctis, gratiarum actio, et benedictio, praeter ea, quae essentialia sunt, oblationem scilicet, consecrationem, et communionem. Qui sane Ecclesiarum omnium consensus non nisi a Spiritu Sancto esse potest; et certe singularis est insania

Protestantium, qui Missae sacrificium Romanorum Pontificum inventum dicant. Late hoc argumentum, praeter scriptores omnes rerum theologicarum, persequitur Robertus Sala in *Not. ad Bonam loc. cit. cap. 4. p. 165. et seq.*, quin etiam saniores Protestantes catholicam veritatem confiteri, ac literis mandare non dubitarunt. Ex eorum numero, praeter ceteros, sunt Ernestus Grabbius in *Irenaeen. lib. 4. advers. haeres. cap. 32.* Thomas Bretius in *pecular. Diss.*, quae extat in *collect. praecipuar. liturg. Eccles. Christ. pag. 104. Londini 1710.*, et Samuel Jebblius in *Justin. Dial. p. 215. Londini 1719.* Hi omnes cum catholicis fatentur, Apostolos, cunctosque Ecclesiae Patres Eucharistiam pro novi testamenti sacrificio habuisse, et sub speciebus panis, et vini illud Deo Patri in altari oblatum docuisse demonstrant.

(4) Occupata ab Arabibus Hispania, Christiani quod essent cum Arabibus commixti, *Mixtarabes*, et corrupta voce *Mozarabes* dicti sunt. Confer Rodericum *Rer. Hispan. lib. 3. cap. 22.*, et Pagium in *Baron. ad ann. 714. num. 7. pag. 200. tom. 12. ed. Luc.* Inde Hispanica liturgia Mozarabica appellata est, quam antiquissimam esse constat. Ritus Mozarabicus servatus in Hispaniis fuit usque ad saeculum XI, sed eo saeculo ad exitum vergente abrogatus, ejusque loco Romanus suffectus est. Denique Cardinalis Franciscus Ximenius, ne tantae antiquitatis ritus omnino interiret, cum novis characteribus in lucem emitti voluit, et collegium, instituit Sacerdotum, a quibus quotidie divina officia, at Missarum solemnia eo ritu celebrarentur in sacello, quod in majori Ecclesia Toletana aedificavit. Sunt etiam Toleti aliquot Paroeciae, in quibus hic Mozarabicus ritus adhuc viget, idemque sit Salmanticae in Sacello Doctoris Talabricensis. Confer Alvarum Gomezium de *Reb. gest. Card. Ximenii lib. 2.*, Eugenium Roblesium in *Vit. Card. Ximenii cap. 23.*, Card. Aguirrium *tom. 3.*, *Concil. Hispan. post Concil. Burgense. p. 258. et seq.*, Cennium *Antiquit. Eccles. Hispan. tom. 2. diss. 7.*

§. LV. Plures autem hi ritus, et hae caere,

moniae sunt, de quibus late agunt Scriptores rerum liturgicarum (1), quaeque ex Apostolica, aut Ecclesiastica traditione, et disciplina procedunt. Omnia sunt instituta, ut majestas tanti sacrificii commendetur, et mentes fidelium per haec visibilia religionis, et pietatis signa, ad rerum altissimarum, quae in hoc sacrificio latent, contemplationem excitentur (2). Ita mysticae benedictiones, lumina (3), thymiamata, sacrae vestes (4) in sacrificio adhibentur: similiter receptum est, ut quaedam submissa, alia vero elatiore voce in Missa pronuncientur (5).

(1) Confer in primis Cardinalem Bonam *Rer. liturg. libros duos*, et Petrum Le Brun *Explicatio Missae*.

(2) Concilium Tridentinum *de Sacrif. Missae sess. 22. cap. 5.*

(3) Joannes Henricus Ottius Calvinianus homo, qui contra annales Cardinalis Baronii examen instituit, irridet hunc ritum accendendi in Ecclesia lumina, eumque aetate Hieronymi minime obtinuisse arbitratur. Sed eum solide refellit Muratorius *Liturg. Roman. diss. de Reb. Liturg. cap. 20., et Dissertat. 16. in Sanct. Paulinum p. 853. ed. Veronae 1736.* Dicam ea de re paulo post, cum sermo de Ecclesiis habebitur.

(4) De sacris vestibus suo loco opportunius agam.

(5) Si quis dixerit (inquit Concilium Tridentinum *Sess. 22. de Sacrif. Missae Canon. 9.*) *Ecclesiae Romanae ritum, quo submissa voce pars canonis, et verba consecrationis proferentur, damnandum esse, aut lingua tantum vulgari Missam celebrari debere . . . anathema sit.* Nihilo tamen minus post hunc Tridentinum canonem tam disertum, tamque perspicuum fuisse aliqui, qui elata voce, ita ut a populo intelligi possent, partem illam canonis, et verba consecrationis proferenda esse censuerunt. Novum hanc errorem su-

periori saeculo compressit Maturinus Savary Sagiensis Episcopus edito die 16 Martii anno 1698 decreto, quo indicta in eos, qui secus facerent, suspensionis poena sancivit, ut *canonis verba, prout in Romano Missali notatum praescriptumque est secreto, submissaque voce pronuncientur*. Quod simili decreto die 22. Januar. an. 1710. a Cardinali de Bissy Meldensi Episcopo constitutum est. Arnaldus, et ceteri, qui Arnaldi partes sequuntur, non exiguam dederant operam, ut Christiani homines minus aequo animo ferrent, quo Missae canon secreto recitaretur. Sed Claudius de Vert Monachus Cluniacensis audacter, et omnium apertissime caput extulit adversus hanc secretam canonis recitationem opere, quod primum evulgavit anno 1706. Adversus hunc hominem Vallemontius theologicam, atque historicam dissertationem opposuit Parisiis editam anno 1710. *du secret des mysteres, ou Apologie de la Rubrique des Missels*; sed eum vehementius, graviusque refutavit Languetus tunc Episcopus Suessionensis *Praef. Instr. Pastor. 8. Sept.* quae iterum edita deinceps est anno 1720. Vallemontii dissertationem impugnavit Anonymus Auctor in tractatu Bruxellis edito an. 1717. cum titulo: *Apologie de Mr. du Vert, ou Remarques critiques sur le Livre de Mr. Vallemont du secret des Mysteres*; sed eum accurate, copioseque defendit Petrus Le-Brun *Diss. 15. t. 4.* operis cui titulus *Explicatio Missae*, qua quidem dissertatione solide, graviterque ostenditur, semper in Ecclesiis Occidentalibus canonem secreto recitari consuevisse. Dignae in primis sunt, quae legantur ea de re dissertationes duae, in quibus cuncta habes, quae ad hoc argumentum pertinent, explicata diligenter. Altera nimirum est dissertatio Le-Brunii, cujus paulo ante facta mentio est, altera vero cum titulo: *della Legittima disciplina da osservarsi nella pronuncia del Canone della Messa etc.* an. 1787: Romae edita est a Francisco Antonio Mondellio Viro erudito, et Auditore olim men in Romana Accademia.

§. LVI. Apostoli, eorumque successores in singulis provinciis divina officia persolverunt eo sermo-

ne, qui tunc ipsis communis erat (1); atque ita Hierosolymis Hebraice (2); Antiochiae vero, Alexandriae, atque in aliis Graecorum civitatibus Graece; Romae, atque in toto Occidente Latine rem divinam confecerunt (3). Labentibus annis licet hae linguae vulgares esse desiissent, ac tantum doctis viris innotescerent, tamen Ecclesia eas in divinis celebrandis officiis retineri voluit, tum ne frequens verborum mutatio sensim etiam mutationem sententiarum induceret (4). Interdum tamen populis, qui novissime Christi religionem susceperunt, Sedes Apostolica liturgias permittit, quae vernaculo eorum sermone conscriptae sint (5).

(1) Apostolos, eorumque successores usque ad aetatem Hadriani Imperatoris Hebraicum sermonem adhibuisse, tum deinceps Ecclesiam Graecum usurpare coepisse putat Joannes Echius de *Sacris Miss. l. 2. cap. 2*. Verum haec opinio nullo nititur idoneo fundamento.

(2) Hebraicum idioma, quo usi sunt Apostoli rem divinam conficientes, non illud erat antiquum idioma, quo veteris testamenti Patriarchae usi sunt, et quod Apostolorum aetate ne notum quidem vulgo Hebraeorum erat. Nam eo temporis cursu, quo ipsi Babylone captivi fuerunt, Hebraici sermonis, quem a parentibus acceperant, oblivisci, et Chaldaicam linguam addiscere coeperunt, qua deinceps usi sunt, aliquid tamen retinentes ex patrio sermone, quem pridem adhibebant. Hinc orta est tertia lingua ex Hebraica antiqua, et Chaldaica mixta, quae a regione Syriaca dicta est, quaeque deinceps Hebraeis vulgaris esse coepit, et Hebraica vulgo appellata, tum quod commixtas habebat ex Hebraeo sermone voces, tum quod eam Judaei usurpabant. Hac lingua Christus Dominus usus creditur, et eadem Sancti Matthaei evangelium, ac Sancti Pauli Apostoli epistola ad Hebraeos scripta traduntur. Atque hic est sermo Hebrai-

cus, vel potius Syriacus, aut Syro-Chaldaicus, qui Christi, et Apostolorum aetate vernaculus erat sermo Hebraeorum, et quo Apostoli rem divinam confecerunt. Confer Petittierum in *diss. critic. in S. Scriptur. diss. 8. p. 83.*, et Renaudotium *Diss. de Liturg. Orient. origin. et antiq. cap. 6*, in primis autem videndus est V. Clar. Jo. Bernardus de Rubéis opere Parmae edito 1772, cui titulus: *Della Lingua propria di Cristo, e degli Ebrei nazionali della Palestina da' tempi de' Maccabei.*

(3) Consule Card. Bonam *Rer. Liturg. lib. 1. c. 5. §. 4. p. 76. tom. 1.* Negat Papebrochius in *Conat. chron. hist. diss. 15*, et Martenius de *Antiq. Ecclesiae rit. lib. 1. cap. 3. art. 2. t. 1. p. 101*, his tantum linguis divina mysteria ab Apostolis celebrata fuisse, ac multa proferunt monumenta, ut conficiant, initio omnes gentes vernaculo sermone suo rem divinam confecisse. Sed eos graviter, lateque refellit Robertus Sala in *not. ad Bonam loc. cit. not. 6. p. 85.* Vide etiam eundem Bonam in *Append. tom. 1. p. 416.*, ubi extat dissertatio Honorati a S. Maria, quo ostenditur, Apostolos tantum his tribus linguis, nimirum Hebraica, aut Siro-Chaldaica, Graeca, et Latina, rem divinam confecisse.

(4) Concilium Tridentinum *Sess. 22. de Sacrific. Miss. cap. 8.* *Esi Missa*, inquit, *magnam contineat populi fidelis eruditionem, non tamen expedire visum est Patribus, ut vulgari passim lingua celebraretur.* Tam retineri jubet *ubique cujusque Ecclesiae antiquum, et a Sancta Romana Ecclesia, omnium Ecclesiarum matre, et magistra, probatum ritum, et canone 9. ead. Sess. Si quis*, inquit, *dixerit . . . lingua tantum vulgari Missam celebrari debere . . . anathema sit.* Porro de Missa vulgari sermone non celebranda plures extant doctorum hominum lucubrationes, quas omnes simul collectas superiori saeculo jussu Cleri Gallicani Parisiis edidit anno 1661. Antonius Vitraeus, quibus apertissime ostenditur, quam recte, quamque sapienter id ab Ecclesia constitutum fuerit. Late etiam ea de re agit, pluresque laudat qui hoc ipsum argumentum egregie illustrarunt, Benedictus XIV. *de Sacrific. Miss. cap. 6.*

(5) Ita Sclavis saeculo IX. a Joanne VIII. permissa est liturgia vernaculo sermone, ut constat ex ipsius Jo-

annis *Ep.* 247. ad *Sfentopulerum* apud Labbaeum *conc.* tom. 11. col. 170. *ed. Venet.* Sed eandem facultatem postulanti Uratislao Bohemorum Regi concedere noluit S. Gregorius VII. *Ep.* 11. apud Labbaeum t. 12. *Concil.* col. 464. *ed. Venet.* Confer Benedictum XIV. de *Sacrific. missae* l. 2. c. 3. n. 14.

§. LVII. Primis Ecclesiae saeculis non omni die sacra mysteria peragebantur. Solum diem Dominicum Paulus (1) memorat; sed tamen ab Apostolis ternos dies in singulas hebdomadas, hoc est Dominicam, et quartam, sextamque feriam, constitutos fuisse, Epiphanius (2) tradit. Accessit etiam deinceps Sabbatum (3), qua die ab omnibus, exceptis Alexandrinis, atque Romanis, sacra mysteria celebrari consueverunt (4). Ætate Augustini variae erant Ecclesiarum consuetudines, cum alibi quotidie, alibi Sabbato, ac die Dominico, alibi tantum Dominico die res divina perageretur (5). Sed jamdiu Latini cunctis diebus, exceptis feria sexta, ac Sabbato majoris hebdomadae, sacrificium conficiunt. Graeci illud omittunt per quadragesimam, exceptis Sabbatis, Dominicis, et die festo Annunciationis, et cum non celebrant, adhibent Missam *praesantificatorum*, hoc est corporis Christi ante consecrati, quae missa etiam a Latinis feria sexta majoris hebdomadae adhibetur (6).

(1) Paulus I. *ad Corinth.* XVI. 1, quod etiam habet Justinus Martyr *Apologi* 2. num. 67. pag. 83. *ed. Paris.* 1742.

(2) Epiphanius *Exposit. fid. num. 22. pag. 1105. tom. 1. opp. ed. Petavii Paris. 1622.*

(3) Basilii *Epist. 93. ad Caesar. Patric. p. 186. opp. tom. 3. ed. Maurin. Paris. 1730.*

(4) Socrates *Histor. lib. 5. cap. 22. pag. 295. edit. Valesii Cantabrig. 1720.* Verum non multo post etiam Romana Ecclesia aliarum consuetudinem recepit, S. Hieronymus *Epist. 71. num. 6. col. 432. tom. 1. ed. Valarsii Veronae.* In Oriente Pascha (quo nomine Eucharistia designatur) ter in hebdomada, nonnunquam etiam quater, vel potius quotiescumque voluerimus, celebratum testatur S. Joan. Chrysostomus *Orat. 5. contr. Judaeos opp. tom. 1. p. 611. edit. Montfauconii Paris. 1718.*

(5) Consule Augustinum *Ep. 54. ad Januar. col. 124. et seq. cap. 2, et. Serm. 58. de Orat. domin. ad competen. col. 399. tom. 5. cit. ed. Ven., Hieronymum cit. Ep. 71. Haec autem ad solemnem tantum missam, quam majorem dicunt, pertinere monet Martenius loc. cit. art. 3. §. 4. p. 106. Ipse Augustinus Confess. lib. 5. c. 9. opp. t. 1. col. 133. ed. Maurin. Venet. 1756. Monicam matrem suam quovis die sacrificio interesse consuevisse testatur, et de Civit. Dei lib. 10. cap. 20. t. 9. col. 335., altaris sacramentum appellat quotidianum Ecclesiae sacrificium. Ambrosius etiam quotidie sacrum faciebat *Ep. 20. ad Soror. n. 15. opp. t. 3. col. 905. ed. Maurin. Venet. 1751. Vos quoque ipsos, inquit, mihi bonos filios gestiebat eripere, pro quibus ego quotidie instauro sacrificium.**

(6) De Missa praesantificatorum vide Card. Bonam *Rer. liturg. lib. 1. cap. 15. §. 5. tom. 6, et Salani in Not. p. 317. ed. Taurin. 1747, Leonem Allatum in Prolegomen. ad Gabrielem Naudaeum de Missa Praesantificat. n. 1. p. 1531., et Benedictum XIV. in Const. Allatae 47. §. 31. p. 188., et Const. Ex quo primum 54. §. 32. p. 234. tom. 4. ejus Bullar. ed. Romae seu Venet. 1758., quibus duabus constitutionibus de Graecorum ritibus late disseritur.*

§. LVIII. Quin etiam uno eodemque die idem

Sacerdos plures missas, et eas non in eodem, sed in diversis altaribus celebrabat (1). Ita in Natale Domini, Kalendis Januarii, in coena Domini, in Paschate, in Rogationibus, in jejuniis post Pentecostem, in festo Apostolorum Petri et Pauli, Sancti Joannis Baptistae, Sancti Laurentii, et aliorum quorundam unus Sacerdos pluries rem divinam conficiebat; quot nimirum erant officia, et festa, quae iis diebus occurrebant. Aliis quoque diebus plures Sacerdoti missas celebrare licebat (2); sed saeculo XI. positus est usque ad tertiam vicem huic arbitrio modus (3). Denique ut avaritiae quaestus, et obloquentium suspensiones removeret Ecclesia sancivit, ut se mel tantum, nisi aliud necessitas postulet, a Sacerdotibus quotidie sacrificium fiat, excepto die Natali Christi Domini (4).

(1) S. Gregorius Taronensis *de Glor. Confess.* c. 50. col. 935. *ed. Paris.* 1699. Concilium. Antisiodorense *Can.* 10. *tom.* 3. col. 445. *collect.* Harduini. Consule Vicecomitem *de Antiq. Miss. rit.* lib. 3. cap. 28. Card. Bonam *Rer. liturg.* lib. 1. cap. 18 §. 13. *et seq.* t. 2. *edit.* Taurin. 1749, et Martenium *de Antiq. eccles. rit.* lib. 1. c. 3. art. 3. §. 4. *et seq.* p. 103. *et seq.* *tom.* 1. *edit.* *citat.*

(2) S. Leo Magnus *Epist.* 9. *ad Dioscor. Alexan.* cap. 2. *tom.* 1. col. 631. *ed. Ballerin. Venet.* 1753., Regino *de Eccles. discipl.* lib. 1. cap. 33. *pag.* 10. *ed. Viennae* 1765, Walfridius Strabo *de Reb. Eccl.* c. 21. *in Biblioth. PP.* *tom.* 10. *ed. Paris.* col. 679.

(3) Concilium Salegustadiense an. 1012. *can.* 5. *tom.* 7. *par.* 1. cap. 829. *coll.* Harduini.

(4) *Can.* 53. *de Consecr. dist.* 1. C. *Consuluisti* 3., *et Cap. Te Referente* 12. *de Celebr. Missarum.*

Subditis tamen Hispaniarum, et Lusitaniae Regum Benedicto XIV. in *Constit. Quod expensis* 61. p. 269. t. 2. ejus *Bullar. edit. Rom. seu Venet. 1754*, concessa est facultas duas, tresve missas celebrandi in die commemorationis omnium defunctorum, modo nihil exinde accipiant, easque speciatim non applicent. Ceterum nunc etiam necessitas, secundum Innocentii III. decretalem in *can. 3. de Celebr. Missar.*, efficere potest, ut ab uno Sacerdote Missa repetatur. Verum Sac. Congregatio apud Fagnanum in *cap. In ordinando 1. de Simon. n. 37.* declaravit, id tantum posse fieri, cum gravis urget necessitas, quae primum Episcopo probata sit. Tum Benedictus XIV. in *Const. Declarasti* 3. p. 13. t. 2. certissimum, esse monet, *Missionariis tantum a Sede Apostolica potestatem aliquando fieri, ut uno die sacrificium bis operentur; reliquis vero sacerdotibus opus esse ut hac de re facultatem ab Episcopo consequantur, etiamsi causa necessitatis intercedere videatur.* Ipse Benedictus XIV. in *Constit. Apostolicum* 16. §. 11. p. 62. tom. 4. *Bullar. ed. cit.* Missionariis in Anglia degentibus bis interdum uno die sacrificium permisit, cum consensu Vicarii Apostolici, ob fidelis populi necessitatem. Quae eadem necessitatis causa facit, ut Parochus, qui duas habet distantes Ecclesias, cum in unam universus populus convenire non potest, neque alius est sacerdos, qui rem divinam conficiat, diebus festis, impetrata primum legitima facultate, duas Missas celebrare possit. Benedictus XIV. in *Const. Declarasti* 3. p. 9. t. 2. ejus *Bullarii edit. citat.*

§. LIX. Initio sacra mysteria noctu, et vero etiam post coenam peragebantur, tum ut fideles Christum imitarentur, qui post legalem coenam primum obtulit sacrificium, tum ut ethnicos laterent conventus, quos in latebris habebat (1). Cum pax Ecclesiae data est, confici res divina per diem coepit; sed tamen etiam post ea tempora Ecclesia retinuit antiquam consuetudinem certis quibusdam tempori-

bus, nimirum in nocte Natalis Domini, in pervigiliis Paschatis, et Pentecostis, atque in diebus ordinationum (2). Nunc sola Missa Natalis Domini noctu celebratur. Privatae missae quavis hora fiebant, uti nunc omni hora recte fiunt ab aurora usque ad meridiem (3); sed pro publicis, ac solemnibus Missis certae erant constitutae horae, nimirum tertia, sexta, et nona (4).

(1) Hinc Christiani ab Ethnicis appellati apud Minutium Felicem in *Lib. Octavius* pag. 332. ed. Paris. 1065. *natio latebrosa, et lucifuga*; atque Tertullianum *Apolog. cap. 2. p. 3. de Coron. cap. 3. p. 102. et ad uxor. cap. 4. p. 168. ed. Paris. 1675.*

(2) Late ea de re disputat Card. Bona *Rer. liturg. lib. 1. cap. 21. §. 4. p. 114. et seq. ibique Sala in Notis tom. 2.*

(3) Consule Martenium *loc. citat. art. 4. §. 3. et seq. pag. 107.*

(4) Amalarinus de *Rit. Eccles. lib. 3. cap. 24. in Biblioth. PP. tom. 14. p. 1000. ed. Lugdun.* Honorius autem de *Gemma Animae lib. 1. cap. 113. col. 1213. Biblioth. PP. tom. 10. ed. citat.* ita rem explicat, ut in festis tertia, in privatis diebus sexta, in quadragesima, vel in diebus jejunii nona hora Missa peragatur, idemque tradit Durandus *lib. 4. cap. 1.* Certe diebus festis hora tertia sacrificium offerri consuevisse, manifestum est ex Concilio Aurelianensi III. *can. 14. tom. 2. col. 1426. coll. Harduini, Gregorio M. Hom. 37. in Evang. num. 9. col. 1632 t. 1. ed. Maurin. Paris. 1705. Gregorio Turonensi de Vit. Patr. cap. 8. num. 11. col. 1196. ed. Paris. 1699., Regiuone de Eccles. disciplin. lib. 1. c. 33 p. 10. ed. Vien. 1765. Atque ita intelligendi sunt Epiphanius *Exposit. fid. cap. 23 p. 1106. tom. 1. ed. Paris 1622, et Walfridius Strabo de Reb.**

eccles. cap. 23. in Biblioth. PP. tom. 10. edit. Paris. col. 685, quorum alter matutinis horis, alter ante meridiem rem divinam conficiendam statuunt.

§. LX. Nam Missa alia publica, alia privata est. Missa publica apud veteres ea praesertim erat, ad quam populus una cum suo Pastore conveniebat: aderant autem clerici, qui suorum ordinum muneribus fungebantur (1). Quae missa dicebatur *collecta*, et *synaxis*, quod ad offerendum, atque ad communicandum multitudo fidelium colligeretur (2). Verum lapsu temporum cum illa desiit frequens communio Christianorum, missa *publica*, sive *conventualis*, et *canonica* appellata est, quae cum cantu, ritumque solemni peragitur, quaeque in omnibus cathedralibus, collegiatis, et conventualibus ecclesiis pro benefactoribus quotidie celebranda est (3). Parochialis quoque missa, quam omnes Parochi saltem diebus festis pro populo, cui praesunt, offerre debent, publica dicitur (4); ut distinguatur a privatis sacrificiis, quae pro quovis homine privato, ac bene de ea Ecclesia merito offeruntur.

(1) Non tantum clerici Missae praesentes erant suorum ordinum munera exercentes, verum etiam Presbyteri adhaerebant Sacerdoti sacra facienti, cum eoque communicabant, et ejusdem sacrificii participes erant, quem ritum late explicat Morinus de *Sacr. ordinat. p. 3. exerc. 8. cap. 11. et seq.* Certe Auctor *Apostolic. constit. lib. 8. cap. 11. et seq. p. 401. lib. ind.* Episcopum describit, qui rem divinam agit cum Presbyteris adstantibus, offerentibus, et communicantibus. Verba etiam consecrationis ab adstantibus Presbyteris prolata

fuisse tradit Amalarius de *Eccles. offic. lib. 1. cap. 12. in Biblioth. PP. tom. 14. p. 945. ed. Lugdun.*, idemque patet ex vetusto Pontificali Ecclesiae Rothomagensis apud Menardum in *Not. ad sacram. S. Gregor. notat. 282. col. 337. opp. S. Gregor. tom. 3. edition. Maurin. Paris. 1705.* Antiquae hujus consuetudinis apud Latinos vestigia supersunt in Episcoporum et Presbyterorum ordinationibus; sed apud Graecos concelebratio adhuc viget.

(2) S. Augustinus in *Brevic. coll. diei tertiae cap. 17. col. 537. opp. t. 9. cit. ed. Venet.* distinguit *collectam a Dominico*, veluti speciem a genere, uti nos publicam, solemnemque Missam a sacrificio distinguimus.

(3) Confer ea de re Benedictum XIV. in *Constit. Cum semper* 103. §. 11. et seq. p. 225. t. 1, Bullarii.

(4) De Missa Parochiali vide laudatam *Const. 103. Benedicti XIV. §. 2. et seq. p. 223.*

§. LXI. Privata Missa est, quae sine cantu, ac solemnibus caeremoniis a solo Sacerdote celebratur, uno tantum ministrante: sive pauci alii, sive nulli intersint, sive solus Sacerdos, sive alii etiam Eucharistiam accipiat (1). Privatae Missae usus perpetuus in Ecclesia fuit, ut proinde sese deridendos praebeant recentiores haeretici, cum rem novam, et contra Missae oeconomiam praedicant id, quod constanti Ecclesiae sententia, longaue vetustate firmandum est (2).

(1) Missa privata differt a *solitaria*, quam nimirum solus Sacerdos, ministrante, ac praesente nemine, celebrabat. Id Missae genus primum instituerunt Monachi saeculo IX; deinde etiam saeculares Presbyteri arripuerunt. Verum hanc Missam vetuerunt sacri canones, quod praesertim absurdum esset in ea Sacerdotem dicere *domi-*

nus vobiscum, sursum corda, gratias agamus, oremus. Concilium Moguntinum an. 813 canon. 43. col. 1015, Parisiense IV. t. 1. c. 48. col. 1324. tom. 4. coll. Har-
duini, Nannetense apud Ivonem par. 3. c. 7. Can. 61. de Consecr. dist. 1, qui canon saeculo IX. antiquior non est, et ideo male Soteri, aut Anacleto attribuitur.

(2) Vide Concilium Tridentinum Sess. 22. Can. 8. et tom. 6. de Sacrific. Missae, Benedictum XIV. in Const. Certiores 64. pag. 129. tom. 1. ejus Bullar. ed. Romae seu Ven. 1754. Et sane gravis est insania, atque error Lutheri, aliorumque haereticorum, qui privatas missas, atque eas, in quibus solus Sacerdos sacramentaliter communicat, abrogandas censuerunt. Nam etiam privata Missa quamquam careat externo illo solempni ritu, qui intimam ejus naturam non attingit, verum est sacrificium, atque in ea similiter sicut in Missa solempni, verum Christi corpus, et sanguis consecratur. Atque hae quoque Missae, ut recte inquit Synodus Tridentina loc. cit. vere communes censi debent, partim quod in iis populus spiritaliter communicet, partim vero quod publico Ecclesiae ministro non pro se tantum, sed pro omnibus fidelibus, qui ad corpus Christi pertinent, celebrantur. Perpetuum ea de re Ecclesiae usum, pluribus collectis ecclesiasticis monumentis, fuisse demonstrant Card. Bona *Rer. liturg.* l. 1. c. 14. §. 1. et seq., ibique Sala in *Not.* p. 276. et seq. tom. 1. Natalis Alexander *Hist. eccl. saec. 4.* c. 6. art. 19. §. 1. n. 3. tom. 4. p. 309. saec. 13. et 14. tota diss. 13. p. 476. seq. t. 8, et saec. 15. ac 16. diss. 12. n. 5. p. 556. tom. 9. edit. Ven. an. 1776, Tournelyus *Praelect. theol. de Sacr. Missae* art. 8, Drouvenius *de Re sacram.* lib. 5. quaest. 9. per totum, eandemque rem agunt, petitis ex liturgiis argumentis, Muratorius *diss. de liturg. Rom.* cap. 16. seq., et Assemanus in *Diss. Cod. liturg.* l. 6. par. 7. praemiss. lect. 2. art. 123. Videndus est etiam Emmanuel Schelestratus in *Act. Eccles. orient. contr. Luther.* c. 1. de Missis. priv. in *Eccles. Graec. circ. fin.*, ubi narrantur conatus Lutheranorum, qui ut Orientales ad suam sententiam perducerent, ad Hieremiam Constantinopolitanorum Patriarcham miserunt Augustanam confessionem, in qua privatae Missae tollantur.

Sed responsum est, ab Orientalibus, sicut ab Occidentalibus damnari pravam morem illorum, qui improba obtinendae eleemosynae cupiditate ad altare accedunt, non autem illos, qui ea, qua decet, pietate, et religione privatas Missas celebrant, ut Deo sacrificium offerant.

§. LXII. Omni etiam loco, ethnicis dominantibus, sive is esset privata domus, sive carcer, sive coemeterium, sacrificium offerebatur (1). Cum ad Christianos Imperatores rerum summa delata est, eam ob rem publica templa aedificata sunt; et vero nunc tantum in Ecclesiis consecratis, aut jussu Episcopi benedictis res divina conficitur, nisi secus postulet necessitas, quia tunc ea recte fit quovis comodo, et decenti loco (2). Cum venia Sedis Apostolicae etiam in privatis sacellis sacra mysteria celebrantur (3).

(1) Act. Apostol. XX. 7, Auctor *Const. Apost. l. 6. cap. 30. pag. 361.* apud Cotelierum *loc. cit.* S. Cyprianus *Epist. 4. ad Presbyt. et Diacon. p. 12. edit. Paris. 1666.* Philostorgius *Hist. eccles. lib. 2. c. 13. pag. 484. edit. Valesii Cantabrig. 1720.*

(2) Confer Benedictum XIV. *Const. Inter omnigenas 89. §. 22. tom. 1. pag. 180. Bullar. edit. Romae seu Venet. 1754.*

(3) Vide Benedictum XIV. *Const. Magno 49. pag. 216. tom. 3. Bullar.*

§. LXIII. Jam Ecclesiae lege Christiani dominici, festisque diebus Missae sacrificio interesse debent. Ac vetus quidem Ecclesiae disciplina fuit, ut iis diebus singuli accederent ad Ecclesiam parochia-

lem, ibique interessent sacrificio, quod a Parocho conficiebatur (1). Verum haec disciplina jampridem antiquata est; et licet deceat Christianos diebus festis ire ad Ecclesiam parochialem, nulla tamen ea de re necessitas est, et qui extra eam sacrificio intersunt, Ecclesiasticae legi satisfaciunt, neque alicujus criminis rei sunt (2).

(1) Concilium Sardicense *Can. 14. col. 648. t. 1. Quini-Sextum Can. 80. col. 1690. tom. 3. collect. Harduini ed. Paris. , Can. 2. de Paroch.*

(2) *Leo X. Const. Intelleximus 28. pag. 462. t. 3. par. 3. Bullarii Romani, S. Pius V. Const. Et si 58. n. 8. p. 376. tom. 4. par. 2. Confer Benedictum XIV, de Synod. dioeces. lib. 11. cap. 14. §. 7 et seq.*

§. LXIV. Mos in Ecclesia fuit, qui quidem diu servatus est, ut fideles omnes, qui ad Missam convenirent, suam sacrificii partem, hoc est panem, et vinum offerrent (1). Eo pane, ac vino Christi corpus, et sanguis conficiebatur, et quod supererat (supererat autem plurimum, quoniam satis laetae, et copisae oblationes erant) id totum alendis clericis, et pauperibus inserviebat (2). Labentibus annis loco panis, et vini pecunia offerri coepit, quae initio dabatur Ecclesiae, atque omnibus generatim clericis; deinceps autem data est certo Sacerdoti, ut privatim pro certis, designatisque personis sacrificium offerret (3).

(1) Late ea de re disseram paulo post, cum de oblationibus agendi locus occurret.

(2) Confer Christianum Lupum *Schol. in Canon.*

13. *Concil. Roman. V. opp. t. 6. pag. 101. et seq. ed. Venet. 1726.*

(3) Ab ipsis Ecclesiae primordiis in omnibus Christianorum templis fuisse arcam, in quam fidelium pecunia inferebatur, constat ex Tertulliani *Apolog. cap. 39. p. 31. ed. Paris. 1675*; et Justino *Apolog. 1. ad Antoninum Pium n. 67. pag. 84. ed. Paris. 1742*. Eamdem consuetudinem adhuc IV et V saeculo perseverasse ostendunt Augustinus *Serm. 356. tom. 5. part. 2. opp. n. 13. col. 1389. edit. Maurin. Venet. 1731*. Hieronymus *Ep. 71. n. 3. col. 431. opp. tom. 1. edit. Vallarsii Veronae 1734*, et Paulinus *Ep. 34. sive Serm. de Gazophylacio col. 231. ed. Veron. 1736*. Sed quo primum tempore pecunia in arcam inferri desierit, atque ad ipsum altare offerri coeperit, certo definiri non potest. Testatur quidem Augustinus *Epist. 12. ad Aurelium Primat. n. 6. col. 29. tom. 2. opp.* tempore oblationis, seu Missae pro defunctis fuisse simul denarios oblatos, sed eos oblatos fuisse constat ea lege, ut pauperibus tribuerentur. Honorius Augustodunensis, qui saeculo XII. floruit, in *Gemma Animae lib. 1. c. 66. in Biblioth. PP. tom. 10. col. 1199. ed. Paris.*, tunc pecuniam ad altare loro panis offerri coepisse asseverat, cum fideles, qui sacrificio intererant, sacrorum mysteriorum participes esse desiderant: verum non ipsum designat tempus, quo id factum fuerit. Illud vero compertissimum est, quod recte animadvertit Thomassinus *Vet. et nov. Eccles. discipl. par. 3. lib. 1. cap. 7. num. 8.* semper olim sive panem, sive denarium Ecclesiae, atque omnibus generatim clericis offerri consuevisse, non dari certo Sacerdoti, ut privatim rem divinam ageret pro eo, qui oblationem fecerat. Morem offerendi eleemosynam certo Sacerdoti, ut ejus largitor exuberantem sacrificii fructum in se, aliosve derivet, tantum saeculo VIII. inductum, ac saeculo XII passim ubique receptum putat Mabillonius *Praef. 1. in saec. 2. Benedictin. n. 62. p. XXVII, edit. Venet. 1734*, sed tamen eum longe antiquiorem esse contendit Franciscus Barlendus in *diss. Historico-Theolog. de Oblation. par. 2. §. 2.* Certe saeculo VIII. ad exitum vergente jam eam consuetudinem fuisse receptam, ostendit Chrodegangus Metensis Episcopus in regula, quam

ea aetate pro suis canonicis scripsit, et in qua c. 32. de Eleemosynis apud Holsteniam *Codex Regular. t. 2. pag. 107. ed. Augustae Vindelic. an. 1759.* Canonico- rum cuique permittit accipere, et in quemvis usum con- vertere eleemosynam, quae pro sua sibi Missa offereba- tur. Saeculo vero XI. mos hic tam late patebat, ut etiam pueris notus esset, sicuti patet ex eo, quod de S. Pe- tro Damiani memoriae prodidit Joannes Monachus in *ejus Vit. c. 2. p. 3. opp. Petri Damiani tom. 1. edit. Paris. 1664.* quem narrat repertum nummum tradidisse Presby- tero, qui Deo pro ejus Patre sacrificium offerret. Confer *Mamachium del Diritto libero della Chiesa ec. t. 2. par. 1. not. 1. pag. 147. seqq. tom. 3. p. 1. not. 1. pag. 66. seqq.*

§. LXV. Quae pecunia offertur Sacerdoti rem divinam conficienti, non quasi pretium sit consecra- tionis Eucharistiae, quod certe simoniae crimen es- set; sed quasi stipendium debitum Sacerdoti, qui cum altari serviat, habere ex eo debet, quae suppeditent ad cultum, et ad victum (1). Et quoniam Episcopi est judicare, quid singulis Presbyteris in unoquo- que loco sit necessarium, ut vitam honeste tradu- cant, hinc ejus est definire, quid ipsis rem divinam facientibus trihuendum sit (2). Sacrificium pro eo speciatim oblatum, quod stipem dedit, non ei solum, sed etiam toti prodest Ecclesiae; verum ille fructum ex eo capit uberiores, modo ad capiendum sacrifi- cii fructum aptus, et idoneus sit (3).

(1) Lutherani, et Calviniani improbant morem dan- di pecuniam Sacerdoti rem divinam acturo, quasi ea pretium sacrificii sit. Sed hanc calumniam jampridem antevererat S. Thomas 2. 2. quæst. 100. art. 2. ad 2. inquit: *Sacerdos non accipit pecuniam, quasi pretium consecrationis Eucharistiae, aut Missae decantandae:*

hoc enim esset simoniacum, sed quasi stipendium suae sustentationis. Et in 4. dist. 25. quaest. 3. art. 2. quaestione. 1. ad 4. Facere pactionem, inquit, de Missa celebranda est simoniacum semper. Si tamen non habet alios sumptus, et non tenetur ex officio Missam cantare, potest accipere danarios, sicuti conducti Sacerdotes faciunt; non quasi pretium Missae, sed quasi sustentamentum vitae. Hac etiam spectat Gersonius in opusculo de Sollicitud. Ecclesiast. tom. 2. partic. 19. pag. 603. edit. Antwerp. 1706, cum ait: sufficere in primis debet ad consensum hujus veritatis usus totius communis Ecclesiae, qui sic habet, et recipit, cui si quis deirahit, imprudenter se decipit. Et part. 6. p. 599. Nihil aequius, inquit, secundum omnem legem esse deducit Apostolus 1. ad Corinth. 9. quam qui altario deservit, de altario et vivat. Haec eadem, quae a D. Thoma aliisque pietate, ac doctrina praestantibus viris de honorario Missarum adversus haereticos, animadversa sunt, quadrant etiam in libellam Neapoli editam, cui titulus: *Dissertazione sull' onorario delle Messe*, de quo libello iudicium ediderunt veritatis, ac sapientiae plenum Scriptores Annalium Trivultiensium ad Menses Januarii, et Februarii an. 1740. In hoc libello eadem pene dicuntur, quae contra Missarum honorarium dicta, et a pluribus refutata sunt, tum potissimum recensentur mala, et incommoda, quae ex eo propter sacerdotum avaritiam oriri dicuntur. Sed huic rei satis provisum est a Synodo Tridentina Sess. 22. in decret. de observan. et evitan. in celebr. missae, cum sancivit, ut Episcopi cujusvis generis mercedum conditiones, pacta, et quidquid pro missis novis celebrandis datur: nec non importunas, atque illiberales elemosynarum exactiones potius quam postulationes, oliaque hujusmodi, quae a simoniaca labe, vel certe a turpi quaestu non longe absunt, omnino prohibeant: atque a Summis Pontificibus, praesertim Benedicto XIV, cujus praeclara ea de re est Constitutio 22, p. 34. l. 1. ejus Ballarii ed. Rom. seu Ven. 1754. Si qui sunt Sacerdotes, qui saluberrimis hisce legibus non obtemperant, non ideo tollendum est Missarum honorarium, uti nemo tollenda dicat beneficia, quoniam interdum simo-

niae causam praebent; itemque cetera bona, quoniam iis saepe hominum vitia abutuntur.

(2) Consule Benedictum XIV. *de Synod. dioeces.* lib. 5. cap. 9. et in *Instit. Eccles.* 56. Atque in omnibus quidem quae ad Missarum celebrationem pertinent, Episcopus tamquam delegatus Sedis Apostolicae etiam in exemptos jurisdictionem exercet, Benedictus XIV. in *Const. Accepimus* 17. t. 2. *Bullarii* p. 78. *ind. edit.*

(3) Walfridius Strabo *de Reb. Eccl.* cap. 22. col. 683. *Bibl. PP.* t. 10. *edit. Paris. cit.* visus est improbare consuetudinem, per quam sacrificium speciatim offertur pro illo, qui eleemosynam dedit, non plus illud ei prodesse ratus, quam coetui fidelium universo. Sed specialem pro certa persona sacrificii oblationem expresse docet S. Cyprianus *Epist.* 66. *ad Cler. et. Pleb.* *Furn. consisten.* col. 272. *edit. Maurin. Venet.* 1758; S. Augustinus *Confess.* lib. 9. c. 12. n. 32. *opp. t. 1. ed. Maurin. Ven.* 1756, et in *Respon. ad 2. Dulciii quaest. num. 4. tom. 11. col. 475*, Concilium Carthaginense III. *Canon.* 29., et IV. *Canon.* 79, apud Labbaeum *tom. 2. Concil. col. 1403. et 1443. edit. Venet.*, alique complures; quos collegit Mamachius *del Diritto libero della Chiesa ec. tom. 3, par. 1. p. 111. et seq. not. 2*, ubi ea de re graviter, copioseque agitur, quamquam sacrificium, si rem ipsam, ac praecipuum offerentem, nimirum Christum spectemus, vim infinitam habeat, tamen, ita Christo ipso volente, ejus effectus finitus est, et ideo plus ei, pro quo speciatim offertur, quam ceteris prodesse manifestum est. Aut enim sacrificium tamquam propitiatorium, seu satisfactorium habetur, et certe pro illo speciatim satisfacit, cujus debiti dissolvendi gratia Deo exhibetur; aut tamquam impetratorium habetur, et profecto Deum movet ad uberiora beneficia ei concedenda, pro quo Sacerdos offerens sacrificium Deum ipsum nominatim rogat. Rem ornem explicat diligenter D. Thomas in 4. *dist. 45. art. 4. quaestiuinc. 1. et 2.* Hinc triplex Missae fructus distinguitur: *Generalis, Specialis, Specialissimus*: *Generalis* ad totam Ecclesiam pertinet, *specialis* ad eum, pro quo nominatim offertur, *specialissimo* solus Sacerdos fruitur, praeterea nemo. Qui specialem sacrificii oblationem respuant, si ne

drobandas quidem putant speciales preces, quae pro aliquo funduntur. Sed alia est doctrina S. Cypriani, qui se pluries his precibus commendavit, alia ceterorum Patrum, alia Concilii Constantientis, quod damnavit 19. articulum Wicleffi agentis, quod *speciales orationes applicatae uni Personae per Praelatos, vel Religiosos non plus prosunt eidem, quam generales, ceteris paribus* t. 16. *Conc. col. 756. collect. Labbæi ed. Venet.*

§. LXVI. Et quamquam Missae, quae pro uno nominatim celebrantur, universam quoque Ecclesiam attingant, tamen Sacerdos pro eo speciatim offerre sacrificium debet, a quo eleemosynam accipit, nec licet Missam unam celebrare, ac pro pluribus stipendium accipere. Nam suam adstringunt fidem Sacerdotes, ut pro uno rem divinam agant; ac praeterea cavendum est, ne quis divinum illud opus in quaestum vertat, si pro pluribus stipendiis Missam unam celebrare liceret (1). Hinc qui propter beneficium, aut capellaniam, qua fruitur, tenetur onere celebrandae Missae, non potest pro eadem Missa eleemosynam accipere (2).

(1) Confer propositiones damnatas ab Alexandro VII. n. 8. 9. 10. in *Bullar. tom. 4. part. 6. Const. 520. pag. 85*, et Benedictum XIV *Const. Demandatam 87. §. 10. pag. 178 tom. 1. ejus Bullar.*

(2) Vide decreta Urbani VIII. in *Bullar. Const. 132. pag. 335. tom. 5. par. 5.* praesertim ad 4. dubium p. 340, et Innocentium XII. in *Const. Nuper 155. p. 464. t. 9. Bullar. ult. ed.* Consule etiam Benedictum XIV. in *Instit. Eccles. 36. 56. 92., et de Synod. dioces. lib. 5. c. 9., et Gagliardum in Instit. Canonic. lib. 2. tit. 7. n. 36. et seq.*, ubi de his omnibus, quae pertinent ad missarum eleemosynas, late disputatur.

S E C T I O IV.

D E P O E N I T E N T I A .

-
- | | |
|--|--|
| LXVII. Effectus et necessitas sacramenti poenitentiae. | LXXIX. Vetusti solemniss Poenitentiae gradus antiquati. |
| LXVIII. Ejus quasi materia. | LXXX. Absolutio quando danda? |
| LXIX. Confessio peccatorum. | LXXXI. Forma Sacramenti Poenitentiae. |
| LXX. Qualis confessio esse debeat? | LXXXII. Minister hujus sacramenti. |
| LXXI. Satisfactio, seu poenitentia. | LXXXIII. In ministro requiritur potestas ordinis, et jurisdictionis. |
| LXXII. Ea vel publica vel privata. | LXXXIV. Unde sumitur potestas jurisdictionis. |
| LXXIII. Antiqui poenitentium gradus, seu stationes. | LXXXV. Casus Episcopo reservati. |
| LXXIV. Flentes, et audientes. | LXXXVI. Casus reservati Summo Pontifici. |
| LXXV. Substrati, et Consistentes. | LXXXVII. Omnia crimina Ecclesiae potestati subiecta. |
| LXXVI. Stationum Poenitentiae tempora. | |
| LXXVII. Poenitentiam vita. | |
| LXXVIII. Poenitentiam restituendorum tempus. | |

§. LXVII.

Dei gratiam baptismo quaesitam, ac postea nostris criminibus amissam per sacramentum Poenitentiae recuperamus. Itaque quantum ad aeternam salutem necessarius est baptismus nondum regeneratis, tantum est necessaria poenitentia iis qui post baptismum criminis rei facti sunt (1); et recte hoc sacramentum *secunda post naufragium tabula* appellatur (2); quoniam in eo spes est posita, ac salus eo-

rum, qui se contagione scelerum contaminarunt. Dicitur etiam hoc sacramentum *reconciliatio et absolutio, et confessio, et manuum impositio reconciliatoria* (3), Μετανοια, Εξομολογησις (4) nuncupatur. Desinitur a Theologis sacramentum, quo lapsis post baptismum contritis, confessis, ac satisfacere proponentibus absolutio a peccatis tribuitur.

(1) Concilium Tridentinum *Sess. 14. cap. 2. de Sacram. poenit.*

(2) S. Hieronymum *Ep. 84. ad Pammach. num. 6. col. 524. tom. 1. opp. edit. Veron.*

(3) Concilium Arausicum I. *Can. 3.* apud Labbaeum *t. 4. col. 702. edit. Venet.* Sed in Concilio Carthaginensi IV. *Can. 76. col. 1443. tom. 2* apud eamdem Labbaeum dicitur simpliciter *manuum impositio.*

(4) Exomologesis vocabulum et confessionem, et criminum poenitentiam significat, quod late ostendunt Fratres Ballerinii *Not. 40. in S. Zanonem lib. 2. tract. 14. pag. 197. tom. 1. edit. August. Vindel. 1758.*

§. LXVIII. Hujus sacramenti quasi materia sunt actus Poenitentis Contritio, Confessio, Satisfactio (1). Qui actus omnes in Poenitente sunt necessarii, ut integrum sit sacramentum, atque ut ipse plenam, perfectamque suorum criminum veniam consequatur, et ideo poenitentiae partes dicuntur. Contritio est animi dolor, ac detestatio de peccato commissum cum proposito non peccandi de cetero (2); eaque duplex est, altera charitate perfecta, quae cum sacramenti voto conjuncta hominem Deo reconciliat, priusquam hoc sacramentum actu suscipiatur: altera imperfecta, quae attritio dicitur, quoniam vel ex turpitudinis peccati consideratione, vel ex gehennae, et poenarum metu communiter accipitur, eaque si voluntatem peccandi excludat, cum spe ve-

niae , peccatorem ad Dei gratiam in Sacramento Poenitentiae impetrandam disponit (3).

(1) Eugenius IV. in *Decreto Concilii Florent.* col. 440. tom. 9. collect. concilior. Hardaini. Concil. Tridentinum Sess. 14. cap. 3. de Sacram. Poenit. , Catechismus Romanus par. 2. cap. 5. §. 13.

(2) Concilium Tridentinum loc. cit. cap. 4.

(3) Concilium Tridentinum *ibid.*

§. LXIX. Confessio est peccatorum accusatio , eo suscepta , ut virtute clavium veniam impetremus. Accusatio inquam , quoniam nostra scelera non ita commemoranda sunt , quasi ociosis auditoribus rem gestam narraremus , sed accusatorio animo ita enumeranda , ut ea etiam in nobis vindicare cupiamus (1). Omnibus post baptismum lapsis integra peccatorum confessio jure Divino necessaria est : quoniam Christus Dominus ad caelos migraturus Sacerdotes sui ipsius Vicarios reliquit , tamquam praesides , et judices , ad quos omnia Christianorum mortalia crimina deferantur , ut pro clavium potestate remissionis , aut retentionis peccatorum sententiam proferant. Quod judicium ferri , et justa , quae facinori debetur , poena imponi non potest , nisi omnia singillatim , ac perspicue crimina aperiuntur (2).

(1) Consule Catechismum Romanum par. 2. capit. 5. §. 33.

(2) Concilium Tridentinum Sess. 14. de Sacram. poenit. , cap. 5.

§. LXX. Itaque omnia mortalia peccata, quae post omnes excussas animi latebras diligenter cogitanti occurrunt, Sacerdoti aperire oportet, ac praeterea patefaciendae sunt *circumstantiae, quae speciem peccati mutant* (1). Cuncta haec apud solius Sacerdotis aures secreto deponuntur (2). Publicae confessionis multa extant in antiquis monumentis exempla, eaque justas habuere causas. quas laudant Tridentini patres: sed nulla unquam Ecclesia lege publicae confessionis necessitas imposita est (3). Olim sedentes peccata confitebantur (4), qui nunc etiam mos Graecorum est (5); hodie Latini genua flectunt, quam consuetudinem a Monachis, ut videtur, arreptam saeculo XIII usurpare coeperunt (6).

(1) Confer Concilium Tridentinum *loc. cit.*

(2) De Sacramentali Confessione, quae apud Sacerdotis aures absolvitur, quamque semper agnovit, ac probavit Ecclesia, late inter ceteros agit Jueninius *de Sacram. Diss. 6. quaest. 5. art. 2.*, collectis unoquoque saeculo Patrum testimoniis, aliisque ecclesiasticis monumentis, unde intelligitur, illam semper fuisse, quae nunc est, ea de re Ecclesiae sententiam. Quare, ut reete monet Julius Laurentius Selvagus *Antiquit. Christian. lib. 3. cap. 12. §. 42.*, risu potius quam solida confutatione excipiendum est commentum eorum, qui contendunt, Innocentium III. auricularem confessionem excogitasse vetustati prorsus inauditam. Ac multa quidem adversus catholicam de auriculari confessione doctrinam sunt, semperque fuerunt impetus, et conatus haereticorum, qui nullo prorsus modo peccandi licentiam coerceri vellent. Ut mittam Valdenses, Albigenses, Wicleffianos in Calvinianis redivivos, Joannes Dallaeus Calvinianus Minister libros quatuor contra auricularem confessionem in lucem edidit. Sed ejus, ac ceterorum haereticorum deliramenta lata refutavit Natalis Alexan-

der *Hist. Eccles. saec. 13. c. 14. tot. diss. 14. pag. 501. et seq. tom. 8. edit. Venet. cit*; ejusdemque etiam Dallaei ratiunculis, atque commentis satisfecit peculiari tractatu, et responsione Dionysius Sanmarthanus Monachus e Congregatione S. Mauri. Videndi etiam sunt Emmanuel Schelestratus de *Concil. Antiochen. tot. cap. 9. a pag. 231. usque ad 307. Mabillonius Praefat. ad saec. 3. Benedictin. num. 80. seq. p. XXXVIII. tom. 3. ed. Venet. an. 1734.*, Jueninius de *Sacramen. quaest. 3. diss. 6. art. 2. cap. 1.*; Drouvenius de *Re sacram. lib. 6. quaest. 5. cap. 1. Tournelyus Praelect. theol. de Sacram. Poeniten. qu. 6. art. 2.*, Selvagius *cit. cap. 12. per tot.*, aliique complures, qui catholicum dogma de auriculari confessione latissime ostendunt. Dallaei, ac ceterorum haereticorum errores novissime renovavit Eybelius libello edito Vindobonae an. 1784, cujus titulus latine redditus est: *Quid continent documenta antiquitatis Christianae de auriculari confessione?* quo quidem Libello totus Eybelii labor, et totum ingenium est in recoqueuda crambe toties recocta, atque in alienis erroribus describendis. Deterrimum, et dignum homine haeretico librum merito damnavit sapientissimus idem optimus Pontifex PIUS VI Apostolicis litteris *Mediator Dei* datis die 11 Novembris 1784. Illud non omittam, etiam hostes sacramentalis confessionis experiundo discere, ac fateri debuisse, quam utilis, quamque necessaria ea sit non tantum ad salutem Animarum, sed etiam pro communi Reipublicae bono ad vitia comprimenda, virtutesque inducendas. Hinc, uti narrat Sotus oculatus testis in *4. dist. 18. quaest. 1. art. 1.* cum propter abrogatam a Luthero sacramentalem confessionem virgines Deo dicatae ex monasteriis ereptae, furta, raptus, adulteria, aliaque multa, eaque gravissima mala erupissent, Norimbergensis Civitas Carolum V. Imperatorem publica supplicatione exoravit, ut ibi sacramentalis confessio restitueretur, quoniam tot, ac tantorum scelerum copia nonnisi ex ejus abrogatione processerat.

(3) Confer S. Leonem M. *Ep. 140 opp. tom. 2. p. 492 ed. Rom. 1765.*, et Concilium Tridentinum *loc. cit.*

(4) Consule Martenium *de Antiq. Eccles. rit. lib. 1. cap. 6. art. 3. §. 5. pag. 265. tom. 1. cit. ed. Ven.*

(5) Vide Leonem Allatium *de Consens. Eccl. Occid. et Orient. lib. 3. cap. 9. num. 6.*

(6) Vide Martenium *loc. cit.*

§. LXXI. Satisfactio est poena, quae poenitenti arbitrio Sacerdotis imponitur. Per sacramentalem absolutionem remittitur quidem culpa, removenturque poenae in inferis constitutae; sed tamen saepe remanent peccatorum reliquiae, et quae criminibus debetur, poena certo tempore definita (1). Nam omnis aequi ratio postulat, ut pro illatis Deo injuriis aliquid persolvamus; et consentanea est Divinae clementiae compensatio, quam ipse postulat, ut ea sit frenum, quo diligentius contineamur in officio, atque a criminibus, pravaque consuetudine abstrahamur (2). Itaque necessaria est satisfactio, per quam eluatur quidquid sordium propter peccati maculam in Anima resedit, ac solvamus poenis temporariis, quibus tenebamur (3).

(1) Concilium Tridentinum *Sess. 14. de Sacram. Poenit. Can. 12. 13. 14. 15. Catechismus Romanus par. 2. cap. 5. §. 65.*

(2) Concilium Tridentinum *Sess. 14. cap. 8. de Sacram. poenit., Catechismus Romanus loc. cit. §. 52. et 66.*

(3) Catechismus Romanus *loc. cit. §. 64.*

§. LXXII. Haec satisfactio passim dicitur poenitentia, eaque vel publica est, quae publice, et coram Ecclesia; vel privata, quae clam, et privatim absolvitur. Mortalia peccata palam admissa publica poenitentia expianda esse, constans semper Ec-

clesiae doctrina fuit, ut ita publicae offensioni satisfiat (1). Sed et publica pro gravioribus criminibus, licet occultis, poenitentia frequens olim erat (2); qui etiam felicissimis illis Ecclesiae temporibus multi erant, qui sceleris puri publicam poenitentiam sponte suscipiebant.

(1) Apostolus I. *ad Timoth.* V. 10., Concilium Tridentinum *Sess. 24. de Reform. cap. 8.*

(2) Frequentissimam fuisse olim publicam occultorum, eorumque graviorum criminum poenitentiam, inter omnes constat; verum magna inter eruditos disputatio est, num hujus, pro occultis criminibus, publicae poenitentiae necessitas aliqua unquam Ecclesiae lege imposita fuerit. Joannes Morinus *de Poenit. lib. 5. cap. 8.* Natalis Alexander *Hist. Eccl. saec. diss. 6. p. 54. tom. 4. ed. Venet. 1774.*, alique complures, Ecclesiae lege sancitum putant, ut rei graviorum criminum, qualia erant idololatria, homicidium, adulterium, aliaque his affinia, licet ea essent occulta, publicam poenitentiam agere cogerentur. Contra vero Bellarminus *in Contr. de Poenitent. tit. 3. cap. 14. opp. tom. 3. pag. 501. edit. Venet. 1721.*, Sirmondus *Hist. poenit. pub. cap. 2. et 3 opp. tom. 4. pag. 482. et seq. ed. Paris. 1696* Jacobus Petitus *ad Theodor. Cantuarien. poenit. tom. 2. ad calcem pag. 61. et seq.*, Constantinus Roncaglia *in Not. ad Natal. Alexandr. loc. cit. p. 69.*, atque alij bene multi, nullam fuisse putant Ecclesiae legem, qua propter occulta crimina, licet gravissima, publica poenitentia imponeretur. Longum esset in hac quaestione immorari; confer tamen Tournelym *Praelect. theol. de Sacram. Poenit. quaest. 8. art. 3.* et Robertam Salam *in Not. ad Card. Bonam rer. liturg. lib. 1. cap. 71 §. 6. not. 4. pag. 380. et seq. tom. 1. ed. Taurin. 1747.*, qui de ea multis disputant.

§. LXXIII. Publica poenitentia nullis certis de-

finitis spatiis, atque solemnibus initio peracta est, eaque tota erat posita in ejectione ab Ecclesia, laboriosisque operibus, quae rei criminum suscipere cogebantur (1). Sed post schisma Novatianum, quod medio fere tertio saeculo erupit, certa, atque solemnina agenda poenitentiae spatia sunt constituta; ut ita vel externis ritibus Ecclesia occurreret Novatianis, qui dimittendi graviora peccata post baptismum admissa in Ecclesiae potestatem esse negabant (2). Omnis haec solemnitas, atque omnes hi ritus consistebant in certis gradibus, sive stationibus; quae quatuor numero erant, *Fletus, Auditio, Substratio, Consistentia* (3).

(1) Consule Martenium *loc. ind. art. §. 1. p. 266.* Sane ab Ecclesiae primordiis usque ad aetatem Montani, et vero etiam Tertulliani nullum fuisse solemne tempus agenda poenitentiae constitutum, patet ex silentio Tertulliani, qui nusquam ejus rei meminit, quamquam de poenitentia egerit, itemque ex silentio eorum, qui ante Tertullianum floruerant. Idem jus fuisse a Montano ad Novatianum, eorum, qui per ea tempora scripserunt, ac praesertim Cypriani silentium ostendit. Quin etiam constat ex eorum temporum monumentis, rem hanc totam Episcopi arbitrio gestam fuisse, licet post Montanum diuturniores quam antea, poenae dari consueverint, quae omnia late persequitur Jueninius de *Sacram. diss. 6. c. 4. art. 4. §. 1. et 2.*

(2) Confer Card. Bonam *Rer. liturg. lib. 1. c. 17. §. 3* ibique Salam in *Not. p. 563. tom. 1. ed. Taur. 1747.*, Morinum de *Poenit. lib. 4. c. 1. n. 3.* Albaspinæum *Observ. l. 2. c. 22. p. 111. ed. Neap. 1770.*

(3) Quatuor hos poenitentiae gradus, ut observat Natalis Alexander *Hist. Eccl. saec. 3. diss. 8. t. 4. p. 77. ed. Ven. 1776,* primus singillatim, ac distincte S. Gregorius Neocaesariensis cognomento Thaumaturgus *Can. ult. epistolae canonicae* memoravit. Negat Morinus hunc

canonem revera Gregorii esse : sed eum refellit Natalis Alexander *loc. c.* Eorumdem graduum mentio est apud S. Basilium *Ep. 199. can. ad Amphil. 2. can. 22. et Ep. 217. can. 3. can. 56. et seq. 65. 75. 77. 80. 81. 83. opp. t. 3. p. 293. st 326 et seq. ed. Maurin. Paris. 1730.*, Concilium Ancyranum *Can 6. 16. 17. t. 1. coll. Harduin col. 273. et 277.*, et Trullanum *Can. 87. col. 1691. tom. 3.* Apud Latinos jam inde a IV. saeculo Poenitentium divisiones fuisse , ostendunt Ecclesiae per ea tempora aedificatae , ac praesertim antiquissima Basilica S. Clementis , de qua videndi Joannes Ciampinius *Vet. Monum. Mus. p. 1.*, et Philippus Rondininius , qui de ea peculiarem librum edidit. Hos etiam poenitentium gradus , et ordines in vetustis Urbis Basilicis extitisse Ciampinius ostendit *l. c.* Consule Morinum , Albaspinæum , Martenium *l. ind.*, itemque Christianum Lupum *in Schol. ad Can. 11. sonc. Nicocni opp. t. 1. pag. 254. edit. Ven. 1724.*, et ceteros recentiores sacrorum rituum scriptores , qui singulos Poenitentium gradus accurate describunt.

§. LXXIV. Primo gradu erant *Flentes* ; qui scilicet extra Ecclesiam in porticu commorabantur , ac lugubri induti veste , sparsisque crinibus , et cinere , ac cilicio sordidati peccata sua publice confitebantur , et flentes , saepeque etiam ad pedes provoluti fideles , qui Ecclesiam ingrediebantur , rogabant , ut sibi a Deo , atque Episcopo poenitentiae locum impetrarent (1). Ii potius candidati poenitentiae , quam veri poenitentes erant. Proximum tenebant locum *Audientes* , qui scilicet Ecclesiae narthecem ingressi Divinam Scripturam , sacrasque conciones audiebant , quibus finitis , cum reliquis audientibus , sive ethnicis , sive catechumenis ab Ecclesia exire jubebantur (2). Erat hic gradus , et beneficii , et opprobrii loco : beneficii inquam , quod iterum poenitentia digni habebantur , opprobrii autem , quod

iterum mittebantur ad audienda fidei rudimenta , quae, quod graviter peccassent, vix didicisse videbantur.

(1) Vide Cyprianum *de Lapsis* p. 77. *ed. Paris.* et epistolam Cleri Romani ad Cyprianum *Epist.* 31. p. 45. ubi flentium status graphice describitur. Ambros. *de Poenit.* lib. 1. c. 16. *opp. col.* 523, et *de Laps. Virg.* c. 8. *col.* 392. 1. 3., Concilium Agathense *Can.* 15. 1. 2. *col.* 999., Barchinonense 1. *Can.* 6. *col.* 1434. 1. 2. Toletanum III. *Can.* 22. *col.* 481. *tom.* 3. *coll.* Harduini. Apud Basilium *Ep.* 217. *ad Amphilochoium* *Can.* 55. *opp. tom.* 3. p. 326. *ed. Paris.* de voluntario homicida, quem inter flentes per triennium esse jubet, habentur haec: *quatuor annis deflere stans extra fores domus orationis*, haec autem *Can.* 75. p. 382. de incesto, qui sororem vitiavit: *triennia defleat stans ad fores domus orationis*. Antiqua monumēta Ecclesiastica memorant etiam *Hyemantes*, qui *Flentibus* inferiores erant, quoniam extra tectum Ecclesiae pulsus sub dio poenitentiam agere cogebantur. Praesertim Ancyra Synodus *Canon.* 17. apud Labbaeum *tom.* 1. *col.* 149. Gentiano Herveto interprete *ed. Ven.*, eos qui *rationis expertia animantia inierunt*, et qui *leprosi sunt, vel fuerunt*, jussit inter *hyemantes* orare. Vnum hic gradus aut a *Fletu* non differebat, ut quidam patant, aut erat veluti extra ordinem gradus in quo rei gravissimorum quorundam criminum versabantur, quoniam ordinarius poenitentiae cursus conficiebatur ex quatuor illis gradibus, quos recensuimus. Erant inter *Hyemantes* majori excommunicatione percussi, ac plane ab Ecclesia praecisi, quo etiam in loco, procul scilicet a porticu, jussi sunt stare leprosi, ne ceteros inficerent, et qui cum brutis, aut contra naturam luxuriabantur, quos monstra, et furias appellabant. Confer Card. Bonam *loc. cit.* §. 5., ibique Salam *Not.* 2. p. 374. et 377. *tom.* 1., Albaspinæum in *Not. ad cit. can.* 17. *Ancyra.* p. 203. *ed. Neap.* 1770, et Selvagium *Antiq. christ.* l. 3. c. 11. §. 21. *not.* 27. a qui-

bus de hyemaetibus, deque leprosis , qui in hoc loco erant, late disseritur.

(2) Memorant *Audientes* S. Gregorius Thaumaturgus *loc. cit.*, S. Basilus *cit. Epist. can. 57. p. 316.* Concilium Nicaenum *Can. 19. col. 466. tom. 1. collect. Harduini.* Similiter S. Gregorius Nyssenus in *Epist. canon. ad Letojum Episc. Militenen. canon. 4. et 5. pag. 951. et seq. tom. 1. ed. Paris. 1651*, haec adversus homicidam voluntarium post novem annos in fletu exatos statuit: *tot annos in auditione permanent, sola Doctorum, et Scripturarum auditione dignus habitus.*

§. LXXV. In tertio gradu erant *Substrati*, seu *Genusflectentes*, qui stabant intra Ecclesiae ambitum usque ad ambonem; ubi post ejectos *Audientes* in genua provoluti (1) manuum impositionem sub precibus accipiebant, inde etiam ab Ecclesia exhibant; interim vero jejuniis, precibus, durisque et laboriosis operibus exercebantur (2). Quartus denique gradus erat *Consistentium*, qui ita dicebantur, quod post ejectos Catechumenos, ceterosque poenitentes cum fidelibus in Ecclesia consisterent, precesque fundarent (3). Hi participes quidem erant precum, quae fidelium dicebantur, sed non item corporis, et sanguinis Christi, neque eorum oblationes recipiebantur; quo factum est, ut quarta haec poenitentium statio interdum *Segregatio*, et *Separatio* diceretur.

(1) Illud quasi praetereuntes animadvertemus, non solum Poenitentes Presbyteris, atque Episcopis praesertim advolvi solitos fuisse, sed et fideles id obsequii genus adversus illos a primis Ecclesiae saeculis praestare

~~consuetudinem~~ *Ubiq. 1112* orta est ethnicorum calumnia apud

Manucium Felicem Octavius p. 333 *epist. laud. Christianos Antistitis, ac Sacerdotis, quasi parentis sui, adorare naturam.* Unde intelligitur, quam graviter desipiant, qui nostras adgeniculationes, seu genuflexiones ad Romani Pontificis Christi Vicarii pedes irridunt: cum exploratissimum sit, hanc reverentiam ab antiquis Ecclesiae saeculis etiam in Episcopos, et Sacerdotes semper adhibitam fuisse. Et Summo quidem Pontifici hoc semper obsequii genus Christianus adhibuisse, ejusque pedes osculari solitos fuisse, compertum est. In actis antiquissimis S. Susannae Virginis, et martyris, quae recitat Cardinalis Baronius ad an. 294. n. 10. p. 271. t. 3 ed. Lucae de Praepedigna Claudii uxore narratur, quod audita viri tanta a Deo facta mutatione repente ad Cajum Papam se contulit, ad pedesque concidens, eos ex more exosculata, aequae se ad fidem recipi postulabat. Cum autem id ex more factum dicatur, perspicuum est, ab ipsis Ecclesiae primordiis fieri consuevisse; quod et paulo post confirmatur in hisdem actis, ubi de eodem Cajo Pontifice dicantur haec: *ad cujus adventum qui erant congregati in domo Gabinii, in terra prostraverunt se omnes ex more.* Eadem etiam de Maximo occurrunt. Vetustus Ordo Romanus, qui Gelasio tribuitur, apud Mabillanum Ord. I. n. 11. Ord. II. n. 8. III. n. 10. p. 9. 45, et 56. ed. Paris. 1689 Diaconum inducit osculantem pedes Pontificis, antequam Evangelium legat. In vitis Romanorum Pontificum, quae Anastasio tribuantur, pluries mentio est obsequii, quo Imperatores Summum Pontificem exceperunt. Cum Joannes I. an. 525. Constantinopolim adiit, eum summo honore persequuti sunt, sed praesertim Justinianus Augustus dans honorem Deo humiliavit se pronus, et adoravit Beatissimum Papam Joannem. Vide Baronium ad an. 525. n. VI. t. 9. p. 341. ed. Lucae 1741. Non multo post Agapetus simili honore exceptus fuit, quoniam piissimus Augustus Justinianus gaudio repletus humiliavit se S. Sedi Apostolicae, et adoravit Sanctissimum Papam Agapitum. Etiam Justinianus II. ineunte VIII saeculo hoc ipsum obsequium praestitit adversus Constantinum Summum Pontificem: *in die autem qua se invicem viderunt, Augustus Christianissimus cum regno in capite sese prostravit, pedes*

osculans Pontificis, deinde in amplexum mutuum coruerunt. Anastasius Bibliothecarius in *Vitis sum. Pontificum* t. 1. Sect. 88. p. 95. Sect. 96. p. 102., et Sect. 173. p. 160. ed. Rom. 1735. Mitto cetera, quae fusius, et uberius explicat Cajetanus Cennius *Diss.* 6. inter ejus dissertationes Pistorii editas an. 1778. t. 1. pag. 171. et seq. Vide Thomassinum *Vet. et. nov. Eccl. discipl. par.* 2. lib. 3. c. 65., et Dominicum a SS. Trinitate *Biblioth. Theolog.* tom. 5 par. 2. l. 4. sect. 11. c. 42.

(2) Vide Concilium Ancyranum *Can.* 16. apud citat. Labbaeum tom. 1. col. 1491. ejusd. edit., ubi potissimum de substratis agitur. Erat substratorum statio intra Ecclesiae ambitum a portis usque ad ambonem, videlicet parvum illud, atque altius aedificium, ex quo legebantur Epistolae, et Evangelium, Dyptica recitabantur, atque ad populum conciones habebantur. Adhuc Romae extant vetusti quidam ambones in Ecclesia S. Clementis, SS. Nerei et Achillei, aliisque Ecclesiis, ac de iis late scripserunt Du-Cangius in *Not. ad Pauli Silentarii descript. Templi S. Sophiae* n. 75. et seq. ac in *Glossar-med. et inf. latin. verb.* Ambo. Thiersius in *Diss. eccl.* n. 2. Rondinini de *Eccles. S. Clem.* pag. 95.

(3) Concilium Nicaenum *Can.* 11. col. 328. t. 1. *Collect.* Harduini hunc gradum vocat *communicare cum populo orationibus* ὁμιλία προσώπου sine oblatione, et *Can.* 4. et seq. col. 27. t. 1. *Collect.* Harduini utitur his formulis: *communicent sine oblatione: sola oratione communicent; communionem ad preces assequantur.* Quae formulae etiam apud plures Latinos Patres occurrunt. Consistentium in Ecclesia locum fuisse ab Ambone usque ad Altare, inter omnes constat; sed non ita exploratum est, num permixti cum fidelibus, nullo discrimine, an potius ab iis loco disjuncti fuerint. Verisimilius tamen est, eos fuisse sejunctos: nam secus ad cancellos sanctuarii accedere potuissent, a quibus non offerentes, et non communicantes arcebantur.

§. LXXVI. Certa erant stationum spatia pro singulis criminibus constituta; sed ea tamen pro gra-

vitae delicti longiora, aut breviora erant (1): et vero rei gravissimorum quorundam criminum toto vitae curriculo poenitentiam agere cogebantur (2). Episcopus stata tempora pro vario poenitentium studio contrahabat, aut producebat arbitrato suo; et hoc quidem Episcopi arbitrium interdum tam late patebat, ut posset poenitentes ex auditione ad Consistentiam, omitta Substratione traducere (3). Longius, ut plurimum, erat tempus substationis, quoniam haec statio ad eluendas animorum sordes proprie erat instituta, et interdum anno decimoquinto solvebatur (4).

(1) Concilium Ancyranum *Canon. 5. col. 273. t. 1. coll. Harduini. S. Basilii Epist. 217. ad Amphilocho. fere per tot. opp. t. 3. pag. 324. et seq. edit. Paris cit.*

(2) Hujusmodi poenitentiam Concilium Eliberitanum *Can. 3. coll. 249. t. 1. collect. Harduini* constituit adversus eos, qui Flaminis, sive ethnici Sacerdotis officium suscepissent, et *Can. 13. col. 250.*, adversus mulierem duobus fratribus nuptam; Arelatense l. *Can. 14. col. 265. t. 1. adversus eos, qui falso fratres accusaverant; Ancyranum Can. 16. col. 277. Valentinum in Gallia Can. 3. col. 790. eod. t. 1. Ilerdense Can. 5, col. 1065. t. 2. adversus aliorum criminum reos. Confer Muratorium Antiq. Italic. medii aevi. 5. diss. 68.*

(3) Concilium Nicaenum *can. 11. col. 1065. t. 2. coll. Harduini.*

(4) Concilium Ancyranum *can. 16. loco mox laud.*

§. LXXVII. Toto illo temporis cursu, quo Poenitentes in iis stationibus versabantur, multas ede-

re debebant dolentis animi significationes, seque etiam a multis, quae ceteris licebant, abstinere. Et vero cinere aspersi, et operiti cilicio (1), ac mares vel raso capite, vel tonsis capillis, mulieres autem aut sumpto poenitentiae velo, aut passis, tonsisve crinibus poenitentiam accipiebant (2). Praeterea corpus jejuniis cruciabant, eleemosynas dabant pauperibus, iis etiam diebus, quibus ceteri fideles stantes orabant, flexis genibus preces fundebant, seque a balneis, conviviis, ipsoque matrimonii usu abstinabant (3).

(2) Cilicium erat vestis aspera ex pilis animalium contexta, quae totum corpus operiebat, Ambros. *de Laps. virgin. cap. 8. num. 35. opp. tom. 5. col. 342. edition. Maurin. Venet. 1751.*

(2) Concilium Agathense *Can. 15. col. 999. t. 2. coll. Harduini, Toletanum III. Can. 12. col. 481. t. 3. Collect. ejusd.; Ambrosius loc. cit. Hieronymus Ep. 77. n. 4. col. 456. opp. t. 1. ed. Vallarsii Veron. Velum poenitentiae, quod mulieres sumebant, memorat Optatus Milevitanus lib. 2. Contra Permanian. pag. 58. edit. Paris. 1676.*

(3) Consule Martenium *de Antiq. Eccles. rit. lib. 1. cap. 6. art. 4. t. 1. p. 266. et seq. edit. c.*, a quo haec omnia accurate describuntur.

§. LXXVIII. Certus erat poenitentium restituendum dies (1), nisi justa adesset causa, propter quam id celerius faciendum videretur (2). Nam citius restituebantur ii, quos martyrum libelli commendarent, qui ad martyrium erant comparandi, qui illustrem Christo piis et obsequentis animi significationem edidissent, qui in vitae discrimine versaren-

tur; idem denique fiebat, si quid inde mali ab Ecclesia amoveretur, aut si quid boni in eam redundaret (3). Qui etiam multi erant, qui sua crimina privata poenitentia expiabant, neque publicam subire cogebantur, quamquam graviora flagitia admisissent. Hujusmodi erant juvenes proptereaetatis fragilitatem (4), et mulieres adulterae, quoniam publica poenitentia, quae certum erat earum criminis monumentum, iis mortis causa esse poterat (5); et conjugati, nisi conjugis consensus accederet (6); et clerici majores, qui clam in monasterio sua crimina dessebant, nisi publicam poenitentiam sponte susciperent (7).

(1) Feria V. in coena Domini olim poenitentes reconciliari consuevisse, demonstrat Innocentius I. in *Ep. ad Decentium Eugubin. cap. 7. col. 862.*, apud *Constantium Epist. Roman. Pontif.* Haec quidem consuetudo erat Ecclesiae Romanae, aliarumque Occidentalium Ecclesiarum, quae ejus ritus susceperant. Verum in Mediolanensi Ecclesia Poenitentes reconciliari solebant feria sexta majoris hebdomadae, uti patet ex S. Ambrosio *Ep. 20. ad Marcellinam soror. n. 2. 6. col. 908. t. 3.* et in *Hexaemer. lib. 5. cap. ult. col. 130. tom. 1. edit. Venet. indic.* Eandem quoque consuetudinem viguisse in Hispaniis, atque in quibusdam Gallicanis Ecclesiis, ostendit Martenius *de Antiq. eccles. rit. lib. 1. cap. 6. art. 5 §. 10. tom. 1. pag. 21.*

(2) Confer Alaspinaeum in *Can. 25. Concil. Eliberit. pag. 167. edit. Neapol. 1770.* et Natalem Alexandrum *Histor. eccles. saec. 3. tom. 4. pag. 46. edit. Venet. 1676.*

(3) Late haec omnia persequitur, et multis confirmat monumentis Natalis Alexander *loc. citat. dissert. 9. pag. 30.*

(4) Concilium Aurelianense III. *Can.* 23. *col.* 1428. *tom.* 2. et Agathense *Can.* 15. *col.* 1000. *tom.* 2. *Col-lect.* Harduini.

(5) S. Basilus *Can.* 51. ibique Balsamon, et Alexius Aristinus in *Scholiis* apud Beveregium in *Pandectis tom.* 2. *par.* 1. *p.* 47. Consule Card. Bonam *Rer. liturg. lib.* 1. *cap.* 17. §. 5 ibique Salam *Not.* 1. *p.* 373. *et. seq. tom.* 1. *laud. ed. Taurin.*

(6) Concilium Arelatense III. *Can.* 22. *col.* 775. *l.* 2. *Col.* Harduini.

(7) Siricius P. *Ep. ad Himerium Tarraconen. Ep.* *cap.* 14. *col.* 636. apud Constantium *loc. cit.*, Hieronymus *Ep.* 147. *ad Sabinian. Diacon.* *col.* 1078. *tom.* 1. *cit. ed. Veron.* Confer Morinum *Exerc. eccles. lib.* 2. *exerc.* 14. , Natalem Alexandrum *Dissert.* 11. *p.* 89. *loc. cit.*, et P. Constantium *de Poenit. major. Cleric. in Thesaur. Theolog. tom.* 12. *opuse.* 12. *p.* 19.

§. LXXIX. Solemnes illi, quos numeravi, publicae poenitentiae gradus jampridem antiquati sunt (1); et nunc poenitentia arbitrio Sacerdotis imponitur. Quod eo spectat, ut non certae, sicuti olim fiebat (2), pro singulis criminibus constitutae a canonibus poenae infligantur; verum Sacerdotes debent *salutares, et convenientes satisfactiones injungere* (3), quae scilicet apte conveniant ad novae vitae custodiam, atque ad peccatorum castigationem. Hinc poenitentiae ministri, ut suo recte munere fungi possint, scire debent canones poenitentiales, ut inde criminum gravitatem, et dignam crimine poenitentiam noscant (4).

(1) Solemnes publicae poenitentiae gradus Constantinopoli sustulit Nectarius Patriarcha Constantinopolitana. *Der. Inst. Can. Tom. II.*

nus, cujus exemplum etiam reliquae Graecorum Ecclesiae brevi sequutae sunt. Consule Cl. Franc. A. Zachariam, qui rem totam diligenter explicat *Diatrib. de Poenitentia Constantinopoli sublata a Nectario, in Thesaur. Theolog. tom. 11. pag. 290.* In Occidente vetus illa disciplina diutius obtinuit. Nam Latini octavo exeunte, nonoque ineunte saeculo gradus illos integros retinebant, ut patet ex capitularibus Caroli M., et Ludovici Pii lib. 5. cap. 156. apud Balutium *Capit. Reg. Francor. tom. 1. col. 569. ed. Ven. 1772.* Medio saeculo IX. solemnes poenitentiae ritus memorat Nicolaus I. *Ep. ad Rivoladrum Episcopum, apud Labbaeum tom. 8. concil. col. 503. edit. Venet., et Epist. 24. ad Hincmar. Remens. col. 513., et Concilium Wormatiense, an. 868. Can. 3. col. 742. t. 5. collect. Harduini.* Sed iis in locis tantum tres Poenitentiae gradus describuntur, scilicet Fletus, Auditio, Consistentia, omittitur autem Substratio, quod etiam fit in epistolis Summorum Pontificum, et decretis Conciliorum, quae ad eam aetatem pertinent. Denique saeculo XII. gradus illi poenitentiae apud Latinos fere ubique desierunt, atque ejus mutatae disciplinae causae praesertim fuerunt canonicae poenitentiae commutatio cum certis precibus, et corporis flagellis, cum pecunia collata in pauperes, atque in alios pios usus conversa, aut cum laborioso aliquo opere, quod in bonum Ecclesiae redundaret; et ideo peccatores saepe sunt jussi arma capere contra haereticos, aut infideles, et communis prope Theologorum ejus aetatis sententia fuit, poenitentiam in foro conscientiae Sacerdotis arbitrio esse constituendam, quae omnia late enarrat Morinus *de Poenit. lib. 10. cap. 16. et 25.*

(2) Magna erat veterum Patrum cura, et diligentia, ut propria remedia, et justa pro unoquoque crimine poenitentiae tempora constituerentur. Ea de re agebatur in conciliis, ubi plures conditi sunt canones, consulebantur etiam primarum sedium Episcopi, et qui ceteris pietate, ac doctrina praestarent; et hi suas dabant litteras, quibus aptam, et idoneam ad singula crimina poenitentiam, et ejus quoque tempus stabiliiebant. Hinc collecti sunt *canones Poenitentiales, ex quorum aucto-*

ritate poenitentiae imponebantur; et ideo cum Episcopi synodum habebant, inter cetera monebant Presbyteros, ut non ex corde, sed sicut in poenitentioli scriptum est, poenitencias darent, apud Reginonem lib. 1. cap. 98. Similiter Episcopi cum dioecesim lustrabant, illud in primis quaerebant, num presbyter haberet librum poenitentialem, et num secundum ejus leges poenitentiam imponeret, ut patet ex Barchardo lib. 1. cap. 94. et Reginone lib. 1. cap. 95. Multi adhuc extant hujusmodi libri Poenitentiales evalgati a viris eruditissimis, quos memorat Benedictus XIV. de Synod. dioecesa. lib. 1. cap. 11. n. 3.

(3) Concilium Tridentinum Sess. 14. cap. 8. de Poenitent.

(4) Consule S. Carolum Borromeum in Praefat. ad can. poenit., et Card. de Aguirre ad can. 11. et 12., Concilii Toletani III. tom. 2. collect. maxim. Concil. Hisp.

§. LXXX. Absolutio primis Ecclesiae saeculis, ut plurimum, post actam poenitentiam concedebatur (1). Verum cum ea res ad disciplinam pertineat, nullaque sit necessitas praemittendae poenitentiae, ut integrum sit sacramentum, labentibus annis invaluit usus tribuendae absolutionis, antequam poenitentia peragatur. Quin et vetusta aetate quamquam ea, quam memoravi, disciplina obtineret, tamen saepe ante emensa poenitentiae spatia absolutio dabatur, si quem libelli martyrum commendarent, si quis praeclaram pietatis significationem edidisset, si qua gravis urgeret causa, quae mitiorem disciplinam postulare videretur (2); diuque obtinuit, ut statim post confessionem dimitterentur crimina, quae publica poenitentia expiare non oportebat (3). Merito hinc damnatae, et proscriptae sunt duriores, asperioresque sententiae illorum, qui Christi lege institutum ferunt, ut poenitentia absolutioni praeceat,

ac minus probant eam, quae nunc viget, disciplinam, per quam absolutio poenitentiam antevertit (4).

(1) Cyprianus *Epist.* 10. 52. 59. p. 23. 66. 94. *ed. Paris.* 1666, Pacianus *Epist.* 1. *ad Sympronian.* p. 307. *Bibliothec. PP.* tom. 4. *ed. Lugd.*, Ambrosius *de Poenit.* lib. 2. cap. 9. col. 549. tom. 3. *cit. ed. Venet.*, Innocentius 1. *Epist.* 25. *ad Decent.* col. 862. *apud Constantium Epist. Pontif. Roman.*, Leo M. *Epist.* 84. *ad Theodor. Forojulien. Epis. opp.* tom. 2. pag. 328. *ed. Rom. cit. Concilium Toletanum III. cap. 11. col. 481. tom. 3. collect. Harduini.*

(2) Cyprianus *Epist.* 18. et 19. *ad Caldon.* 52. 54. col. 71. 73. 165. 1187. *ed. Venet.* 1758, Cornelius *Epist. ad Cyprian.*, quae inter Cyprianicas est. *Ep.* 46. col. 147. Innocentius I. *Epist.* 25. *ad Decent.* num. 10. col. 862. *apud Constantium*, Leo M. *Ep.* 108. *ad Theodor. c. 4. col. 1175. opp. tom. 1. ad. Ballerin. Venet.* 1753, Concilium Nicaenum *can.* 13. *apud Labbaeum tom. 2. Concil. col. 39. ed. Venet.* Carthaginense IV. *can.* 76. col. 1423. *ibid.*, Ancyrantum *can.* 5. col. 1487. *ibid.*, Arausicanum I. *can.* 3. col. 702. tom. 4. Epae-
neae *can.* 36. col. 716. tom. 5. *ib.*

(3) Consule Morinum *de poenit. lib. 9. cap. 14.*

(4) Saeculo XV. Petrus Oxomensis Theologiae in Salmanticensi Academia Professor docuit, satisfactionem absolutioni omnino esse praemittendam, isque a Sixto IV. damnatus est. Superiori saeculo hunc errorem aliqui renovarunt, contententes, differendam esse absolutionem sacramentalem, ut prius aliqua saltem laboriosa opera a Sacerdote imposita Poenitentes absolverent, sed eum damnarunt Alexander VIII. n. 16. 17. 18. in *Bullar. Rom. pag. 97. tom. 9. ult. ed. et Clemens XI. in Constit. Unigenitus* 187. p. 340. tom. 10. *ejusd. Bullar.* Eundem hunc errorem, quem scripto mandarat Theophilus Brachet, Sacra Facultas Parisiensis die 23. Jun. an. 1644. condemnavit.

§. LXXXI. Formam hujus sacramenti confi-

ciunt verba illa absolutionis, quae Sacerdos profert, non nudum praestans ministerium pronunciandi; remissa esse peccata, sed actum judiciale exercens: *Ego te absolvo etc.* quibus de Ecclesiae more preces quaedam laudabiliter adjunguntur, ad ipsius tamen formae essentiam nequaquam spectant, neque ad ipsius sacramenti administrationem sunt necessariae (1). Indicativa haec forma antiquissima certe est apud Latinos (2), de Graecorum forma non eadem omnibus sententia est (3).

(1) Concilium Tridentinum Sess. 14. de Sacram. poenit. cap. 3. et 6.

(2) Joannes Morinus lib. 8. de Administrat. poenitent. multis capitibus defendit, deprecativam fuisse formam sacramenti Poenitentiae, qua usque ad saeculum XII. Latini uti sunt. Morinum complures sequuntur, licet fateantur, nunc tantum indicativam esse formam, quam Synodus Florentina, ac Tridentina proposuit. Contra Latinorum formam et nunc esse, et semper fuisse indicativam, contendit Edmundus Simonetus de forma Sacramen. Poenitent. Thesaur., Theolog. tom. 11. Opusc. 8. pag. 384. et seq. Aetate S. Thomae, quae pertinet ad saeculum XIII indicativa forma jamdudum inducta erat, de eaque loquitur ipse Thomas Opusc. 23. alias 22. cap. 1., tamquam antiquissima, et ubique recepta, imo potius existimare videtur, nullam aliam unquam obtinuisse. Martenius autem de Antiq. Eccl. rit. lib. 1. cap. 6. art. 5. §. 12. in quatuor antiquissimis libris ritualibus esse indicativam formam deprehendisse testatur.

(3) Simonetus loco mox laudato art. 6. p. 575 et seq. Graecorum formam non deprecativam, sed indicativam esse arbitratur. Sed alia sententia est Morino loco c. cap. 12., Juevinio de Sacram. diss. 16. qu. 7. c. 2. art. 1., aliisque compluribus.

§. LXXXII. Minister sacramenti poenitentiae

est Episcopus, aut Sacerdos (1). Si quando a Diacono datam absolutionem constat (2), non id deferendum est ad sacramentalem absolutionem, quae rei crimen tollit, quaeque ordinis propria est, sed ad caeremonialem absolutionem, quae poenitentem solvit legibus publicae poenitentiae, quaeque etiam Diacono committi poterat, cum tota jurisdictionis (3). Similiter si quem laico sua interdum patefecisse crimina scriptum est (4), factum id fuit patientiae, et demissionis causa, non quod laicus per sacramentum poenitentiae solvere quemquam posset (5).

(1) Concilium Tridentinum sess. 14. de Poeniten. cap. 7. Eugenius IV. in *Decret. union. Armen. tom. 9. collect. Harduini col. 440.*, Leo X. *Consti. 44. tom. 3. par. 3. Bullarii pag. 489*, ubi inter ceteros damnatur Latheri error, quod videlicet in sacramento poenitentiae, ac remissione culpae non plus facit Papa, aut Episcopus, quam infimus Sacerdos: imo, ubi non est Sacerdos, aequè tantum quilibet Christianus, etiamsi mulier esset. Quo in luto ante Lutherum haesitaverant Wicleffus, Flagellantes, et Hussitae, qui spreto Sacerdotis Tribunali sua apud laicos crimina confitebantur, atque ab iis absolutionem obstinebant, ut videre est in *lib. 3. de Gestis Boldevini de Luezenburch. cap. 9. apud Balutium Miscellan. Hist. tom. 1. pag. 324. ed. Luc. 1761.* Quamquam, ut in ceteris, ita etiam in hoc errore Lutherus inconstans, et varius de *Captivit. Babylon.* unum baptismum Sacramentum habeat: quo factum est, ut quasi duae familiae proseminatae sint Lutheranorum, quorum alii Poenitentiam sacramentum esse affirmant, alii negant. Adeo verum est, nonnisi in Ecclesia catholica unam semper, et eandem esse fidem.

(2) S. Cyprianus *Ep. 12. p. 25. ed. Paris. cit.*, Constitutiones Odonis Parisiensis Episcopi *cap. 56. tom. 6 par. 2. col. 1946. collect. Harduini, Cap. Fures de Furtis*, si vera est lectio quae vulgo traditur, Presby-

tero, vel Diacono confessi fuerint. Nam Antonius Augustinus in *Not. ad prim. Collect. Decretalium lib. 5. tit. 26. cap. 4. p. 327. ed. Luc. 1769.* legendum esse monet *Presbytero, vel Deo*, uti est in *can. 31. Concilii Triburensis col. 449, tom. 6. collect. Harduini*: unde illud caput desumptum est.

(3) Confer Cardinalem de Aguirre *Concil. Hispan. tom. 1. pag. 729.*, Natalem Alexandrum *Histor. Eccles. saec. 3. diss. 4. pag. 49. ed. Venet. 1776*, et Benedictum XIV. *de Synod. Dioec. lib. 7. cap. 16. n. 5. ad 8.* Late etiam, ac solide hoc argumentum persequitur Carolus Blaschus *Dissert. 1.*, et contra Basnagium, Launojum, atque alios ostendit, numquam Diaconos, etiam urgente necessitate, poenitentiae sacramentum administrasse.

(4) *Can. Qui vult. de poenitent. dist. 6.* Multa hujusmodi exempla colligunt Morinus *de Poenitent. lib. 8. c. 14.*, Jueninius *de Sacram. diss. 6. qu. 3 c. 4, art. 2.* Martenius *de antiq. Ecc. rit. lib. 1. cap. 6. art. 6. §. 8. p. 294. tom. 1. cit. ed. Venet.*

(5) Vide D. Thomam in *4. dist. 17. quaest. 3. art. 3. quaest. 2*, et vide etiam Benedictum XIV. *loc. cit. n. 9. et seq.*

§. LXXXIII. Ut autem valeat absolutio, in ministro requiritur non tantum potestas Ordinis, per quam ei ex divina institutione committitur iudicium Animarum in foro poenitentiae, sed etiam jurisdictionis (1). Potestas ordinis efficit, ut Presbyter iudicium hoc sacramentaliter exercere possit; sed frustra id exerceret, nisi haberet subditos, in quos suam explicet potestatem. Atque haec est potestas jurisdictionis, quae tota pendet ex imperio in subditos, adeo ut sine subditis nulla sit. Cetera sacramenta sine hac potestate conferre non licet, sed tamen collata cum sola ordinis potestate; verum sacramentum poenitentiae utramque desiderat;

quoniam opus est ministro, per quem et conferatur gratia, et feratur sententia, quae tantum valet prolata in eos, qui Iudicis jurisdictioni subjecti sunt(2).

(1) Concillium Tridentinum Sess. 14. de Sacram^{to} poenitent. cap. 6. et can. 9., et Catechismus Romanus par. 2. cap. 5. §. 54.

(2) Consule Cl. Christianopolum in libro della nullità delle assoluzioni ne' casi riservati cap. 2. §. 109. p. 158. et seq.

§. LXXXIV. Jurisdictio penes Episcopum in omni dioecesi est, et ideo nisi quis eam ab Episcopo obtineat, in ejus subditos exercere judicium, ac sententiam ferre non potest. Parochi, cum Animarum curae praeficiuntur, sui officii jure obtinent hanc potestatem, quia cum parochi fiunt accipiunt ab Episcopo subditos, quos regant, et in quos jurisdictionem exerceant. Ceteri Sacerdotes, quibus nulli cum beneficio subditi dati sunt, opus habent venia Episcopi, a quo ad hoc munus apti, et idonei judicentur, ac muneris gerendi potestatem accipiant (1). Itaque Parochi posteaquam rite constituti sunt, jure proprio, reliqui Sacerdotes sive ex saecularibus, sive ex regularibus jure delegato poenitentiae sacramentum administrant (2).

(1) Concillium Tridentinum Sess. 23. cap. 15. de Reformat. Consule Benedictum XIV. Instit. Eccles. Instit. 86. ubi multa sunt, quae ad hunc locum pertinent.

(2) Nullus ita sit temerarius, inquiunt Patres Concilii can. in comitiis generalibus an. 1625. 1635. 1645. ut ingerat se audiendis confessionibus, quin ad id fa-

cultatem scripto traditam ab Episcopo, aut ejus Vicario generali obtinuerit; et Religiosi, quamvis exempti ab illius jurisdictione, excipere non poterunt confessiones, quin prius examen subierint, ab eoque aut ejus Vicario generali approbati fuerint, ex quorum nutu pendebit, ut indefinitam aut ad tempus solum facultatem concedant. Hinc Pius IV. *Const. in Principis Apostolorum* 109, *Bullar. Roman. ult. edit. tom. 4. par. 2. p. 214.*, et Urbanus VIII. *Const. Cum sicut accepimus* 279. *tom. 6, par. 1. ejusd. Bullar. p. 142*, sustulerunt privilegia omnia concessa Regularibus, aliisque omnibus audiendi saecularium confessiones, non impetrata primum ab Episcopo facultate. Alias eadem de re propositiones a Regularibus quibusdam Andegavensibus evulgatas contra Episcoporum potestatem confixere Clerus Gallicanus in comitiis generalibus an. 1656. et Alexander VIII. die 24. Septembris 1665, *Const. 120. ejusd. Bullar. tom. 6. par. 6. p. 84.*

§. LXXXV. Haec autem ab Episcopo data potestas modo angustioribus coercetur finibus, et modo latioribus explicatur. Nam ea res pendet ab Episcopi arbitrio, qui ut jurisdictionem attribuit, ita eam arctat, constringit, explicat suo arbitratu. Ex quo patet, posse Episcopum suo lubitu tantum in certos homines, atque in certa crimina potestatem concedere, unde intelligitur, quamobrem Sacerdotes nequeant ferre sententiam in certos homines, ac judicare de quibusdam criminibus, quorum sibi iudicium Episcopus reservavit. Inde jus oritur *casuum* quos *reservatos* vocamus, quod efficit, ut Sacerdos, excepto mortis articulo (1), nihil possit in iis rebus, quarum potestatem Episcopus non mandaverit (2).

(1) Mortis articulus a periculo differt. Est namque

mortis periculum, inquit Melchior Canus *de Poenitent.* par. 9, in *his dumtaxat unde mors frequenter solet accidere*. . . . *Articulus mortis intelligitur, cum regulariter certa mors est.* Non solum in articulo, sed etiam in gravi mortis periculo, cum abest Parochus, aut alius ab Episcopo approbatus confessarius, quemlibet Sacerdotem absolutionem impartiri posse, ostendit Carolus Blaschus in *Append. ad Diss. 2. de Poenitent.*

(2) Concillium Tridentinum Sess. 14. *de Sacram. poenit.* cap. 7. et can. 11. Inquit autem ipsa Synodus *cit. cap. 7. quod nullu sit reservatio in articulo mortis, atque ideo omnes Sacerdotes quoslibet poenitentes a quibusvis peccatis, et censuris absolvere possunt.* Quae verba cum pateant amplissime, ac nullum Sacerdotem excipiant, omnibus fere scriptoribus Juris Canonici argumento sunt, quod urgente necessitate, absolvere possit quisvis Sacerdos, etiam excommunicatus, suspensus, degradatus, haereticus, modo absit publica offensio, ac periculum subversionis. Graviter, et copiose in hoc argumenti genere versatur Carolus Blaschus *Diss. 2. de Poenitent.* Verum autem adeo est, quod supra dixi, neminem sine Episcopi venia absolvere quemquam posse a casibus ipsi Episcopo reservatis, ut id etiam ad eos pertineat, qui absolventi a casibus reservatis Sedis Apostolicae facultatem obtinuerant. *Et habentes*, inquit Clemens X. *Const. Superna* 10. §. 7. p. 32. t. 7. *Bullar. Roman. ult. ed., facultatem absolventi ab omnibus casibus Sedi Apostolicae reservatis, non ideo a casibus Episcopo reservatis posse absolvere.* Consule S. Carolum Borromeum *Concil. Provinc. III. tit. de his quae ad poenitent. Sacrament. pert., et Concil. Provinc. V. eod. tit. Act. Eccles. Mediolan. par. 1. p. 79, et 199. ed. Patav. 1754.*

§. LXXXVI. Quod autem Episcopus in sua dioecesi, id potest Summus Pontifex supremo jure, cui subsunt omnes in Ecclesia universa. Nam per totam Ecclesiam ejus propagata, ac diffusa jurisdictio est; et ideo nulla est aliorum potestas in iis,

quae huic uni Summae Potestati servata sunt (1). Ac recte quidem, et merito graviora quaedam crimina Summo Pontifici, aut Episcopo reservata sunt, ut ea difficultate absolutionis cohiberentur, et gravioribus peritiores medici remedium adhiberent (2).

(1) Concilium Tridentinum *Sess. 14. de Poenitent. cap. 7.*, et merito sapientissimus, atque optimus Pontifex PIUS SEXTUS literis doctrinae, veritatis, dignitatis, auctoritatisque plenis, quas edidit die 28 Novembris anno 1786, Eybelium damnavit ausum in libro *Quid est Papa?* calumniari reservationem absolutionum, quae ad Sedem Apostolicam pertinent. De casibus a Summo Pontifice, aut ab Episcopo reservatis, deque nullitate absolutionis, quae contra reservationis legem data est, copiose disputat Cl. Christianopolus libro Romae edito anno 1785, cui titulus: *della nullità delle assoluzioni ne' casi riservati*. Vide etiam Cl. Bolgenium in egregio libello Maceratae edito anno 1789, cui titulus: *Esame della vera idea della Santa Sede* §. 133. et 134. pag. 208. et seq. Falsi autem sunt Van-Espenius *Jur. eccles. univers. tom. 1. par. 2. tit. 6. cap. 7. num. 9.*, et Dominicus Cavallarius *Instit. Jur. Canon. par. 2. cap. 16. §. 7. in not.*, qui graviora crimina Sedi Apostolicae tantum reservari coepisse putant post saeculum X, et initio quidem potius Episcoporum, quam Summorum Pontificum auctoritate. Nam Romanos Pontifices jam VI saeculo quosdam sibi *casus*, ut dicimus, suo sibi jure reservare solitos fuisse, demonstrat S. Gregorius M., quem nemo ignorat abfuisse quam maxime a violandis juribus Episcoporum *Is autem Epist. 7. lib. 3. col. 931. tom. 2. opp. edition. Paris. citat. Joannem Larissensem Metropolitam*, si quid ageret contra quam a Sede Apostolica praescriptum fuisset, privandum statuit communione sacrorum, quam recuperaret, *exceptio ultimo vitae suae tempore, nisi concessa Romani Pontificis jussione*. Vide etiam S. Leonem M. *Epist. 12. ad Anastas. Thessalonicens. c. 1. et ult. pag. 49. seq. et 55. seq.* Homicidas autem ante annos circiter nongentos,

quod vere observat Martenius *de antiq. eccles. rit.* tom. 1. lib. 1. cap. 6. art. 6. num. 6. pag. 723., veniae impetrandae causa ad Summum Pontificem missos fuisse constat ex lib. 3. *de Gest. Sanctor. Rotonens. cap. 1. saec. IV. Benedict.* Cum autem homicidium esset ex genere eorum criminum, quae in quibusdam Ecclesiis veniae locum non relinquebant, fortasse cum haec disciplinae austeritas emolliri, ac mitigari coepit, id retentum est, ut eorum graviorum criminum rei nonnisi a Sede Apostolica veniam consequerentur. Nam ea semper ipsius lenitas, benignitasque fuit, ut etiam cum antiqua vigeret disciplinae severitas, ipsa tamen justis de causis veniam interdum daret in criminibus, quae alicubi ordinaria lege uni Dei iudicio relinqui, non autem ab Ecclesia dimitti solebant. Ita Tertullianus, posteaquam in Montani errores inciderat, Zephyrinum Pontificem reprehendit, quod veniam daret moechis, quibus illam aliae Ecclesiae antea denegare consueverant.

(2) Concilium Eliberitanum *can. 32. cap. 1. Conc. collect. Labbaei col. 996. Apud Presbyterum*, inquit, *si quis gravi lapsu in ruinam mortis inciderit, placuit agere poenitentiam non debere, sed potius apud Episcopum.* Ergo gravius crimen jam tunc Episcopo reservatum erat. Sed et nota cunctis est antiqua Ecclesiae disciplina de publica poenitentia, quae donec vixit, publice poenitentium reconciliatio ad Episcopum pertinebat, eademque obsolescente Summi Pontifices, et Episcopi potestatem absolvendi a gravioribus quibusdam criminibus, extra mortis periculum, sibi reservarunt. Quinimo non tantum Episcopis, sed etiam Majoribus Sedibus ab atrocioribus quibusdam criminibus absolutionem reservari consuevisse jam inde ab ineunte saeculo V. ostendit Synesius *Epist. 67.*, unde constat, Theophilo Alexandrino Patriarchae, cui Synesius suberat, Lamponiani cujusdam absolutionem fuisse servatam. Inquit autem ipse Synesius *cit. Epist. 67. pag. 215. edit. Paris. 1633. Sed ego in iis perseveravi, quae semel decreveram; solvendi porro jus, et auctoritatem ad Pontificiam Sedem rejeci.*

§. LXXXVII. Nullum esse scelus, quod Ec-

clesiae potestati non subjiatur, contra Montanistas, et Novatianos definitum est: et vero hanc potestatem initio Ecclesiam, nullo discrimine, exercuisse demonstrant Paulus (1), et Joannes Evangelista (2), quorum alter incestus in novercam reo, alter homicidae veniam dedit (3). Quoniam vero Christus dimittendorum, aequae ac retinendorum criminum jus Ecclesiae fecit, non desperatione indulgentiae, sed rigore disciplinae (4) factum est, ut alicubi venia, et cum Ecclesia reconciliatio non daretur reis graviorum quorundam criminum; quibus spes omnis veniae in una Dei misericordia relinquebatur (5). Verum disciplina haec, quae non diu obtinuit (6), propria fuit peculiarium quarundam Ecclesiarum (7), non totius Ecclesiae catholicae, quae reis criminum poenitentiae functis, praesertim in vitae exitu, nunquam pacem, aut sacramentalem absolutionem denegavit (8).

(1) *Epist. II. ad Corint. cap. 2.*

(2) Eusebius *Hist. Eccl. lib. 3. cap. 23. pag. 112. ed. Valesii Cantabrig. 1720.*

(3) Consule Hermam Pastorem *lib. 2. Mandat. 4. et Aactorem Constit. Apostol. tom. 1. p. 88. et 236. cit. ed. Amstelaedami.*

(4) Augustinus *Ep. 185. ad Bonifac. num. 65. col. 661. opp. tom. 2. ed. cit.*

(5) Graviora haec crimina quae in iis locis cum Ecclesia reconciliationis spem adimebant, erant idololatria, homicidium, adulterium.

(6) Zephyrinus Pontifex moechis veniam dedit, quae re eum acerbe carpit Tertullianus *de Pudicit. cap. 1. pag. 555. ed. Ven. 1744*, posteaquam in Montani haeresim lapsus fuerat. Verum Zephyrinus non novam aliquam disciplinam indaxit, sed potius jam inductam confirmavit. Confer etiam Cyprianum *Ep. 52. col. 177. ed.*

Ven. 1758, qui mirari se ait, quosdam ita obstinatos esse, ut dandam non pulent lapsis poenitentiam, aut poenitentibus existiment veniam denegandam, postremoque addit, neminem putamus a fructu satisfactionis et spe pacis arcendum. Concilium Nicaenum *can.* 19. *col.* 466. *tom.* 1. *coll.* Harduini, nemini morienti sacramentalem absolutionem, quam viatici nomine appellat, denegandam statuit; qui canon ostendit, adhuc ea aetate quosdam fuisse, qui reis quorundam criminum veniam denegabant. Secus enim ejus condendi canonis causa defuisset: Concilium Sardicense, quod non multo post Nicaenum habitum est, *can.* 1. *col.* 637. *tom.* 1. *Collect.* Harduini, Prelatis Ecclesiarum, qui per ambitionem sedem mutaverant, ne in exitu quidem laicam communionem habere permittit: quod decretum ita mitigavit Damasus Pontifex in *Epist. ad Paulin. Antiochen.* apud Holstenium in *Collect. Rom. par.* 1. *pag.* 183, ut illi a communione alieni haberentur, quamdiu ad eas redierunt civitates, in quibus primum sunt constituti. Quam Pontificiam sanctionem memorat etiam Theodoretus *Hist. Eccl.* l. 5. c. 11. p. 210. *edit. Cantabrig.* 1720. Sed et ante Damasum Julius I, quo Pontifice Sardicense Concilium habitum est, reum Animarum dixit Presbyterum, qui morientibus veniam denegaret *can.* 12. *caus.* 26. *quaest.* 6. Coelestinus I., qui Summus Pontifex creatus est an. 423. *Ep.* 4. *ad Episcopos provinc. Viennen., et Narbonen.* c. 2. *col.* 1967., apud Constantium *Ep. Rom. Pontific.* graviter reprehendit Gallicanos Praesules, qui morientibus veniam denegabant, ac denique sic concludit: quovis tempore non est deneganda poenitentia postulanti. Eadem sententia est Innocentii I. *Ep.* 25. *ad Decent. Eugubin.* cap. 7. *col.* 862., apud eundem Constantium, et eadem Leonis M. *Epist.* 84 cap. 3. *opp. tom.* 2. p. 329. *ed. Romae* 1755., cum inquit, in dispensandis Dei donis non debemus esse difficiles.

(7) Fuit haec disciplina quarundam in Africa Ecclesiarum, uti testatur Cyprianus *Ep.* 55. *ad Antonian.* p. 247. *ed. Amstelæd.* 1700., et quidem apud Antecessores nostros quidam de Episcopis istis in provincia nostra dandam pacem moechis non pulaverunt; et in lo-

tum poenitentiae locum contra adulterium clauservunt. In Hispanis graviorum quorundam criminum reis etiam in exitu vitae communionem denegatam ostendant plures Eliberitani Concilii canones, nemini tamen unquam poenitentiae copia denegata est. Imo eodem Eliberitano Concilio can. 22. tom. 1. Concil. collect. Labbaei col 995. ed. Venet. cautum expresse est, ut haeretici ad Ecclesiam redeuntibus a poenitentia non repellatur. Si quis, inquit, de Catholica Ecclesia ad haeresim transitum fecerit, rursusque recurrerit, placuit, huic poenitentiam non esse denegandam, eo quod cognoverit peccatum suum. Confer Natalem Alexandrum *Histor. eccl. saec. 3. diss. 7. propos. 2. t. 4. p. 72. ed. Venet. 1776.*

(8) Dionysius Petavius *Animadvers. ad Epiphani. haeres. 59. t. 2. p. 227. ed. Paris. 1622.*, Gabriel Albaspinæus *lib. 2. Observ. 7. p. 90. ed. Neapol. 1770.*, Jacobus Syrmundus *Hist. poenitent. public. t. 1. cap. 1. col. 481, ed. Paris. 1696.*, Edmundus Martenius *de Antiq. eccles. rit. l. 1. c. 6. art. 2. t. 1. p. 261. edit. ind. aliique putant, tribus prioribus, aut saltem II, et III. saeculo Ecclesiam idololatris, homicidis, adulteris veniam denegare consuevisse.* Contra Morinus *de Poenitent. lib. 9. c. 20. et seq.*, Natalis Alexander *loco mox laudato*, Cardinalis Baldizucchi *in select. quaest. theolog. p. 52.*, Tournelyus *Praelect. theolog. de Sacram. poenitent. quaest. 9. art. 1.*, Balthasar Francollinus *in Cleric. Roman. par. 1. disp. 2.*, aliique complures ostendunt, nunquam Ecclesiam eo severitatis venisse, ut reis atrociorum quorumvis criminum in vitae exitu veniam non concederet. Prae ceteris vero Cardinalis Orsius peculiari ea de re edita dissertatione demonstravit, *Catholicam Ecclesiam tribus prioribus saeculis capitalium criminum reis pacem, et absolutionem ne utiquam denegasse.* Certe in Ecclesiis quibusdam aliquandiu vixit severior illa disciplina, quam ea aetate retinere licuit, cum adversus eam nulla adhuc Ecclesiae lex esset. Verum Catholicae Ecclesiae sententia semper fuit, nulla esse crimina, quorum rei vere poenitentes veniam, et absolutionem aliquando non obtinerent. Hinc quemadmodum Tertullianum ab Ecclesiae communione rejecit, ejusque

nimiam severitatem repressit Zephyrinus, Novatianum, qui criminum reis implacabilem se, inexpiabilemque praebebat, Cornelius, deincepsque Innocentius; ita duritiam, et asperitatem Episcoporum aliquot Galliae Caelestinus, et postea similem aliorum duritiam Leo M. damnarunt; quos et alii Romani Pontifices usque ad hanc nostram aetatem sequuti sunt, ex recentioribus S. Pius V., Gregorius XIII, Urbanus VIII, Innocentius X, Alexander VIII, et Clemens XI, qui antiquos Montanistas, Novatianos, Encratitas, Eustathianos, et Luciferianos in Michaelae Bajo, Cornelio Jansenio, ceterisque similibus redivivos nimiam, atque a Christi, et Ecclesiae benignitate alienam severitatem praeseferentes damnarunt, et rejecerunt. Consule Cardinalem de Aguirre *Concil. Hispan. tom. 2. diss. 7. 8, et 9. in Can. 11. et 12. Concilii Toletani II. vulgo III. an. 589. p. 358. et seq.*, ubi late agitur de antiqua Hispaniarum ea in re disciplina, et in *Not. ad Can. 1. 2. 3, et 7. Concilii Eliberitani t. 1. pag. 333. et seq.*, qui Eliberitani canones valde torquent eruditorum ingenia, cum duriores, asperioresque videantur. De his ipsis canonibus agit etiam Cardinalis Orsius *laudat. Diss. sect. 5. cap. 1. digress. 5. et cap. 3. num. 4.*

S E C T I O V.

DE EXTREMA UNCTIONE.

- LXXXVIII. Effectus sacramenti extremæ Unctionis.
 LXXXIX. Ejus materia remota.
 XC. Materia proxima.
 XCI. Forma.
 XCII. Minister.
- XCIII. Parochus Minister ordinarius.
 XCIV. Quibus datur hoc sacramentum?
 XCV. Graecorum unctio.
 XCVI. Quando datur sacramentum Extremæ Unctionis.

§. LXXXVIII.

Extrema unctio, quæ et *Oleum Sanctum*, et *Oleum infirmorum* appellatur, sacramentum est, quod ex hac vita migrantibus tribuitur (1). Propterea dicitur Extrema Unctio, quoniam hæc omnium sacrarum unctionum, quas Christus Dominus Ecclesiae commendavit, ultimo administranda est. Hujus sacramenti vim expressit Jacobus Apostolus his verbis (2): *Infirmatur quis in vobis, inducat presbyteros Ecclesiae, et orent super eum, ungentes eum oleo in nomine Domini, et oratio fidei salvabit infirmum, et alleviabit eum Dominus: et si in peccatis sit, remittentur ei.* Quibus ex verbis facile est intelligere materiam, formam, ministrum hujus sacramenti; atque iis utitur, ut hæc cuncta explicet Synodus Tridentina (3).

- (1) Concilium Tridentinum Sess. 14. de *Extrem. unct. can. 1.*
 (2) *Epist. Catholic. V. 14.*
 (3) *Sect. 14. de Sacram. extrem. unct. c. 2.*

§. LXXXIX. Materia, unde conficitur Extrema Unctio, est oleum olivarum (1), et oleum quidem merum; quoniam nulla permixtionis mentio in libris ritualibus, atque in antiquis monumentis occurrit (2). Oleum ab Episcopo benedictum esse debet (3), atque haec quidem vetus Ecclesiae consuetudo est (4). Apud Latinos solus Episcopus oleum infirmorum consecrat feria V. coenae Domini (5), ab eoque illud quotannis accipiunt singuli, quibus opus est (6). Apud Graecos etiam Presbyteri: et vero non semel in anno, sed singulis vicibus quibus illud adhibere oportet (7).

- (1) Concilium Tridentinum Sess. 14. de *Extrem. unction. cap. 1.*, Catechismus Romanus de *Sacram. extrem. unct. part. 2. n. 5.*

(2) Innocentius I. in *Epist. 25. ad Decent. Episc. Eugubin. cap. 8. col. 893.* apud Constantium *Ep. Rom. Pontif.* hujus sacramenti materiam esse inquit *oleum Chismaticis*, qui locus Suaresium t. 4. in 3. par. *Disp. 40. sect. 1. num. 10*, aliosque scholasticos in eam opinionem adduxit, ut crederent, olim balsamum cum oleo misceri consuevisse. Verum saepe apud Ecclesiasticos Scriptores chrisma merum oleum infirmorum est. Confer Jueu nium de *Sacram. diss. 7. qu. 3. c. 1.* et Tournelyum de *Sacram. extrem. unct. quaest. 1. art. 3.*

(3) Eugenius IV. in *Decret. pro instruct. Armen. Conc. Florent. col. 440. t. 9.* Concil. collect. Harduini, Concilium Tridentinum *Sect. 4. de Sacram. Extrem. unction. can. 2.* Episcopus autem oleum benedixit praesentibus Presbyteris, aliisque clericis, de quibus agit Pontificale Romanum tit. de *Offic. in fer. V. coenae D.*

mini §. 3., ibique Catalanus in *Not.* 4. t. 3. p. 57. unde ut putat Martenius de *antiqu. Eccles. rit.* l. 4. c. 22. §. 3. n. 3. t. 3. p. 87. *ed. cit.*, factum est, ut quidam Presbyteri sibi olei consecrandi potestatem adscriberent; sed his resistit Concilium Carthaginense II. *can.* 5. *col.* 1245. t. 5., et Toletanum I. *can.* 26., apud Labbaeum *cit.* t. 2. *col.* 1474. *ed. Venet.* Quaestio tamen est inter Theologos, num ex Christi Domini institutione, an tantum ex Ecclesiae praecepto Episcopi benedictio sit necessaria. Verum utut ex Christi institutione consecratio aliqua requiratur, ut oleum fiat apta materia sacramenti extremæ unctionis, cum tamen illud ex delegatione Summi Pontificis siue tacita, siue expressa etiam a Presbytero benedici possit, tantum Ecclesiae lege inductum est, ut oleum infirmorum ab Episcopo benedicatur. *Consule Benedictum XIV. de Synod. Dioec. lib.* 8. *cap.* 1. *num.* 4.

(4) Innocentius I. *loc. cit.*, Gregorius Magn. *Sacram. col.* 67. *opp. tom.* 3. *ed. Maurin. Paris.* 1705.

(5) Disciplinam conficiendi quotannis chrismatis feria V. in coena Domini memorat Fabianus P. in *can.* 18. de *Consecr. dist.* 3., verum hic canon pertinet ad falsas Isidori decretales. Hoc certum est, uti observat Van-Espenius *Jus eccl. par.* 2. *tit.* 3. *cap.* 3. n. 13, disciplinam illam saeculo VIII. obtinuisse, quoniam eam memorant Sacramentarium S. Gregorii, Vetustus ordo Romanus, atque omnes, qui per ea tempora de *divinis Officiis* scripserunt. Constitutus deinceps fuit etiam olei conficiendi locus, scilicet Ecclesia cathedralis in *capit.* 12. de *Celebr. Miss.*

(6) Nonnisi a proprio Episcopo sacra olea, hoc est chrisma, et oleum catechumenorum, ac infirmorum accipiendum est *can.* 122. et 123. de *Consecr. dist.* 4., neque exemptionis privilegium aliquem ea lege solvit, quod late ostendit Passerinus de *Stat. hom.* t. 3. *quaest.* 189. *art.* 10. *inspect.* 10. *num.* 910. et *seq.* Quotannis autem sacra haec olea sumenda sunt; nam vetus, quod superest ponitur, ut inquit Ritnale Romanum t. 1. *Comm. tit.* 2. *cap.* 1. §. 34. *num.* 3. *pag.* 71. *ed. Rom.* 1667., in *lampadibus Ecclesiae ante sacramentum, ut comburatur;*

Reliquum autem, quod est in pyxidibus, sive capsulis cum bombice igne comburitur; et novum deinde cum novo bombice in pyxidibus, sive capsulis imponitur. Vide etiam Concilium Provinciale IV. Mediolanense a S. Carolo habitum *Act. Eccl. Mediolan. p. 2. tom. 1. pag. 113. ed. Patav. 1754.*

(7) Confer *Goarium in Eucholog. Graec. p. 436., Arcudium lib. 5. cap. 2., Allatium de Consens. utriusque eccles. cap. 16.* Quam Graecorum consuetudinem ratam habuit Clemens VIII. *Instruct. seu Const. 107. Bullar. tom. 3. par. 2. p. 72, et Benedictus XIV. Const. 57. §. 4. t. 2. ejus Bullar. p. 104. ed. cit.*

§. XC. Consecrato oleo aegrotus inungitur; quae unctio materia proxima appellatur. Quoniam vero Jacobus Apostolus nullam certam indicavit corporis partem, quam inungere oporteret, hinc varia ea de re fuit Ecclesiae disciplina. Olim una pars corporis, puta pectus, inungi consuevisse videtur (1). Placuit deinde plures partes inungere, ac praeter ceteras alicubi partem morbo affectam (2), quo referebant verba Jacobi: *alleviabit eum Dominus.* Nunc Latini unguot quinque organa sensuum, videlicet oculos, aures, nares, os, manus, itemque pedes, et renes: verum renum unctio in foeminis propter honestatem omittitur, et omittitur etiam in viris, cum ea morbi vis est, ut infirmus commode moveri non possit (3): Graeci Sacerdotes ungunt aegri frontem, mentum, ambas genas, deinde pectus, tum utramque manum, postremo pedes (4).

(1) Consule Mabillonium *Praef. ad saec. Benedictin. n. 97. p. XXXVI. ed. Venet. 1733.*

(2) Vide Menardum in *Sacram. S. Gregorii M. col. 540. et 541. t. 3. opp. 5. Gregori. ed. cit.*

(3) Confer *Rituale Romanum tom. 1. in Comm. tit. 5. cap. 2. §. 5. pag. 336. edit. cit., et Decretum*

Eugenii IV. pro instruct. Armen. col. 440. t. 9. col. lect. Harduini. Constat inter omnes, pedum, ac renum unctiones necessarias non esse ad vim sacramenti. Verum inter Theologos quaeritur, num reliquae quinque unctiones omnes necessario requirantur, ut integrum sacramentum sit. Plerique sic statuunt, valere hoc Sacramentum collatum per unicam unctionem, prolata tamen formula universali, quae sensus omnes complectatur; quod tamen facere non licet, nisi id summa necessitas postulet. Late ea de re agit Benedictus XIV. de Synod. dioec. lib. 8. cap. 3.

(4) Vide Arcudium lib. 5. cap. 7.

§. XCI. Formam comprehendunt preces, quas Sacerdos fundit, cum aegrotum ungit: *per istam sanctam unctionem, et suam piissimam misericordiam indulgeat tibi Dominus etc.* (1). Et quoniam Jacobus Apostolus non designavit verba, quibus Sacerdotem ungentem uti oportet, hinc Ecclesiae variis orationibus, et formulis, iisque conceptis verbis tum precantibus, tum directis usae sunt (2). Synodus Tridentina precativam formulam proposuit, sed cum non expresse rejecerit indicativam, hinc factum videtur, ut etiam post Synodum aliquae Ecclesiae eam formulam retinuerint (3). Nunc omnes Latini deprecativa formula utuntur; forma Graecorum non lisdem est concepta verbis; sed tamen eodem redit, ac similiter deprecativa est (4).

(1) Concilium Tridentinum Sess. 14. cap. 1. de Extrem. unct.

(2) Albertus M. in IV. dist. 23. art. 4., plures vetustos Germaniae rituales libros se legisse testatur, qui indicativam formam describunt, eamque disciplinam ab ipsis Gregorianam appellari dicit. Sacramentale Venetum a Leone X, ut fertur, approbatum indicativam habet formam, quod Arcudius refert lib. 5. cap. 5. Plu-

res etiam describit Morinus *de Sacram. poenit. lib. 8. cap. 16.*, aliarum Ecclesiarum formas, quae conceptae sunt verbis aut indicativis, aut precibus intermixtis. Vide Menardum in *Not. ad sacrament. S. Gregor. not. 923. col. 537. et seq. tom. 3. opp. Gregorii ed. Paris. 1705.*, et Martenium *de Antiq. eccles. rit. lib. 1. c. 7. art. 3. §. 4. tom. 1. pag. 301. ed. cit.*

(3) Confer Benedictum XIV. *de Synod. dioeces. lib. 8. cap. 2*, ubi quaeritur, num propter formam directis verbis prolatam sacramentum valeat.

(4) Vide Arcudium *loc. cit.*

§. XCII. Minister hujus sacramenti jure Divino est Episcopus, aut Sacerdos, quoniam uterque *Presbyter* est, quem Jacobus memorat (1). Et quoniam Jacobus plurali numero *Presbyteros* nominat, plures olim Sacerdotes apud Latinos vocari solebant (2), uti nunc etiam plures a Graecis vocantur (3), ad hoc sacramentum administrandum. Sed jamdiu in Occidentali Ecclesia universa tantum Sacerdos unus adhibetur, atque eum solum recte aegrotum innungere certe jure cautum est (4). Non enim pluralis numerus, quem Jacobus expressit, divinum aliquod praeceptum continet; cum praesertim in sacris libris saepe pluralis numerus singularis vicem obtineat (5).

(1) Concilium Tridentinum *cit. Sess. 14. cap. 3.*, Innocentius I. *cit. Ep. ad Decent. Eugubin. cap. 8.*, quem in locum vide Petrum Constantiam in *not. col. 863*, ubi omnem evellit scrupulum, quem forte alia ipsius Innocentii verba de ministro extremae unctionis injicere videntur posse.

(2) Id multis collectis monumentis ostendunt Menardus in *Sacramentar. S. Gregorii not. 909. col. 534. loc. citat.*, et Martenius *loc. citat. §. 3.* Quae disciplina adhuc in Galliis vigeat saeculo XII., uti patet ex

constitutionibus Odonis Episcopi Parisiensis apud *Har-
duinum Collect. Concil. tom. 6. part. 2. col. 1941.*,
imo vero eam deinceps etiam consequenti aetate obti-
nuisse, demonstrant, synodalia Statuta Ecclesiarum *Æ-
duensis, Cadurcensis, Rutenensis, et Tutelensis* apud
Martenium cap. 17. tom. 4. Anecd. Recte tamen ani-
madvertit ipse Martenius, illam Latinae Ecclesiae con-
suetudinem non ita firmam, atque constantem fuisse, ut
non interdum ab uno tantum Sacerdote aegrotus unge-
retur. Nam Artemium febre correptum ab unico *S. Ne-
potiano visitatum, atque oleo sancto perunctum* narrat
*S. Gregorius Taronensis lib. 1. Histor. cap. 41. pag.
31. edit. Ruinartii Paris 1699.*, atque etiam *S. Euge-
nium ab uno de fratribus inunctum* legimus in *eius vita*
apud *Bollandum 1. Januar.*

(3) Adhibent autem Graeci Sacerdotes septem, uti
patet ex eorum Euchologio, atque testantur *Simeon Thes-
salonicensis* apud *Saintebeuvium de Sacram. exirem. unct.
Disp. 6. art. 2.*, et *Arcadius l. 5. c. 3.*

(4) *Cap. Quaesivit de Verb. signif.*

(5) Confer *S. Augustinum de Consen. Evangelist.
lib. 3. cap. 16. opp. tom. 3. pag. 2. col. 128. edit. Ve-
net. 1730.*, et *S. Thomam lib. 4. Contr. Gent. cap. 73.*

§. XCIII. A quovis Presbytero collatum hoc sa-
cramentum valet; sed tamen soli Parocho illud con-
ferre licet; qui ordinarius ejus minister est, aut ei,
cui suam Parochus jurisdictionem commisit (1). Quod
si mors instet, ac Parochus praesens esse non pos-
sit, cuivis Sacerdoti licet jam jam moriturum inun-
gere (2).

(1) *Catechismus Romanus part. 3. cap. 6. §. 13.*
Hinc io *Clem. 1. de Privileg.* vetatur Presbyter sine
Parochi venia hoc sacramentum administrare, ac si Re-
ligiosus sit, excommunicationis poena plectitur.

(2) Consule *S. Carolam Borromeum in concil. Me-
diolan. V. par. 1. actor. Mediolan. par. 1. pag. 190.
ed. Patav. 1754*

§. XCIV. Datur hoc sacramentum infirmis *de quorum morte timetur* (1); sive mortis periculum proxime immineat, sive absit longius; modo ea sit vis morbi, ut in gravi vitae discrimine versari videantur (2). Decet autem aegrotum ungere, cum integris adhuc sensibus utitur, non cum omnino fractis viribus, ac omni spe salutis amissa vita carere incipit. Nam ita salus corporis facilius restituitur, atque ita infirmus integra adhuc mente, et ratione valens fidem, ac religiosam animi voluntatem afferre, ac sacramenti gratiam percipere uberiores potest (3); pueri, qui nulla admiserunt peccata, quorum reliquias hoc sacramentum deleat, sacro oleo non unguntur; similiter et amentes, nisi interdum rationis usum habuerint, atque eo potissimum tempore suscipiendi sacramenti voluntatem significaverint (4).

(1) Eugenius IV. in *Decret.* apud Harduinum coll. *Concil.* tom. 9. col. 440.

(2) Concilium Tridentinum Sess. 14. de *Extrem. unctione.* Catechismus Romanus cit. cap. 6. §. 9.

(3) Catechismus Romanus par. 2. de *Sacram. extr. unct.* num. 9., S. Carolus Borromeus *Concil. provinc. I, et III. Actor. Eccles. Mediolan.* par. 1. p. 11. et 79 ed. Patav. 1754. Circa saeculum XIII. loca quaedam Occidentalis Ecclesiae mos perversus invasit differendi hoc sacramentum ad extremum vitae tempus; quem morem induxit falsa opinio, quod eo sumpto non amplius liceret uxorem cognoscere, et carnes comedere, ac condere testamentum. Falsam hanc opinionem evellere curarunt synodi ea aetate habitae, praesertim Wigorniensis cap. 19. col. 337. t. 7 et Exoniensis c. 6. col. 1081. tom. 7. *Collect. Harduini.* Consule Thiersum de *Superstit.* c. 7. tom. 2., Mabillonium *Praefat.*

in saec. 1. *Benedictin. num. 100. pag. XXXVII. ed. Venet. 1733.*

(4) Vide Catechismum Romanum *loc. mox. ind.*

§. XCV. Graeci non eos tantum ungunt, qui corpore, sed etiam qui mente aegrotant, quales sunt peccatores, qui edita peccatorum confessione poenitentiam agunt. (1) Nam apud eos feria V. in coena Domini, postquam Episcopus infirmorum oleum solemmi ritu consecravit, non illud servari jubet, ut suo tempore ad aegrotos deferatur, sed totum insumit inungendo illos, qui praesentes sunt. Verum haec Graecorum unctio sacra tantum caeremonia, non verum sacramentum est (2)†

(1) Confer Allatium *de Consens. Eccl. Occident., et Orient. lib. 9. c. 16.*, Goarium *in Not. ad Eucharolog. Graecor. pag. 432. et seq. Paris. 1647.* Arcadium *Concord. lib. 5. cap. 4. et ult.* Quam Graecorum consuetudinem tolerandam statuit Innocentius IV. *Epis. 20. ad Ottonem Card. Tusculan. apud Labbaeum tom. 14. Concil. col. 17. edit. Venet.*

(2) Confer Benedictum XIV. *de Synod. dioeces. lib. 3. cap. 5. num. 4. et seq.* qui graviter, et copiose ea de re disputat adversus Arcadium, Juvenium, Saintebeuvium.

§. XCVI. Sacramentum extremae unctionis in veteri disciplina cum poenitentia, ut plurimum, conjungebatur, ut per utrumque sacramentum omnes eluerentur Animae sordes, ac plane expiatus homo Eucharistiam acciperet (1). Desiit jamdudum haec disciplina, et nunc post acceptum viaticum aegrotus inungitur (2). Toties autem sacra unctio repetitur, quoties aliquis incidit in morbum, a quo in vitae

quemque ipse memorat in libro *Memorie della B. Chiara di Rimini diss.* 5. pag. 187. in not. lib. 6. Ex quibus intelligimus, neque novam esse, neque minus probandam videri posse disciplinam, quae viget, quaeque justissimas habet causas, dandi aegrotis Extremam Unionem, posteaquam Eucharistiam acceperunt.

(2) *Rituale Romanum tit. de Extrem. unct.*

(3) Concilium Tridentinum cit. *Sess. 14. cap. 3. de Extrem. Unct.*, Catechismus Romanus par. 2. c. 6. §. 11. S. Thomas in *Supplement.* 3. p. quæst. 33. art. 1.

(4) Consule Benedictum XIV. de *Synod. Diocæs.* lib. 8. capit. 8, qui late ea de re agit, atque etiam refert falsam opinionem illorum, qui hoc Sacramentum aut nunquam, aut tantum post certum tempus iterari posse putabant, illorum etiam, qui illud in eadem aegrotatione, eodemque vitae periculo repetebant.

SECTIO VI.

DE ORDINE.

XCVII. Quid Ordo, et quot et Forma Ordinis.
Ordines sunt. C. Minister, ac subjectum
XCVIII. et XCIX. Materia, Ordinis.

§. XCVII.

Ordo sacramentum est, quo solemni inauguratione spiritualis potestas ad sacra obeunda munera confertur. Proprie ipsa potestas data ordo est; sacra autem caeremonia, per quam illa datur, ordinatio dicitur. Ordines sunt numero septem: Ostiariatus, Lectoratus, Exorcistatus, Acolytiatus, Subdiaconatus,

Diaconatus, Presbyteratus, atque horum priores quatuor *minores*, posteriores tres *maiores* appellantur (1). Presbyteratum, seu Sacerdotium et ordinem, et sacramentum esse certum est: verum non constat inter Theologos, num Episcopatus, ac Diaconatus sacramenta sint a Sacerdotio re ipsa distincta; et num Ostiariatus, Lectoratus, Exorcistatus, Acolytatus, itemque Subdiaconatus Ordines tantum sint, an etiam sacramenta (2).

(1) Concilium Tridentinum *Sess. 23. de Sacram. ord. cap. 2.* Catechismus Romanus *par. 2. cap. 7. §. 12.*

(2) Late ea de re disputant Theologi, et Canonistae, quos omnes referre longum esset. Satis erit indicare Benedictum XIV. *de Synod. dioeces. l. 8. capit. 9.* et Robertum Salam *in Not. ad Card. Bonam rer. liturg. l. 1. cap. 25 §. 17. not. 1. tom. 2. pag. 365. edit. Taurin. 1749.* De simplici tonsura quaestio est inter Theologos, et Canonistas, num ea ordo sit, uti animadvertimus *lib. 1. tit. 2. sect. 2. §. XXXIII. pag. 153.*

§. XCVIII. De materia, et forma ordinis Eugenius IV. (1) habet haec: *materia est illud, per ujus traditionem confertur ordo, sicut Presbyteratus traditur per calicis cum vino, et patenae cum pane porrectionem: Diaconatus vero per libri Evangeliorum dationem: Subdiaconatus vero per calicis vacui cum patena vacua superposita traditionem; et similiter de aliis per rerum ad ministeria sua pertinentium assignationem.* Tum pergit Eugenius, ac forma, inquit, *Sacerdotii talis est; accipe potestatem offerendi sacrificium pro vivis, et mortuis in nomine Patris, et Filii, et Spiritus Sancti, et sic de aliorum ordinum for-*

mis, prout in Pontificali Romano late continetur. Locus hic Eugenii caput, et radix est controversiarum, quae inter homines doctos de ordinis forma, et materia sunt.

(1) In Decreto Concil. Florent. col. 440. tom. 9. Concil. collect. Harduini.

§. XCIX. Nam plurimi sunt praestantes ingenio, et doctrina viri, qui trium majorum ordinum, quos hierarchicos dicimus, Episcopatus, videlicet, Presbyteratus, Diaconatus, materiam faciunt manuum impositionem (1), formam, orationem, quam Episcopus manus imponens recitat. Et certe hanc Graeci materiam, et hanc formam agnoscunt; neque unquam de vi harum ordinationum Latina Ecclesia dubitavit. Accedit, quod illa instrumentorum traditio recentioris disciplinae est: quoniam Apostolos, atque antiquos Ecclesiae Patres per manuum impositionem majores illos ordines contulisse, memoriae proditum est. Eugenius autem, cum illam memoravit instrumentorum traditionem, verbaque illa descripsit, non ordinis materiam, et formam definivit, unde vis sacramenti penderet, sed tantum proposuit Romanae Ecclesiae ritum, quem manuum impositioni Armenos ad jungere optabat, ut ita cum Ecclesia Romana communes haberent ritus, atque ad eam firmis adhaerescerent. Omnis haec disputatio propria Theologorum est (2).

(1) Ceteros tamen ordines diaconatu inferiores per solam instrumentorum traditionem conferri, inter omnes constat.

(2) Sunt et alii, qui tertiam sequuntur sententiam ponentes ordinis materiam in utroque ritu, scilicet in illa instrumentorum traditione, atque in manuum impositione. Totam hanc quaestionem, praeter ceteros, graviter, et copiose pertractat Benedictus XIV: *de Synod. dioecesis. lib. 8. cap. 10.*

§. C. Episcopus ordinarius est Minister hujus sacramenti: extra ordinem, et cum venia Summi Pontificis, etiam Presbyteri subdiaconatum, ceterosque inferiores ordines conferre possunt (1). Ordinationes factae ab Episcopo excommunicato, schismatico, haeretico valent, modo cum legitima potestate, debitoque ritu, materia, forma, intentione perficiantur (2). Soli mares ordines suscipere possunt, non item foeminae, quas *turpe est in Ecclesia loqui, ac docere* (3). Cetera, quae ad hoc sacramentum pertinent, superiori libro explicavimus.

(1) Confer ea, quae diximus *lib. 1. tom. 1. sect. 6. § LIII. not. 3. pag. 231.*

(2) Anglicanas ordinationes, ceteris etiam missis, nullas omnino, atque irritas esse facile deprehendet quisquis ad solam advertat formam, quae secundum Eduardi VI. Rituale jam usurpatur. Nam ea Christi Domini institutioni, et Apostolicae Traditioni adversatur, apertasque haereses complectitur. Hinc merito Romana Ecclesia ceterarum mater et magistra sancivit, ut quoties Minister aliquis Anglus ad Catholicam Ecclesiam redeat, si dignus sit qui in Clerum cooptetur, tamquam merns laicus omnes ordines suscipere debeat secundum Ritualis Romani leges.

(3) Apostolus I. *ad Corinth. XIV. 34, et I. ad Timoth. II. 12.*

S E C T I O VII.

D E M A T R I M O N I O.

- | | |
|---|---|
| CI. Matrimonium novae legis sacramentum. | nio necessarius, et quomodo declaretur. |
| CII. Ejus definitio. | CVI. Matrimonium legitimum, ratum, consummatum. |
| CIII. Materia. Contractus Christianis unus, et idem ac Sacramentum. | CVII. Verum, praesumptum, putativum. |
| CIV. Forma, et Minister Matrimonii. | CVIII. Matrimonium conscientiae. |
| CV. Consensus in matrimo- | |

§. CI.

Matrimonium etiam novae legis sacramentum est (1) Cum enim Christianus homo Christianae mulieri rite, et recte nubit, utrumque divina virtute donari voluit Christus Dominus ad perpetuam unius vitae societatem retinendam, atque ad filios instituendos sapienter educatione, doctrinaque Christiana. Recte ab Apostolo (2) matrimonium dicitur *honorabile connubium*; quoniam in baptizatis signum est conjunctionis Christi cum Ecclesia, *propter quam Dominus Patrem suum Deum reliquit, et venit ad terras, sicut de homine dictum est, relinquet homo patrem suum, et matrem, et adhaerebit uxori suae.* (3) Matrimonii nomine intelligitur tum ipse contractus inter virum, ac mulierem initus, tum vinculum, quod ex contractu oritur, et quod solvi non potest (4).

(1) Concilium Tridentinum Sess. 24. can. 1. de Sacrament. matrim.

(2) Epist. ad Hebr. XIII. 4.

(3) S. Hieronymus in cap. 5. ad Ephes. col. 660. vers. 32. tom. 7. edit. Veron. 1737.

(4) Eugenius IV. in Decr. pro Armen. apud Harduinum Collect. Concil. tom. 9. col. 440. Ita sola vocis explicatione dirimenda est quaestio, quae a scholasticis de matrimonii essentia proponitur. Hanc autem perpetuam matrimonii firmitatem ex jure divino procedere certum est, idque docent Bonifacius VIII in cap. unic. de Voto et redempt. in 6, et Concilium Tridentinum in Decret. de Sacram. Matrim. Sess. 24.

§. CII. Est autem matrimonium viri, et mulieris maritalis conjunctio inter legitimas personas, quae individuum continet vitae consuetudinem. Ex quo intelligitur, quam procul absit a matrimonii ratione conjunctio non maritalis, neque individuum continens vitae consuetudinem, uti est concubinatus (1), adulterium, stuprum, itemque conjunctio duarum personarum, quas dirimens impedimentum nuptias inire vetat (2). Maritalis autem conjunctio non in corporum praecise, verum in animorum praecipue copulatione consistit (3); et translatio dominii in corpus utriusque conjugis ab usu separari potest (4).

(1) Concubina proprie est mulier, quam quis non mariti animo, sed concubinatus tantum causa domi retinet, atque haec consuetudo, sive concubinatus, individuum non continet vitae consuetudinem, et procul abest a matrimonio, quod dissolvi non potest. Decet tamen animadvertere, quod concubina interdum dicitur vera uxor, ducta tamen sine dote, et nuptiali solemnitate, uti colligitur ex L. 144. ff. de Verb. signific. l. 32. ff. de Donat. et Nov. 18., eaque a vera uxore tantum

dignitate differebat, quia scilicet concubina, etsi vera esset uxor, non transibat in familiam mariti, neque, uti uxor legitima, ejus juri, privilegiorum, honorum particeps fiebat, quod ostendunt Merillus *Obser. l. 3. c. 16.* Antonius Augustinus *de Emendat. Gratian. l. 1. Dial. 15. opp. tom. 3. p. 80. edit. Luc. Du-Cangius in Glossar. verb. Dos.* De his concubinis, quas a pellicibus sedulo distinguere oportet, loquuntur antiqui canones, qui concubinas ad Baptismum, et concubenarios ad communionem admittunt; et has porro spectant Auctor *Const. Apostolic. lib. 8. cap. 32,* apud Cotelierum *PP. Apostolic. p. 418. tom. 1. ed. Amstelæd. 1724.,* Patres Concilii Toletani I, et Isidorus apud Gratianum *Can. 4. et 5. dis. 34.* Ad hoc sane concubinus genus non adverterunt Van-Espenius, et ceteri, qui Gratianum reprehendunt, quod Toletanum illum canonem descripserit. Occurrit et mentio concubinarum, quas viri accipiebant non solum sine tabulis nuptialibus, sed etiam cum vinculo, quod solveretur; et cum his quidem viri individuum servabant vitæ consuetudinem, sed eas tamen suo lubitu dimittebant. Genus hoc concubinus non infrequens olim fuit, neque deerant, qui licere putarent unam sibi foeminam jungere, quam a se abjicerent suo arbitratu: sed Ecclesia semper hujusmodi conjunctiones extra matrimonium improbavit. De concubinus discrimine late agunt Benedictus XIV. *de Synod. dioeces. lib. 9. cap. 12.* et Carolus Blaschus in *Epistola de interpretatione can. Fraternitatis dist. 34. inter ejus opuscula Neapoli edita ann. 1758. p. 1. et seq.*

(2) Consule Catechismum Romanum *par. 2. c. 8. §. 3.*

(3) Vide S. Augustinum *Serm. 51.^o cap. 13. col. 239. tom. 5, cū. edit. Venet.,* et S. Ambrosium *de Inuit. Virgin. cap. 5. et 6. opp. tom. 3. col. 318. et seq. edit. Maurin. Venet. 1751.* Unde illud apud Patres, et in canonibus frequenter occurrit: non concubinatu, sed consensu matrimonium existere.

(4) Hinc verum matrimonium fuit inter Beatissimam Virginem, et S. Josephum, quamquam immaculata semper Virgo ad perpetuo servandam virginitatem sese voto obstrinxisset. B. Virgo, ut inquit S. Thomas in 4.

Sent. dist. 5. quaest. 2. art. 1. ad 2. antequam cum S. Josepho matrimonium contraheret, divinitus intellexit, quod Joseph in simili proposito erat, et ideo non se commisit periculo nubens, nec tamen propter hoc aliquid veritati deperit, quia illud propositum non fuit conditionaliter in consensum appositum; talis enim conditio cum sit contra matrimonii bonum, scilicet prolem procreandam, matrimonium tolleret. Ceterum quod dixi translationem dominii in corpus utriusque conjugis ab usu secerni posse, id ita intelligendum, ut uterque in alterius corpus dominium habeat, quamquam nihil referat, quod eo jure non utatur. Si enim cum initur matrimonium, expresso pacto caveatur, ut neque vir in corpus mulieris, neque vicissim mulier in viri corpus dominium habeat, hoc pactum irritum matrimonium facit, quoniam ejus bono adversatur. Consule Benedictum XIV. de Synod. dioeces. lib. 13. c. 22. num. 10. et seq.

§. CIII. Materia sacramenti matrimonii est contractus, per quem vir, et foemina suam obstringunt fidem, ac perpetuam coeunt vitae societatem. Hunc contractum Christus Dominus in lege Gratiae ad sacramenti extulit dignitatem, ita ut quisquis inter Ecclesiae filios cooptatus rite, et recte hunc contractum perficit, sacramentum suscipiat. Neque enim fieri potest, ut in hac lege contractus a sacramento distinguatur, ita ut haec duo diversa. et dissimilia sint. Ille idem contractus, in quo Christus in prima institutione mysticum impressit signum copulationis suae cum Ecclesia, in lege nova sacramentum esse voluit; idemque hic contractus, cui dignitas accessit, et gratia sacramenti, ab eodem Christo revocatus est ad primam institutionem suam, quae fuit, ut dissolvi non posset (1). Sic matrimonium, quod in lege naturae tantum contractus erat

naturalis , post institutas societates , atque illud earum legibus approbatum , civilis etiam contractus evasit , et sic factum quoque sacramentum postquam illi Christus Dominus in lege nova sacramenti gratiam , et dignitatem adjunxit. Unus et idem semper est contractus , qui initio fuit , neque novae accessiones ejus naturam pervertere potuerunt , ita ut in tres ascinderetur , atque alius , et distinctus Christianis esset contractus juris naturalis , alius juris civilis , alius juris evangelici.

(1) Nemo ignorat ex prima sui institutione eam esse matrimonii naturam , ut solvi non possit , quod apertissime docet Christus apud Matthaeum c. CXIX. v. 3. et seq. , ubi Hebraeis repudii libellum a Moyse permissum objicientibus respondit , id a Moyse factum *ad duritiam cordis eorum , ab initio autem non fuisse sic* , ideoque hoc libello abrogato ad pristinam sui naturam solvi nesciam matrimonium revocavit. Vide etiam eundem Matthaeum c. V. v. 32. , Marcum c. XV. v. 11. Lucam c. XVI. v. 18. Paulum I. ad Corint. c. VII. v. 10. Paucis , uti institutionum modus patiebatur , attingi hoc argumentum , quod si longiorem vitam dederit Deus , latius persequar lib. 4. *Juris Canonici universi publici et privati*. Videndus interim est egregius liber Cardinalis Gerdilii cui titulus : *Trattato del matrimonio*.

§. CIV. De forma vero , et ministro magna disputatio est. Sunt enim qui Sacerdotem benedicientem nuptiis ministrum , Sacerdotalem benedictionem sacramenti formam esse arbitrantur. Sed plerique sacramenti ministros ipsos contrahentes , faciunt formam in verbis , aut signis , quae consensum declarant , positam esse sentiunt (1).

(1) Theologorum de his rebus sententias, quae variae sunt, enumerat atque expendit Benedictus XIV, *de Synod. dioecses. lib. 8. cap. 13*. Vide etiam eadem de re Carolus Blaschum *Diatrib. 5. p. 231.*, ubi de forma sacramenti matrimonii late disputatur.

§. CV. Matrimonium mutuo consensu contrahitur, quoniam societas est, neque sine consensu jungi societates possunt. Hic vero consensus tum verbis, tum signis ostenditur; ac debet respicere tempus praesens, quoniam in futurum collatus matrimonium non conjungit, sed spondet (1); editurque vel verbis, vel signis certam voluntatem declarantibus; quin etiam vicaria alterius opera uti quis potest; modo ad id speciale mandatum detur. Procurator commissum sibi munus per se gerat; ei mandans, cum matrimonium contrahitur, in consensu perseveret (2).

(1) Vide Catechismum Romanum *par. 2. capit. 6. §. 6.*

(2) *C. ult. de Procurator. in 6.*

§. CVI. Dividitur matrimonium in legitimum, ratum, et consummatum. Legitimum secundum gentium leges contrahitur cum solo naturali consensu, caret Ecclesiae auctoritate, ac sacramenti dignitate; et hujusmodi sunt matrimonia infidelium. Ratum est, quod contrahunt fideles ex regulis Christianae Religionis: et est quidem ratum, donec conjugum corpora commixta non sunt. Cum haec accessit maritalis conjunctio, matrimonium consummatum efficitur, ac significat conjunctionem Christi cum Ecclesia, cujus conjunctionis causa perfectum, et consummatum dicitur. Nam propter sacramentum, quod

gratiam confert, itemque ob civile negotium, etiam ratum perfectum censetur.

§. CVII. Est item matrimonium verum, praesumptum, putativum. Verum dicitur quod rite, et recte contractum est inter virum, et mulierem, quorum uterque ad nuptialem consociationem aptus, et idoneus est. Praesumptum educebatur olim ex juris praesumptione; puta si post consensum de futuro ineundo conjugio vir cum muliere concubisset (1). Sed jure novo Concilii Tridentini nullum hoc matrimonium est (2). Putativum vocamus, quod re quidem est irritum ob latens impedimentum, sed specie valet; quia coram Ecclesia contractum est, et impedimentum vel uterque, vel alter conjugum ignoravit. Filii ex hoc matrimonio suscepti legitimi habentur (3), et dos suis gaudet privilegiis.

(1) *Cap. 15. et 30. de Spons. et Matrimon. 3. et 6. de Condition. apposit. in despons.* At inanis conatus ac copulam praesumptum matrimonium non efficiebat *cap. 32. et ult. de Sponsal.*

(2) Concilium Trident. *Sess. 24. cap. 3. de Reform. matrim.*

(3) *Cap. 11. Qui fil. sint legit.*

§. CVIII. Nec praetereundum matrimonium conscientiae, quod coram Ecclesia contrahitur, ea lege, ut semper occultum maneat. Matrimonium hoc, ut cetera Christianorum matrimonia palam, ac rite inſta, verum est sacramentum (1), et conjungitur coram Parocho, ac duobus testibus, qui omnes arcani silentii lege obstringuntur (2); sed a reliquis differt, quia contrahitur omissis tribus denuncia-

nibus (3), neque contractum describitur in libro, quo Parochus omnium matrimonia describit (4). Non omnes inire suo lubitu possunt hoc matrimonium, quod, cum occultum sit, gravia mala importare potest, sed ab Episcopo ex justa, gravique causa permittitur (5). Hujus simile est matrimonium *ad Morganaticam* (6), quod in Germania praesertim contrahunt viri nobiles, cum post obitum nobilis mulieris, quam pridem uxorem habebant, ac genitos ex ea filios, aliam ducunt humili loco natam. Uxor haec, atque ex ea suscepti liberi a viri ac patris dignitate excluduntur; quod in matrimonio consensientiae secus est (7).

(1) Hertius, Willelbergius, aliique Protestantes ita explicant hujus matrimonii naturam, ut vix illud a concubinato distinguatur. Sed certum est inter catholicos, verum esse, ac legitimum matrimonium, et ideo sacramenti rationem habere. Videndae autem in primis sunt encyclicae literae *Satis vobis* Benedicti XIV in ejus *Bulario* tom. 1. num. 35. pag. 54. ed. Rom. seu Venet., in quibus omnia, quae ad hoc matrimonium pertinent, accurate explicantur, quaeque regulam praebent Apostolicae Poenitentiariae, cum de his matrimoniis agitur, uti patet ex ipsius Benedicti XIV. *Const.* 95. §. 39. pag. 198. loc. citat.

(2) Late ea de re disputat V. Cl. Franciscus Mazzeus in Romana Curia Advocatus, qui de *matrimonio conscientiae* singularem librum Romae edidit an. 1665. c. 9.

(3) Facultatem solvendi, aliquem lege proclamationum totam Episcopi arbitrio commisit Synodus Tridentina *Sess.* 24. *cap.* 1. de *Reform. matrim.* De harum proclamationum origine paulo post dicam.

(4) Synodus Tridentina loc. cit. *habeat*, inquit, *Parochus librum, in quo conjugum, et testium nomina, diemque et locum contracti matrimonii describat, quem diligenter apud se custodiat.* Eadem Synodus E-

piscopi arbitrio non committit hanc legem, ut committit proclamationes; sed cum hodie Episcopus, secundum encyclicas literas Benedicti XIV, permittere possit matrimonium conscientiae, dubitandi locus esse non potest, quin etiam cum ejus venia hujus matrimonii descriptio in ordinario matrimoniorum libro omitti possit.

(5) Benedictus XIV in laudatis encyclicis mala commemorat, quae ex occulto matrimonio oriri solent, ideoque statuit, illud non esse permittendum *sine causa gravi, urgenti, et urgentissima*. Unam ipse expressit causam, si videlicet vir, et mulier in occulto concubinato vivant neque ulla apud homines hujus criminis suspicio sit. Tunc enim permittendum est matrimonium conscientiae; sed recte addit ipse Pontifex: *hanc praxim vobis duximus proponendam; non quia dispensatio praemisso casui solum congruat, cum alii similes, et fortasse urgentiores esse possint, in quibus dispensare expediat; sed quia vestri pastoralis officii partes versari debent in sedulo investiganda legitima, et urgenti causa dispensationis, ne matrimonia occulte celebrata luctuose habeant exitus, quos intimo cordis moerore recensuimus.*

(6) De origine matrimonii ad *Morganaticam*, deque vocabuli significatione late disputant Heineccius *Elem. jur. German. lib. 1. tit. 13. per tot*, et Henricus Coccejus de *Leg. morganat sect. 2 §. 7.* quorum alter ex lege Salica, et alter moribus hoc matrimonium obtinuisse putat. Ita autem describitur in *l. 2. Feudor. tit. 29.*, quidam habens filium ex nobili conjuge post mortem ejus non valens continere, etiam minus nobilem duxit, qui nolens existere in peccato eam desponsavit, ea lege ut nec ipsa, nec filii ejus amplius habeant de bonis patris, quam dixerit tempore sponsaliorum: verbi gratia decem libras, vel quantum voluerit dare, quando eam desponsavit, quod Mediolanenses dicunt accipere uxorem ad morganaticam, alibi lege Salica: *hic filius ex ea susceptis decessit. Isti in proprietatem non succedunt aliis extantibus; sed nec in feudo etiam aliis non existentibus, qui licet legitimi sint, tamen in beneficio minime succedunt. In proprietate vero succedunt patri prioribus non existentibus: succedunt etiam fratribus*

sine legitima prole decedentibus, secundum usum Mediolanensium. Quo ex loco facile intelligitur, quae hujus matrimonii natura sit, et quibus legibus regatur. Est autem *Morgengap*, unde ductum vocabulum ad *morganaticam* donum matutinum, quod a viro uxori datur post concubitum, cum adhuc nuptiarum solemnia peraguntur, ac illud quidem erat voluntarium, magis scilicet lautum, magisque tenue, pro cujusque amore, et caritate in uxorem; et in lege Longobardorum l. 2. tit. 1. c. 8. gratuita donatio dicitur: *per gratuitam donationem, idest morgengap*. Sed cum quorundam, quos mulieris illecebrae deliniebant, ea in re dissolutior esset liberalitas, Rex Longobardorum Liutprandus anno quinto regni sui legem tulit, qua sancivit, ut nemo propter *morgengap* uxori daret ultra quartam partem bonorum suorum L. 2. Leg. Longobard. tit. 5. cap. 1. Hinc Papias in suo Vocabulario inquit *Morgengap*, idest quarta pars in Lege Longobardorum. Multa de hoc *Morgengap* antiqua monumenta afferantur a Balutio in Not. ad Capitular. Reg. Francor. verb. *Morgangeba* tom. 2. col. 668. edit. Venet. 1773. Vide etiam Du-Cangium Glossar. verb. *Morganegiba*.

(7) Pactum praesertim, quo cavetur, ut uxor, et liberi certis contenti bonis, quae data sunt, a viri ac patris haereditate et dignitate arceantur, matrimonium ad *Morganaticam* a conscientiae matrimonio distinguat.

S E C T I O VIII.

D E S P O N S A L I B U S.

CIX. Sponsalia quid?

CX. Qui ea recte contrahant?

CXI. Consensu sponsalia fiunt.

CXII. Eorum vis, et obligatio.

CXIII. et CXIV. Quomodo solvantur.

§. CIX.

Quod veteribus in more fuisse scribit Ulpianus (1), *stipulare, et spondere sibi uxores futuras*, id etiam Christianis semper fieri consuevit; tum quia comparare se sponsi debent ad gratiam sacramenti, tum quia periculi plena res est sese perpetuo vinculo temere implicare. Itaque ante matrimonium fiunt sponsalia, quae a *spondendo* dicuntur (2), quaeque sunt futurarum nuptiarum facta, et vicissim accepta promissio (3). Sponsalium nomine proprie intelligitur consensus in futuras nuptias, sed interdum etiam comprehenditur consensus in praesens matrimonium, quae sponsalia *de praesenti* appellantur (4).

(1) *L. 2. ff. de Spons.*(2) Confer A. Gellium *Noct. Attic. lib. 4. cap. 4.* p. 181. *ed. Lugd. Batav. 1666*, et Brissonium *de Formul. lib. 6. form. 123. p. 518. edit. Halae 1731.*(3) *Cap. 31. de Sponsal.*(4) Sponsalia *de futuro*, ac *praesenti* memorat Gre-

gorius IX. in *cap. 31. de Sponsal.* Sponsalia *de praesenti* rident Hotomannus *Disp. de Sponsal. cap. 7.* et A. Matthaeus *Manud. ad jus canon. lib. 2. tit. 6.* Sed ut rectissime animadvertit Panormitanus in *d. cap. 31.*, matrimonium ratam sponsalia *de praesenti* appellare solemus, non propter conjugale vinculum, quod jam colligatum est, sed propter ejus *exequutionem*, quae corporum conjunctio est. Hanc sane loquutionem in vulgus probari, ac vulgares loquendi modo ipsis Romanis jurisconsultis probatos constat. Adde et illud quod ipsi veteres Romani sponsalia *de praesenti*, qualia canones agnoscunt, haud ignorasse videntur, quod recte tradit Huberus *Observ. jur. lib. 2. cap. 8.*

§. CX. Sponsalia consensu perficiuntur, eaque recte contrahunt omnes, qui in futurum matrimonium consentire possunt. Furiosi, amentes, itemque pueri, qui nondum e septennio excesserunt, eadem contrahere vetantur (1); sed majores septem annis, qui suo consensu futuras nuptias probare possunt, recte illa conciliant; modo, si sint filii familias, parentes assentiantur, aut saltem non dissentiant; quae naturalis est reverentia, qua filios prosequi decet parentes suos (2). Quoniam vero impuberi lubrica aetas, atque incertum, et praeceps consilium est, ideo potest a sponsalibus resilire, cum pubertas adveniet (3). Ipsi quoque parentes pro filiis impuberibus dare possunt futuri matrimonii fidem, at ea filii ipsi non obligantur, nisi expresse, aut tacite consenserint, postquam puberes evaserunt (4). Sed et pro filiis puberibus parentes sponsalia contrahere possunt, verum ut ea vim habeant, illorum consensu opus est (5).

(1) *Leg. 8. et Leg. 14. ff. de Sponsal. Cap. 13. de Desponsat. impub.*

(2) *Leg. 7. ff. de Sponsalibus Can. 1. et 3. caus. 30. quæst. 5.* Ac sponsalia quidem a filiis familias inita parentibus insciis, vel juste invititis etiamsi jarata sint, nullius momenti esse, demonstrat Franciscus M. Muscettula *Dissert. de Sponsal. et Matrimon. quæ a filiis familias contrahuntur parentibus insciis, vel juste invititis dub. 4. num. 145. et seq. pag. 107. edit. Rom. 1766.*

(3) *Cap. 8. de Desponsat. impuber.*

(4) Vetas disciplina erat, ut parentes pro filiis impuberibus sponsalia contraherent, eaque filii ipsi, cum ad pubertatem pervenerant, servare cogebantur; uti patet ex *Cap. 1. de Desponsat. impuber.* Verum hoc jus abrogavit Bonifacius VIII. in *C. de Desponsat. impuber. in 6*, statuitque, ut his sponsalibus filii non teneantur, nisi ea post pubertatem suo consensu probaverint. *Con. sale Beuedictum XIV. const. Probe 54. §. 6. tom. 3. ejus Bullar. pag. 241. edit. Rom. seu Venet. 1754.*

(5) *Cit. cap. unic. §. ult.*

§. CXI. Confirmantur sponsalia donationibus sponsalitiis (1), aliisque solemnitatibus; imo et adhibentur testes (2), et matrimoniales tabulae conficiuntur, ut ea jam contracta fuisse constet (3). Sed tota eorum vis posita est in consensu contrahentium, qui modo sit certus, nihil refert, nutu ne quis assentiatur, an verbis sive ore prolatis, sive epistola comprehensis, neque etiam refert, per se quis contrahat. an per procuratorem. Quin etiam sponsalia fiunt sub conditione, quæ pendet ab incerto futuro eventu, quæque si honesta, et possibilis sit, vim contractus suspendit, donec existat, et si non existit, contractum solvit. Turpes autem, atque impossibiles conditiones rejiciuntur, ac firma manent sponsalia; quæ tamen infirmantur, si conditio matrimonii bono adversetur (4).

(1) Munera haec, quae *arrhae*, et *pignora* vocantur a Christianis etiam usurpata memorat *Gregorius Taronensis de vit. Patr. capit. 20. pag. 1252. edit. Paris. 1699*: inter munera, quae in sponsalibus tradebantur, eminebat praesertim annulus, qui a viro foeminae dabatur ante nuptias, *Tertullianus de Cultu foeminar. lib. 1. cap. 5. pag. 152. et Apologet. cap. 3. pag. 7. ed. Paris. 1675*. Hujus annuli usum, quem Christiani quoque retinebant, memorant etiam *Clemens Alexandr. Paedagog. lib. 3. cap. 12. pag. 287. tom. 1. edit. Oxoni. 1715*. Annulus *arrhae* nomine in omnibus sponsionibus a Romanis saepe adhibebatur, cum darent vel pecuniam, vel annulum, ut pignoris loco esset, *Plinius lib. 33. cap. 6. Histor. Natural. tit. 5. pag. 16 edit. Paris. 1685. Leg. 11. § 6. ff. de Action. empt. Leg. ult. ff. de Leg. commiss. ; Leg. 5. §. 15. ff. de Institor*. Hinc ad firmendam sponsionem, quae in sponsalibus fiebat, annulus adhiberi consuevit, quem ferreum ac sine gemma sua aetate fuisse, testatur *Plinius loc. cit.* Sed *Tertulliani* aetate, uti constat ex ejus *Apologetic. cap. 3. pag. 7. edit. cit.* aureus erat. Antiqui Galli *per solidum*, et *denarium secundum Legem Salicam* sponsalia contrahebant, uti patet ex *formula 5. Bignonii, et ex formula 75. Lindebrogii apud Balutium Capitular. Reg. Francor. tom. 2. col. 344. edit. Venet. 1773*. Nimirum *arrha* erat et *denarius*, et *annulus*, ideoque alterutra sponsalia contrahebantur. Sunt qui annuli caeremoniam non ad sponsalia, sed ad ipsas nuptias referendam putant; sed longe aliud ostendunt *Gregorius Taronensis loc. cit.*, et *Nicolaus I. in Respons. ad consulti. Bulgar. cap. 3.*, apud *Harduinum, Collect. Concil. tom. 5. col. 364*. *Isidorus Offic. Ecclesiast. lib. 2. cap. 19. p. 608. ed. Paris. 1601*, annulum a sponso sponsae dari inquit *vel propter mutuae fidei signum, vel propter id magis, ut eodem pignore eorum corda jungantur. Unde et quarto digito annulus idem inseritur, quod in eo vena quaedam, ut fertur, sanguinis ad cor usque perveniat.*

(2) Quot numero testes in sponsalibus adhiberi solerent, non satis exploratum est; adhibitos tamen fuisse testes decem colligi potest ex *Ambrosio de Laps. Virg. cap. 5. opp. tom. 3. col. 386. edit. indic. Haud*

tamen necessaria est praesentia testium, ut sponsalia valeant; nam ut inquit Benedictus XIV. *de Synod. dioec. lib. 12. cap. 5. num. 1.* Concilium Tridentinum nihil innovavit circa sponsalia, eaque reliquit sub dispositione juris communis juxta quod, etiam remotis arbitris, valide contrahuntur.

(3) Consule Martenium *de antiq. eccles. rit. lib. 1. cap. 9. art. 3. tom. 9. pag. 124. edit. Venet. 1763.*, et Jacobum Gothofredum in *Leg. 3. Cod. Theodos. de Nuptiis tom. 1. pag. 321. edit. Lips. 1736*, a quibus omnes sponsalium ritus describuntur. Praeter ceteros ritus, etiam osculum, et dexterarum conjunctio adhibebatur. Osculi quidem sponsaliti consuetudinem a Christianis, apud quos nihil osculo sancitus, et usitatus erat, repetendam putat Jacobus Gothofredus in *L. 5. Cod. Theod. de Spon. et ante nupt. donation. 2. d. 308. ed. ind.*, et Mazochius in *Adnot. ad Muscettulae Dissert. de Spon. et matrimon. etc. distrib. 2. n. 8. et seq. p. 337. et seq. ed. Romae 1766.* Meminit hujus osculi Tertullianus *de Veland. Virg. cap. 11. p. 179. ed. Paris. 1765*, et meminit Constantinus in *L. 16. Cod. de Donat. ante nupt.*, quae ejus constitutio est *Lex 5.* mox indicata Codicis Theodosiani, ac refertur in Basilicis *lib. 28. tit. 3. cap. 16.* Haec porro sponsalia osculo firmandi consuetudo viguit, et nunc etiam viget in Ecclesia Graeca, uti ex Crusii Turcograecia colligit Mazochius *loc. cit. not. 3. pag. 233*, sed Latina Ecclesia Graeca severior, et austerior, cum sponsalia in grandiore aetate differri coeperunt, atque hominum malitia desit antiqua simplicitas, rituale illud osculum omittendum putavit. Postrema ejus osculi mentio est in *Palea Can. Lex Divinae cap. 27. quaest. 2.*, quisquis tandem sit auctor hujus rescripti, quod vulgo Benedicto tribuitur.

(4) *Cap. ult. de Condit. apposit.*

§. CXII. Contracta sponsalia obligationem contrahendi matrimonii pariunt; adeo ut renuens implere fidem non tantum monendus, sed etiam metu poenarum, atque ecclesiasticis censuris cogendus

sit. (1). Verum coactioni, atque censuris, in quibus nervus inest ecclesiasticae potestatis, non ita facile dandus est locus, quoniam tristes habent exitus coacta matrimonia: et ideo vel levis causa procul esse jubet coercitiones, atque ab iis plane abstinendum est, cum adhuc sponsus voluntate obstinata pergit matrimonio resistere (2). Quod si qua gravis causa urgeat, puta si mulier a sponso deflorata sit, ipse omnino ad nuptias cogi debet.

(1) Lucius III. *In C. 17. de Sponsal.* sponsam monendam potius, quam cogendam esse statuit, cum coactiones difficiles soleant exitus frequenter habere. Contra Alexander III. in *cap. 10. eod.* sponsum non tantum moneri, sed etiam ecclesiastica censura compelli jubet ut ipsam, nisi rationabilis causa obstiterit, in uxorem recipiat. Ita componendus videtur uterque locus Juris Canonici, ut vel levissima causa faciat soli monitioni locum; contra vero adhibenda sit coercitio, cum eam gravis causa postulat.

(2) Confer Muscettulam *laud. Diss. de Sponsal. et Matrim. etc. dub. 4. n. 134. et seq. p. 100. et seq. ibique Mazochium not. 34. p. 103.*

§. CXIII. Solvuntur sponsalia mutuo consensu eorum, a quibus contracta sunt, etiamsi jurata sunt; quia sacramentum sequitur naturam actus, cui adjectum est (1). Impuberes vero dissentire non possunt, nisi puberes facti sint, et se corporum conjunctione abstinuerint (2). Quod si alter impubes suam obligavit fidem, atque dissentiat, sponsalia dissolvuntur, etiam invito altero, qui ea contraxit, cum jam pubes evaserat (3).

(1) *Cap. 25. de Jurejur.*

(2) *Cap. 8. de desponsat. impuber.*

(3) *Cap. 7. eod.*

§. CXIV. Sed et solvuntur sponsalia per matrimonium, quod sponsorum alter injuria quidem, sed valide cum alia, aliove contraxit; per sacros susceptos ordines (1), aut emissam in approbata religione professionem (2). Quin etiam interdum unus liberatur, sed alter adhuc manet obstrictus sponsione sua; si nimirum ipse dolo rem egit, si in longinqua proficiscatur sine alterius consensu (3), si magnam, atque constantem post sponsalia pertulit mutationem animi, corporis, fortunarum (4), si fidem fregit, hoc est suum cum alio corpore commiscuit (5). Qua in re Canonici juris interpretes virum liberant, etiamsi mulier ante sponsalia, ac per vim quoque stuprata sit; verum mulier lege solvitur, tantum si vir post inita sponsalia in fide non stetit.

(1) *Cap. unic. de Vot. in 6.*

(2) Qui ingreditur religionem obligatus manet, donec professionem emittat, sed alterius obligatio per solum illius ingressum tollitur.

(3) *Cap. 6. de Sponsal.*

(4) *Cap. ult. de Conjug. lepros.* Nam in omnibus pactionibus, multo magis sponsalibus, inesse censetur conditio, *rebus in eodem statu manentibus.*

(5) *Cap. 25. de Jurejur.*

- CXV. Quae et qualia sint
matrimonii impedimenta?
CXVI. Ea constituere, et
ꝑ laxare Ecclesiae est.
CXVII. Matrimonii sacra-
mentum a contractu civi-
li non pendet.
CXVIII ad CXXI. Summo
Pontifici, non item Epi-
scopis laxandi dirimentia
impedimenta potestas est.
CXXII. Impedimentorum di-
spensatio publica, vel oc-
cultas.
CXXIII. et CXXIV. Divi-
sio impedimentorum diri-
mentium.
CXXV. Aetas.
CXXVI. et CXXVII. Im-
potentia.
CXXVIII. Ordo sacer.
CXXIX. Votum solemne.
CXXX. Ligamen.
CXXXI. ad CXXXV. Co-
gnatio naturalis.
CXXXVI. Cognatio Civilis.
CXXXVII. Cognatio spiri-
tualis.
CXXXVIII. Affinitas.
CXXXIX. Publica honestas.
CXL. Crimen.
CXLI. Cultus disparitas.
CXLII. Error.
CXLIII. Ignoratio servilis
conditionis.
CXLIV. Vis.
CXLV. Raptus.
CXLVI. Turpis conditio.
CXLVII. Matrimonium clan-
destinum.

§. CXV.

Dum ineuntur nuptiae, illud in primis consideran-
dum est, num aliquid interveniat, quo illae vel
prorsus irritae; vel non laudabiles, neque honestae
sint. Quae irritum matrimonium faciunt, impedimen-
ta dirimentia; quae minus laudabile, et honestum
impedientia appellantur. Impedimenta impedientia ve-
tant, ne nuptiae contrahantur, sed non tollunt,
nec evertunt contractas; dirimentia vim prorsus adi-
munt matrimonio, et ideo non tantum contrahen-
dum impediunt, sed etiam contractum dirimunt.

§. CXVI. Impedimentorum constituendorum , et laxandorum jus penes unam Ecclesiam est (1). Id ostendit et natura matrimonii , quod cum apud Christianos sacramentum sit , civilibus legibus subesse non potest , ac perpetua traditio , et consuetudo , quam semper Christiani omnes ratam firmam habuerunt (2). Civilibus quidem legibus effici potest , ut qui certas nuptias conciliarunt , potiri non debeant iuribus , et privilegiis , quibus reliqui Cives potiuntur : sed unius Ecclesiae est leges constituere , quae vim matrimonii respiciunt.

(1) Concilium Tridentinum Sess. 24. Can. 3. de Sacram. matrim. Si quis , inquit , dixerit , eos tantum consanguinitatis , et affinitatis gradus , qui in Levitico exprimuntur , posse impedire matrimonium contrahendum , et dirimere contractum , nec posse Ecclesiam in nonnullis illorum dispensare , aut constituere , ut plures impediant , et dirimant , anathema sit. Idemque habet Can. 4. Waldenses primum , postea Lutherani , et Calviniani , tum Marcus Antonius de Dominis Archiepiscopus Spalatensis , et apostata Paulus Sarpus , et Joannes Lænojus nullam esse putarunt in Ecclesiastica Hierarchia impedimenta illa constituendi potestatem. Errorem hunc jam prope senescentem ab oblivione hominum , atque silentio non nullis abhinc annis vindicare conati sunt Aloysius Litta , Thomas Nestius , Petrus Tamburinius , et quidam alii ; qui etiam absurde detorquent Tridentinos canones , quorum supra facta mentio est , ne in illum ipsum incidere videantur errorem , quem Synodus contra Lutherum , ceterosque haereticos damnavit. Inquiunt videlicet , canones non esse dogmaticos ; Tridentinis Patribus Ecclesiae potestatem esse potestatem non propriam Ecclesiae , sed ei a Principibus concessam , denique Ecclesiae nomen Patres ipsos usurpasse , non ut Ecclesiasticum ordinem , sed ut saeculares Principes significarent. Verum si Tridentina Synodus hanc de matrimonio doctrinam non aliquo de Reformatione titulo , sed comprehendit canonibus , quibus

semper catholicum dogma stabilire solet ; si initio sessionis 24., in qua extant duo illi canones de matrimonii impedimentis , se declarat *anathematizare* omnes haereses , et errores qui de sacramento matrimonii orti sunt ; si inter has haereses , et errores *anathematizat* etiam eos , qui negant jus esse Ecclesiae constituendorum , et laxandorum impedimentorum matrimonii , nonnisi obfirmata evellendi licentia hos canones dogmaticos esse inficiabitur. Quod vero ajunt de prava illa interpretatione vocabuli Ecclesiae , id argumentum est , quo nullum illustrius , et praeclarius esse potest , perditae , ac desperatae causae , quam tuentur. Quis enim putet , Ecclesiam , quae omnibus , atque ipsis Tridentinis Patribus semper est Ordo Ecclesiasticus , duobus illis canonibus esse potestatem saecularem ; Patres ipsos qui cuncta suis propriis germanisque vocabulis explicarunt studio ac diligentia singulari , eo tantum loco a proposito discessisse pervertisseque vocabuli significationem , ut facerent disputationi locum , et simul integrum relinquerent errorem Lutheri , cujus erant conatus omnes in ecclesiasticam potestatem ; Principum Oratores , qui concilio intererant , curabantque diligenter , ne quid verbis , aut factis eorum potestati detraheretur , permittere voluisse , quod haec potestas , quae suo , et proprio vocabulo clarissime designari potuisset , comprehenderetur vocabulo , quod tantum violenter detortum , ac minus proprie eam significare poterat ? C. 1. Sess. 14. de Reform. matrim. Synodus irrita facit clandestina matrimonia , quae rata firma fuisse dicit , *quamdiu ea Ecclesia irrita non fecit*. Ergo Tridentinis Patribus Ecclesia , quae dirimentia matrimonium impedimenta constituit , est ipsa Synodus , hoc est coetus Ecclesiasticus , cujus decreto factum est , ut clandestina matrimonia , quae pridem Ecclesiae lege irrita non erant , alia deinceps Ecclesiae lege irrita habeantur , et sint. Eodem sensu aliis in locis Ecclesiae vocabulum Synodus usurpat , ex. gr. Can. 15. Sess. 14. de Poenitent. Can. 12. Sess. 24. de Matrim. Sess. 25. in Decret. de Indulgent. quibus locis omnibus Ecclesiae nomine intelliguntur Superiores , et Pastores , in quibus inest regendi , ac pascendi auctoritas. Quid ? Nova illa a Synodo constituta impedimenta , illae Principum Ora-

torum preces, illaque de his impedimentis studia, quae partim Synodi Patres probarunt, partim rejecerunt arbitrio suo, nonne evidenter ostendunt in eo negotio Ecclesiae potestatem? Neque his precibus, et officiis remegissent *Delegantes cum Delegato*; nihil illis a se postulantibus Synodus recusare potuisset; non tuto, ac certo statuere *Can. 3. et 4.* (addita quoque poena anathematis in eos qui id negarent) non solum antea potuisse, sed etiam in posterum Ecclesiam posse matrimonii impedimenta constituere; non pari anathematis poena plectere *Can. 12.* qui dicerent, *causas matrimoniales non spectare ad Judices Ecclesiasticos*, si in eo negotio Ecclesia delegato tantum jure uteretur, non proprio, et suo. Denique cum Tridentini Patres impedimenta stabilire dicant *Ecclesiam, et Sanctam Synodum*, quibus iisdem verbis catholicum dogma constituunt; aut in utroque, aut in neutro potestas delegata ponenda est. Quis autem dicat, Synodum oecumenicam in constituendo dogmate potestate delegata indigere? Paucis haec attingi, quae multo fusius, et uberius explicari possunt, sed ita instituti mei ratio postulabat. Praeclare in hoc argumenti genere versatus est Cl. Auctor operis editi *Hierapoli an. 1786*, cui titulus: *Defensio Tridentinorum Canonum de Ecclesiae potestate in dirimentia matrimonium impedimenta, adversus Launojum, Tamburinium, Nestium, aliosque recentiores, Auctore Petro Deodato Nicopolitano*. Confer etiam ejusdem Auctoris opus editum an. 1788., cum titulo: *Nuova difesa dei canoni III e IV della Sessione 24. del Concilio di Trento scritta da Pietro Diodato*, itemque opus quod extat in *Supplemento Diarii Ecclesiastici Roman. Mens. Septembr. et Octobr. 1791.* atque divulgatum est a V. Cl. Aloysio Cuccagnio cum titulo: *del Matrimonio Cristiano, e della Divina immediata potestà della Chiesa di apportare ad esso gli impedimenti, che si dicono dirimenti: praeterea Les vrais principes sur le mariage, opposés au rapport de M. Durand de Maillane par l'Abbé Barruel.*

(2) Id ostendam paulo post, cum de unoquoque impedimento singillatim disseram. Interim, ut mittam caetera ejus rei monumenta, quorum magnus est numerus, quaeque a Gerbaisio recensentur, satis est legere duas

canonum collectiones, quas VII et XIII saeculo ediderunt Theodorus Cantuariensis, et Egbertus Eboracensis, ut pateat, quot jam essent ea aetate matrimonii impedimenta ab Ecclesia constituta. Ille enim apud Dacherium *Spicileg. tom. 1. C. 23. 24. 30. 31. 32. 63. 92. 93. 108. 139. 140. 143. pag. 187. ad 490. edit. Paris. 1723*, multa huiusmodi impedimenta describit, et multa item habet Egbertus in collectione, cui titulus: *Excerptiones a c. 128 ad 138*, apud Spelmanum *Concil. Britanic. tom. 1. pag. 271. et seq. edit. Londini 1639*. Vide Jueninium *de Sacram. quaest. 6. de matrimonio impedimen. in gener.* Gerbaisium *Traité du pouvoir de l'Eglise, et des Principes sur les empêchemens du mariage*, quo quidem opere *tota parte I* apertissime ostendit, Ecclesiam jus proprium habere constituendi impedimenta matrimonii, atque omnium aetatum: collectis monumentis hanc esse demonstrat perpetuam traditionem, et consuetudinem, quam etiam saeculares Principes saepissime ratam habuerunt; quamquam *parte 2*, minus vere jus constituendi impedimenta matrimonium dirimentia etiam laicae Potestati adscribere conetur. Vide etiam Lau-noii sophismata refellentem Auctorem operis *De l'Autorité des deux puissances c. 3. §. 8. t. 2*, et Jacobum Clementem *Traité du pouvoir irrefragable et inébranlable de l'Eglise sur le mariage des Catholiques*.

§. CXVII. Neque vero quod in matrimonio inest etiam civilis contractus, exinde effici potest, quod si forte civiles leges contractus tollant, matrimonium quoque tollatur; quoniam materia eripitur, in qua consistit. Nam sacramenti materia non civilis, sed naturalis est contractus, qui simul est hinc quidem contractus civilis, illinc vero sacramentum; quoniam ab eo perficitur qui simul civilis, et Christianus est. Atqui nec contractus civilis a sacramento, nec sacramentum a civili contractu pendet, quae diversa sunt rerum genera certae Civitatis, et Christianae religionis, utrumque per se con-

stans, non alterne necessario nexa inter se; cum sit tamen utrumque singillatim innexum conditioni naturali hominis, atque ab hac pendeat. Itaque, sublato etiam civili contractu, integrum tamen est sacramentum, quod ab illo non pendet, et quod suam habet materiam in contractu naturali (1).

(1) Gravis est error illorum, qui cum in matrimonio civilem contractum fieri animadvertant, ita ab hoc contractu sacramentum pendere arbitrantur, ut illo sublato, alterum etiam tolli, evertique debeat. Inquiunt enim, in matrimonio inesse et civilem contractum, et sacramentum, sed primum contractum existere, postea sacramentum, quod ab illo sumit materiam, in qua consistat. Quemadmodum vero civilibus legibus ceteri contractus subjiciantur, ita etiam iis subesse contendunt contractum matrimonii; et ideo cum civiles leges contractum perimunt, ipsam tollunt materiam sine qua sacramentum stare non potest. Verum materiam sacramenti matrimonii non civilis, sed ipse est contractus naturalis, qui certe absolvi coepit, multo ante quam ullae civiles societates constituerentur. Naturalis hic contractus materiam praebet tum contractui civili, tum sacramento. Cum contractus ab eo perficitur, qui tantum est Civis, ejus matrimonium tantum civilis contractus esse potest; atque ex eo genere sunt conjugia, quae ab infidelibus contrahuntur. Sed quando nuptias conciliat, qui simul civis, et Christianus est, matrimonium simul efficitur contractus civilis, et sacramentum; quia non primum a Cive, deinde a Christiano, sed ab uno simul Cive, et simul Christiano contrahitur. Quare utut leges impedimenta constituant adversus civilem contractum, nulla certe possunt constituere adversus sacramentum, neque illo sublato hoc etiam tollitur, perinde ac non amplius habeat materiam, in qua consistat. Haec enim est posita in contractu naturali, cui tamquam fundamento utriusque communi, et proximo, tum contractus civilis, tum sacramentum incumbit. Certe Christus Dominus, qui suam instituit Ecclesiam ex omnibus gentibus, quibus dissimiles erant mores, legesque civiles, omni-

bus qui ad hanc Ecclesiam pertinerent, matrimonium sacramentum esse voluit. Itaque ejus materiam constituere debuit, quae omnibus una et eadem esset, et ideo primam quae ante ullas conditas civiles leges fuit, matrimonii institutionem appellavit. Atqui tantum naturalis contractus unus, idemque erat omnibus, non civilis, quem aliis legibus Romani, aliis Hebraei, aliis reliquae gentes perficiebant. Equidem peto ab iis, qui civilem contractum sacramenti materiam faciunt, quorum populorum civiles leges Christus respexerit ut in iis sacramenti materiam poneret? An Hebraeorum, an Romanorum, an reliquarum Gentium? Si Hebraeorum leges spectavit, negabimus sacramentum fuisse matrimonium ceterorum, qui ex Romanis, aut ex reliquis gentibus ad Ecclesiam veniebant: quoniam non iisdem, quibus illi, legibus utebantur. Eadem contra argumentatio redit, si in contractu civili Romanorum, aut reliquarum gentium sacramenti materiam a Christo collocatam dicamus. Adde, quod nullae tunc erant civiles leges de matrimonio, quae non Christi legi adversarentur. Hebraeorum leges repudium permittebant, leges Romanorum ac gentium reliquarum et repudii facultatem dabant, et plenae superstitionum, ac vitiorum erant. Quis dicat Christum fecisse sacramenti materiam has leges, a quibus divina, quae ab eo ferebatur, Lex abhorrebat? Fecisse praeterea materiam vagam, et incertam, qualis est contractus civilis, qui a populorum moribus, a temporum ratione, ab hominum voluntate, arbitrioque pendet? In reliquis sacramentis una, atque eadem cunctis gentibus materia est. Quis illud sibi in animum inducat, solius sacramenti matrimonii Christum fecisse materiam tam variam, tamque dissimilem, quam varii sunt, interque se dissimiles mores, ac leges civiles quibus populi reguntur? Confer Jacobum Clementem *loc. cit. cap. 3.* et Auctorem operis *De l'Autorité des deux puissances cap. 3. et 8. tom. 1.*

§. CXVIII. Cumque Ecclesiam repraesentent vel ejus caput Romanus Pontifex, vel oecumenicum Concilium, sequitur, ut ab alterutro tantum dirimentia matrimonium impedimenta constitui (1), et

constituta removeri possint (2). Saepe enim justis de causis aliquis lege solvitur; solvendus est autem potestate pari, qua adstrictus est. Episcoporum potestas infra Summi Pontificis, atque oecumenici Concilii potestatem est; et ideo, quae superiori lege sancita sunt, impedimenta perfringere, et labefactare non possunt. Quare ut Summi Pontifices jus illud exerceant, quod semper exercuerunt, laxandi dirimentia matrimonium impedimenta, nihil sibi praecipue reservare debuerunt, neque aliquid de juribus episcopalibus diminuere, ac detrahere oportuit. Res ipsa vetat, inferiorem abrogare legem, quae superioris imperio sancita est.

(1) Impedimentorum matrimonii, quae a Summis Pontificibus constituta sunt, vel probata, et tunc generalis Ecclesiae legis vim obtinuerunt, antiquissima exempla suppeditant Innocentius I. *Epist. 2. ad Victorie Rothomag. cap. 13.* apud Constantium *Epist. Roman. Pontific. col. 756*, Siricius *Epist. 1. ad Himer. Tarracōnen. cap. 4.* apud eundem Constantium *col. 628*, Leo M. *Epist. 2. ad Rustican. Narbonen. et Ep. 133. ad Nicet. pag. 11. et 443. opp. tom. 1. edit. Romae*, Gregorius M. *Epist. 2. lib. 7. Epist. 64. lib. 11. Epist. 17. lib. 14, et in Decret. 6. opp. tom. 2. col. 845, 1154. 1179. 1293. edit. Paris.*, Gelasius *Decret. cap. 20.* apud Pithoeum *eod. canon. Eccles. Roman. Paris. 1678. pag. 268*, Gregorius II. *Decret. 1. 2. 3.* apud eundem Pithoeum *loc. cit. pag. 300.* Falso igitur auctor libri *Sopra il diritto di stabilire impedimenti di matrimonio, e di dispensare a Romanis Pontificibus constituta* negat matrimonii impedimenta. Sane eorum quaedam primum a Conciliis particularibus stabilita sunt: sed ea tantum post decretum Summi Pontificis in Ecclesia universa vim legis habere coeperunt.

(2) Saeculo VI. Gregorius M. Anglorum genti, quae recens Christi fidem amplexa fuerat, matrimonia permisit in tertio consanguinitatis gradu, in quo jam tunc irrita conjugia erant. Unde, inquit ipse Gregorius ad

*Augustinum Epist. 54. lib. 11. tom. 2. col. 1154. edit. Paris. cit., necesse est, ut jam tertia, aut quarta generatio fidelium licenter sibi jungi debeat; nam secunda, quam diximus, a se omnino debet abstinere. Quae indulgentia Pontificis cum displicuisset Felici Episcopo Messanensi, ipseque ea de re vehementiores ad Gregorium literas dedisset, respondit Pontifex Ep. 17. lib. 14 col. 1277, se non omnibus universe, sed tantum Anglis hanc veniam iustis de causis concessisse. En dispensationum matrimonialium, ut vocant, quae a Sede Apostolica datae sunt monumentum loculentissimum, ac vetustissimum. Scio, quosdam esse, qui has literas Gregorii esse negant; sed et stylus, et rerum de quibus agitur, ratio, et cetera argumenta, meo quidem iudicio, evidenter ostendunt, eas omnino Gregorio adscribenda esse. Adeundi sunt eruditi Monachi e Congregatione Sancti Mauri in Not. ad utramque Epist. Hujus simile exemplum sup-
 peditat initio saeculi VIII. Gregorius II, qui Germanis facultatem dedit nubendi post quartum gradum, quo quidem gradu nullum ea tempestate matrimonium erat, uti patet ex ejus Epist. 14. ad Bonifacium Mogunt. apud Labbaeum Coll. Concilior. tom. 8. col. 177. ed. Venet. Alia multa eadem de re monumenta collegit Auctor operis, quod Fulginei prodit anno 1784 cum titulo: *Le storie idee raddrizzate c. 3. pag. 89. et seq.* Interdum etiam a Synodis provincialibus laxata sunt matrimonii impedimenta, quando scilicet Pontificiis Constitutionibus, aut totius Ecclesiae lege nondum probata fuerant. Multa enim impedimenta primum a Conciliis provincialibus constituta sunt; et tunc ea tolli poterant eadem auctoritate, qua stabilita fuerant. Sed posteaquam jus illud totius Ecclesiae lex evasit, ei certe non amplius derogare potuit Synodus provincialis, cujus potestas infra illam potestatem est. Certe matrimoniales causas inter causas majores, quas Romano Pontifici servatas voluerunt Innocentius I, Leo M., et ceteri, quorum loca indicavi lib. 1. tit. 3. sect. 1. §. 14. not. 6. pag. 159. recenset Caelestinus III Epist. 3. ad Archiepiscopum Senonen. apud Labbaeum tom. 13. Concil. col. 698. edit. Venet., Sigefridus Mognutinus Epist. ad Alexand. II. T. 2. Concil. German. pag. 152, Annales Berti-*

niani *ad ann.* 138. apud Eckartum *Gallia orient.* tit. 2. lib. 18. §. 193. Synodus Tridentina sartam tectam esse voluit potestatem, qua semper Apostolica Sedes usa fuerat removendi dirimentia impedimenta, ideoque regulas in materia dispensationis, ac signanter super impedimentis matrimonii praescriptas ad Romanum Pontificem praecipue direxit; uti post Du-Cassium *de Jurisdict. eccles.* tom. 1. cap. 10 §. 8, observat Van-Espe-nius *Jus eccles. par. 2. sect. 1. tit. 13. c. 1. n. 10.* Imo cum disputatum esset a Patribus, num satius esset Episcopis quam S. Pontifici facultatem laxandi impedimenta reservare, potissimum Pius IV. aequo animo assentiebatur ut consanguinitas in quarto gradu, quia frequentior a Pontificiis reservationibus tolleretur, et Episcoporum arbitrio permitteretur. At Synodo magis placuit sententia M. Antonii Bobbae Augustani Episcopi, et Sabaudiae Ducis Legati, qui animadvertit, fore, ut data Episcopis hac facultate multo facilius, et frequentius, quod Patrum studio, et proposito adversabatur, hujusmodi veniae concederentur. Confer Paleottum *in Act. conc. Trident. ad diem 17. Augusti 1563*, et Pallavicinium *Histor. concil. Trident. lib. 23. cap. 9. num. 17.* Neque verum est ut aliqui putant, Tridentinam Synodum *Session. 25. capitul. 18. de Reformation.* dispensandi necessitatem imposuisse, cum revera canones *exacte ab omnibus, et indistincte observari* voluerit. Tantum statuit, ut si interdum canones justis de causis laxentur, id nonnisi *causa cognita, ac summa maturitate* fiat. Quibus verbis non dispensandi necessitas constituitur, sed modus praescribitur, quem servare oportet, cum venia datur. Haud multo post Tridentinam Synodam jus removendi impedimenta matrimonii tantum Romani Pontificis proprium agnoverunt Concilia Turonense *tit. 9. de Matrim.*, et Tolosanum *par. 2. cap. 8. col. 1405. et 1804. tom. 10. Collect. Harduini.* Merito igitur Optimus Sapientissimusque Pontifex Pius VI. literis datis die 28. Novembris 1786, praeter ceteros, damnavit errorem Eybelii agentis dispensationum reservationes indebitas, atque Episcopis injurias esse. Consule Doctissimum Mamachiam, qui de jure dispensationum quod in Romano Pontifice inest, graviter, solide, accurate

disputat in libro, quem nuper edidit *Pisti Alethini* nomine contra Auctorem opusculi *Quid est Papa? Epist.* 3. §. 9. pag. 232. tom. 1., et Cl. Auctorem *dissertationis*, qua defenditur *Romani Pontificis auctoritas in impedimenta matrimonium dirimentia.*

§. CXIX. Verum si quid etiam ex juribus Episcoporum detractum, si ipsorum ea in re arctata jurisdictio videatur; quis neget, id suo jure factum a Summis Pontificibus pro suprema, quam habent, in tota Ecclesia potestate? (1) *Primigenia* quidem, ut vocant, sint jura Episcoporum, quae ad jurisdictionem pertinent, eaque jurisdictio a Christo repetatur (2). Sed haec ab ipso Christo ita instituta est, ut uni summo omnium capiti, et moderatori subesset (3); neque Christus, cum eam Episcopis dedit, divisit dioeceses, et singulis certos adscripsit subditos, in quos jurisdictionem illam exercerent. Id totum factum ab Ecclesia est, et factum cum opera, et auctoritate Summi Pontificis, sine quo vera Ecclesia esse non potest. Itaque jurisdictio Episcoporum a Christo, usus, et exercitium hujus jurisdictionis in certos subditos ab Ecclesia est.

(1) Concilium Tridentinum *Sess. 14. cap. 7. de Sacrament. Poenitent. Merito*, inquit, *Pontifices Maximi pro suprema potestate sibi in Ecclesia universa tradita causas aliquas criminum graviores suo potuerunt peculiari judicio reservare.* Quae in re illud in primis animadvertere oportet; quod si quae potestas Episcopis jure Divino concessa integra relinqui debet, ea certe est potestas absolvendi a quibuscunque peccatis, quam amplam, ac nullo modo cohibitam a Christo Apostolis, et Episcopis eorum successoribus datam fuisse constat. Quod si tanta haec, tamque late patens potestas ita (et ita quidem Divino jure) Pontificiae auctoritati subest, ut pro suprema Romanorum Pontificum potestate per re-

servationes coerceri, et arctari merito potuerit, an non ceterae Episcoporum facultates, simili prorsus jure, ac suprema potestate, cum id expedire visum fuerit, auctius adstringi poterant?

(2) Ne quis obtrudat, niti me principiis minus exploratis minusque probatis omnibus, tamquam certum pongo id quod incertum, controversumque est. Non enim certo constat, num Episcoporum potestas a Christo *αμεσος immediate* sit repetenda, an potius in eos per Petrum, ejusque successores transierit: neque Synodus Tridentina quaestionem hanc definire voluit, ut ostendi tom. 1. c. 2. not. 1. p. 19.

(3) Episcoporum jurisdictio primigenia quidem sit, et a Christo immediate procedens: sed primigenius etiam est; essentialis, et a Christo institutus Primatus non dignitatis solum, sed etiam jurisdictionis in Ecclesia universa. Utraque potestas primigenia est; sed utriusque ex lege divina propria est, atque intima natura, ut altera subsit, altera praesit. Christus et Petrum ejusque successores toti Ecclesiae praefecit non solum dignitate, sed etiam imperio, et simul Episcopis jurisdictionem subjectam superiori potestati, in qua Principatum posuit. *Jesus Christus ipse*, inquit Clerus Galliganus in comitiis extraordinariis diei 8 Maj. 1728, *sua institutione limites praescripsit huic potestati Episcopali, quam subjecit Sedi Petri, in qua posuit plenitudinem Apostolicae potestatis.* Reservationes causarum matrimonialium, et ceterae hujusmodi non tollunt, evertuntque primigeniam, et essentialem Episcoporum jurisdictionem, quae Divinae institutionis est; tantum ejus exercendae constituunt modum, qui a Christo definitus non fuit. Et vetustiori quidem aetate ea res tota fere pendebat a Synodis provincialibus, Metropolitibus, Patriarchis; quos humanae institutionis esse, inter omnes constat; adeo verum est, primigeniae, essentiali, et a Christo datae Episcopis potestati non adversari modum, qui in ea exercenda superiori imperio stabilitur. Quod si hunc modum constituit potestas, quae tantum humana est; nonne id multo magis poterit praestare potestas summi Pontificis, hoc est potestas divinitus instituta? Si magis intrare volumus, potius hae ipsae reservationes ad jus divinum re-

ferri possunt ; quatenus videlicet jure Divino Summo Pontifici in omnes Episcopos jurisdictio data est , et quatenus Christus ordinem inter potestates omnino servandum constituit. Cujus quidem ordinis ea vis , et natura est , ut inferiores subjecti sint superioribus , uti docet Petrus *Epist. 2 cap. 2. vers. 13* ; *Subditi igitur estote omni humanae creaturae propter Deum , sive regi quasi praecellenti , sive Ducibus etc.* , et Paulus ad Roman. *c. XIII. vers. 1. Omnis Anima Potestatibus sublimioribus subdita sit ; non est enim potestas nisi a Deo ; quae autem sunt a Deo , ordinatae sunt.* En ordinem inter Potestates a Deo constitutum ut inferiores quantumvis potestate aliqua praediti , sublimioribus subesse debeant. Consule Ballerinum *de Potest. Ecclesiast. Summor. Pont. c. 1. §. 4. 5. et 6* , et doctissimum Mamachium egregio opere quod paulo ante indicavi , *Ep. 1. 2 3. fere per tot.*

§. CXX. Cum Episcopo certi adimuntur subditi , non tollitur primigenia illa jurisdictio , quae divinitus data est ; tantum arctatur , et constringitur usus jurisditionis , quae amplius exerceri non potest in subditos , qui ab Episcopi imperio subtracti sunt. Ita Synodi particulares saepe arctarunt usum jurisditionis Episcopalis ; et id quidem jure , ac recte factum , omnes facile concedunt ; quia cum Synodi Episcopis auctoritate praestarent Episcopali-um facultatum usum , pro Ecclesiae utilitate praefinire (1). Quod si haec facta , et rite fieri potuerunt a Synodis particularibus , quae tantum jure ecclesiastico provinciae , aut regioni , ejusque Episcopis divinitus institutis praesunt ; id certe multo magis concedendum est Petri successoribus (2) , qui non humano , sed divino jure omnibus Episcopis , ipsisque Synodis particularibus praefecti sunt (3).

(1) Episcopalis potestatis , quae a Synodis , Metropolitanis , Patriarchis cohibita fuerit , innumera propemo-

dam, et omnibus comperta exempla sunt. Praeclarum est illud Concilii Chalcedonensis *act. 4. col. 418. tom. 2. Collect. Harduini*, ubi sancitum est, ut *nihil absque ipso* (Antistite Alexandrino) *ageretur ab aliquo sub-jacente Episcopo*. Hoc quidem loco ita arctatur Episcoporum potestas, ut nulla in re non pendeat a Patriarcha, ac *nihil* Episcopus agere possit sine venia Patriarchae, cui subest. Divino quidem jure ad Episcopos pertinere ordinationes eorum, quos suarum Ecclesiarum regimini utiles, et multo magis necessarios agnoscant, quis ignorat? Africanæ antem Ecclesiae in exitu saeculi quarti, et initio quinti magna sacrorum ministrorum inopia laborabant, adeunt multae earum plebes essent desertæ, et sicuti ne unus quidem Diaconus reperiretur. Huic malo remedium adhibere oportebat; et vero adhiberi facile poterat, tum si in suis reciperentur gradibus, qui a Donatistis ad Catholicam unitatem revertebantur, tum si ordinibus donarentur, qui apud Donatistas in infantia baptizati, rationis usu praediti ad Catholicam Ecclesiam redierant. Sed obstabant decreta edita in transmari-no Concilio, quorum mentio est in Synodo Africana *Can. 35. apud Pithoeum Cod. Canon. p. 132. edit. Paris. 1687.* Itaque ut ea lex necessitatis gratia laxaretur, missa legatio est ad eos, a quibus illa lata fuerat, sicuti patet ex eadem Synodo Africana *loc. cit. p. 143.* Quod si Synodi particulares Episcoporum potestatem in re tam gravi, tamque Episcopis propria arctare potuerunt, an non idem multo magis praestare poterit Summus Pontifex, cujus non humano jure sancta, sed a Christo ipso instituta potestas est?

(2) Si antiquis temporibus Episcopaliū facultatum definiendarum modus a Patriarchis, Metropolitibus, Synodisque provincialibus totus fere pendeat, non ideo Pontificio juri, quod ex Primatu descendit, quidquam detractum videri potest. Cum enim omnis illorum, quæ tandem cumque illa esset, in Episcopos, et Episcopatus jurisdictio tantum ex Ecclesiastico jure procederet: profecto quidquid ecclesiasticæ institutionis est juri ordinario, ac divino Primatus detrabere nihil potuit. Consule Ballerinum de *Potest. ecclesiast. cap. 1. §. 4.*

(3) Equidem nescio, qui teneat error, aut miserabilis ignoratio veri eos, cui propria, et nativa Episcoporum jura a legitima superiori Potestate tolli, ac minui posse inficiantur. Ab ipsis Ecclesiae incunabulis luculentissima sunt monumenta, quae longe aliud ostendunt. Episcopi erant Timotheus, et Titus, alter Ephesi, alter Cretae, ad quos Apostolus literas dedit, et hi a Spiritu Sancto positi erant regere Ecclesiam Dei in suis dioecesibus, et omnem cum Episcopatu conjunctam potestatem obtinebant. Ergo quemlibet Christianum hominem ordinibus initiare poterant, quoniam ampla Episcopis ea de re data a Christo potestas fuerat, et tamen Paulus arctat, et constringit hanc potestatem, dicta lege, ut neque bigami, neque neophiti ordinentur *I. ad Timoth. c. 3. vers. 2. 6. 12.* Similiter jure Divino Presbyteri Episcopis suberant, atque hi suo lubitu poterant adversus illos eam servare methodum judiciorum, quae magis commoda, et opportuna videretur, quoniam haec methodus ab eodem divino jure constituta non fuerat, et tamen Paulus Episcopis imperat, *ne adversus Presbyterum accusationem recipiant, nisi sub duobus, aut tribus testibus. I. ad Timoth. capit. 5. vers. 19.* Mitto cetera similia, quae sunt a Paulo constituta, et quibus nativa Episcoporum potestas arctata est. Priora Ecclesiae saecula pene innumera ejusdem rei monumenta suppeditant. Sane Christus his verbis *quaecunque ligaveritis etc.* Apostolis, et Episcopis amplissimam concesserat facultatem ligandi, et solvendi in sacramento poenitentiae, verum huic Episcopis insitae, et inuatae potestati veneranda antiquitas modum imposuit, constitutis legibus, quibus Episcopi jussi sunt quosdam criminum reos tantum solvere post annos plures, diuturnamque poenitentiam, quosdam vero tantum, cum ad vitae exitum properarent. Res eo demum venit, ut oecumenici Concilii venia, et auctoritate opus fuerit, ut liceret *Episcopo humanius aliquid de eis statuere*, qui luculentiores dederant dolentis animi, et pietatis significationes. Concilium Nicaenum *can. 12. t. 2. Concil. collect. Labbaei col. 38. edit. Venet.* An non ligandi, et solvendi potestas propria, ac nativa Episcoporum est? Attamen haec potestas cohibetur modis pluribus, neque Episcopus suo

jure, licet proprio, et nativo, uti potest, nisi oecumenica Synodus nominatim hanc facultatem tribuat. Idem esto iudicium de Ordinis sacramento. Certe proprium, ac nativum est jus Episcoporum ordinandi quoslibet Christianos homines, quos ad ecclesiasticum ministerium, aptos, et idoneos judicant. Verum hoc jus imminuunt antiqui canones, cum vetant, Ordinibus initiari eos, qui titulo carent, qui bigami sunt, qui in haeresi fuerunt, qui certam non attigerunt aetatem, qui baptismum in aegritudine acceperunt, qui sibi virilia amputarunt, qui graviora quaedam crimina admiserunt. His de rebus multa sunt constituta a canonibus, qui dicuntur Apostolorum, a Concilio Eliberitano, Nicaeno, Carthaginensi III., Antiocheno, Chalcedonensi, ceterisque conciliis, quae antiquissimis Ecclesiae temporibus habita sunt. Nec leviora sunt de matrimonii sacramento monumenta. Christus nullam dixerat legem, per quam Episcopi ministerium suum exercere prohiberentur in matrimoniis Christianorum cum infidelibus, cum haereticis, schismaticis, itemque in Matrimoniis quae inter affines copulantur. Attamen haec matrimonia fieri vetat Synodus Eliberitana *Can. 15. 16. 17. 61. 66. t. 1. Concil. coll. Labbaei col. 944. 999. et seq. ed. cit. Venet.*, atque ita in hujus administratione sacramenti Episcoporum potestas cohibetur. Similia occurrunt in Concilio Laodiceno *Can. 10. et 31. tom. 1. cit. col. 1531. et 1535.*, Carthaginensi III. *Can. 11. tom. 2. ejusd. collect. col. 1401.* Chalcedonensi *Can. 11. t. 4. col. 1687.* Quid dicam de ceteris legibus, per quas arctata potestas Episcoporum est? Trans mare proficisci prohibentur Episcopi, non consulto primae Sedis Episcopo hoc est Metropolita. Concilium Carthaginense III. *Can. 28. t. 2. c. 1403.* oeconomum constituere jubentur, sine quo res Ecclesiae administrare non possunt, Concilium Chalcedonense *Can. 26. t. 4. c. 1691.* gentiliū libros legere nequeunt, haereticorum autem pro necessitate, et tempore: gubernationem viduarum, et pupillorum ac peregrinorum per Archipresbyterum, aut Archidiaconum agere coguntur; prohibentur suscipere tuitionem testamentorum, Concilium Carthaginense IV. *cap. 16. 17. 18. c. 1438. et 1439. t. 2.* Extant et in Decretalibus Pontifi-

eum Romanorum plures hujusmodi leges, per quas potestas cohibetur Episcoporum. Vetat Innocentius I. *Ep. 2. ad Victric. cap. 1. 2. 5.* apud Constantium c. 748. et 750. Episcopum extra conscientiam Metropolitanum aliquem ordinare, pluresque a sacris ordinibus arcendos jubet, quod etiam facit *Ep. 3. ad Episc. in Toletan. Synod. constit. cap. 6. col. 770.*, ceterisque literis, quae a Petro Constantio descriptae sunt, et in quibus similiter plures feruntur leges, per quas Episcoporum potestas arctatur. Id vero etiam factum est a Siricio, qui Innocentio antiquior fuit. Ne omnes persequar ejus literas, quod esset operae, scriptionisque longioris, tantum indicabo *Ep. 1. ad Himer.*, qua *cap. 4.* statuitur, ne quis alterius sponsam uxorem accipiat, *cap. 5.* ne Eucharistia tribuatur reis graviorum quorundam criminum c. 8. ne bigami ordinentur c. 6. et seq. alia stabiliuntur, quae ad aetatem, et qualitates ordinandorum pertinent, apud Constantium *col. 628. 632. seq.* Per has leges omnes Episcopi non amplius exercere poterant ampliorem illam, quam pridem habebant propriam, et nativam potestatem in administrationem sacramentorum. Confer S. Leonem *Epist. 5. cap. 3. col. 618*, *Ep. 6. col. 662*, *Ep. 9. capit. 1. et 2. col. 629. seq.* *Ep. 10. col. 663. opp. tom. 1. edit. Ballerin. Venet.*: postremo fere omnes ejus epistolae, in quibus Episcopis certae praescribuntur leges, quas eos servare oportet in negotiis ecclesiasticis, atque in sacramentorum administratione; S. Gelasium I. *Ep. 9. ad Episc. Lucan. c. 3 et 4.* apud Labbaeum t. 5. *Concil. collect. 315*, S. Gregorium M. *Ep. 10. et 11. lib. 4. Ep. 7. lib. 5. Ep. 43. lib. 7. Ep. 70. lib. 9. Ep. 2. lib. 10. opp. tom. 2. col. 689. 690. 733. 890. 986. 1043.* aliisque locis compluribus; ubi plures dicuntur leges, quibus Episcoporum jura imminuuntur. Infinitus essem, si omnia colligere vellem exempla aut ex conciliis tum provincialibus, tum generalibus petita, aut ex decretalibus Pontificum Romanorum, quibus Episcoporum jura propria, et nativa cohibita, atque imminuta sunt.

§. CXXI. Hoc sane primigenium jus est Pontificum Romanorum, quod abrogari nequit, nisi

abrogetur, quod salva fide tolli non potest, Primatus jurisdictionis, cui Christus omnes subiecit, et cui Episcoporum jurisdictionem obnoxiam voluit (1). Eo jure Summi Pontifices recte potuerunt Episcopalis jurisdictionis modum constituere, ac sibi tantum certorum criminum veniam, ac laxandi dirimentia matrimonium impedimenta facultatem reservare. Atque haec quidem vetustissima consuetudo est, quam omnium aetatum consensus comprobavit, ut Summus Pontifex dirimentia matrimonium impedimenta constituat, et tollat constituta, cum id justis de causis faciendum est (2). Episcopis permissa tantum est facultas laxandi impedimenta impedientia, exceptis haeresi, et sponsalibus, in quibus non licet fidem fallere, invito eo, cui data est; et voto simplici aut perpetuae castitatis, aut ingrediendi Religionem, quod cum purum fuerit, nullique conditioni obnoxium, tantum Romano Pontifici reservatur (3).

(1) Consule praestantissimas, gravissimasque literas datas a Pio VI. P. Max. die 28. Novemb. 1766. adversus auctorem opusculi: *Quid est Papa?* et vide etiam Cl. Mamachium l. mox indic.

(2) Auctor libri *Sopra il diritto di stabilire impedimenti dirimenti il matrimonio, e di dispensare*, novum excogitavit genus dispensationum, quas vocant, suoque hoc invento efficere se posse censet, ut etiam Episcopi laxandorum impedimentorum potestatem habere videantur. Inquit enim, impedimenta laxata quidem initio fuisse ex gratia, et beneficio, sed frequentem laxandi consuetudinem, quasi legis exceptionem induxisse, ita ut dispensationes quae initio gratiae tantum erant, lapsu temporum justitiae evaserint. Quare Episcopus suo jure removet impedimenta, quorum vetus est, et longo usu firmatus removendorum usus; et tunc quidem judicat, num locum habere debeat exceptio legis, quae jam vetustate consuetudinis inducta est. Sed primum nego, ex

repetitis actibus fieri posse, ut quod semper ex gratia, et beneficio conceditur, iustitiae actus evadat. Longa consuetudo parere quidem potest exceptionem legis, cum et populorum mores, et consensus legislatoris ita derogant vel omnino, vel ex parte, ut jus ea lege constitutum non amplius vigeat, neque ullam parendi offerat necessitatem. An quisquam superiorem rogat, ut eum lege solvat, quae contraria consuetudine sublata est? Imo legis loco est ipsa consuetudo, quae antiquo juri adversatur, eique tantum parere omnes debent. Sed dispensationum, quas vocant, longe dissimilis ratio est. Non enim per eas, ut ut saepe concedantur, diuque concessae fuerint, jus novum inducitur. Imo vero ea, quae petitur, et quae conceditur, dispensatio, vigentis, et confirmatae legis monumentum est. Nam quisquis superiorem rogat ut lege solvatur, necessario fatetur, integram esse legem, qua stulte et inutiliter solvi vellet, si ea esset antiquata; et superior quoties aliquem solvit, ejus quidem gratia legi derogat, sed legem ipsam confirmat, qua obstrictos vult esse ceteros, quos ipse simili beneficio, ac privilegio non solvit. Quod si specialis dispensatio non legem generatim abrogat, sed confirmat, Oedipo opus est conjectore, ut intelligatur, quomodo *justitiae* actus evadere possit, ut quis parere non debeat legibus, quae fixae, certaeque sunt, atque omnibus constitutae. At enim frequens usus beneficii, quod Superior confert in unum, aut alterum, quem lege solvit, quasi vim consuetudinis obtinet, ita ut omnes ad simile beneficium obtinendum jus consequi videantur. Falso. Nam omnis dispensatio *ex gratia, et beneficio* est; justitia postulat, ut lex, quae viget, observetur; sed Superior justis de causis hanc justitiam silere jubet, ut in unum, aut in alterum beneficium conferat. Itaque quoquo numero esse poterunt dispensationes, cum semper *ex gratia, et beneficio* concedantur, semper *gratiae, ac beneficii* actus erunt, neque unquam *justitiae* actus evadent; imo semper justitia erit obtemperatio legibus, nisi beneficium accedat supremæ Potestatis, per quam aliquis lege solvatur. Sed esto; fac sane actus, qui semper gratiae, ac beneficii sunt, ex longa consuetudine in actus justitiae converti, ita ut omnes ad beneficium, ac privilegium obtinendum

jus consequantur. A quo beneficium ipsum impetrandum erit? Ab eo, qui semper dedit, quique longa consuetudine hanc sibi legem imposuit, ut quod semper largiri solet, jam amplius nemini denegare possit. Itaque totum hoc inventum *dispensationum*, quas vocant *justitiae* eo demum redibit, ut Summus Pontifex jam omnibus concedere debeat beneficium, quod longa consuetudo justitiae actum facit: sed certe non efficiet, quod jus concedendi beneficium amittat Pontifex, qui illum semper dedit, acquirat autem eum qui nunquam eo jure potitus est. Si princeps certum aliquod beneficium in omnes conferat, si cunctos lege solvat, si longo usu fiat actus *justitiae*, qui pridem erat *gratiae*, et beneficii; an ideo Magistratus inferior sibi etiam jus arrogabit exercendi actum, quem semper unus Princeps exercere consuevit? Sunt haec plane nugae. Revera aetate S. Anselmi jam obtinebat usus *dispensationum*, quae a Sede Apostolica concedebantur, uti testatur Paschalis II. P. Ep. 42. ad Anselm. col. 1008., apud Labbaeum *Collect. Concil. tom. 12. edit. Venet.*, et tamen nullus unquam fuit Episcopus, qui sibi earum concedendarum potestatem arrogaret. Imo ipse Anselmus, qui Episcopus erat, eas a Summis Pontificibus Urbano II., et Paschale II. impetrandas curavit, uti patet ex loco mox laudato; et an. 996. Gregorius V. in Concilio Romano Robertum regem deserere coegit Bertam consanguineam suam, quam in matrimonium acceperat, sacrisque interdixit Erchembaldum Archiepiscopum Turonensem, caeterosque Episcopos, quorum consensu nuptiae illae conciliatae fuerant, apud Labbaeum *Collect. Concil. tom. 11. col. 1029. Can. 1. et 2. edit. indic. Saeculo XII. tam crebro dispensationes a Summis Pontificibus concedebantur, ut S. Bernardus de Consider. lib. 3. cap. 4. opp. tom. 2. pag. 373. ed. Venet. 1781.*, Eugenium III. discipulum olim suum monendum putarit, ne quem tam facile lege solveret, et tamen nullus Episcopus propter eam dandam veniae consuetudinem, jus illud sibi debitum contendebat. Imo cum frequentior esset *dispensationum* usus, omnis earum potestas Sedi Apostolicae servata est in Concilio Lateranensi IV. *Can. 19. 20. 57. 58. col. 42. 62 et 63. tom. 7. collect. Harduini*, ac tantum absit, quod Sum-

mi Pontifices ex crebro illo dispensationum usu jas aliquod, aut aliquam necessitatem inductam putarint, ut plussemel rejecerint preces eorum, qui veniam postulabant. Ita Alexander IV. qui anno 1258. a Galliarum Rege rogatus legem solverat de consanguinitatis gradibus, Waldemaro Svecorum Regi veniam dare noluit, per quam nuberet Sophiae suae ex fratre nepti; sed postea gravioribus expensis causis hanc ipsam veniam dedit, et ita nuptiae illae conciliatae sunt, ut narrat Raynaldus *ad an.* 1258. *num.* 20., *et* 1259. *n.* 19. *pag.* 27. *et* 39. *tom.* 2. *edit.* Lucae. Clemens IV. *apud Martenium Anecd.* *tom.* 2. *p.* 537., lege solvit ex justis causis filium Regis Siciliae, non item filiam Alphonsi Regis quam Pater filium Balduini Imperatoris in matrimonio habere cupiebat, licet ipse fateatur, quod *larga esset retroactis facta temporibus diversarum effusio gratiarum.* Ejusdem generis exempla suppeditant Clemens VI., et Innocentius IV. *apud Balatium Miscellan. diplomat. t.* 3. *edit.* Lucae, itemque Joannes XXII., qui veniam, quam propter cognationis impedimentum Aragoniae Rex a se postulaverat concedere noluit, *apud Raynaldum ad ann.* 1329. *num.* 88. *seq.* *tom.* 5. *edit.* Lucae.

(3) Consule Benedictum XIV. *de Synod. dioec.* l. 9. *cap.* 2.

§. CXXII. Sunt tamen graviora quaedam impedimenta, quae tametsi divino, aut naturali jure inducta non sint, tamen a Summo Pontifice laxari non solent; et huc spectat consanguinitas in primo gradu, quae videlicet est inter fratrem, et sororem (1), affinitas in primo item gradu inter vitricum, et privignam, publicum impedimentum criminis ex occisione conjugis cum adulterio (2). In certis impedimentis, quae Ecclesiastici juris sunt, Summus Pontifex ex justis, gravibusque causis veniam tribuit (3). Quae venia, sive dispensatio, ut vocant, vel publica, vel occulta est; illa pro utroque foro datur per *Datariam*, vel *Secretariam Bre-*

vium, haec per Sacram Poenitentiarium pro inter-
no tantum foro conceditur.

(1) Non convenit inter Theologos, interque peritos juris Canonici, an matrimonium inter fratrem, et sororem jure naturali, Divino, vel humano prohibeatur. S. Thomas, Gonzalesius, Pontius, alii solam juris positivi prohibitionem agnoscant.

(2) Confer Benedictum XIV. in *Epist. ad Ignatium Realem de cèlebratione Missae a sedente*, quae extat in *Append. II. tom. 4. ejus Bullarii*, §. 13. 14. 15. p. 7. et 8. ed. cit.

(3) Ita fidei catholicae utilitas, timor apostasiae, bonum publicum, studium avertendi mali, angustia loci, inopia mulieris indotatae justam praebent causam, propter quam dispensatio concedatur. Sunt et aliae similiter graves causae, quarum judicium pertinet ad Summum Pontificem, a quo venia tribuitur. Dataria solet in diem dispensationes publicas concedere super consanguinitate, et affinitate, et spiritali cognatione, et publica honestate, et crimine adulterii; modo nulla fuerit in necem conjugis machinatio. Ceterae dispensationes super aliis publicis dirimentibus impedimentis raro, atque ex causis gravissimis per secretariam Brevium conceduntur. Ex Cancellariae Regula 49. in litteris dispensationum super aliquo gradu consanguinitatis, vel affinitatis ea adjicitur clausula, seu conditio: *si mulier rapta non fuerit*. Si raptor scienter nuptias cum rapta contraxerit, ac veniam postulet, tunc alia adjicitur, *ex quaterno conditio*, ut separentur ratione delicti, quoadusque arbitrio commissarii, seu executoris Apostolici congruam egerint poenitentiam. Confer Rigaltium ad eamdem Regulam 49. *Cancellar.*, et confer etiam Gagliardum *Institut. Jur. Canon. lib. 2. tit. 11. §. 5. num. 93. et seq.*

§. EXXIII. Jamvero dirimentia impedimenta nuptiarum ad tria summa capita revocari commode possunt. Nuptiae enim nullius momenti sunt; vel quod aliquis ad eas contrahendas aptus, et idoneus non est; vel quod eas deceptus errore contraxit;

vel quod in iis conciliandis non eum servavit modum, quem servare oportebat.

§. CXXIV. Primum caput duplex est; nam quis vel ab omnibus universe, vel a certis tantum nuptiis arcetur. Irritae sunt generatim nuptiae impedimento vel corporis, vel animi. Corporis impedimento tenentur, qui non satis progressus aetate est, et qui venerem exercere non potest; quorum vitiorum alterum *defectum aetatis*; et alterum *impotentiam coeundi* vulgus appellat. Impedimentum animi triplex est, ordo sacer, votum, ligamen. Quaedam autem nuptiae fieri non possunt propter cognationem, affinitatem, honestatem, delictum, cultus disparitatem. Caput alterum impedimentorum est error, siquidem personae sit, vel conditionis. Tertium modus, quo frustra ineuntur nuptiae; si nimirum vi, si raptu, si clam, si cum iniqua conditione perficiantur. Singula partite, atque ordine expendenda sunt.

§. CXXV. Omnes, uti diximus, generatim nuptias propter corporis impedimentum inire prohibentur, quibus vel aetas tenera, vel imbecilla natura, vitiumque corporis cum conjugē liberis operam dare non sinit. Fiunt maturae viro mulieres anno decimosecundo, mares autem anno decimoquarto idoneam ad procreandos liberos aetatem consequuntur. Ante hoc tempus initum matrimonium irritum est (1); nisi malitia suppleat aetatem, hoc est impuberes dare operam liberis possint, et rem uxoriā intelligant (2).

(1) Cap. 6. 10. 11. de Desponsat. impuber.

(2) Cap. 9. eod. Recte tamen animadvertit Benedictus XIV. Const. Magnae nobis 51. tom. 2. ejus Bullar. pag. 249. ed. cit., Apostolicae Sedis venia opus esse, ut recte matrimonium contrahat impubes, qui propter aetatem nondum corporum conjunctioni maturus est,

sed tamen ita rationis usu valeat, ut matrimonii contrahendi vim, et naturam intelligat. Potest enim Episcopus judicare, num malitia suppleat aetatem, sed non potest ei conjugium permittere, qui ad rem uxoriā exercendam nondum aptus, et idoneus est.

§. CXXVI. Vitium corporis procul a matrimonio esse jubet adultos, qui vel natura, vel morbo ita sunt comparati, ut suum cum foemina corpus nequeant commiscere; praeterea mulieres, quae ita habent obstructam viam, ut viriles conatus excludant. Quisquis talē hoc laborat vitio, modo perpetuum sit, et contractum antea matrimonium, frustra inire conatur nuptias, quae jure ipso naturae irritae sunt (1). Stat enim vis matrimonii, quando impedimentum postea ortum est (2); et quando illud tolli humana opera, ac sine vitae discrimine potest, periculum est faciendum (3).

(1) *Cap. 1. et 3. de Frigid. et malefic.*

(2) *Can. 25. c. 32 qu. 7.*

(3) *Cap. 5. de Frigid. et malefic.*

§. CXXVII. Ut hoc impedimentum dirimat matrimonium, certum, atque exploratum esse debet; ubi dubium sit, ad triennale experimentum confugiendum est. Scilicet triennii spatio simul conjuges agere vitam debent, nixuque ad venerem periculum facere virium suarum. Lapso triennio si omnes conatus inutiles fuerint, matrimonium dissolvitur, accedente jurejurando conjugum, ac septem propinquorum (1). Praesertim vero, cum de alterutrius conjugis viribus controversia est, inspicienda sunt corpora, quod in viris fit per chirurgos, in mulieribus per honestas, et fide dignas obstetrices (2). Omnes hi jurati confirmare debent, sese novisse

mulieris, aut viri corpus minus aptum ad rem uxori-
am gerendam.

(1) *Can. 2. c. 33. quaest. 1. c. 5. et ult. de Frigid. et malefic.*

(2) *Cap. 4. et 14. de Probat.*

§. CXXVIII. Animi, sive voluntatis impedimento irritae sunt generatim nuptiae, si quis ante illas vel sacro ordine, vel religiosa professione, vel altero matrimonio sese obligavit. Sacros quidem ordines, vel ex voto, vel ex lege ecclesiastica, impedimento esse, quominus valeant matrimonia eorum, qui illis obstricti sunt, inter catholicos omnes constat (1). Nam continentes esse oportere majores clericos, ex ipsa Apostolica traditione intelligimus (2), et certe his numquam licuit uxores accipere (3). Verum initio nullis opus fuit poenis, quarum formidine clerici servare cogerentur officium, in quo eos prisca videndi ratio pura, et incorrupta satis sua sponte retinebat. Constitutae sunt ea de re poenae annis consequentibus, cum depravati, et corrupti mores clericorum hoc officium comminuere, et violare coeperunt (4).

(1) Concilium Lateranense II. *Can. 7. et 8. l. 12. Concil. Collect. Labbaei col. 1501. ed. Venet. et Tridentinum Sess. 14 de Sacram. matrim. can. 9.*

(2) De origine, ac sanctitate celibatus, quem Majores Clerici servare debent, copiose disserit V. Cl. Franciscus Antonius Zacharia duobus libris, quorum alter *Storia Polemica del Celibato Sacro* editus an. 1774, alter *Nuova giustificazione del celibato Sacro etc.* editus Falginei an. 1785. His duobus libris egregie, ac di-

ligenter expediuntur quidquid ad hoc argumentum pertinet, ac plane evertuntur commenta, et sophismata liberculorum quorundam, qui adversus Sacrum Coelibatum paucis abhinc annis in Germania, atque alibi prodierunt.

(3) Canon Apostolorum 27. apud Cotelierium PP. *Apostol. tom. 1. pag. 445. edit. Amstelaed. 1724*, quem canonem, et simul etiam cap. 17. l. 6. *Apostolic. Constit. pag. 350. loc. cit.* Graeci corrumpunt, atque absurde detorquent, ut observat Cotelierius in *Notis ad utrumque locum*, S. Epiphanius *Exposit. fid. catholic. cap. 21*, et *Haeres. 59. num. 4. tom. 1. l. 2. pag. 496. edit. Paris. 1622.*, Justinianus *Novel. 22. c. 42. coll. 4. tit. 1.* S. Hieronymus *cont. Vigilant. num. 2. opp. tom. 2. col. 389. edit. Vallarsii Veron.* Quibus ex locis intelligimus, eandem initio fuisse Orientalis, atque Occidentalis Ecclesiae sententiam, quod scilicet Majores Clerici post sacros susceptos ordines matrimonium inire prohiberentur, quodque se in posterum matrimonii usu abstinere deberent, qui uxorem habebant, antequam sacros ordines acciperent. Vetustissimam hanc disciplinam Graeci relaxare coeperunt saeculo VII, cum scilicet Synodus Trullana, seu Quini-sexta habita est. Nam haec Synodus *can. 6.*, ratam quidem firmam haberi voluit antiquam disciplinam, per quam majores Clerici post sacros ordines nuptias conciliare prohibentur, sed tamen *can. 13.* Subdiaconis, Diaconis, Sacerdotibus, non item Episcopis, permisit usum matrimonii cum uxoribus, quas antea duxerant. Huic autem novitati Trullani Patres praesidium quaerere studuerunt in antiquiori Canone Carthaginensi, in quo tamen nihil tale statutum est; sicuti post Fleuryum animadvertit doctissimus Zacharia in opere: *Nuova giustificazione del Celibato sacro ec. Diss. 2. cap. 2. pag. 88.* Canonem hunc nunquam probarunt Romani Pontifices, neque ut probarent, Graeci Imperatores aut minis, aut blanditiis, et pollicitationibus efficere potuerunt, uti ostendit ipse Zacharia *Storia Polemica del Celibato Sacro p. 159. et seq.* sed tamen eum postea tolerandum putarunt, ut praeciderent causam schismatis, ad quod Graecorum animi propensiores

esse videbantur. Optandum vehementer esset, inquit Benedictus XIV. *Const. 57. n. 26. tom. 1 ejus Bullarii pag. 109. edit. Romae seu Venet. 1754*, ut Graeci in sacris ordinibus constituti, non secus ac Latini, castitatem servarent: *nihilominus ut eorum Clerici, Subdiaconi, Presbyteri uxores in eorum ministerio retineant; dummodo ante sacros ordines, virgines, non viduas, neque corruptas duxerint, Romana non prohibet Ecclesia*. Irritum tamen est matrimonium apud Graecos a Diacono, vel Sacerdote contractum; et Sacerdos, qui uxorem habeat antea ductam, per hebdomadam, vel per triduum abstinere se ab usu matrimonii debet, antequam ad sacrificium conficiendum accedat. Benedictus XIV. *l. cit. n. 28.*, Clemens VIII. *Const. 107. §. 5. t. 5. par. 2. Bullarii pag. 73*. Pertinet etiam ad hunc locum *Constitutio 129. ipsius Benedicti XIV. in cit. Bullar. tom. 1. pag. 312.* ubi multa sunt de uxoribus Cophtorum, qui in sacris ordinibus versantur. Ceterum de Subdiaconorum continentia non eadem semper fuit Ecclesiae disciplina. Canones Apostolorum, Justinianus, Epiphanius locis paulo ante indicatis eadem, qua ceteros majores clericos continentiae lege obstringunt Subdiaconos: verum Hieronymus *l. c.* tantum Episcopos, Presbyteros, Diaconos, non item Subdiaconos memorat, qui matrimonii usu prohiberentur. Idem de Subdiaconis est silentium in Decretalibus Siricii, et Innocentii, atque in reliquis antiquis monumentis. Primus omnes Subdiaconos continentiae legi addixit S. Leo Magn. *Epist. 14. c. 4. col. 687. tom. 1. edit. Ballerin.*, verum haec decretalis non ubique obtinuisse videtur. Nam Concilium Turonense I, quod postea habitum est, *canon. 2. col. 794. tom. 1. Collect.* Harduini clericos Diaconis inferiores continentiae lege non obstringit. Concilium Aurelianense III. *can. 2. col. 1423. mox laud. tom. 2.* continentes vult esse Subdiaconos; at Concilium Aurelianense IV. *can. 17. col. 1438. ibid.* tantum Presbyteros, et Diaconos, non item Subdiaconos, quorum nullam mentionem facit. Romae, cum Pontificatum teneret Gregorius M., Subdiaconi continentiam servare debebant, atque ipse utitur exemplo Sedis Romanae *lib. 1. Ep. 44. tom. 2.*

opp. col. 538. ed. Paris. 1705., ut Subdiaconos Siculos eadem lege constringat.

(4) Extat ea de re decretum latum a Siricio ann. 386. in *Ep. 1. ad Himerium Tarracon. c. 6. et 7.* apud *Constantiam Epist. Pontific. Roman. col. 626. seq.*, atque hoc decretum postea confirmavit Innocentius I. *Ep. 6. ad Exuper. Tolosan. cap. 1. col. 790. seq.* apud eundem Constantium.

§. CXXIX. Votum, quod matrimonium dirimit solemne votum est, conjunctum scilicet cum professione, quae in probata Religione emissa fuit. Quod votum ab eo distinguitur, quo quis extra Religionem sese obligavit, quod votum simplex castitatis dicitur (1). Hoc enim minus licitum, non item irritum matrimonium facit (2); uti irritae sunt nuptiae eorum, qui religiosae professionis voto, aut sacris ordinibus impediti, ac devincti sunt (3). Sed Religiosa professio differt ab Ordinibus sacris, quoniam ea solvit etiam matrimonium antea contractum, modo ratum sit, non consummatum (4); verum sacer ordo tantum irritas facit nuptias, quae post eum conciliatae sunt (5).

(1) Plerique sentiunt, distinctionem voti *simplicis*, ac *solemnis* Gratiani aetate primum inventam fuisse, deinceps ubique receptam, posteaquam ab eo descripta in Decreto fuit. Ego dabo non gravate, ea vocabula *simplicis*, et *solemnis* ea tempestate primum usurpari coepisse; sed certe res ipsa, hoc est distinctio eorum, qui solemniter castitatem voverant, multo antiquior est. Mitto testimonia Hieronymi, Augustini, ceterorum, quae Gratianus habet *Canon. 1. 22. 41. cap. 27. quaestione 13. et Canone 2. 4. 5. 9 dist. 27.*, et ex quibus intelligimus, jam IV. saeculo aliud fuisse votum, quod irritas, et aliud quod non irritas nuptias efficiebat. Utriusque voti diversitatem luculentissime mihi quidem videtur proposuisse Siricius P., qui IV. Ecclesiae saeculo Pontificatu Maximo functus est. Is enim *Epist. 10. cap. 1. col. 688.*, apud Constantium *Epist. Roman.*

Pontific. primo agit de Virgine velata jam Christo, quae integritatem publico testimonio professa a sacerdote prece fusa benedictionis velamen accepit. Hic sane locus pertinet ad professionem, quam solemnem dicimus. Pergit continuo Pontifex, deque hac virgine dicit haec: sive incestum commiserit furtim, seu volens crimen protegere adultero marito nomen imposuit, tollens membra Christi, faciens membra meretricis etc. Sane si haec velatae virginis conjunctio incestum et adulterium, si ipsa mulier non uxor, sed meretrix appellatur, manifestum est, ejus nuptias irritas judicari. Haec de virginibus velatis, quae publicam, aut solemnem professionem emiseraut, Siricius constituit; sed longe aliud habet de virginibus non velatis, quae scilicet privatim castitatem voverant. Eas quidem poenitentiae subjicit, quod fidem fregerant, et furtivam vocat earum conjunctionem, sed eam tamen veri matrimonii, ac nuptiarum nomine appellat. Inquit enim: Item puella, quae nondum velata est, sed proposuerat sic manere, licet non sit in Christo velata, tamen quia proposuit, et in conjugio velata non est, furtivae nuptiae appellantur, ex eo quod matrimonii coelestis praeceptum non servaverit. Hic quidem locus meo judicio satis aperte indicat discrimen voti simplicis, et solemnis, quorum alterum minus licitum, alterum vero irritum matrimonium efficit. Ex eodem hoc loco intelligimus, quam graviter errent, qui negant, per quinque priora saecula irritas fuisse nuptias illorum, qui solemniter castitatem voverant. Nam eas Siricius apertissime irritas judicat, et consentit Innocentius I. Epist. 2. ad Victricium cop. 12. col. 754. et seq., quem Innocentii locum Constantius in Notis diligenter expendit.

(2) *Cap. 4. et seq. Qui cleric. vel voven. Concilium Tridentinum Sess. 24. can. 9. de Reform. matrim.*

(3) *Cap. un. de Vol. in 6.*

(4) *Cap. 2. de Convers. conjug.*

(5) *Extrav. un. Joannis 22. de Vol.*

§. CXXX. Pertinet etiam ad generalia impedimenta matrimonium antea cum alia muliere, virove contractum, quod impedimentum ligamen di-

citur. Nam qui obstringitur vinculo primi matrimonii novis se nuptiis obligare non potest, cum divino jure vetitum sit plures simul habere uxores (1); ideoque apud Christianos novae nuptiae conciliari non possunt, nisi primum de conjugis morte certus nuntius allatus sit (2).

(1) Concilium Tridentinum Sess. 24. can. 2. *de Sacram. matrim.*; et hac spectat Decretalium titulus *de sponsa duorum*.

(2) *Cap. 19. de Sponsal.*

§. CXXXI. Nunc a generalibus impedimentis ad particularia veniamus. Sunt igitur qui non omnes, sed aliquas in specie nuptias inire prohibentur, atque id quinque de causis, quarum prima est cognatio, quae triplex est, naturalis, legalis, seu civilis, spiritualis. Cognatio naturalis vinculum est personarum, quae per generationem ab eodem propinquo stipite descendunt. Stipes est ille, a quo procedunt ii, de quorum cognatione quaeritur.

§. CXXXII. Distribuitur cognatio in lineas, lineae in gradus. Linea series est personarum sanguine junctarum; gradus sunt intervalla harum personarum, quibus tamquam punctis linea conficitur, et quibus noscitur, quae persona stipiti propinquior sit. Linea vel recta est, quae genitores, et genitos continet; vel transversa, et obliqua, quae comprehenduntur, qui ex latere conjuncti sunt. Cum hi pari gradu distant a stipite, linea transversa aequalis est: cum distant gradu dispari, nimirum alter altero remotior est, inaequalis dicitur. Ita fratres et sorores, qui aequaliter a patre distant, itemque horum filii, qui similiter paribus intervallis ab avo se junguntur in linea aequali sunt; patruus, et

fratris filius in linea inaequali versantur ; quoniam alter sursum , alter deorsum fertur , et ille ad communem stipitem propius accedit.

§. CXXXIII. Jure civili una , et perpetua regula in omnibus lineis gradus numerantur , scilicet *generata persona gradum adjicit* (1) , sive tot gradus , quot generationes sunt. Retinent hanc eandem regulam Sacri Canones in linea recta , nisi quod generationum loco personas usurpant , et ita , quot , dempto stipite , personae sunt , totidem gradus numerant. Quare filius patri est primo gradu conjunctus , quoniam una hic generatio , sive una , dempto stipite , persona est , nepos ab avo distat secundo gradu , quoniam duae generationes , sive duae , sublato stipite , personae sunt. Sed in numerandis gradibus lineae transversae alia est Juris Civilis , et alia Canonici Juris ratio. Nam jus civile subjicit iisdem legibus et rectam , et transversam lineam ; et ideo lateris utriusque generationes numerat.

(1) §. 7. *Inst. de Gradib. cognat.*

§. CXXXIV. At canones tot gradus constituunt , quot personae in uno tantum latere reperiuntur ; et in linea aequali collaterales inter se sunt eo gradu , quo distant a stipite communi , in inaequali eo gradu , quo a stipite remotior distat (1). Nimirum canones ex uno latere ascendunt ad stipitem , unde collaterales originem ducunt , atque hic subsistunt ; civiles leges descendunt etiam ad aliud latus , et in utroque colligunt generationes omnes , quotquot sunt , atque ex singulis singulos gradus efficiunt.

Itaque secundum canones etiam cognatio collateralium incipit a primo gradu, in eoque sunt fratres, et sorores; verum hic gradus jure Civili secundus gradus est. Ecclesiastica illa ratio numerandorum graduum obtinet in matrimoniis, at in haereditatibus adhuc ex jure civili gradus aestimantur (2).

(1) Initio canones in numerandis gradibus lineae transversae Juris Civilis regulam retinuisse, putat Cujacius ad tit. de consanguinit. et affinit. opp. tom. 6. col. 1084. ed. Mutin. un. 1778. Verum est sane vetus Ecclesiastica illa regula a civili distincta, eamque diserte memorat Gregorius M. qui certe (ut alia quibusdam sententia sit) auctor est *Ep. 64. ad Augustin. lib. 11. opp. tom. 2. col. 1150. edit. Paris. 1750.*, quae descripta est in *Can. 101. cap. 35. quaest. 2. et 3.* Inquit enim, terrenam legem in Romana Republica nuptias consobrinorum permittere: sed ipse vetat has nuptias, tamquam in secunda generatione contractas, atque Anglis matrimonium in tertia, aut quarta generatione permittit. Ergo Gregorio Pontifice consobrini erant in secundo gradu, quae omnino Juris Canonici regula est; neque ipsis licebat nuptias inter se conciliare. Atque hac quidem aetate editum jam erat jus Justinianum, quod nuptias inter consobrinos permittebat §. 4. *Instit. de Nupt.* Non enim assentior iis qui hoc Institutionum loco adjiciendum putant negantem particulam, quoniam ita sensum reddidit Theophilus, qui jus expressit, quod post Justinianum in Oriente inductum est. Et certa vulgata lectio, quam veteres Interpretes, et Glossa sequuntur, legit affirmative; sicut et editiones Haloandri, Russardi, Contii, Carondae, Cujacii. Atque hoc quidem jus de nuptiis consobrinorum comprehensum Institutionibus consentaneum est Arcadii et Honorii constitutioni in *L. 19. C. de nuptiis*, si integra haec lex illorum revera est, quod negat Contius *Subsequ. lection. lib. 1. cap. 9. pag. 12. edit. Neap. 1725.*, per quam legem abrogata est antiquior Constitutio Theodosii M., qua vetantur in-

ter consobrinos matrimonia. Sed de civilibus legibus, quae ad nuptias pertinent consobrinorum, deque illa, quam memoravi, Theodosii constitutione disputant Contius loc. cit. lib. 2. cap. 1. pag. 19. Jacobus Gothofredus in *Cod. Theodos. Leg. 1. tit. 10., et Leg. 3. tit. 12. lib. 3. tom. 1. pag. 330. et 341. edit. Lipsiae 1736.*, Harprechtus in *Institut. lib. 1. tit. 10. §. 4.* Fr. Florens. cujus ea de re peculiaris disputatio est *de Nuptiis consobrin. prohib. opp. tom. 1. pag. 389. edition. Norimbergae 1756.* Nunc eo redeamus, unde discessimus. Post Gregorium Zacharias Pontifex in *Can. 4., cap. 35., quaest. 5.*, similiter ecclesiastica regula utitur in numerandis gradibus cognationis; denique Alexander II. in *Can. 2., cap. 35. quaest. 5. novum, et inauditum* vocat errorem illorum, qui germanos fratres, ac sorores in secunda generatione esse asseverant, atque ait, in Lateranensi Concilio diu ventilatis legibus, et sacris canonibus deprehensum fuisse, ob aliam atque aliam causam alteram legum fieri alteram canonum computationem. Quae Alexandri constitutio per se ipsa refutat Van Espenium *Jus Ecclesias. par. 2. tit. 13. c. 5. num. 10.*, qui Ecclesiasticam illam regulam numerandi gradus saeculo XI. nondum ubique receptam, nec extra quaestionem fuisse arbitratur. Nam eos, qui unam eandemque esse aiebant juris utriusque regulam, Alexander *legum, et canonum imperitos* vocat, et facere inquit *contra sacros canones, et ecclesiasticum morem*, eorumque errorem *novum esse, et inauditum.* Ex quibus facile intelligitur, jam ea aetate ecclesiasticam illam regulam exploratissimam, ac receptissimam fuisse. Cum Van Espenio sentit Dominicus Cavallarius *Instit. Jur. Canon. par. 2. cap. 21. §. 8.*

(2) *Cit. Can. 2. cap. 34. qu. 5.*

§. CXXXV. Jam vero inter illos, qui in linea recta sunt, sive inter generantes, et genitos, matrimonium esse numquam potest, quotocumque, vel remotissimo gradu inter se distent. Natura enim ab hujusmodi nuptiis abhorremus, et officia conju-

gum non bene congruunt cum officiis, quae liberos parentibus tribuere oportet (1). Sed in linea transversa Jus Canonicum nuptias velat usque ad quartum gradum, gradu ipso comprehenso (2); Jus Civile ad quartum quoque gradum producit interdictum suum; sed gradum ipsum excludit (3). Itaque Jus Civile nuptias probat consobrinorum quos collocat in quarto gradu. At Canones improbant has nuptias, non solum quod et quartum gradum interdicto comprehendunt, sed etiam quod revera ipsi consobrini in secundo gradu sunt (4).

(1) Ascendentium, et descendentium nuptias jure ipso naturae vetitas esse ferme inter omnes constat. At in linea transversa tantum jure ecclesiastico interdictas nuptias multi sentiunt; contra vero alii etiam primum gradum lineae transversae ad juris naturae interdictum pertinere arbitrantur, quoniam naturalis pudor nuptias inter sorores, et fratres vetare videtur.

(2) Olim cognationis impedimentum ad septimum usque gradum producebatur *Can. 1. et 19. cap. 35. qu. 2.* Nicolaus II. *Decret. 13.*, apud Balutium *Miscellane. sacr. tom. 2. p. 119. edit. Lucae 1761.* Sed cum tam late patens impedimentum sine gravi incommodo observari non posset, Innocentius III. in *cap. 8. de Consanguinit.* illud coarctavit ad quartum gradum, eoque jure nunc utimur.

(3) §. 4. *Instit. de Nuptiis.*

(4) Vetus est regula canonum de nuptiis inter consobrinos vetitis. Nam eam, praeter Gregorium M., cujus paulo ante indicavi locum, memorat etiam Concilium Agathense an. 506. *Can. 61. t. 5. Concil. Collect. Labbaei col. 531.*, ed. Venet., Turonense II. an. 567., *Can. 21. tom. 6. Concil. col. 544.*, Gregorius II. *Decret. 8.* apud Pithoeum *Cod. Canon. Eccles. Roman. p. 300. ed. Paris. 1687.* Atque ea quidem aetate, uti demonstratum supra est, Jus Civile consobrinorum nuptias permittebat. Abrogat tamen hoc jus Ecclesia, et ita declarat, jus constituendi dirimentia impedimenta ad se

pertinere. Nolo autem hic omittere praeclarum Ennodii Ticinensis locum, ex quo patet, jam inde a V. et VI. saeculo (nam Ennodius obiit an. 521) omnes de matrimonio, deque cognatione controversias ad Summum Pontificem deferri consuevisse. Ipse enim *Epist.* 24. l. 5. in *Biblioth. PP. tom. 9. p. 345. ed. Lugdun.* inquit: *Divinis tamen legibus cognationem indiculo comprehensam in Matrimonio licere sociari, sine dubitatione noveritis. Sed continuo ad Urbem Romam homines meos dirigo, exacturus a venerabili Papa super hac parte responsum, ut animum vestrum potioris praecepti firmiter auctoritas.*

§. XXXVI. Praeter cognationem ex sanguine, etiam civilis, et spiritualis cognatio irritas nuptias facit. Civilem cognationem a Jure civili inventam probarunt, atque acceperunt Canones (1), eaque ex adoptione oritur, triplexque est. Prima diffunditur per lineam rectam ascendentem, et descendentem adoptantis, et adoptati (2); altera obtinet in linea transversa inter adoptatum, et filias legitimas, ac naturales adoptantis sub patria potestate manentes; quod impedimentum tollitur, vel soluta adoptione, vel filio emancipato, quoniam his modis solvitur vinculum, unde impedimentum oriebatur (3). Denique affinitatis similitudine oritur etiam impedimentum nuptiarum inter adoptantem, et uxorem adoptati, similiter inter adoptatum, et uxorem adoptantis (4).

(1) *Can. 1. cap. 30. quaest. 3. Cap. unic. de Cognat. legal.* Integrum a Jure civili Ecclesia hoc impedimentum accepit, neque aliquid in eo mutavit, hinc Cajacius in *tit. Decretalium de Cognat. legal. opp. tom. 6. col. 1078. ed. Mutin. 1788.* monet nunc etiam civilem fraternitatem nuptias dirimere.

(2) §. 2. *Inst. de Nuptiis.*

(3) *L. 55. ff. de Rit. nupt.*

(4) *Leg. 14. ff. de Rit. nupt.*

§. CXXXVII. Spiritualem cognationem pari Baptismus, et Confirmatio (1). Velus est Ecclesiae doctrina, qua veluti pater habebatur, qui aliquem Baptismo donaverat, aut in Christo instituerat, et de sacro fonte susceperat. Sed nullum inde impedimentum initio oriebatur, adeo ut ipsi parentes filios suos de fonte susciperent (2). Lapsu temporum hoc impedimentum inductum est, et late etiam propagatum, adeo ut ad instar consanguinitatis, et adoptionis suscipiens ex sacro fonte, ejusque filii, neque cum suscepta, neque cum ejus cognatis nuptias conciliare possent (3). Verum Tridentini Patres, quod experti didicerant, nimis late patente cognationis spiritalis impedimento saepe per errorem matrimonia contra jus fieri, quae nec sine peccato stabant, nec sine offensione dirimebantur, statuerunt, cognationem spiritualem tantum comprehendere suscipientem, et baptizatum, hujusque patrem, ac matrem, itemque baptizantem, et baptizatum, atque hujus patrem, ac matrem, praeterea neminem. Quod jus etiam obtinet in confirmatione (4).

(1) Solum Baptismum memorat Justinianus in *Leg. 6. Cod. de Nuptiis*, Concilium Trullanum *can. 5.* apud Labbaeum *tom. 7. col. 1371. ed. Venet.* Nicolaus I. in *can. I. cap. 30. quaest. 3.* Verum confirmatione contractam cognationem ponit Concilium Compendiense *ann. 757., can. 12.,* apud eundem Labbaeum *tom. 8. col. 452., non Vermeriense, seu apud Vermerias, uti habet Gratianus can. 2. cap. 30. quaest. 1.,* qui quidem Compendiensis Concilli canon extat etiam in Capitularibus Caroli M., et Ladovici Pii *lib. 5. cap. 7.,* apud

Balutium tom. 1. col. 553. ed. Venet. 1772. Diserte autem Bonifacius VIII. in cap. 1. et ult. de Cognat. spirit. in 6., hoc impedimentum memorat. Interim ex iis, quae mox collegimus, monumentis intelligimus, antiquissimum esse, et multo ante quam in Decretalibus describeretur, ab Ecclesia agnitum, ac probatum spiritualis cognationis impedimentum. Quod etiam ostendit Gregorius II. Decret. 4., apud Pithoeum loco mox indicato.

(2) S. Augustinus Ep. 98. ad Bonifac. tom. 2. col. 266. num. 6. ed. Venet. 1729.

(3) Consule Gratianum caus. 30. quaest. 3. et 4.

(4) Concilium Tridentinum Sess. 24. cap. 2. de Reform. matrim.

§. CXXXVIII. Est et alia nuptiarum prohibitio inducta ex maris, et foeminae conjunctione, per quam duae cognationes copulantur, et inde affinitas oritur (1). Leges civiles tantum ex maritali, canones etiam ex vetita conjunctione affinitatem repetunt (2). Quod affines ab affinibus non generantur, nulli proprie gradus inter eos sunt (3). Verum exemplo cognationis etiam affinitatis gradus recepti sunt, et ideo quo gradu quis est cognatus viro, eodem est affinis uxori et contra (4). Affinitas orta ex nuptiis matrimonium impedit eo modo, quo cognatio; perpetuo scilicet in linea recta ascendentium, et descendantium, in linea transversa usque ad quartum gradum (5): orta vero ex vetita corporum commixtione tantum primum, atque alterum gradum comprehendit (6). Contrahit autem affinitatem sola uxor cum viri consanguineis, et solus vir cum consanguineis uxoris; verum nulla inter utriusque consanguineos affinitas intercedit (7).

(1) Affinitatis impedimentum ecclesiastica lege constitutum initio fere saeculi IV. habes in Concilio Neo-

caesariensi *Can. 2.* apud cit. Labbaeum *t. 1. col. 1511.* Hujus quoque impedimenti diserta mentio est in *Can. 61. Concilii Eliberitani*, quod habitum est an. 305. apud Labbaeum *tom. 1. col. 999.* Itaque vehementer errant qui hujus impedimenti originem repetunt a Jure Civili, nimirum a *L. 2. Cod. Theodos. de Incest. nupt.*, apud Gothofredum *tom. 1. pag. 337.*, quae quidem lex lata est an. 355.

(2) *Can. 10. cap. 35. qu. 2. Cap. 8. et 10. de eo qui cogn. consanguin. uxor.*

(3) Consule Cujacium *ad tit. de Consanguinit. et affinit. opp. tom. 6. col. 1084. ed. cit.*

(4) *Leg. 10. ff. de Grad. et affin.*

(5) *Cap. 1. de Consanguinit. et affinit.*

(6) Concilium Tridentinum *Sess. 24. cap. 4. de Reform. matrim.*

(7) *Cap. 5. eod.* Jus civile vetat etiam conciliari nuptias inter vitricum, et uxorem privigni *Leg. 15. ff. de Rit. Nuptiar.*, verum huic legi derogatum est a Jure Canonico in *Cap. 8 de Consanguinit. et affinit.*, uti ostendit Benedictus XIV. *de Synod. dioec. lib. 9. cap. 13.* Confer etiam Cujacium in *tit. de Consanguin. et affinit. opp. tom. 6. col. 1805.*, edit. Mutin. seu Venet. 1778.

§. CXXXIX. Tertium particulare impedimentum est publica honestas, hoc est reverentia certis personis debita, quae facit, ut si quis cum aliqua matrimonium ratum, non consummatum, aut etiam sponsalia contraxit, quae certa, ac pura, hoc est sine conditione, et valida sint (1), cum consanguineis uxoris usque ad quartum gradum, cum consanguineis sponsae usque ad gradum primum, matrimonio jungi vetetur, ac si jungatur, nihil agat (2).

(1) Etiam sponsalia irrita, modo non deesset consensus, publicae honestatis impedimentum parere Bonifa-

cus VIII. constituit in *Cap. un. de Sponsal. in 6. Verum Concilium Tridentinum Sess. 24. de Reform. matrim. c. 3.*, sustulit impedimentum honestatis ex sponsalibus quavis ratione nullis; quam Tridentinam legem tantum ad sponsalia de futuro pertinere, declaravit S. Pius in *Const. ad Romanum 85. in Bull. ed. Rom. ult. t. 4. par. 3. pag. 18.*

(2) Publicae honestatis impedimentum tamquam recens inventum Haeretici reprehendunt, atque eorum e numero Henricus Brouverus *de Jure connub. l. 2. cap. 14.*, plura de hoc impedimento, praeter verum, atque honestam dicit, atque illud primum a Bonifacio VIII. excogitatum putat. Verum multo ante Bonifacium hujus impedimenti diserta mentio est *Can. 14. et 15. cap. 27. quaest. 2.*, quin etiam IV. saeculo Siricius *Epist. 1. ad Himer. cap. 4.*, apud Constantium *col. 628.*, vetat generatim, ne quis alterius sponsam uxorem accipiat, ac plane falsum est, sicuti Jueninius observat *de Sacram. diss. 10. quaest. 7. cap. 9.* decretum, quod ex Benedicto Pontifice Brouverus recitat. Quia impedimenti publicae honestati vetus origo est, non obscure expressa in Jure civili, uti late ostendit Alexius Symmachus Mazochius *Diatrib. 1. in Can. Illiberit. 54. num. 15. et Not. 6. pag. 235. et seq. edit. Romae 1766.* Et sane laudat Vir doctus *Leg. 12. §. 1. Leg. 14. §. 4. Leg. 40. ff. de Rit. nupt. et §. 9. Instit. ut de Nupt.*, additque praeterea Alexii Comneni constitutiones 3. et 4., apud Gothofredum in *Corp. jur. civ.*, quibus in locis de publica honestate agitur disertissime. Itaque hoc impedimentum in remotissima Ecclesiae antiquitate fixas habet radices; imo nunc etiam magna ex parte mitigatum est, cum antea quartum gradum comprehenderet, nunc a Synodo Tridentina coercitum sit intra primum gradum, si ex sponsalibus, intra quartum, si ex matrimonio rato procedat; tantum abest, ut conqueri Brouverus, alique haeretici possint, inventum hoc impedimentum fuisse ambitu, et cupiditate Summorum Pontificum ut suam latius jurisdictionem, potestatemque explicarent.

§. CXXXX. Sequitur impedimentum criminis,

quod duplex est; adulterium, et homicidium. Adulteram nubere adultero vetat Jus Civile Romanorum (1); quod quidem Jus initio etiam Ecclesiae fuisse videtur (2). Sed nunc adulterium tantum matrimonium dirimit, si adulter, et adultera, vel eorum alter innocentis uxoris, vel mariti mortem conspiraverint, ut nuptias inter se conciliarent, vel vivo adhuc alterius conjuge, patratum sit adulterium, ac simul mutuo data futuri matrimonii fides, cum alter alterius nuptias non ignoraret (3). Homicidio quoque dirimitur matrimonium; nam si quis alterius conjugem interfecerit, nuptias inire non potest cum altero conjuge, qui superstes est, modo et ipse in hanc mortem conspiraverit (4).

(1) *Leg. 11. §. 11. et Leg. 40. ff. ad Leg. Jul. de Adulter.*, Nov. 234. cap. 7. col. 9. tit. 9.

(2) *Can. 1. cap. 31. quæst. 1.*, qui canon a Gratiano tribuitur S. Leoni M., sed revera desumptus est ex concilio Triburiensi an. 895. can. 51., apud Labbæum t. 11. *Concil.* col. 653., idemque habet Concilium Altheimense apud eundem Gratianum can. 3. *ibid.* Canon autem 2. *eod. c. et qu.* qui excerptus est ex S. Augustino de nupt. et concupiscen. cap. 10. opp. t. 13. col. 355. *ed. Maurin. Venet. 1768.* longe aliam, ac interpetram vulgus putat habere significationem, ostendit Sebastianus Berardus *Gratiani canones etc. par. 3. c. 19. pag. 310. edit. Venet. 1783.* Porro solum adulterium initio irritum fecisse videtur matrimonium; sed Gratianus antiquos canones arctavit iis conditionibus, quas descripsit post cit. can. 3., si adulter nihil in mortem viri machinatus fuerit, vel si vivente viro fidem adultera non dedit, se sumpturum eam sibi in conjugem, si viro ejus superviveret. Jus idem hoc constitutum est in cap. 6., et pen. de *Eo qui dux. in matrim. quam polluit per adulter.* Conditiones illas a Gratiano descriptas minime necessarias habuisse videtur Alexander III., in cap. 1. *eod. uti intelligitur ex eo, quod utitur verbo*

maxime, sed eas ut necessarias agnovit Innocentius III. in d. c. 6. Quare simplex adulterium sine conspiratione in conjugis necem, aut sine data matrimonii fide dirimens impedimentum non inducit. Confer Benedictum XIV in *Const. Redditae* 113. tom. 1. *ejus Bullar.* §. 15. et seq. p. 279. ed. Rom. seu Venet. 1754.

(3) Cap. 1. et 7. de *Eo qui dux. in matrim. quam polluit per adulter.*

(4) Cap. 1. de *Convers. infidel.*

§. CXLI. Cultus disparitas matrimonio jungi vetat baptizatos, et non baptizatos. A primis Ecclesiae saeculis semper interdictae fuerunt Christianorum nuptiae cum Judaeis, et infidelibus, quoniam eas contrahere idem videbatur, ac *prostituerere membra Christi cum gentilibus* (1). Verum Christiani, qui tales nuptias conciliabant, tantum violatae disciplinae rei erant, poenisque subiciebantur: at nulla Ecclesiae lex erat, quae illas infirmaret. Quin talium nuptiarum occurrunt exempla celeberrima, quae sunt S. Monicae, S. Clotildis, quarum altera Patricium, altera Clodoveum Francorum Regem utrumque ethnicum virum habuit. Postremo consuetudine, ut videtur, inductum ac lege ecclesiastica sancitum est, ut fidelium conjugia cum infidelibus irrita habeantur (2). Matrimonia Catholicorum cum Haereticis improbat Ecclesia, sed ea tamen consistunt; quin etiam interdum a Sede Apostolica ex justa causa, certisque adjectis legibus permittuntur (3).

(1) S. Cyprianus de *Laps.* p. 88. ed. *Amstelaed.* 1700. Vide etiam Concilium Eliberitanum *Can.* 15. 16. 17. col. 252. tom. 1. Chalcedonense *can.* 14. col. 607. Agathense *can.* 67. col. 1005. tom. 2. collect. Harduini; et Gratianum *101. c.* 28. *quaest.* 1. Neque cum infideli-

bus solum, sed etiam cum haereticis Catholicorum matrimonia damnat Ambrosius in *can. 15. c. 28. quaest. 1.* Synodus Agathensis in *can. 16. loc. cit.* misceri vetat connubia cum haereticis: *nisi profiteantur Christianos esse futuros et catholicos.* Jus Graecorum in iis matrimoniis constitutum explicat Synodus Trullana *can. 72*, quem in locum vide Balsamonem, et Zonaram apud Beveregium *Pandect. can. t. 1. p. 241. seq. ed. Oxon. 1672.*

(2) In sacris literis nihil est, ex quo necessario inferri debeat, jure divino, ac praecepto positivo vetita esse fidelium cum infidelibus matrimonio, secuso subversionis, periculo, quilibet omni jure hujusmodi conjugium inire prohibetur S. Augustinus *lib. de Fid. et oper., cap. 19. opp. tom. 11. col. 550. ed. Maurin. Venet. 1767.* S. Cyprianum inter malos Christianorum mores recensere testatur *jungere cum infidelibus vinculum matrimonii*, quod nihil aliud esse assererat, quam prostituere gentilibus membra Christi; quae nostris temporibus, pergit ipse Augustinus, jam non putantur esse peccata, quoniam revera in novo testamento nihil inde praeceptum est, et ideo aut licere creditum est, aut velut dubium derelictum. Quod etiam confirmat de *Conjug. adulterin. lib. 1, cap. 25. t. 8. col. 1746.* Non enim, inquit, tempore testamenti revelati novi, in Evangelio, vel ullis Apostolicis literis sine ambiguitate declaratum esse recolo, utrum Dominus prohibuerit fideles cum infidelibus jungi. Itaque hoc impedimentum ex vetusta consuetudine, ac lege Ecclesiae videtur repetendum. Consule Tournelyum *Praelect. theolog. de Sacram. matrim. diss. 10. quaest. 7. cap. 6. art. 2.*

(3) Late ea de re agit Benedictus XIV. in *Const. Matrimonia 33. tom. 1. ejus Bullar. pag. 53, et in Constit. Magna 51. t. 2. p. 247. ed. Rom. seu Venet. 1754*, ubi etiam antiquiores Summorum Pontificum constitutiones indicantur.

§. CXLII. Caput alterum impedimentorum, uti supra diximus, error est. Non omnis error, qui in nuptiarum contractum incidit, eas irritas facit,

sed ille, qui *personae* dicitur, cum videlicet is, cum quo contrahitur, alius revera est ab eo, qui creditur (1). Quod naturali rationi consentaneum est, cum in id, quod ignorat consentire nemo possit. Error, qui dicitur *fortuna* aut *qualitatis*, nihil afficit, cum non pertineat ad vim intimam, sive ad substantiam contractus (2), nisi error qualitatis in personam redundet (3). Itaque valent nuptiae, cum quis uxorem accepit inopem, ignobilem, inelegantem, quam divitem, nobilem, elegantem putabat.

(1) *Tot. caus. 29. quaest. 1.*

(2) *Cap. 26. de Sponsal. et matrim., Leg. ff. de Contrah. empt.*

(3) Confer S. Thomam in 4. *sentent. dist. 29. et 30. quaest. 1. art. 2. ad 5.*

§. CXLIII. Sed et ignorata quoque servilis conditio nuptiis impedimento est; et ideo non valet matrimonium ab homine libero contractum cum ancilla, quae libera habebatur (1). Civiles leges nullas servorum nuptias, sed tantum contubernia agnovērunt (2); et canones initio desiderasse videntur consensum dominorum, ut nuptiae illae ratae firmae haberentur (3). Sed nunc valent matrimonia servorum, invitis dominis contracta (4); et valet etiam matrimonium liberi hominis cum ancilla, modo ipse jus servitutem non ignoraverit (5).

(1) *Cap. ult. de Conjug. servor.*

(2) *Leg. 3. C. de Incest. et inutil. nupt. Consule Harprectum, et ceteros interpretes in tit. institut. de Nupt.*

(3) *Can. 8. cap. 29. quaest. 2.*

(4) *Cap. 1. de conjug. servor.*

(5) *Can. 2. 4. et seq. c. 29. quaest. 2. Cap. 2. de Conjug. serv.* Van-Espenius, ejus mira in fingendis epochis confidentia est cum pari rerum ignorance conjuncta *Jus eccles. par. 2. tit. 13. cap. 3. num. 9.*, adfirmare non dabitur, Gratianum nixum falso Decreto Julii Pontificis in *can. 1. cap. 26. quaest. 2.* primum adhibuisse distinctionem inter scienter, et ignoranter cum personis servilis conditionis contrahentes: eam accepisse summos Pontifices, cum ea de re Decretales ediderunt, atque ita inductum fuisse hoc impedimentum restrictum ad causam, quocirca conditionem servilem error intervenisse probatur. Sed ut paucis me expediam, atque hominis errorem patefaciam, dabo Concilia duo, quae multo antiquiora Gratiano sunt, scilicet Vermeriense, quod anno 752., et Compendiense, quod anno 757. habitum est. Duobus his Conciliis proponitur disertissime ea distinctio, quam Van-Espenius a Gratiano excogitatam putat. En Vermeriensis Concilii verba *can. 13.*, apud Labbaeum *tom. 8. Concil. col. 408.* Qui scit uxorem suam ancillam esse, et accepit eam voluntarie, semper postea permaneat cum ea. Clariora sunt etiam Compendiensis Concilii verba *Can. 5. col. 451. ibid.* Si Francus homo accepit mulierem, et sperat quod ingenua sit, et postea invenit, quod non est ingenua, dimittat eam, si vult, et accipiat aliam. Similiter si foemina ingenua, et sciebat tunc quod servus erat, habeat, interim quo vivit. Una lex est viris, et foeminis. Habes hic disertissime propositum, explicatumque discrimen inter scienter, et ignoranter cum personis servilis conditionis contrahentes. Eadem jurisprudentia est in Capitularibus Regum Francorum *l. 5. cap. 20. tom. 1. col. 554. edit. Batavii Venet. 1772.*, eadem apud Burchardum *lib. 9. cap. 27.* et eadem apud Ivonem *par. 8. cap. 52. et 65.* Vides igitur Van-Espenii errorem; sed et aliis similibus, atque gravioribus refertum est indigestum illud opus, quod equidem non intelligo, quomodo a quibusdam tantopere laudari possit.

§. CXLIV. Postremum caput impedimentorum

pertinet ad formam, atque rationem, qua nuptiae conciliantur. Principio nullum est matrimonium, quod vi adhibita, illatoque metu contractum fuit; cum omnem consensus libertatem postulet nuptialis consociatio, quae semel rite inita amplius dissolvi non potest. Verum ut vis, indeque ortus metus irritum matrimonium faciat, debet esse gravis, et quo vir fortis, et constans afficiatur (1); praeterea ab homine injuste illatus esse debet, quia si quem Judex metu poenarum cogat nubere puellae, cui stuprum intulit, justus hic metus est a legis imperio procedens, et ideo nuptiae consistunt (2). Est autem Judicis metum expendere, gravis ne sit, an levis, et inanis (3); ac saepe novo, liberoque consensu convalescit matrimonium, quod irritum metus fecerat (4).

(1) *Cap. 6. 15. et 28. de Sponsal. , Cap. 2. de Eo qui dux. in matrim. quam pol. per adulter.*

(2) *Cap. 1. de Adulter. et stupr. , Cap. 10. de Sponsal. et Matrim.*

(3) *Consule Fagnanum in c. consultation. de sponsal. num. 12.*

(4) *Cap. 21. de Sponsal. et matrim. Vide Fagnanum c. Is, qui 30. de Sponsal. num. 44. ubi habes ea de re editam a S. Pio V. declarationem.*

§. CXLV. Eadem est causa raptus, qui vetat consistere matrimonium, quod inter raptorem, et raptam contractum fuit. Mulier enim per vim abducta, ac raptoris imperio, aspectuque truce perterrita non videtur sponte in nuptias consentire. Atque antiquis quidem legibus numquam ipsa raptori matrimonio conjungi poterat (1). Sed nunc potest: si a raptoe separata, atque in loco tuto constituta li-

bere assentiatur, quia procul est metus, qui suum mulieris arbitrium, et liberam voluntatem adimebat (2).

(1) *Can. 11. Cap. 36. quaest. 2.* Vide etiam Codicem Theodosianum l. 9. tit. 34. de *Raptu virgin. vel viduar.*, *Leg. 1.*, et *leg. unic. Cod. Justinian. eod. tit.*, et *Capitularia regum Franc. lib. 6. cap. 69. tom. 1. col. 627. ed. Balutii Venet. 1752.* Concilium Chalcedonense C. 27. tom. 4., *Concil. collect. Labbaei col. 1691. ed. Venet. Eos, qui nomine conjugii mulieres rapiunt, vel opem ferunt, ac consentiunt iis qui rapiunt, si sint quidem clerici proprio gradu excidere jubet; sin autem laici anathematizari.*

(2) Concilium Tridentinum *Sess. 24. cap. 6. de Reform. matrim.*, *Cap. 7. de Raptor.* Certum porro est raptum violenter patratum dirimens impedimentum inducere: sed non ita exploratum omnibus est, num idem impedimentum oriatur etiam ex raptu *seductionis*, ut vocant, cum scilicet mulier dolo, aut illecebris decepta est. Affirmant Tournelyus *Praelect. Theolog. de Sacram. matrim. quaest. 8. art. 1.*, Colletus *Instit. Theol. tom. 9. tract. de Matrim. cap. 7. §. 2.*, et alii praesertim ex Gallicis scriptoribus; sed alii tamen negant, et horum opinionem communioem vocat Giralduus *exposit. Jur. Pontific. par. 1. sect. 840. pag. 668.* Illud animadvertere oportet, raptum, qui patratu est non tantum consentiente, sed etiam postulante, et suadente puella, impedimento non esse, quominus raptor cum ea contrahat matrimonium, sicuti a Sac. Congregatione Concilii responsum fuisse testatur Giralduus *loc. cit.*, et *par. 2. sect. 3. 123. p. 999.*

§. CXLVI. Turpes, et iniquae conditiones faciunt irritum matrimonium, modo ejus bono adversentur. Ita si quis nubat adjecta lege ut mulier suum corpus in questum conferat, ut partum abigat, ut matrimonium dissolvatur, faciunt hae conditiones ut nulla vis matrimonii sit (1). Ceterae conditiones,

licet turpes , et iniquae sint , modo cum matrimonio bono non pugnent , haud illud vitiant , sed potius ipsae vitiantur , ac despiciuntur , quasi adjectae non fuerint (2).

(1) *Cap. 7. de Condit. apposit.*

(2) *Cap. 1. eod.*

§. CXLVII. Denique irritum est matrimonium non contractum *in facie Ecclesiae* , quod clandestinum dicitur. Hujusmodi matrimonia etiam ante Synodum Tridentinam prohibuit Ecclesia , quae semper exegit praesentiam Parochi , ac testium , sed ea pridem subiciebat poenis , non item infirmabat (1). Concilium Tridentinum cum adverteret ad damna gravissima , quae ex his matrimoniis oriebantur , ea irrita declaravit (2) ; et ideo nunc nuptiae non valent , nisi coram proprio Parocho , aut alio vel ejus , vel Episcopi mandato Sacerdote , ac duobus , tribusve testibus concilientur (3). Quod non pertinet ad eas regiones , in quibus Tridentinum Concilium receptum non est ; nam ibi adhuc valent clandestina matrimonia , nisi quis tantum ut clam ouberet , eo se contulerit , relicto loco in quo Tridentina lex obtinebat (4). Quod attinet ad ea matrimonia , quae temere sunt contracta , omissis tribus denunciationibus (5) , ea vetita quidem , et minus honesta , non tamen irrita sunt.

(1) Disputat ea de re accurate , et copiose Benedictus XIV. *De Synod. Dioec. lib. 8. cap. 12.*

(2) Concilium Tridentinum *Sess. 24. de Reform. matrim. cap. 1.* Consule Pallavicinium *Histor. Concil.*

Trid. lib. 22. cap. 4. et lib. 23. cap. 9., ubi accurate explicatum habes, quam diligenter expensa sint omnia, antequam illud evulgaretur decretum, quo clandestina matrimonia irrita declarata sunt.

(3) Modo autem Parochus praesens sit, atque id, quod agitur, intelligat, matrimonium valet, etiam si casu repertus, aut aliam ob causam vocatus sit. Vide Benedictum XIV. *de Synod. Dioecès. lib. 13. cap. 23.*, ubi et alia multa habes, quae ad hanc rem pertinent. Confer etiam Schmalzgrueber *Jus eccles. univers. lib. 4. tit. 3. §. 3.*, ubi etiam late ostenditur, qualis, et quomodo Parochus praesens esse debeat. Similiter necesse non est, quod testes expresse sint vocati, ut praesentes matrimonio sint; sed etiam testes casu reperti apti, et idonei sunt. Consule Schmalzgrueber *loc. cit. §. 5. num. 234. et seq.*

(4) Vide Benedictum XIV. *loc. cit. lib. 13. cap. 4. num. 10*, ubi habes declarationem ea de re editam a Sac. Congregatione Concilii, quam Urbanus VIII. confirmavit.

(5) Vetus est lex Ecclesiae confirmata a Synodo Tridentina *Sess. 24. capit. 1. de Ref. matrim.*, per quam omnium matrimonia, antequam conjungantur, tribus continuis diebus festis in Ecclesia publice inter Missarum sollemnia nuncianda sunt, ut ita, si quod forte latet impedimentum detegatur. Concilium Lateranense in *cap. 3. de Clandestin. desponsat.* haec edicta, sive denunciationes repetit ex speciali nonnullorum locorum consuetudine, quam ubique servandam esse constituit. Cujacius in *cap. 27. de Sponsal.*, et in *cap. 3. de Clandestin. desponsat. opp. tom. 6. col. 1041. et 1058. ed. Maurin. 1788.*, praesertim apud Gallos hujusmodi consuetudinem viguisse tradit; sed eadem revera et in aliis locis obtinebat. Nam illas in Papiensi Ecclesia adhibitas testatur Gonzalez *ad cap. 17. verb. Bannis de Sponsal.*, et in Africa etiam usitatas fuisse, ex Tertulliano monet Bohermerus *ad cap. 3. n. 21. de Clandest. desponsat.* Quinimo a primaeva Apostolorum institutione eam semper fuisse disciplinam, ut nuptiae non clam, sed publice in facie Ecclesiae, coram testibus, et de Episcopi sententia con-

ciliarentur, facile colligitur ex S. Ignatio *Epist. ad Polycarpum* num. 5. , apud Cotelerium *PP. Apostolic.* tom. 2. p. 41. ed. cit. , et Tertulliano *lib. 2. ad Uxor.* num. 8. , et de *Pudicit.* numer. 4. p. 171. 577. ed. *Venet.* 1744. Eadem est disciplina in *can. 2. cap. 30. quaest. 5.* , quem canonem exemplo Barchardi, et Ivonis Hormisdæ P. falso Gratianus adscribit; eadem in *Capitularibus Regum Francorum lib. 6. cap. 133. et lib. 7. cap. 179. tom. 1. col. 632. et 709. ed. Balutii Venet.* 1772. , et in canonibus Isaac Episcopi Lingonensis *tit. 5. cap. 6.* , apud Labbaeum *tom. 10. Concil. col. 46. ed. Venet.* Quanta vero sit harum denunciationum utilitas, ipsi etiam Protestantes noverunt, qui eas suis legibus pluries confirmarunt, uti ostendunt Menckenius de *Omiss. proclamat. sacerdotal. thes. 1.* , et Bohemus *Jur. Parochial. sect. 4. cap. 3. §. 1.*

S E C T I O X.

DE IMPEDIMENTIS IMPEDIENTIBUS.

CXLVIII. Antiqua impedi- numero.
menta impedientia plura CXLIX. Hodie quae sint?

§. CXLVIII.

Impedimenta impedientia esse diximus, quae contractum matrimonium non dirimunt, sed tantum contrahendum impediunt. Sunt igitur cum his impedimentis minus laudabiles, et minus honestae nuptiae, irritae vero non sunt. Magnus olim horum impedimentorum erat numerus. Nam reus gravioris criminis, et qui publicam agebat poenitentiam a nuptiis arcebatur (1); nec puellae nubere poterat, qui eam ad christianam religionem instituerat, qui patrinus catechismi dicebatur.

(1) *Can. 5. 12. et seq. cap. 33. quaest. 2., cap. 2. de Poenitent. et remiss.*

§. CXLIX. Nunc impedimentis impedientibus irretiti sunt sponsi, qui cum sibi futuras nuptias promiserunt, nequeunt fidem fallere, et cum alio, aliave inire matrimonium; filii familias, qui sine parentum consensu nubere prohibentur (1); obstricti voto simplici castitatis, quale est votum extra sacros ordines, aut extra religiosam professionem emissum; ignorantes elementa christianae religionis (2); ca-

Dev. Inst. Can. Tom. II. 11

tholici conjungentes nuptias cum haereticis (3); nubentes omissis denunciationibus, aut extra tempus permissum, hoc est a prima Dominica Adventus usque ad diem Epiphaniae, et a feriis quarta Cinerum usque in octavam Paschatis inclusive, ut ajunt; quo toto temporis cursu publicae, ac solemnes nuptiae interdictae sunt (4); vetiti a summo Pontifice (5), vel ab Episcopo, aut Parocho certas inire nuptias ob latens impedimentum, quod subesse creditur, donec ejus suspicio removeatur (6).

(1) Concilium Trident. *Sess. 24. de Reform. matrim. cap. 1.* Qua in re Jus Canonicum abrogat Jus Civile, quod parentum consensum necessarium statuit ad vim matrimonii *Just. de Nup. in princ. Leg. 2. 10. 11. ff. de Rit. nupt. Leg. 7. 12. 20. cod. de Nupt.* Sed obstat locus Pauli 1C. *Recept. senten. lib. 2. tit. 19. n. 2*; qui etiam ex Jure civili valere inquit matrimonia, quae a filiis familias sine parentum consensu contracta sunt. De hoc Pauli loco multae sunt doctorum virorum Cujacii, Gothofredi, Vinnii, Grotii interpretationes, quas vide apud Antonium Schultingium *ad eumd. loc. num. 6. Jurisprud. vet. ante Justinian tom. 1. p. 300. ed. Lips. 1737.*, et Alexium Symmachum Mazochium *in Diss. Muscettulae de Sponsal. et matrim. dub. 1. not. 5. p. 21. ed. Romae 1766.* Ecclesia autem, cujus tantum ea in re leges sequi debemus, haec quidem matrimonia inita a filiis familias contra reverentiam, qua eos prosequi decet parentes suos, semper detestata est, sed ea tamen rata firma habet. Multi putant, Gallos eo jure uti, ut apud ipsos parentum dissensus impedimentum dirimens iuducat. At longe alia Gallis plerisque mens est, ex quorum sententia defectus patris consensus secundum mentem Regum Christianissimorum non attingit contractus substantiam, sed tantum effectus civiles; uti ex Juvenio tradit Mazochius *loc. cit. not. 12. p. 30.* Argumentum hoc late, et diligenter pertractavit Franciscus

Maria Muscettula peculiari dissertatione: *De sponsalibus et matrimoniis, quae a filiis familias contrahuntur parentibus insciis, vel juste iuvitis*; quam dissertationem Alexius Symmachus Mazochius doctis, copiosisque notis illustravit.

(2) Consule Rituale Romanum tit. de Matrim., S. Carolum Borromeum in Concil. Provinc. Mediol. V. par. 3. act. Eccles. Mediol. par. 1. p. 287., Benedictum XIV. Const. Et si minime 42. §. 11. tom. 1. ejus Bullar., p. 68. ed. Rom. seu Venet. 1754, et de Synod. dioec. lib. 8. cap. 14.

(3) Concilium Laodicenum Can. 10. tom. 1. collect. Harduini col. 784., can. 16. cap. 28. quaest. 1., cap. 14. de Haeret. in 6., Benedictus XIV, Const. Matrimonia 34. §. 3. tom. 1. ejus Bullar. pag. 53. cit. ed. Quemadmodum autem, et quibus legibus interdum a Sede Apostolica catholicorum cum haereticis matrimonia permittantur, late explicat Benedictus XIV. cit. const. 34., et const. Magnae nobis 51. p. 247. tom. 2. Confer etiam eundem Benedictum XIV. de Synod. Dioec. lib. 6. cap. 5. 6. et 7., ubi de matrimoniis, quae inter catholicos, et haereticos, quaeque inter haereticos, contrahuntur, late disseritur.

(4) Can. 8. et 11. cap. 33. quaest. 4. Concilium Tridentinum Sess. 24. de Reform. matr. cap. 10. Vide etiam Fulgentium Ferrandum in Breviar. can. num. 210., et Crisconium in Breviar. can. cap. 188., utrumque apud Pithoeum cod. can. Eccles. Roman. p. 313. et 322. Multiplex autem erat olim hoc tempus, quo publicas, ac solemnes nuptias inire non licebat, uti patet ex can. 10. caus. et quaest. cit., quem canonem Gratianus tribuit Concilio Salegunstadiensi can. 3. apud Labbaeum tom. 11. col. 1131. ed. Venet. Sed nunc a Concilio Tridentino ita, uti diximus, arctatum est. Hoc autem tempore tantum publicas, ac solemnes nuptias vetitas, non item vetitum esse matrimonium, quod sine solemnitate conjungitur, omnes plerique sentiant. Quare non datur sollemnis benedictio, neque item celebratur missa pro sponso, et sponsa, in qua eadem benedictio tribuitur, neque sponsa solemniter in viri domum traducitur, ne-

que demum ceterae solemnitates peragantur. Confer *Ca-*
bassutium Jur. Canon. theor. et prax. lib. 3. cap. 20.
num. 8. et Benedictum XIV. Inst. eccles. 80. num. 3. seq.

(5) Summus Pontifex, cum matrimonium vetat, etiam
clausulas adjungere potest, per quas irritum fiat, si con-
trahatur *Cap. 4. de Spons. duor. Episcopi, et Parochi*
interdictam tantum impediens impedimentum inducit,
donec in latens malum, et impedimentum inquiritur.

(6) *Cap. ult. de Clandestin. desponsat., Cap. 1. et*
3. de Matrim. contr. interdict. eccles.

SECTION XI.

DE DIVORTIIS.

CL. Quid divortium, et re-
pudium?

CLI. Quomodo solvatur ma-
trimonium consummatum?

CLII. Quomodo ratum?

CLIII. et CLIV. Quibus de
causis tori separatio fiat?

CLV. et CLVI. Quomodo,
et quibus solemnitatibus
expedienda sit?

§. CL.

Matrimonium interdum solvi contingit, idque duo-
bus modis, vel quoad ipsum vinculum, quo conju-
ges obstricti tenentur, vel tantum quoad torum, et
mutuam habitationem. Jure Romano ipsa vinculi so-
lutio divortium dicitur, et hoc facit potestatem no-
vas ineundi nuptias, cum primae solvuntur. Differt
divortium a repudio, quod hoc et in uxorem, et
in sponsam cadit, illud tantum in uxorem; quo-
niam non recte dicitur sponsa divertere, cum divor-
tium ex eo dicatur, quod in diversas partes eunt,
qui discedunt (1). Jure Canonico et ipsa vinculi nu-

ptialis solutio, et separatio tori, atque habitationis, quae fit integro vinculo, divortium appellatur.

(1) *Leg. 101. ff. de Verb. significat.* Consule Philippum Vicat. *Vocabular. jur. verb. Divortium.*

§. CLI. Nuptiale vinculum difficiliter solvitur, si consummatum, facilius, si nondum consummatum matrimonium sit. Consummati matrimonii vinculum solvit mors naturalis conjugis, quo vita functo alias nuptias inire licet (1), et conversio conjugis infidelis; si nimirum alter adhuc infidelis sit, atque ab illo discedat, aut ejus mora injuriam religioni afferat, ac peccandi occasionem praebet (2). Quod si conjugi, qui Christi fidem amplexus est molestus non sit infidelis, divortium fidei non conceditur, ut nimirum alter alterius salutem procuraret. Separato autem conjugio per Christianam Religionem ab altero susceptam, si deinceps etiam infidelis Christianus fiat, antequam alter novas nuptias conciliet, matrimonium redintegratur (3). Verum matrimonii vinculum non solvitur, si duo fideles conjugio juncti sint, atque alter eorum a fide discedat (4).

(1) Apostolus I. *ad Corinth. VII. 39.* Non defuerunt haeretici Montanistae, atque alii, qui contra Ecclesiae doctrinam secundas nuptias vetitas dixerunt. Confer Jueninium *de Sacram. diss. 10. quaest. 4. c. 1. art. 2.*

(2) Apostolus I. *ad Corinth. VII. 13. et seq. can. 4. et seq. cap. 20. quaest. 1., cap. 7. de Divort.* Monendus est autem conjux infidelis, num et ipse Christi Religionem amplecti velit, antequam hoc matrimonium dissolutum habeatur. Consule, qui ea de re copiose disputat, Benedictum XIV. *de Synod. dioeces. lib. 13. cap. 21. n. 2. et seq.*

(3) *Cap. 8. de Divort.*

(4) *Cap. 7. eod.*

§. CLII. Ratum matrimonium, praeter alterius obitum, et infidelis conjugis conversionem, solvitur etiam auctoritate Summi Pontificis, qui ea tamen uti non solet, nisi causa cognita (1), et Religionis professione. Nam ut conjuges de meliori proposito deliberent, postquam matrimonium contraxerunt, non eo statim uti coguntur, sed habent duos menses; a quo temporis intervallo si eorum alter Religionem ingrediatur, in eaque professionem emittat, ita solvitur matrimonium, ut conjugi relicto suo luitu liceat alias nuptias conciliare (2).

(1) Confer Benedictum XIV. *loc. cit. num. 4.*, et vide etiam ipsius *Constitutionem Dei miseratione 33. §. 15. tom. 1. ejus Bullar. p. 52. cit. ed.*, ubi declaratur, quomodo, et quo ritu matrimonium ratum a Sede Apostolica dissolvatur.

(2) *Cap. 2. 7. 14. de Convers. conjug.* Concilium Tridentinum *Sess. 24. can. 6. de Matrim.* Tridentinum hunc canonem, et Pontificias illas leges, quibus statutum est, matrimonium ratum, non consummatum dirimi per solemnem Religionis professionem, carpere ausus est Petrus Suavis, sive Paulus Sarpius, aut Marcus Antonius de Dominis, quisquis sit auctor historiae Concilii Tridentini. Sed omnia hujus scriptoris commenta, et sophismata, praeter ceteros, solide, graviterque refutavit Carolus Blaschus *Diatrib. 4. p. 265. seq.* Vide etiam Tournelyam *Prælect. theolog. de Sacram. matrim. quaest. 5. art. 2.*

§. CLIII. Tori, seu habitationis separatio minorem quoque habet difficultatem; quoniam et mutuo consensu conjugum, et altero invito fieri potest. Mutuo consensu fit, cum uterque conjux castitatem vovet, aut approbatam Religionem proficitur (1). Altero autem invito plures sunt divortii cau-

sae: nimirum si alter conjugum in haeresim, aut in idololatriam prolabatur (2); si ea conjunctio peccatum parere, aut disjunctio emendationem afferre possit (3); si gravem in uxorem saevitiam maritus adhibeat (4); si alter conjugum adulterium, aut infandae veneris scelus commiserit (5).

(1) *Cap. 1. et 4. de Convers. conjug.* Qua in re illud decet animadvertere, non cogi uxorem religiosam professionem emittere, cum in ea aetate est, ut sine suspitione in communi hominum societate versari possit, modo extra religionem castitatem voveat, cogi autem omnino, cum florens aetas huc suspicioni locum.

(2) *Cap. 2. 6. 7. de Divort., can. 5. capit. 28. quaest. 1.*

(3) *Cap. 2. de Divort., cap. 3. de Adulter.*

(4) *Cap. 8. et 13. de Restit. spoliat., can. 6. c. 31. quaest. 1.* Verum si maritus caveat de non vexanda uxore, neque tanta sit ejus saevitia, ut non satis caveri posse videatur, eam ob causam tori separatio non conceditur.

(5) Quin debeat maritus uxorem adulteram, nisi poenitentiam egerit, a se remove *can. 4. et 6. c. 32. quaest. 1., sed post actam poenitentiam eam recipere potest can. 7. eod., cap. 3. de Adulter.* Vide etiam Hermann Pastorem l. 2. *Mandat. 4.* apud Cotelerium *PP. Apostol. tom. 1. p. 87. ed. Amstelaed. 1724.*

§. CLIV. Verum propter adulterium separatio non permittitur, si mulier invita fuerit compressa (1); aut vir deceptus, quod aliam mulierem uxorem putaverit (2); vel si uterque conjux ejusdem criminis reus sit (3); vel si vir aut opera, aut hortatu causa adulterii fuerit (4); vel si crimen remiserit uxori, cum qua concubuerit, licet ejus culpam non ignoraret (5).

- (1) *Can. 3. c. 32. qu. 5.*
- (2) *Can. 6. c. 34. qu. 1. ibique Glossa.*
- (3) *Cap. 6. et 7. de Adult.*
- (4) *Cap. 6. de Eo qui cognov. consanguin. uxor.*
- (5) *Can. 4. c. 32. qu. 2.*

§. CLV. Quaecumque autem fuerit causa, non proprio arbitrio, sed re primum diligenter cognita, et ecclesiastici iudicis sententia conjuges separantur⁽¹⁾. Quod faciendum in primis est, cum agitur de vinculo matrimonii, quod non facile, nec temere dirimendum est. Quare ob impedimentum dirimens matrimonium solutum haberi non potest, nisi primum ea de re sedulo quaesierit Iudex Ecclesiasticus⁽²⁾, atque edita sententia solutum declaraverit.

(1) Confer Benedictum XIV. *de Synod. dioec. lib. 9. c. 9. n. 4.*

(2) Conc. Tridentinum *Sess. 24. cap. 20. de Reform. matrimoniales causas Episcopi iudicio commisit, Praelatis inferioribus generatim exclusis. Hinc Benedictus XIV. causas matrimoniales eorum, qui subsunt Capitulo Veronensi, non ab ipso Capitulo, sed ab Episcopo Veronensi judicandas esse decrevit in constit. Regis Pacifici 59. §. 29. tom. 4. Bullarii sui pag. 283. ed. Rom. seu Venet. 1758; quemadmodum et similes causas non ab Abbate Cryptae Ferratae loci Ordinario, sed ab Episcopo Tusculano cognosci voluit in constit. Inter multos 33. §. Tertium tom. 2. p. 170.*

§. CLVI. Quod iudicium certo ritu expediendum est, ne quid in re gravissima inconsiderate, ac negligenter fiat. Nimirum in omnibus his controversiis publicus matrimonii Defensor esse debet, sive uterque conjux, sive alter tantum solutionem postulet, eoque citato gerenda sunt omnia, ut iudicium

valeat. Si Judex ratum firmum habendum esse definiverit matrimonium, neque quis ab ea sententia appellaverit, etiam matrimonii Defensor abstinere se a judicii progressu debet: verumtamen ejus est provocare ad judicem superiorem, cum sententia contra vim matrimonii lata est. Altera sententia si matrimonium similiter irritum declaretur, necesse non est longiori judicio experiri, et tunc eo finito conjuges, qui interim, dum servebat judicium, novas nuptias inire prohibebantur, ad eas transire libere possunt. Semper tamen integrum est, etiam postquam duabus sententiis infirmatum est matrimonium, redintegrare judicium, quoniam hae sententiae vim nunquam accipiunt rei judicatae (1).

(1) Cuncta haec, quae pertinent ad agnoscendas causas matrimoniales, earumque judicia expedienda, accurate, lateque explicantur a Benedicto XIV. in *Constit. Dei miseratione* 23. tom. 1. ejus *Bullarii* pag. 49. edit. Romae seu Venet. 1758. quam constitutionem ipse Benedictus memorat in *Const. Si data* n. 47. tom. 2. *Bullarii* p. 236.; et in *Constit. Et si matrimoniales* 51. tom. 4. p. 213.

TITULUS III.

DE INDULGENTIIS ET REMISSIONIBUS.

- | | |
|---|--|
| I. Indulgentiarum fons, et effectus. | III. Earum concedendarum potestas penes Ecclesiam. |
| II. Indulgentiae plenariae vel partiales. | IV. Variarum earum species. |
| | V. Indulgentiae pro vivis, et defunctis. |

§. I.

Habet Ecclesia thesaurum inexhaustum conflatum ex infinitis Christi meritis, Sanctorumque satisfactionibus (1), unde depromit Indulgentias, quibus remittit poenas temporales, quas poenitentes subire, et quibus sua scelera expiare debent. Sacramentalis absolutio veniam peccati tribuit, indulgentiae reum criminis liberant a poenis temporalibus, in quas aeternae vi sacramenti commutantur (2). Utraque potestas a Christo data Ecclesiae est (3), et ea usus Apostolus veniam peccati dedit, et poena solvit Corinthium, quem pridem ab Ecclesia eiecerat (4).

(1) *Extravag. 2. de Poenitent. et remission. int. Communes.* Vide etiam Benedictum XIV. in *Constit. Peregrinantes* 17. §. 4. tom. 3. ejus *Bullarii* p. 75.

(2) Non desunt Theologi, qui per indulgentias tolli posse peccata venialia, etiam quoad culpam, existimant; sed haec valde dubia sententia est, neque sanae theologiae rationibus convenit, quod ostendunt Passerinus *de Indulgent. quaest. 7. num. 82.*, Theodorus a Spiritu S. *cod. tract. tom. 1. cap. 5. §. 1.* Hinc si quae occurrunt

indulgentiarum formulae, quibus quis a culpa et a poena liberari dicitur, eae vel falsae haberi debent, uti monet Benedictus XIV. *de Synod. dioeces. lib. 3. cap. 18. num. 7*, vel tribuendae sunt eleemosynariis quaestoribus, quos increpat Clemens V. in *Clem. 2. de Poenit. et remiss.* Si quae autem reperiuntur indulgentiae, in quibus ex. gr. quarta, aut septima pars venialium peccatorum remittitur, qualis est indulgentia data ab Urbano III., apud Du Cangium *Glossar. med. et infim. Latinit. verb. Indulgentia*, eae referendae sunt ad remissionem poenae temporalis, et huc illa spectat Urbani indulgentia, uti patet ex ejus verbis, quae describit Lucas Dacherius *tom. 3. Spicilegii p. 3. ed. Paris. cit.*

(3) Concilium Tridentinum *Sess. 25. in Decret. de Indulg.* Confer Theologos, atque inter ceteros, Jueninium *de Sacram. Diss. 13. quaest. 1.*, qui de vi Indulgentiarum, deque earum concedendarum a Christo Ecclesiae data Potestate contra Lutherum, Zuinglium, Calvinum, ceterosque haereticos copiose disputat; et consule Amortum *Histor. Indulgentiar.*, et Theodorum a Spiritu S. *de Indulgentiis*, qui latissime de Indulgentiis agunt. Videndae praeterea sunt *les Conférences de Lucon. tom. 7.*, ubi multa et egregia de indulgentiis occurrunt, et hic porro tractatus nuper in Italicum sermonem conversus descriptus est in Diario Ecclesiastico Romano: *Supplemento dell' anno 1790., per i mesi di Marzo, Aprile, Maggio, Giugno.*

(4) Apostolus II. *ad Corinth. II.*, quem in Pauli locum vide Chrysostomum *Hom. 4. in 2. ad Corinth. opp. tom. 10. pag. 434. edit. Paris. indic.*, Ambrosium, Anselmum, Thomam, aliosque apud Cornelium a Lapide in *Paul. Epist. 2. ad Corinth. cap. 2.*, qui cuncti illum de indulgentia plenaria interpretantur. Praeclarum illud indulgentiae exemplum reliquit Joannes Apostolus, qui juvenem latronem, et homicidam Ecclesiae restituit, uti narrat Eusebius *Histor. Eccles. lib. 3. cap. 23. pag. 99. edit. Taurin. 1746.* Confer etiam Jueninium *loc. cit. c. 2.*, qui illam Pauli locum diligenter expendit.

§. II. Indulgentia vel integram relaxat poenam,

vel ejus partem, et ideo vel plenaria, vel partialis est. Jus concedendi indulgentias a Christo datum est Apostolis, eorumque successoribus, quibus potestas ligandi, et solvendi, in qua illud continetur, concessa est. Sed quoniam Episcoporum potestas subest Romano Pontifici, qui illius exercendae modum constituit (1), jure suo Pontifices Maximi, pro suprema potestate sibi in Ecclesia universa tradita, sibi plenarias indulgentias reservarunt, ac tantum partiales Episcopis permiserunt (2). Quare unus Romanus Pontifex plenarias indulgentias tribuit, Episcopi tantum partiales; et vero ab ipsis in Ecclesiae dedicatione unius anni, in ceteris vero temporibus quadraginta dierum indulgentia tribuitur (3). Jure extraordinario, et delegato etiam presbyteri, imo et inferiores clerici indulgentias elargiuntur; quin etiam interdum Summus Pontifex Vicariis Apostolicis plenarias indulgentias permittit (4).

(1) Confer quae scripsi in *Prolegomenis cap. 2. §. 20. pag. 19.*, et confer, quem eo loco laudavi, Petrum Ballerinium. Atque huc etiam redeunt ea, quae supra dixi de Summi Pontificis potestate in Ecclesia universa, deque jure quod habeat, arcandi Episcopalem jurisdictionem. Ex his autem et ceteris harum Institutionum locis satis patere arbitror, quid ego revera sentiam de Primatu Summi Pontificis, deque ejus in tota Ecclesia potestate. Sed Scriptores Annalium Ecclesiasticorum Florentiae primum me immerito reprehendunt, quod nimis late hujus Primatus jura explicaverim, deinde aliam mihi sententiam adscribunt, meque immerito similiter laudant, quasi harum Institutionum *lib. 1. tit. 3. sect. 1. prim. ed.* Primatus jura arcare voluerim. Praesertim vero appellant §. 15. *not. 6. ejusd. ed.*, ubi egi de judiciaria Summi Pontificis potestate, atque ita hunc locum explicant, quasi negarim, etiam omissis mediis judicibus

ad Pontificem provocari posse. Sed ago eo loco ne attigi quidem hanc disputationem, quam integram servavi lib. III, ubi ostendam, etiam medio Judice praetermisso recte ad Primatem totius Ecclesiae provocari. Ordinarius quidem iudicii cursus est, ut gradatim appellatio fiat, ac medius iudex non negligatur, antequam controversia deferatur ad summum omnium Rectorem cujus iudicium soli Deo subjicitur; et huc referendus est Innocentius I., cujus ibi descripsi locum. Sed non inde efficitur, quod Summus Pontifex eodem jure, quo arctat Episcoporum jurisdictionem, ex eaque subtrahit certos Subditos, eodem inquam vocare ad se non possit controversias, et ita de iis rebus agere prohibeantur medii Judices, qui Primatis, cui subsunt, imperio parere debent. Agam ea de re copiose *Libro III*, ut annalium Scriptores intelligant, mihi de his appellationibus ad Summum Pontificem interponendis fixam esse, certamque sententiam. Primatus autem jura, ut pluribus ostendi harum Institutionum locis, patere confirmo quam latissime, et prorsus assentior Bellarmino, Baronio, Mamachio, Balerinio, ceterisque similibus doctissime viris, quorum pluries opera laudavi.

(2) Concilium Lateranense *can. 62.*, qui canon descriptus est in corpore Juris canonici *cap. 14. de Poenitent. et remiss.* Martinus V. in Bulla quae incipit *Inter cunctas*, quaeque approbante Constantiensi Concilio edita est contra errores Wicleffi, et Joannis Hussi, extatque *tom. 16. concil. col. 761.*, coll. *Labb. Venet.* Consule Bellarminum *de Indulgent. lib. 1. cap. 11. controuv. tom. 2. opp. p. 684. ed. Venet. 1721*, et Benedictum XIV *de Synod. Dioec. lib. 2. cap. 9. num. 7.* Multa etiam, atque praeclara de Indulgentiis, deque Summi Pontificis in iis concedendis potestate habet Mamachius *Contra Auctorem opusc. Quid est Papa? Ep. 5. §. 6. t. 2. pag. 48. et seq.*, et doctissimus Cardinalis Gerdilius: *Confutazione di due libelli contro il Breve Super soliditate t. 1. p. 87. et seq.*

(3) *Capit. 14. de Poenitent. et remiss. capit. 3. eod. in 6.*

(4) Benedictus XIV. *Const. Apostolicum 16. §. 23.*

pag. 66. tom. 4. *Bullarii indic. edit.* Ita etiam Cardinalibus de latere Legatis, qui jussu Summi Pontificis anno Jubilaei aperiunt, clauduntque portas sanctas, plenariae indulgentiae permittuntur. Benedictus XIV. *Const. Nemo* 22. §. 9. pag. 145. et *Const.* 26. pag. 151. tom. 3. cit. *edit.* Solent quoque Episcopi, uti monet ipse Benedictus XIV. *de Synod. dioec. lib.* 5. *cap.* 1. num. 5., saltem cum primam agunt Synodum, plenariam a Summo Pontifice indulgentiam impetrare illis, qui una ex tribus synodi diebus Ecclesiam cathedralem visitaverint. Quod etiam a Sede Apostolica concedi solet semel in anno ea die, qua Episcopi jussu generalis communio fit in Ecclesia Cathedrali: cum sacrae, ut vocant, *Missiones* habentur; cum Episcopus prima vice Pontificalia exercet in Ecclesia cathedrali, et in insignioribus dioecesis Ecclesiis ea die, qua prima vice cathedralem Ecclesiam, vel aliquam ex Ecclesiis locorum insigniorum dioecesis visitat; similiter ab eadem Sede Apostolica Episcopis bis in anno facultas tribuendi populo Pontificiam benedictionem cum plenaria indulgentia conceditur.

§. III. Indulgentias ii tantum consequuntur, qui ab omni lethalis peccati labe expiati satisfaciunt universis operibus, quae praescripta sunt ab eo, qui illas elargitus est (1). Fuisse semper penes Ecclesiam potestatem concedendi indulgentias certum est: sed usus hujus potestatis, qui totus ab Ecclesiae judicio pendet, pro rerum, temporum, personarum ratione multiplex variusque fuit (2). Initio justae concedendarum indulgentiarum causae erant libelli martyrum (3), reditus haereticorum ad Ecclesiam, imminens in Christianos persecutio, ferventius agenda poenitentiae studium (4).

(1) Vide Benedict. XIV. *Const. Accepimus* 6. l. 2. p. 19. *Bullarii laud. edit.* Proponuntur indulgentiae contritis, et confessis, sacraque communione relectis;

hinc quaesitum est, num actualis confessio, et sacramentalis communio necessaria sit, ut quis indulgentiam consequatur. Ea de re variae sunt intelligentium hominum opiniones; sed omnem dubitationem sustulit Benedictus XIV. *Constit. Inter praeteritos* 21. §. 2. ad 7. p. 99. et seq. 1. 3. ejus Bullarii, qua definitum est, necessariam esse actualem confessionem, et sacramentalem communionem, ut acquiratur indulgentia, quae pro confessis, et sacra communione refectis concessa est.

(2) Consule Papebrochium in *Responsionib. ad P. Sebastianum a S. Paulo respon. ad art. 4 num. 22.*

(3) Ferventibus persecutionibus confessores, qui carceribus detinebantur, libellos dabant ad Episcopos, quos rogabant, ut lapsis poenitentiam, vel ejus partem remitterent, pacemque darent. Tertullianus ad *Martyres cap. 1. pag. 137. edit. Paris. 1675*, Cyprianus *Epist. 11. 21. 22. 23. pag. 24. 33. 34. edit. Paris. 1666*, et alibi, praesertim libro de *Lapsis*. Videndus ea de re Morinus de *Administr. poenitent. lib. 8. cap. 26.* Magna vis erat eorum libellorum, qui valebant etiam jam sedata persecutione, mortuisque martyribus, ut recte ostendit Albaspinaeus *lib. 1. Observ. 20. p. 52. ed. cit.*

(4) Integrum erat Episcopis poenitentibus, quorum maximus erat in agenda poenitentia fervor, et stadium, tempus contrahere, ac de ipsis aliquid humanius cogitare, uti loquitur Synodus Nicoena *can. 12. col. 330. tom. 1.*, idemque habet Synodus Ancyraea *can. 2. et 5. eod. t. 1. col. 271. 272. collect. Harduini.*

§. IV. Labentibus annis invaluit redemptio poenitentiarum eleemosynis, quae aut in pauperum subsidium, aut in aedificandas, reparandasve ecclesias convertebantur; tum etiam data indulgentia per Missarum sacrificia, aliaque suffragia, vel sacras peregrinationes, aut pia opera, quae ab Ecclesiarum Praelatis imponebantur (1). Saeculo XI potissimum in Ecclesiae dedicatione Indulgentiae concedebantur (2), eademque aetate tributae sunt illis, qui

captis armis contra infideles Hierosolymitanum iter susciperent (3). Denique Bonifacius VIII., plenam indulgentiam attribuit iis, qui certis vicibus Apostolorum ecclesias visitarent (4), quae est indulgentia Jubilaei (5), centesimo quoque anno initio constituta, deinceps vero a Clemente VI. vocata ad annos quinquaginta, ab Urbano VI. ad annos tres, ac triginta, a Paulo II. ad annos vigintiquinque.

(1) Hujusmodi poenarum redemptiones memorant Concilium Triburiense an. 895. *Can. 57 col. 455. 1. 6 collect.* Harduini, Ratherius Veronensis *Orat. synodic. ad Presbyter. num. 9. col. 416. ed. Veron. 1765.*, atque alii bene multi.

(2) Benedictus IX., ut tradit Mabillonius *Praef. in saec. V. Benedictin. num. 109. pag. LV. tom. 7. ed. Venet. cit.*, an. 1040. indulgentiam tribuit omnibus, qui se ad Ecclesiam S. Victoris Massiliensis recenter dictam contulissent; eamque indulgentiam concessit Alexander II. in Cassinensis Ecclesiae dedicatione tum iis, qui tunc praesentes erant, tum reliquis omnibus, qui per octo continuos dies eo convenirent, uti patet ex *Chron. Cassinens. lib. 5. cap. 31.* Similis data venia est an. 1098. ab Urbano II. visitantibus Ecclesiam S. Nicolai Andegavensis, quam ipse dicaverat; eodemque modo Calixtus II. an. 1120. dedicata Maurianensi prope Stampas Ecclesia, uti narrat Duchesnius *Histor. Francor. tom. 4. pag. 369*, annuam peccatorum remissionem in dedicationis anniversario die constituit, quod et consequentes Pontifices praestiterunt.

(3) Alexander II. ut tradit Malaterra *de rebus gestis a Roberto Guiscardo Calabriae Duce, aliisque lib. 2. cap. 33. in Schotti Hispan. illustr. tom. 3.*, contra infideles in Sicilia pugnantibus anno 1063., indulgentiam largitus est, deinde Urbanus II. in Concilio Claromontano an. 1096. *can. 2. apud Labbaeum t. 10. Concilior. col. 507.* plenam attribuit veniam omnibus, qui captis armis contra infideles irent ad Terram Sanctam, ut eam recuperarent. Quam indulgentiam omnium, quae plenariae sunt, antiquissimam putat Cardinalis Thomasius

Commentar. de Concess. Indulgent. opp. tom. 7. pag. 126. edit. Romae, quam accurate, et erudite perficiendam curavit. Antonius Vezzosi Collega olim meus in Romana Academia, Vir praestans ingenio, doctrina, pietate singulari, mihiq̃ dum vixit, amicissimus. Sed alia plenariorum, ut videntur, Indulgentiarum exempla Urbano II. antiquiora sunt apud Sohelestratum in *Act. Eccles. Orient. tom. 2. diss. 1. cap. 5., pag. 761. et seq.*, et Amortum *Histot. Indulg. par. 1. sect. 2. pag. 46. edit. Venet. sect. 4. pag. 105. et sect. 7. pag. 155.* Urbani Indulgentiae similem, quam S. Bernardus *Epist. 426. opp. tom. 1. pag. 319. edit. Mabillonii Venet. 1781. largissimam veniam* appellat, Eugenius III. iisdem Crucesignatis impertit, uti patet ex ipsius Bernardi *Ep. 363. pag. 275.*; quod exemplum et alii Summi Pontifices sequuti sunt.

(4) Centenariam hanc indulgentiam, quae jubilai nomine appellatur, primum a Bonifacio VIII. institutam fuisse, plerique arbitrantur; verum ejus aetate antiquiorem esse, ostendit Jacobus Cajetanus Diaconus Cardinalis S. Gregorii ad velum aureum in *tract. de Centesimo, seu Jubilaeo anno in Biblioth. PP. tom. 25. p. 936. ed. Lugdunen.* Omnium accuratissime, copiosissimeque de anno jubilai, sive anno Sancto peculiari opere Romae edito 1775. disserit Cl. Zacharia.

(5) Hebraei quinquagesimo quoque anno habebant annum Jubilai *Levit. cap. 25.*, et hic porro annus in sacris literis appellatur annus remissionis, sanctificationis, et quietis. Annus hic aliquo modo imago fuit Jubilai, quem postea Romani Pontifices instituerunt. De origine hujus vocis Jubilai late disputat Calmetus in *Levit. loc. cit.*

§. V. In concedendis indulgentiis adhibenda est moderatio, quoniam effusa liberalitas poenitentiam enervat. Itaque ante oculos habenda sunt exempla veterum Patrum, qui respectu habito ad dolorem, atque ad lacrymas poenitentium indulgentias concedebant (1). Quavis vero de causa dentur indulgen-

tiae, non eas certe largitur Ecclesia, ut foveat poenitentium ignaviam, sed ut nostram imbecillitatem erigat, atque excitet (2). Itaque non desides nos, et ignavos esse oportet, cum vocamur ad caelestem thesaurum accipiendum: sed omni ope eritendum est, ut dignos poenitentiae fructus facientes, Deoque pro nostris criminibus satisficientes, studio obsecundemus Ecclesiae, quae omnem nobis opem ferre conatur, ut aeternam gloriam consequamur (3).

(1) Concilium Tridentinum *Sess. 25. in decret. de indulg.*

(2) Consule Baronium *ad an. Chr. 1073. num. 71. t. 17. pag. 371. edit. Lucae, Pallavicinium Histor. Concil. Tridentin. lib. 24. cap. 12. num. 6. Bellarminum de indulg. lib. 1. tom. 12. §. Ad tertium opp. t. 2. pag. 587. ed. Venet.*

(3) Consule Jueninum *de Sacrament. dist. 12. qu. 5. cap. 5. et qu. 6. cap. 1. et 2. Baronium ad an. 1078. n. 71. tom. 17. p. 371. ed. Lucae, Pallavicinium Histor. Conc. Trident. lib. 24. cap. 12. n. 6., et Benedictum XIV. Instit. eccles. 53. §. 11.*

§. VI. Prosunt Indulgentiae tum vivis, tum illis, quos vita defecit, sed his per suffragii, illis vero per absolutionis modum (1). Nunciandae autem sunt ab Episcopo cum duobus Canonicis, et oblatae a Fidelium pietate eleemosynae, nulla prorsus accepta mercede, colligendae sunt. Quod sanctissime, et providentissime sancitum est a Synodo Tridentina (2), ut omnes intelligant, hos caelestes Ecclesiae thesauros non ad quaestum, sed ad pietatem exerceri. Ideo sublati sunt eleemosynarum Quaestores, qui suo saepe abusi munere gravissima Ecclesiae mala attulerunt.

(1) Confer Benedictum XIV. *Constit. Apostolica* 19. §. 14. pag. 87. tom. 3. ejus *Bullarii*, et confer etiam, quae eodem loco laudatur, Leonis X. Constitutionem.

(2) Concilium Tridentinum *Sess. 21. de Reform.* c. 9. et in decret. de *Indulg. Sess. 25.*

TITULUS IV.

DE DIVINO OFFICIO.

- | | |
|---|--|
| I. Quid divinum Officium ?
et diversa ejus nomina. | Divinum Officium persolvendum sit. |
| II. Horae canonicae. | VIII. Olim etiam laici ad |
| III. Matutinae, et Vespertinae preces antiquissimae. | Divinum officium conveniebant. |
| IV. Horarum canonicarum distributio. | IX. Qui nunc illud persolvere cogantur. |
| V. Quando haec ubique inducta? | X. Quomodo persolvendum sit; et quis ejus ritus, ac formulas constituit? |
| VI. et VII. Quò tempore | |

§. I.

Certus ille, ac sollemnis numerus, ritusque psalmodum, hymnorum, lectionum, aliarumque precum Ecclesiae auctoritate institutus, atque in statas diei horas distributus, ut continenter Deo laudes offeramus, *divinum officium* appellatur. Nam officium significat id, quod ratione habita locorum, temporum, personarum efficere omnes debent: unde tractum est nomen divini officii, quoniam in eo comprehenditur, quod erga Deum quotidie praestare debemus (1). Dicitur etiam divinum officium *sacra*

sygnaxis, et *collecta*, hoc est conventus, et congregatio fidelium, qui ad fundendas preces conveniunt, et *cursus ecclesiasticus*, quasi orbem, et cursum constituat, quem singulis diebus conficere oportet (2); et *Breviarium*, quasi summa caeremoniarum, et precum, quas servare et quas fundere oportet ut divinum officium recte persolvatur (3).

(1) Confer Cardinalem Bonam de *Divin.*, *Psalm.* c. 2. §. 1. Antequam vero saeculo XI. Breviarium introduceretur, ad recitandas horas canonicas in Ecclesiis Occidentalibus adhibebantur Psalteria, Biblia Sacra, Homiliaria, Passionaria, Antiphonaria, Hymnaria, Collectaria, Martyrologia, de quibus omnibus doctissime, accuratissimeque agit V. Cl. Franciscus Zacharia *Biblioth. ritual.* lib. 1. cap. 4. art. 3. tom. 1. p. 96.

(2) Ratherius Veronensis in *Orat. synodic.* ad Presbyter. num. 6. col. 414. ed. Veronae 1765. Confer etiam Regulam S. Columbani c. 7. apud Holstenium *Cod. Regul.* tom. 1. pag. 171. edit. Agust. Vindelic. 1759, et vitam S. Serenici apud Mabillonium *Act. SS. Ordin. S. Benedict.* saec. II. p. 552. ed. Ven. 1733.

(3) Breviarium ita appellatum est, nimirum breve horarium, seu precum epitome, et compendium, ut inquit Gavantus *Thesaur. sacr. rit.* tom. 2. par. 1. sect. 2. cap. 1. Primus autem divinum officium contraxit S. Gregorius VII, qui ab anno 1073. ad ann. 1085. Pontificatum obtinuit: et inde verisimile est, divinum officium ita contractum *Breviarium* fuisse appellatum, quo quidem nomine utitur Micrologus cap. 28. de *Eccles. obser.* p. 481. tom. 18. *Biblioth. Patr. Lugd.* 1677., qui circa annum 1080. vitae usura fruebatur. Narrat Radulphus Tangrensis de *Canon. observ. propr.* 22. p. 313. t. 26. ejusd. *Biblioth. Patr. Lugdun.* summos Pontifices cum olim in Lateranensi palatio commorarentur, Romanum officium in eorum sacello non ita absolutum, ut in alijs Ecclesijs recitare consuevisse, quod et Pontificii sacelli clerici faciebant, ut negotiis suis vacare pos-

sent, additque Radulphus, se *hujus officii ordinarium* vidisse *Romae a tempore Innocentii III* recollectum. Et istud officium brevialium sequuti sunt *Fratres Minores*, inquit ipse Radulphus, *inde est quod Breviaria eorum, et libros intitulant secundum consuetudinem Romanae Curiae*. Nimirum cum S. Franciscus eorum institutor praecepisset, ut Divinum officium secundum ordinem Romanae Ecclesiae peragerent, rati illi, quod qui in Pontificio sacello servabatur, mos esset Ecclesiae Romanae, ac praeterea cum Missionibus Apostolicis destinarentur, contractum Breviarium, quo Pontificium sacellum utebatur, susceperunt. Breviarium porro hoc cum male digestum esset, Haymo Generalis Minister Franciscanorum illud emendandum suscepit, mandante, et approbante Gregorio IX. sicuti narrat *Wadingus Annal. Minor. tom. 3. ad an. 1244*. Hoc postea Breviarium ab Haymone emendatum Nicolaus III. in omnibus Romae Ecclesiis recipi, servarique jussit, sicuti Radulphus narrat. Sed Radulphum vel in Fratres Minores male animatum, vel deceptum putat Franciscus Pagius Junior in *Vit. Nicolai III. num. 22.*, propterea quod ex epistola apologetica, quam adversus S. Bernardum scripsit Petrus Abaelardus circa annum 1140, nimirum ante annos fere centum, quam Franciscanus ordo approbaretur constat, quod ea tempestate omnes Romae Ecclesiae contracto illo officio utebantur. Itaque contractum officium Franciscanis tribui posse negat Pagius, et Radulphum tamquam suo Ordini inimicum reprehendit. Sed nulla justa est ejus reprehendendi causa. Nam si ante Franciscanos Romae Ecclesiae contracto illo officio utebantur, hoc deinceps ab Haymone, emendatum jussu Nicolai III. ab omnibus Romae Ecclesiis receptum est. Vere igitur Radulphus scripsit Breviarium Ecclesiarum Urbis Romae esse Breviarium Franciscanum, quoniam tale revera est Breviarium ab Haymone Generali Ministro Franciscanorum emendatum, quod Nicolaus III. in cunctis Ecclesiis adhiberi voluit. Verum Breviarium hoc ita contractum, seu potius recognitum, et emendatum, brevius adhuc redditum est hortatu Clementis III. a Francisco Quignonio Cardinali, qui opus ipsum anno 1536. Paulo III.

Pontifice Romæ evulgavit. Hujus Breviarii usus per annos circiter quadraginta perseveravit, nimirum a Paulo III usque ad S. Pium V, nunquam tamen praecepta, sed solum permissa fuit ejusdem Breviarii recitatio. S. Pius V. Quignonii Breviarium abrogavit, novumque confici curavit, quo nunc omnes utimur, et quod deinceps recognitum est etiam Clementis VIII, et Urbani VIII auctoritate. Consule Card. Bonam *Rer. liturgic. lib. 1. cap. 7. §. 7. tom. 1. pag. 119. et seq. ibique Salam Not. 3. edit. Taurin. 1747. Meratum ad Gavant. Thesaur. sacr. rit. tom. 2. p. 1. sect. 2. cap. 1., et Zachariam Biblioth. rit. l. 1. c. 4. tom. 1. pag. 107.*

§. II. Frequens quoque est *horarum canonicarum* nomen, quo divinum officium appellamus. Omnes Christiani, ac praesertim clerici prece, et obsecratione humili adversus Deum continenter uti deberent; sed quoniam id neque infirmæ naturæ patiuntur vires, neque negocia, quibus implicamur, sapienter Ecclesia constituit, ut certis saltem horis has preces fundamus, atque ita nunquam intermittamus officium, quod erga Deum præstare debemus. Inde processit nomen *horarum canonicarum*, quoniam in eas divinum officium tributum est (1). Quod autem divinum officium statis horis persolvitur, pluribus constat officiis, quæ omnia simul conjunctæ ecclesiasticum cursum conficiunt. Hæc vero officia ex recepta Ecclesiæ disciplina sunt. Matutinum cum laudibus, hora prima, tertia, sexta, nona, vespersa, et completorium.

(1) Institutionem hanc certis saltem horis debitas Deo laudes persolvendi ab ipsis Apostolis repetendam esse, atque ad nos perpetua traditione delatam, ostendit Martenius *de Antiq. ecc. rit. lib. 4. cap. 1. §. 1. et seq. tom. 3. pag. 1. et seq. et de Antiq. Monach. rit. lib. 1. cap. 1. et seq. tom. 4. p. 1. seq. ed. ind.*, ubi cuncta fere habes quæ ad hoc argumenti genus pertineant.

§. III. Verum haec officia non omnia ejusdem antiquitatis, sed alia vetustiora, alia recentiora sunt. Apud priscos Christianos celebres sunt matutinae, et vespertinae preces. Nimirum quotidie Christiani ante ortum lucis in Ecclesiam conveniebant, ut preces funderent, laudarentque Deum, qui conventus quod ante lucem haberentur, *coetus antelucani*, et *horae nocturnae* dicebantur (1). Sed et Vespere, cum Sol ad Occasum vergeret, in solemnibus conventibus preces fundebantur (2); atque haec duo tempora, matutinum, et vespertinum quotidie erant praecipua antiqui ministerii tempora.

(1) Tertullianus *ad Uxor.* lib. 2. cap. 4. pag. 168, et *de Coron. milit.* cap. 3. p. 162. edit. Paris. 1672. Hinc Christiani apud Minucium Felicem *de Idololatr. vanit.* in l. Octavius p. 332. edit. Paris 1505., appellati *latebrosa*, et *lucifuga natio*; et Plinius *Ep.* 97. l. 19. *ad Trajan.* p. 629. num. 7. edition. Lipsiae 1711, ex ore quorundam Apostatarum de Christianis se accepisse scribit, quod *stato die ante lucem convenire soliti sunt*. In his conventibus adhibitam psalmodiam constat, eamque inchoatam a psalmo LXII. tradit Auctor *Constit. Apostol.* lib. 2. cap. 59. apud Cotelierum *PP. Apostol.* tom. 1. p. 270. ind. ed. Matutinum hoc officium plures psalmos, precesque comprehendebat; sed non illam habebat distinctionem nocturnorum, et laudum quae recentiori aetate a Monachis initium habuisse videtur. Hi tribuerunt officium antelucanum, seu matutinum in tria nocturna, atque in laudes. Tria nocturna tribus primis noctis vigiliis seorsim celebrari solebant; quod S. Thomas *Epist.* 1. *ad Corinth.* c. 14. l. 6, et Marcellus Francolinus *de Hor. canon.* cap. 6. observant. Quin in quibusdam Occidentalium Monachorum regulis expresse sancitum est ut nocturna seorsim celebrentur, atque ita porro habet regula Columbanii cap. 7., apud Holstenium *Cod. Regul.* pag. 171. tom. 1. edit. August. Vindelic. 1759. Laudes etiam distinctum a nocturnis offi-

cium constitauerunt, uti ostendit Card. Bona *de Divin. Psalm. cap. 5. §. 1.* Primus S. Benedictus tria nocturna conjunxisse videtur; saltem ita fert ipsius *regula cap. 11. p. 121.* apud Holstenium *Cod. Regul. tom. 1. ed. laud.*, ut uno tempore tria nocturna celebrentur. Longo post tempore in Ecclesia Romana etiam laudes nocturnis conjunctae unum continuum officium nocte persolvendum constituerunt, uti testatur Hugo a S. Victore *de Off. eccles. lib. 2. cap. 2. col. 1389. in Biblioth. PP. tom. 10. ed. Paris.* Rem totam, praeter Card. Bonam *de Divin. psalm.*, explicant Thomassinus *Vet. et nov. eccles. disciplin. par. 1. lib. 2. c. 71. et seq.* Martenius *de Antiq. Monachor. rit. lib. 1. cap. 2. et seq. tom. 4. p. 4. et seq. ed. Venet. 1764.*, et Binghamus *Origin. eccles. lib. 13. capit. 9. §. 7. et seq. p. 299. et seq. tom. 5. ed. Halae Magdeburg. 1754.*

(2) Matutinas, et vespertinas preces omnium apertissime distinguit Auctor *Const. Apost. lib. 8. cap. 35. p. 421. laud. ed.* et Concilium Laodicenum *Can. 18. tom. 1. col. 784. Collect.* Harduini memorat tum preces vespertinas, tum eas, quae ad noñam fiunt, et eandem in utrisque liturgiam servari jubet. Vespertinum officium initium sumebat a psalmo CXL. quem auctor *Const. lib. 8. cap. 35. p. 241.* vocat *τον επιλυχνιον ψαλμον*, lucernalem psalmum, quod canebatur eo tempore, quo lumen accendi solebat; et Chrysostomus *Homil. in psalm. 140. tom. 5. num. 1. p. 427. ed. Paris. 1724.* pluribus explicat, quam apte hic psalmus in Vespertino officio adhiberetur. Et apud eundem Auctorem *Constit. loc. cit. cap. 36. et 37. p. 521. προσφωνησις επιλυχνιος, ευχαριστια επιλυχνιος*, precatio, et gratiarum actio lucernalis. In hoc quoque vespertino officio psalmi, hymni, precesque aliae adhibebantur, atque in matutinis, et vespertinis officiis a Christianis *dies in orationibus Dei inchoabantur, dies hymnis Dei claudabantur*, uti loquitur Hilarius in *Psalm. 64. num. 12. col. 169. edit. Paris. 1693.* Quod etiam tradit Hieronymus *Ep. 22. ad Eustoch. n. 37. p. 119. tom. 1. ed. Veron. 1734.*

§. IV. Accessere deinceps horae , quae dicuntur *canonicae* , eaeque ex monachorum instituto repetendae videntur. *Aegypti* monachi , qui omnium antiquissimi sunt , et a quibus monasticae vitae initia ducuntur , praeter vespertinos , et antelucanos conventus , nullas canonicas publicarum precum horas videntur habuisse ; cum reliquum diei spatium tribuerent labori manuum , cum quo tamen continenter miscebant preces , psalmos ac meditationem rerum divinarum (1). Non multo post monasteria Mesopotamiae , ac Palaestinae consuetudinem induxerunt , ut monachi , hora tertia , sexta , et nona publice convenirent , ut preces funderent , psalmosque canerent (2). Sed nondum erat novum aliquod matutinum ministerium , distinctum ab antiquo , quod ante lucem peragebatur. Hoc primum in monasterio Bethleemitico institutum est , ne monachi post laudes usque ad horam tertiam inertes , et somnulosi in cellis jacerent , cum eos nulla conventus necessitas ad preces vocabat (3). Denique completorium , quod vocatur , ut distinctum a vespertino , seu lucernari ministerio , instituit S. Benedictus , ut monachi , finitis diei operibus , in unum collecti preces , laudesque complerent , ac solemni ritu absolverent (4).

(1) Vide Cassianum *Instit. Coenob.* l. 3. c. 2. p. 30. ed. Francofurti 1722.

(2) Cassianus *loc. cit. lib. 3. p. 32. ed. cit. Tertullianus de Jejun. cap. 10. p. 549. ed. Paris. 1675.* , et Cyprianus *de Orat. dominic. p. 180. ed. Amstelæd. 1700.* memorant horas tertiam , sextam , nonam ; verum non has horas pro publicis ecclesiasticis conventibus constitutas fuisse scribunt. His quidem horis Christiani privatim preces fuisse videntur , deinceps vero illae e Monachis , ut plerique sentiunt viri docti , publicis conven-

tibus addictae sunt. Vide Josephum Medum *Epist.* 66. et Joannem Pearsonium *Praelect.* 2. in *Act. Apostol.* n. 3. et 4. Certe antiqui Patres Hieronymus, Basilus, Gregorius Nyssenus, aliique saeculi IV. Scriptores cum memorant horas canonicas, tantum monachos respiciunt. Chrysostomus *Serm. IV. de Anna opp. tom. 4. pag. 737. edit. Paris. 1721.* de tribus diei horis pro publicis conventibus constitutis loquitur, verum praeter matutinam, et vespertinam, quae alia fuerit hora, non indicat. Fortasse jam tunc hora nona in Ecclesia Constantinopolitana inducta erat, et eam quidem diserte commendat ipse Chrysostomus *Hom. 2. de inscript. act. apost. op. tom. 3. num. 4. pag. 67. ed. Paris. 1721.*, atque etiam Concilium Laodicenum *can. 18.*, Gentiano Herveto interprete apud Labbaeum *tom. 1. col. 1534. ed. Venet.* Sed cum de Monachis loquitur Chrysostomus *Hom. 14. in 1. ad Timoth. opp. tom. 11. pag. 629. num. 3.* expresse memorat matutinas, ac vespertinas preces, horasque tertiam, sextam, nonam. Negari tamen nequit, quod in Oriente in quibusdam Ecclesiis jam inde a IV. saeculo recepta erat illa pro publicis conventibus horarum distributio, uti constat ex Auctore *Constit. Apostolic. lib. 8. cap. 34. p. 420. laud. ed.* qui preces fieri jubet mane; et tertia hora, ac sexta, et nona, et Vespera, atque in gallicinio. Mabillonius de *Curs. Gallican. §. 5. num. 67. p. 423. ed. Paris. 1685.* ex Gregorio Turoensi demonstrat, sextam, et nonam horas circa initium sexti saeculi in Gallis fuisse receptas, eademque ferme aetate similem consuetudinem in Hispanias delatam constat ex Isidoro Hispalensi de *Regul. Monach. cap. 6. p. 537. tom. 2. ed. Matriti 1778.*

(3) Cassianus *loc. cit. lib. 3. cap. 4. p. 36. ed. cit.* Hinc hora prima dicebatur officium matutinum novum, ut distingueretur a matutino officio veteri, quod semper ante lucem celebrabatur.

(4) Completorium, ut distinctum a vespertino ministerio, antiquiori aetate plane ignotum fuisse, contra Bellarminum ostendit Cardinalis Bona de *Psalm. cap. 11. §. 1. num. 3.* Ejus origo a Sancto Benedicto repetenda est, uti patet ex ejus *Reg. cap. 17. tom. 1. p. 122. edit. Angustae Vindelicorum an. 1759.* ac brevis illa lectio

quae hodie completorium antevertit , sine dubio illam repraesentat , quam psalmis praemitti voluit Benedictus *Reg. cap. 42. p. 127. ibid. Vide Martenium de Antiq. Monach. rit. lib. 1. cap. 12. tom. 4. p. 12. ed. ind.*

§. V. Singulae hae horae e monasteriis serius ocius ad omnes ecclesias translatae sunt. Quod factum est opera vel monachorum , qui ad Episcopatum evecti divina officia in suis ecclesiis ad exemplum vitae monasticae composuerunt , vel clericorum , qui monachorum instituta , et consuetudines in clericatu amplexi sunt (1). Potissimum vero inducta vita communi, datisque canonicis regulis, quae ex regulis Monachorum magna ex parte decerptae sunt , ubique invaluit ea partitio divinorum officiorum, quam primum monachi instituerant. Hodie igitur divinum officium constat his septem partibus, matutino cum laudibus, horis prima, tertia, sexta, et nona , vespers , et completorio , Matutinum cum laudibus faciunt officium, quod nocturnum dicitur, quod olim noctu celebraretur (2); reliquae horaediurnum officium constituunt.

(1) Consule Selvagium *Antiquit. Christian. lib. 2. cap. 9. §. 7. et seq.* Martenium *loc. cit. cap. 1. et seq.*, et Thomassinum *Vet. et nov. eccles. disciplin. par. 11. lib. 2. c. 71. et seq.*, a quibus omnia , quae ad divinum officium pertinent , fusius , et uberius explicantur.

(2) De antiqua consuetudine divinam officium noctu recitandi multa , et praeclara habes apud Cl. Cardinalem Garampium *Memorie della Beata Chiara di Rimini diss. 20. p. 315. et seq.*

§. VI. Omnia haec officia non solum intra spatium vigintiquatuor horarum , sed etiam suo quaeque tempore , atque ordine celebranda sunt. Matu-

tinum officium cum laudibus a clericis saecularibus (1) mane illucescente crepusculo celebrandum est, prima jam lucis orto sidere, tertia, sexta, nona horis respondentibus (2), vesperae decima, vel undecima hora diei, completorium post solis occasum. Sed nunc pro more ecclesiarum matutinum cum laudibus, horaeque prima, tertia, sexta, et nona eo temporis spatio, quod est inter auroram, et meridiem recte persolvuntur, vesperae circa horam nonam, aut decimam, quin in quadragesima circa meridiem, completorium autem statim post vespas celebratur (3).

(1) Regulares choro addicti nocturnum officium quod tamen vulgo matutinum vocatur, vel media nocte, vel hora secunda post mediam noctem; id vero, quod re ipsa matutinum est, illucescente aurora persolvunt. Sed in ea re peculiare singulorum regulas spectare oportet.

(2) Tertia hora apud Romanos respondet nostrae horae nonae antemeridiana; sexta horae duodecimae, unde circa meridiem exsolvenda est, quod et hymnus indicat his verbis: *splendore mane illuminas, et ignibus meridiem*; nona tertiae horae nostrae pomeridiana, et ideo non ante, sed post meridiem persolvenda est.

(3) Sunt qui a matutino, et laudibus primam, sunt qui omnes horas sejungunt, sunt qui simul conjungunt omnia officia, quae ante meridiem persolvunt. Ea res tota pendet ex moribus, atque ex legibus ecclesiarum.

§. VII. Atque haec quidem pertinent ad publicam, et solemnem divini officii celebrationem. Privata etiam ut statis horis fiat, curandum est, quoniam ea mens est Ecclesiae, divinum officium in certas horas distribuit, ut in omnibus diei partibus ad Deum animum revocemus, eumque crebro debitis laudibus, et honore prosequamur (1). Ex ju-

sta tamen causa, non serbato horarum intervallo, divinum officium rite persolvitur (2); Verum curandum est, ut vesperae, et completorium pomeridianis horis recitentur, excepta quadragesima, in qua fictione canonica vesperae ante meridiem celebrantur. Sed et matutinum sequentis diei post elapsum dimidium tempus, quod est a meridie ad occasum solis, privatim recitari potest (3).

(1) Consule Card. Bellarminum *de Bon. oper. l. 1. cap. 18. opp. tom. 4. p. 550. §. Sed quidquid sit, et seq. ed. Venet. 1721.* Statis autem horis divini officii varia tribuuntur ministeria, quae tradit Card. Bona *de Divin. psalmod. cap. 2. §. 2. et seq.* Sed illud in primis constat, quod horae canonicae divinis addictae laudibus mysticas exhibent nostrae redemptionis, et has quidem mysticas rationes enarrat Auctor *Apostolic. Constit. lib. 8. cap. 34. p. 420. loc. cit.*

(2) Mittimus ea in re duriores, asperioresque quorundam opiutiones, ac sequimur sententiam, quam et sequitur Benedictus XIV. *Inst. eccles. 24. §. 9.*, S. Thomae qui in *quodlibet. 5. quaest. 14. art. 1.* habet haec: *consideranda est intentio ejus qui praevenit tempus in matutinis dicendis, vel in quibuscumque horis canonicis. Si enim hoc facit propter lasciviam, ut scilicet quietius somnolentiae, et voluptati vacet, non est absque peccato. Si vero hoc faciat propter necessitatem licitarum, et honestarum occupationum, puta si clericus, aut magister debet videre lectiones suas de nocte, vel propter aliquid hujusmodi, licite potest sero dicere matutinas, et in aliis horis canonicis tempus praevenire; sicut etiam hoc in solemnibus ecclesiis fit; quia melius est Deo utrumque reddere, scilicet et debitas laudes, et alia honesta officia, quam quod per unum aliud impediatur.*

(3) Adeundus Benedictus XIV. *Instit. eccles. 24. t. 10, et Inst. 107. n. 21.*

§. VIII. Initio non solum clerici, sed etiam a-

deles laici ad divinum officium celebrandum quotidie conveniebant, et cum clericis psallebant, et canebant (1). Verum id veteres Christiani faciebant sponte sua, et incitati studio pietatis, quo fervebant, cum nulla lex esset, quae laicum occupatum assiduis laboribus ad vitam sustinendam, quotidie interruptis officiis, statisque horis ad ecclesiam ire compelleret (2). Tantum diebus dominicis, et praecipuis festis legis necessitate debebant laici ad divinum officium convenire, ut sancte agerent dies festos (3); in qua quidem sanctificatione festorum eadem nunc est, quae semper fuit, Ecclesiae mens, licet non amplius laici ad divina officia convenire cogantur.

(1) Consule Thomassinum *Vet. et nov. eccles. disciplin. par. 1. lib. 2. cap. 79. et seq.*

(2) Vide S. Joannem Chrysostomum *cit. Homil. 6. de Anna.*

(3) Confer Van-Espenium *de Hor. canon. dissert. part. 1. cap. 5. §. 2. et 3.*

§. IX. Praecepti necessitas cogebat clericos ad ecclesiam quotidie convenire, ut divinum officium persolverent, et vero nullum ea in re inter majores, minoresque clericos discrimen erat. Omnes enim in ordinatione certae ecclesiae adscribebantur, ut ei perpetuo servirent; ideoque in ea divinum officium celebrabant, quae pars erat praecipua, ac nobilissima servitii quod praestare debebant. Sed cum desiit haec disciplina, et clerici in ordinatione non amplius adscribi coeperunt certae ecclesiae, cui semper addicti essent, sensim minores clerici illud ecclesiae officium obire desierunt. Nunc igitur divinum officium recitare quotidie debent Regulares choro adstricti, beneficiati, et clerici in sacris ordini-

bus constituti (1). Canonici, et ceteri clerici, qui in chorum conveniunt, debent officium solemniter in choro persolvere, aut quodidie, aut alternis diebus, hebdomadibus, mensibus, ut ferunt instituta, moresque ecclesiarum (2).

(1) Vide *Const. Ea quamvis tempore* 129. Benedicti XIV. § 43. et 44. tom. 1. ejus Bullarii cit. ed. p. 317.

(2) Debent autem Canonici, qui in choro versantur, Divinum officium recitare, et cantum sequi Capellano- rum, aut Mansionariorum, ac suo plane deessent mune- ri, qui taciti tantum choro interessent. Confer Benedi- ctum XIV. *Instit. Eccles.* 107. §. 3.

§. X. Preces, caeremonias, ritus in divino of- ficio adhibendos constituit Sedes Apostolica (1); quod rectissime sancitum est, ut amoveantur mala, et in- commodata, quae olim ex diversis divini officii for- mulis oriebantur. Quisquis autem ejus persolvendi lege obstringitur, sive privatim domi, sive publice in ecclesia, id *reverenter*, *distincte*, ac *devote* fa- cere debet (2); et quisquis illud sine justa causa (3) omittit, non solum lethalis criminis reus evadit, sed etiam si beneficium habeat, pro ea parte, quam omisit, beneficii fructus restituere debet.

(1) Cum ex diversitate formularum, quibus divinum officium conceptum erat, magna rerum confusio, et gra- via damna orirentur, actum est in Concilio Tridentino de breviario emendando, deque certa proponenda for- mula, quam omnes in posterum sequerentur. Sed Conci- lii Patribus *Sess. 26. in decret. de Indice librorum, et catechismo, breviario, et missali* satius visum est rem totam Summi Pontificis judicio committere, atque hinc S. Pius V. Pontif. id negotii dedit selectis quibusdam viris, atque opere absoluto edidit Bullam, *Quod a no-*

bis. 37. *tom.* 4. *par.* 3. *Bullarii* p. 22. , ubi certam proposuit breviarii formulam ab omnibus observandam, illis tantum exceptis, qui ab ipsa prima institutione a Sede Apostolica approbata, vel consuetudine, quae ducentos annos superaret, aliis breviariis uterentur. Pianam hanc Bullam confirmavit Clemens VIII. *Const. cum in Ecclesia* 276. *tom.* 5. *par.* 2. *Bullarii* p. 422. deinceps vero Urbanus III. *Constit. Cum alias*, 749 *tom.* 6. *par.* 2. p. 380. hymnis quibusdam auxit, atque emendavit. Ac recte, et jure Romanos Pontifices omnem semper dedisse operam, ut Occidentales Ecclesiae traditiones, et ritus Ecclesiae Romanae in celebranda Missa, in Sacramentis administrandis, in Psalmodia, in ceteris ad publicum cultum pertinentibus amplecterentur, ostendit Cl. Zacharia *Bibl. Ritual.* t. 1. *diss.* 2. *cap.* 4. et 5. p. *XXIX.* et seq.

(2) Concilium Tridentinum *Sess.* 24. *de Reformat.* *cap.* 12.

(3) Caecitas, aut gravis infirmitas, quae officium recitari non sinat, justa causa est, propter quam illud impune omittatur. Qua in re sequi oportet medici, aut superioris, aut prudentis viri judicium. Similiter si quis sine culpa breviario careat, atque in loco versetur, in quo illud invenire non possit, item si quis administrare debeat sacramenta, neque moram ferre possit, legitimam excusationis causam habere censeatur. Possunt et aliae hujusmodi esse causae, de quibus late agunt scriptores qui in hoc argumenti genere versantur. Confer inter ceteros Lucium Ferraris in *Biblioth. verb. Officium divinum*, *artic.* 5. Illud tamen est animadvertendum, quod qui matutinum, et laudes ob aliquod necessarium impedimentum recitare non potest, reliquas tamen partes persolvere debet, uti constat auctoritate Innocentii XII., qui contrariam sententiam proscripsit. *Propos.* 64. in *Bullar. Const.* 54. *tom.* 8. p. 82.

TITULUS V.

DE FESTORUM CELEBRATIONE.

- | | |
|--|---|
| I. Festorum celebratio apud Christianos antiquissima. | dam particulares in certis locis. |
| II. Festi dies vel mobiles, vel immobiles. | V. Summus Pontifex constituit et diminuit festos dies in tota Ecclesia observandos. |
| III. Paschatis celebratio. | VI. et VII. Festorum sanctificatio. |
| IV. Festi dies quidam generales in tota Ecclesia, qui- | |

§. I.

Omnes ferme gentes habuere dies festos, quibus suos Deos honore prosequerantur, et in quibus magnam religiosi cultus partem constituebant. Apud Christianos jam inde ab Apostolorum aetate festi sunt acti, et instituti dies. Antiquitate ceteros vincunt omnes dies Dominici, Pascha, Ascensio, Pentecostes (1). Postmodum alii quoque accesserunt, videlicet Natalis Christi Salvatoris (2), solemnitates B. Mariae Virginis, Apostolorum, Martyrum, Confessorum, alique complures (3).

(1) Festivitates dierum Dominicorum Paschatis, Ascensionis, Pentecostes ab Apostolis celebratas tradit S. Augustinus *Ep. 54. cap. 2. opp. tom. 2. col. 124. edit. Venet. 1729.* Verum Ascensionem Domini non uno, et eodem ubique ritu, sicuti observabatur Dies natalis Domini, Pascha, Pentecostes, observatam fuisse monet Martenius de *Antiq. eccles. rit. lib. 4. cap. 28. §. 1. tom. 3. p. 192. ind. ed. Venet.*

(2) Certo statui non posse videtur, quod etiam diem festum Natalis Christi Apostoli instituerint: et vero Augustinus, uti nunc demonstratum est, cum memorat dies festos ab Apostolis institutos, nullam hujus diei mentionem facit. Primam hujus diei disertam mentionem multi referunt ad exitum saeculi III, hoc est ad aetatem Diocletiani Imperatoris, quem Nicephorus *Hist. lib. 3. cap. 7. pag. 545. ed. Paris. 1630.* narrat ingentem Christianorum numerum natalem Christi noctu celebrantem igne injecto combussisse. Hoc certum est, in Occidente ab antiquissimis inde temporibus festum hunc diem celebrari consuevisse. Testatur id Chrysostomus *Hom. in diem Natal. Christ. t. 2. num. 1. pag. 355. ed. Paris. 1718.* jam inde a primordio ab ipsa Thracia Gades usque incolentibus manifestus, et celebris fuit. Memorat etiam hanc solemnitatem tamquam ubique receptam, et jamdiu pervulgatam Augustinus *Ep. 55. c. 10. t. 2. c. 169. et Serm. 287 t. 7. col. 282. et 52. edit. Maurin. Venet. 1756.* Qui non tantum ipsa solemnitas, sed etiam constitutus solemnitatis dies, hoc est 25. Mensis Decembris in antiquis monumentis designatur. Kalendarium Bacherianum, quod anno 354 scriptum fuisse sentiunt, ab hoc festo initium ducit *VIII. Kal. Jan. Natus Christus in Bethleem Judaeae*; eundem diem servant Polemeus Silvius, et auctor Kalendarii Carthaginensis, uterque proximus eorum temporum, eundem quoque constitutiones Apostolicae *lib. 5. cap. 13.*, apud Cotelierum *PP. Apostol. tom. 1. pag. 312. edit. Antwerp. 1598.* Verum in Oriente prima Chrysostomi aetate nondum haec solemnitas obtinebat, quod manifestum facit ipse Chrysostomus homilia, quam primam de Natali Christi Antiochiae habuit postquam inter Presbyteros cooptatus fuerat anno 386. In ea enim diserte inquit *loc. cit.* quod nondum quidem decimus annus est, ex quo hic ipse dies manifestus nobis innotuit. Nam antea in Oriente unum erat festum Natalis Christi, et Epiphania. At Constantinopoli, exemplo Occidentis, jampridem haec solemnitas recepta fuisse videtur, quod testimoniis Joannis Chrysostomi, et Gregorii Nazianzeni ostendit Cl. Marcellus *Kalend. Constantinopol. ad d. 25 Decembr. tom. 1. pag. 281.* Tanta autem religione festum hoc Natalis

Christi celebratum fuisse constat, ut clerici ea die gravibus constitutis poenis a suis Ecclesiis abesse prohiberentur. Concilium Agathense *can. 64. t. 5. Collect. Labbaei col. 531. edit. Venet.* Quin etiam laici eo die suos Episcopos communionis, ac benedictionis gratia convenire jubebantur. Concilium Agathense *can. 63. loc. cit.*, Aurelianense I, *can. 25. col. 547.* et Epaonense *can. 36. col. 716. d. tom. 5. conc.* Confer etiam Concilium Toletanum XIII *Can. 8. col. 1473. tom. 7. conc.* De hujus festi celebritate multa habet Card. Baronius *Appar. ad Annales circa fin. n. 23. p. 475. ed. Lucae*, et multa etiam Franciscus M. Florentius in vetustissimo suo *Martyrologio exerc. 2. p. 195. et seq.*, qui et p. 204. et 228. de Epiphania, seu apparitione Domini loquitur, atque hunc diem tum in Orientali, tum in Occidentali ecclesia semper celeberrimum fuisse demonstrat.

(3) Martyrum solemnitates antiquissimas esse, et jam saeculo II. receptas constat. Jam enim ea aetate S. Polycarpj memoria festive colebatur, ejusque festus dies agebatur, uti patet ex Smyrnsensium epistola ad Philomelienses apud Eusebium *Histor. Eccles. lib. 4. c. 15. p. 171. ed. Valesii Cantabrig. 1719.* Memorant etiam has Martyrum solemnitates Tertullianus *de Coron. milit. c. 3. p. 102. edit. Paris. 1675.*, et Cyprianus *Ep. 34. p. 48.*, atque *Epist. 37. pag. 51. ed. Paris. 1720.* mandat clero suo, ut diligenter notetur dies, quo martyres ex hac vita migrant, sibi que significetur ut, inquit, *celebrentur, hic a nobis oblationes, et sacrificia ob commemorationes eorum.* De hac martyrum veneratione loquitur etiam Augustinus *de Civit. Dei lib. 8. cap. 27. opp. tom. 7. num. 1. col. 217. et contr. Faustum Manichaeum lib. 20. cap. 21. col. 1346. tom. 8. edit. Venet. 1733.*, ubi refutat Manichaeorum calumnias, qui non verebantur falso accusare catholicos, quod mortuos adorarent. Quod autem de martyribus dico, idem etiam de Apostolis dictum volo, cum eorum solemnitates ab Ecclesia celebrarentur, potissimum quod pro Christo martyrium pertulissent. In his solemnitatibus legebantur passiones martyrum, quorum dies festus agebatur. Concilium Carthaginense II. *Can. 47. Col. 968. tom. 1. Collect. Harduini*; atque forte ea de causa dictae sunt

legendae quod publice in ecclesia legerentur. Habebantur etiam in eorum laudem orationes, quarum sexcenta sunt exempla apud Chrysostomum, Basilium Nazianzenum, Nysseum, Augustinum, Ambrosium, Leonem, Chrysologum, atque alios. Paulo serius iustitata sunt confessorum solemnitates, atque hinc initio solis martyribus publice dicatae Ecclesiae sunt, et in diurno Pontificum in formula petitionis dedicationis Ecclesiae *cap. 34. 35. 40. 42.* martyris tantum, non confessoris mentio est. In Oriente IV. saeculo Hilarionem celebrasse diem mortis Antonii, scripsit Hieronymus in *Vit. Hilar. cap. 30. opp. tom. 2. col. 31. edit. Veron. cit.*, et Sozomenus *Histor. Ecclesiast. lib. 3. cap. 14. pag. 114. edit. Valesii Cantabrig. 1729.* narrat a Palestina ecclesia celebratam fuisse solemnitatem plurium confessorum, nimirum Hilarionis Gazaei, Aurelii, Authedonii, Alexionis, et aliorum. Primus in Occidente ex confessoribus publico cultu honorari coepit S. Martinus Turonensis, qui obiit ann. 402., atque hunc cultum probavit Concilium Turonense II. *can. 18. col. 360. t. 3.*, et Matisconense I. *Can. 9. col. 402. t. 3. Collect. Harduini*, eique S. Benedictus in Monte Cassino monasterium aedificavit. Contra Jacobus Ladeschius edito a se libro demonstrare conatus est, Ss. Confessorum, ac mulierum cultum a prima usque aetate perpetuum in ecclesia catholica fuisse. Equidem non inficior, ab ipsis ecclesiae primordiis privatum cultum fuisse tributum Sanctis Patriarchis, Prophetis, Confessoribus, Virginibus, ac Viduis, cum catholica Ecclesia id semper ratum fixum habuerit, non solum martyres, sed etiam ceteros, qui servatis Christi praeceptis in ejus dilectione mortui sunt, aeternam gloriam consequi, eosque etiam colendos, et invocandos esse, atque haec a primis usque saeculis Patrum omnium sententia semper fuit. Sed publicus, de quo hic tantum loquimur, cultus citius martyribus, serius autem confessoribus datus ab Ecclesia est. Consule Card. Bellarminum *de Missa lib. 6. cap. 8. p. 429. §. Tertia objectio tom. 3. edit. Venet. 1721.*, Card. Thomasium *Praefat. ad Godices sacramental. Eccles. Rom. num. 5.*, et ipsius Thomasii vindicias Panormi editas an. 1723, praesertim *cap. 4. pag. 52. et seq.*

§. II. Festi dies vel mobiles , vel immobiles sunt. Mobiles dicuntur , qui non eodem die quovis anno celebrantur; immobiles, qui certis semper diebus haerent; atque hi sunt Natalis Domini, Circumcisio , Epiphania, dies festi Beatae Mariae Virginis , et Apostolorum. Dierum festorum mobilium celeberrimus est Paschalis , a quo omnes reliqui mobiles pendent. Pascha antecedit jejunium quadragesimale, ad quod praeparantur animi tribus hebdomadibus, quae proxime antevertunt; et quarum prima *septuagesima* , altera *sexagesima* , postrema *quingagesima* est (1). Pascha sequitur Ascensio Domini post dies quadraginta , post quinquaginta , Pentecostes. Reliqui Dies Dominici usque ad Adventum , et ab Epiphania usque ad Septuagesimam numeris distinguuntur. Ergo in figendo Paschate praecipuus labor.

(1) Plures olim , ac praesertim Monachi sese a carnibus abstinentes ad quadragesimam praeparabant , et vero Graeci hanc abstinentiam inchoabant a die, qui Dominicam Sexagesimae proxime sequebatur ; post Dominicam vero Quingagesimae non solum carnibus , sed ne lacte quidem , atque ovis vescebantur. Itaque a Graecis hebdomada Sexagesimae dicitur *Αποκρεως* hoc est *carnis privium* , quo vocabulo non raro utuntur mediae aetatis Scriptores , ut designent tempus bacchanalium, quoniam tunc Christiani carnibus privabantur. Inde ortum forte est vocabulum *Carnevale* , quia tunc Christiani carni valedicebant : et hinc a tollendis , deserendisque carnibus hoc idem tempus *carnelevamen* , et *carnem lavare* appellatum ostendit Muratorius *Antiq. Italic., disert.* 71. , unde etiam vocabulum *carnevale* effici potuit.

§. III. Est autem celebrandum Pascha die Dominica, quae post aequinoctium vernum proxime sequitur Lunam XIV. Martii , hoc est plenilunium ,

sed non illa ipsa die XIV, quia Christus postridie Paschatis Hebraeorum ex inferis resurrexit. Itaque nostrum Pascha cum Paschate Hebraeorum convenire nunquam potest. Vetus est haec de celebrando Paschate Ecclesiae Romanae regula, quam Nicaenum Concilium probavit contra Arianos, qui festum illum agebant diem ipsa luna XIV, Hebraeorum more (1).

(1) Magnae olim de celebrando Paschate fuerunt controversiae excitatae praesertim ab Asianis, qui antiquam traditionem proponentes ipsa luna XIV. more Judaico, pascha celebrandum esse contendebant. Contra Summi Pontifices nixi traditione, quam a Divo Petro acceperant, hanc solemnitatem differebant ad diem Dominicum, qui post aequinoctium vernum ipsam lunam XIV. proxime sequitur. Romam ea de re venit Polycarpus, ut cum Aniceto Pontifice consilia conferret; sed nihil tunc perfectum est, et Asiae Ecclesiae in sua sententia permanserunt, sicuti narrat Irenaeus in *Epist. ad Victor.* apud Eusebium *Histor. eccles. lib. 5. cap. 24 p. 245. et seq. ed. Valesii Cantabrig. 1720.* Recruduit controversia Victore Pontifice, qui Asianis Episcopis ecclesiasticam communionem interdixit, quod Pascha eodem, quo Judaei tempore celebrare pergebant; denique Nicaeno Concilio probatum, confirmatumque est, quod a Romanis Pontificibus statutum fuerat. Atque hi, qui Pontificiae, ac Nicaenae sententiae de celebrando Paschate pervicacius obsistere ausi sunt, haeretici, et schismatici habiti sunt, et Quartadecimani, Tessaradecatitae, Andiani appellati. Sed quamquam catholicorum Ecclesiae de celebrando Paschate in die Dominico consentirent, non una tamen, eademque erat omnium sententia in hoc Dominico die constituendo. Nam interdum eveniebat, ut ecclesiae quaedam una hebdomada, vel mense citius, quam reliquae festum illum diem agerent; et Ambrosius quidem *Epist. 23. num. 13. et seq. col. 94. tom. 3. edit. Venet. cit. testatur, anno 387 pascha ter separatim temporibus celebratum fuisse; ab aliis XII. Kal. Aprilis; ab aliis XIV. Kal. Majas, ab aliis VII. Kal. Ma-*

jas. Similiter Leo M. *Epist.* 110. t. 2. cap. 1. p. 401. edit. Rom. tradit an. 435. octo dierum intervallum inter Romanorum Pascha, et Pascha Alexandrinorum interces-
sisse. Tanti hujus discriminis ratio erat, quod non omnes uno, eodemque cyclo uterentur. Priscos Christianos Hierosolymitanos adhibuisse constat cyclum Judaicum 84. annorum quo Judaei aliquando ante ad constituendam anniversariam paschatis sui celebritatem usi fuerant. Cyclum hunc per ducentos fere annos Christiani adhibue-
rant, quamquam Pascha suum die dominico, non quarte-
decima luna cum Hebraeis observarent, uti adversus Josephum Scaligerum de *Emend. tempor. lib.* 2. ostendunt Guillelmus Beveregius in. can. 7. *Apostol.*, et Jacobus Usserius *Prolegom. ad Ignat.*, cap. 9., uterque apud Cotelerium *PP. Apostol. tom.* 1. p. 464., et t. 2. pag. 218. edit. Amstelæd. 1724. Post Judaicum statum omnino ab Hadriano sublatum Christiani alios cyclos adhibere coeperunt, cum novissent Judaici errores, qui interdum Pascha equinoctio verno anteferebant, adeo ut illud aliquando bis in uno anno fieret. Hypolytus Portuensis in Arabia Episcopus circa annum 220. cyclum composuit annorum sexdecim, alium annorum octo non multo post dedit Dionysius Alexandrinus Episcopus, et alium undeviginti annorum Anatolius similiter Alexandrinus an. 270., quae omnia narrat Eusebius *Mist. Eccles. lib.* 6. cap. 22. et lib. 7. cap. 20. et 32. p. 286. 344 et 369. ed. Cantabrig. 1720. Sed cum res adhuc incerta maneret, Synodus Nicaena, quae die tantum dominico pascha celebrandum esse decreverat, omnem hanc curam Alexandrinis Episcopis commisit, ut reliquos Episcopos quoque anno certiores facerent de die dominico, quo pascha celebrare oporteret, sicuti testatur S. Leo M. *Ep.* 96. ad *Marcian. opp. t.* 2. p. 453. ed. Rom. 1755. Verum hoc Nicaenum decretum vel non ubique obtinuit, vel progressu temporis antiquari coepit; nam Cyrillus Alexandrinus *Ep. Paschal.* apud Bucherum de *Doctrin. tempor. p.* 481. seq. ed. Antuerp. 1634. de gravi queritur confusione, quae de tempore celebrandi paschatis ubique dominabatur, cum Romanorum, et Alexandrinorum rationes una quandoque hebdomade, vel mense inter se discrepant. Romana

enim Ecclesia adhuc vetusto cyclo judaico annorum 84. non autem novo Alexandrino annorum 19. utebatur. Denique rem perfecit Dionysius Exiguus anno 525. qui in Romanam Ecclesiam induxit canonem Alexandrinum, atque ita omnes inter Romanos, et Alexandrinos ea de re controversiae sublatae sunt. Sed adhuc magna erat confusio ob discrimen, quod est inter annum astronomicum, et civilem, quo utimur, neque recte novilunia constabant; ideo Gregorius XIII. fastos emendandos curavit, et nunc post Gregorianam emendationem ex fastis perpetuis, et Kalendaris quae singulis annis evulgantur, facile deprehendimus ordinem anni cum civilis, tum ecclesiastici. Nostro hoc saeculo hujusmodi argumentum, quod pertinet ad Gregoriani Kalendarii emendationem, atque ad tempus celebrandi Paschatis, late pertractavit Jacobus Bettazius Pratensis, qui an. 1732. Florentiae librum edidit, cui titulus: *Epitome operis Paschalis proferens necessitatem emendandi correctionem Gregor. ; deinde opportunam ejusdem Gregor. emendationem sine Kalendarii, et martyrologii variatione: atque exhibens dissertationes IV., et appendices II. ad materiam de cyclo Paschalis constitutione emendandam.* Cujus operis deinde ipse Bettazius defensionem edidit.

§. IV. Ex festis diebus quidam sunt omnibus per totum orbem christianum, et omni tempore sacri ut cuncti dies Dominici, Pascha, Pentecostes, ceterae majores solemnitates; et quidam sunt non ubique, sed a certis tantum civitatibus, aut provinciis, aut nationibus observati. Ita unaquaeque fere civitas suum habet patronum, cujus festum diem agit cum venia Sedis Apostolicae (1); atque in provinciis quibusdam certi sunt festi dies antiquissima majorum traditione constituti. Rursus quidam sunt festi dies, in quibus ubique Christiani et Missae sacrificio interesse debent, et ab omnibus se abstinere operibus, quae servilia vocantur; et quidem sunt minus solemnes, in quibus alicubi Christianis postea-

quam divino sacrificio fuere praesentes, integrum est suis rebus vacare, ac pauperibus licet victum sibi ex suis laboribus comparare.

(1) De eligendo Sancto Patrono alicujus civitatis aut provinciae, cujus ab universo populo festus agatur dies, habes apud Lucium Ferraris in *Biblioth. verb. Festanum*. 4. decretum Sac. Congregationis Rituum, quod jussu Urbani VIII. editum est die 23 Martii an. 1630. Ejus autem decreti summa est, ut ii tantum eligantur Patroni, qui Sanctorum albo adscripti sunt, non item qui tantum Beati vocantur, ut haec electio fiat per secreta suffragia ab universo populo, cum Episcopi, et Cleri consensu, ut hujus electionis causae Sac. Rituum Congregationi aperiantur, ab eaque noscantur, et approbentur.

§. V. Dies festos, quos de praecepto omnes in toto orbe Christiani observare debeant, constituit Summus Pontifex, cujus est auctoritas, et potestas in Ecclesiam universam (1). Idemque deminuit numerum minorum festorum (2); quod non multis abhinc annis factum est a Benedicto XIV., qui rogantibus Episcopis, et conquerentibus, quod propter festorum multitudinem, vetitosque labores pauperibus eriperetur occasio sibi paranti victum, et universa pene festa minus religiose observarentur, diebus festis minus solemnibus, integro praecepto audiendi missam, laborandi facultatem attribuit (3).

(1) Consule Urbanum VIII. *Const. Universa* 270. *Bullar. t. 6. p. 341.* Episcopus in sua dioecesi dies festos praecipere posse quidam negant. Sed mihi e Synodo Tridentina *Sess. 25. cap. 12. de Regular.* haec facultas Episcopo perspicue concedi videtur; et Urbanus VIII. in laudata Constitutione *Universa*, §. 3. monet quidem Episcopos, ut se a novis festis praeciipiendis abstineant,

ne nimia eorum copia mali aliquid pariat, non tamen ipsis adimit hanc facultatem. Consule Gonzalezium in *cap. ult. num. 17. de feriis*, et Ferrarium *Biblioth. verb. Festa in nov. addit. n. 2.* Sunt autem etiam a Regularibus, ceterisque exemptis servandi dies festi, quos Episcopus in sua dioecesi servari jussit. Concilium Tridentinum *loc. cit.* Vide Giraldum *Expos. Jur. Pontif. par. 2. sect. 166, p. 1042.*

(2) Extant inter epistolas selectas Cardinalis Bonae duae ipsius literae, nimirum 258. et 259, datae ad Joan. Baptistam Thiersium auctorem operis *de Dierum festorum imminutione*, atque in postrema ipse reprehendit Thiersium, qui putaverat, Episcopum posse in sua dioecesi tollere dies festos in universa Ecclesia receptos, atque id tantum a Summo Pontifice fieri posse animadvertit. Confer ea de re peculiarem dissertationem editam a Benedicto XIV. quae descripta est in ejus opere *de Canonizatione Sanctorum libr. 4. part. 2. capit. 16.*

(3) Adeundus est Benedictus XIV. *Const. Non nulli 63. ejus Bullar. tom. 21 p. 303. ed. cit.*

§. VI. Sed reliquos dies festos integros Deo et Religioni tribuere oportet, eaque est, quae dicitur, festorum sanctificatio, quae in eo est posita; ut non tantum sacrosancto Missae sacrificio praesentes simus, sed etiam diem in divinis laudibus, in precibus, in ceteris religionis officiis transigamus (1). Justum enim est, ac rationi consentaneum, quod vacui reliquis curis, atque negotiis certos quosdam dies habeamus, quos totos divino cultui tribuamus; Deumque immortalem, a quo summa, et innumerabilia beneficia accepimus, cognoscamus, colamus, ac veneremur. Si enim jussisset, nos quotidie religionis cultum sibi tribuere, nonne pro innumeris, quibus ab eo cumulati sumus, beneficiis; omni ope et opera eniti nos oporteret, ut ei prompto, alacrique animo pareremus? Nunc vero paucis ad ejus cultum

institutis diebus, non socordes, et negligentes nos esse oportet in hoc officio persolvendo, quod sine gravissima culpa praetermittere non possumus (2).

(1) Catechismus Romanus par. 3. praec. 3. cap. 4. §. 25.

(2) Catechismus Romanus loc. cit. §. 26.

§. VII. Itaque his diebus, qui toti Deo, ac Religioni addicti sunt, Christianis abstinendum est ab omnibus, quae animum a Deo abstrahunt, quaeque impedimento sunt, quominus ipsi ad Ecclesias conveniant, rebusque religionis animum adjungant. Hinc vetita sunt opera servilia, quae olim apud Romanos praesertim a servis gerebantur; et ideo servilia dicuntur (1). Similiter nefas est agere mercatus rerum venalium, quamquam nundinae longo usu receptae cum certis legibus tolerentur (2), et nefas judicialia acta exercere, quae si gesta fuerint die festo, irrita sunt (3). Urgente vero necessitate, veluti si fruges ingenti periculo subsint, aut praeclara sit occasio piscandi, quae alio die haberi non possit, Episcopus metendi, et piscandi tribuit facultatem (4).

(1) Opera servilia, quae diebus festis expedire nefas est, numerat Lucius Ferraris *Biblioth. Canon. verb. Festa n. 12. et seq.* Vide etiam Benedictum XIV. *Instit. Eccl. Instit. 43. et. 65.*

(2) Consule Benedictum XIV. *Const. Ab eo tempore 144. ejus Bullar. tom. 1. p. 355. ed. Venet. seu Romae cit.*

(3) *Leg. 2. et 3. cod. de Feriis, cap. 1. et cap. 6. de Feriis.*

(4) *Cap. 3. de Feriis.* Catechismus Romanus par. 3. praec. 3. cap. 4. §. 23. Vide etiam Benedictum XIV.

cit. Constit. 144. §. 26. et 27., et cit. Inst. 65. Edicto S. Caroli Borromaei spectacula etiam, ac publici ludi interdiciuntur, de quo edicto vide ipsum Benedictum XIV. de Synod. lib. 11. cap. 1. num. 7.

TITULUS VI.

DE JEJUNIIS:

- | | |
|---|--|
| I. Quid jejunium, et abstinencia? | V. Vigiliae. |
| II. Jejunium Quadragesimae, Quatuor Temporum, Vigiliarum. | VI. Abstinencia a carnibus, lacte, ovis. |
| III. Jejunium quartae, ac sextae seriae, et Sabbati. | VII. Et unica comestio in diebus jejunii. |
| IV. Jejuniorum finis. | VIII. Jejunium a quibus, et quomodo observandum sit. |

§. I.

Ut celebratio dierum festorum, ita jejuniorum observatio pertinet ad religiosa officia Christianorum, qui per ea corpus castigant, atque in officio continent. Jejunium proprie sic dictum distinguitur ab abstinencia, quae jejunii pars est. Nam abstinencia propria est eorum, qui carnes non comedunt, sed quavis die parce cibum sumere possunt; jejunare autem dicuntur ii, qui non modo abinent se a carnibus, atque a delicato convivio, sed etiam cibum ad certam, statamque horam differunt, atque non nisi semel in die sumunt. Hoc porro est Jejunium, quod ecclesiasticum dicitur, quod cum naturali confundi

nōn debet. Nam hoc nihil cibi, potusque permittit, adeout tantum observetur ab iis, qui plane jejuni sunt, hoc est nihil cibi; aut potus in stomachum immiserunt, quale est jejunium eorum, qui Eucharistiam accipiunt. Verum jejunium ecclesiasticum⁽¹⁾ potum, cibumque permittit, modo statō tempore, et vero talis capiatur, qualis tunc capi potest.

(1). Jejunium ab Ecclesiasticis Scriptoribus etiam statio appellatur. Hermas in *Pastor. lib. 3. simil. 5. n. 1.* apud Cotelierium *PP. Apostol. tom. 1. p. 103. edit. Auctuerp. 1698: Responddi, quoniam, Domine, stationem habeo. Quid est, inquit, statio? Et dixi jejunium: Et dixit, quid est illud jejunium? Sicut solebam, inquam, sic jejuno. Eodem sensu stationis vocabulum accipiant Tertullianus de *Coron. cap. 11. p. 106. de Anima c. 48. p. 300, de Jejun. cap. 10. p. 550. ed. Venet. 1744.*, Cassianus de *Coenob. instit. lib. 5. cap. 20. et 24. p. 125. et 129.*, et collat. 21. cap. 29. 804. ed. Aurobat. 1628, Isidorus *Orig. lib. 6. cap. ult. p. 83. ed. Paris. 1601.* Alii stationem a jejuniō distinguunt. Nam Rabanus lib. 2. de *Instit. Cleric. cap. 18. p. 17. tom. 6. edit. Colou. Agrip. 1626.* Jejunium, inquit, est indifferenter cujuslibet diei abstinētia, non secundum legem, sed secundum propriam voluntatem. Statio autem est observatio statutorum dierum ut quartae, et sextae feriae jejunium ex vetere lege praeceptum; temporum autem, ut jejunium quarti, quinti, septimi, et decimi mensis, et observatio Quadragesimae, quae in universo orbe institutione Apostolica observatur. Cur autem statio dictum sit jejunium explicat Auctor *Serm. 21.*, qui extat in *Append. opp. S. Ambrosii tom. 4. col. 517. ed. Maurin. Venet. 1751.* Castra enim nobis sunt nostra jejunia, quae nos a diabolica oppugnatione defendunt. Denique stationes vocantur quod stantes, et commorantes in eis inimicorum insidias repellamus. Verum Cotelierius in *Hermam loc. cit. not. 56.* inter jejunium, et stationem hoc tantum discrimen fuisse contendit, quod*

interdum statio pro jejunio quartae, et sextae feriae acciperetur; de cetero unum, et idem utrumque fuisse putat. Similiter observat, quod sicut diebus jejunii conventus, sive stationes Christianorum in Ecclesia longiores erant, quam Dominicis, festisque diebus, hinc forte factum est, ut jejunium stationis nomine vocaretur.

§. II. Religiosa jejunia apud Christianos (1), alia generali Ecclesiae lege sunt constituta, atque omnes obstringunt, statoque tempore quotannis redeunt, ut jejunium quadragesimae, quatuor temporum, vigiliarum; et alia certos tantum homines attingunt, qualia sunt jejunia, quae poenitentibus imponuntur, quae suscipiuntur ex voto, quae ab Episcopo in dioecesi, propter sollicitudinem, curamque ecclesiasticam indicuntur (2). Inter stata, et solemniora jejunia maxime sacrum est jejunium ante Pascha, quod Quadragesima appellatur, et quod licet a Christo praeceptum affirmari non possit (3), tamen ab Apostolica traditione repetendum est (4). Hoc jejunium nunc complectitur dies quadraginta, atque ejus initium fit a die cinerum (5); olim constabat sex hebdomadibus, hoc est diebus triginta sex (6); nam die dominico Christiani de veteri more in memoriam dominicae resurrectionis non jejunabant.

(1) Calviniani, atque in primis Joannes Dallaeus *lib. de Jejun. et Quadrages.*, contendunt de veteri ecclesiae more Christianos pro arbitrio suo, non autem ex necessitate jejunia observasse. Hinc ajunt, jejuniorum disciplinam, quae a Catholica ecclesia constituta est, non abesse a sententia Montanistarum, quoniam ut his erant, ita catholicae Ecclesiae sunt stata jejunia, quae ex necessitate observari debeant. Sed putidae hae calumniae sunt, quas satis refutarunt catholici, quos inter videndus est Natalis Alexander *Histor. Rocles. saec. 2. dis-*

ser. 4. tom. 3. p. 304. seq. ed. Venet. 1776. Sane veteris ecclesiae jejunia non ex hominum voluntate, et arbitrio, sed ex legis necessitate Christiani observarunt; et Montanistarum jejunia Ecclesia rejecit, atque damnavit, quod ea illi ducerent ex figmento novarum revelationum, quas se a Paracleto Montanus accepisse jactabat. Egregie etiam de catholicorum jejuniis contra haereticos doctissimi Cardinales Baronius, Bellarminus, Cozza, Gottus disputarunt.

(2) Vide Benedictum XIV. *de Synod. dioec. lib. 13. cap. 4. n. 6.*; ubi etiam quaeritur, num exempti observare debeant jejunium, quod ab Episcopo pro tota dioecesi indictum est.

(3) Consule Ludovicum Thomassinum in *tract. de Jejun. part. 1. capit. 4.* S. Hieronymus in *Isaiam lib. 26. tom. 4. cap. 58. col. 688.*, et in *Ionam cap. 3. opp. t. 6, col. 416 ed. Vallar. Veronae 1736.* quadragesimae jejunium repetere videtur ex jejunio, quod per dies quadraginta Moyses, Elias, et Christus Dominus observarunt. Verum id ita intelligendum est, non quod Christus de quadragesimali jejunio disertum, atque expressum mandatum dederit, sed tantum quod proposuerit exemplum, cui insistens Ecclesia quadragesimae jejunium instituit, uti monet Augustinus *Ep. 55. ad Januar. cap. 15. opp. tom. 2. col. 139. ed. Venet. 1729.* Atque ita etiam intelligendi sunt Basilius, Theophilus, Cyrillus Alexandrinus, Petrus Chrysologus, ceteri Patres, qui hoc jejunium ad divinam institutionem referunt. Vide Bertium *Histor. Eccles. tom. 1. dissertation. 6. num. 31.*

(4) S. Augustinus *de Baptismo Contr. Donatist. lib. 4. cap. 24. opp. tom. 9. col. 140. ed. cit., S. Hieronymus Epist. 41. ad Marcellam opp. tom. 1. num. 3. col. 187. ed. cit., S. Leo. M. Serm. 43. de Quadrages. cap. 2. opp. t. 1. p. 117. ed. Rom. 1753* Apostolos observasse constat jejunium antepaschale, quod numero dierum a quadragesimali differt, quoniam complectebatur tres illos dies, qui inter Christi mortem, atque ejus resurrectionem intercesserunt. Antepaschale hoc jejunium ipsa fortasse aetate Apostolorum amplificatam deinceps est, atque ita quadragesima instituta; et certe cum haec institutio retenta semper in universa Ecclesia fuerit, atque

ejus origo ignoretur, nonnisi Apostolica auctoritate tradita haberi debet, quae celebris est Augustini regula. Consule Natalem Alexandrum *cit. Dissert. 4. art. 3. p. 313.*, et Selvagium *Antiq. Christian. lib. 2. par. 2. cap. 7. §. 4. et 5.* Porro quadragesimam tamquam ubique observatam, ac jampridem memorant Origenes *Hom. 10. in Levit. opp. tom. 2. p. 246. ed. Maurin. Paris. 1733*, Concilium Nicaenum *Can. 5. col. 326. tom. 1 Collect. Harduini*, Athanasius *in Apolog. ad Constant. opp. tom. 1. p. 241. n. 15. ed. Patav. 1777.*, Cyrillus Hierosolymitanus *Catech. 3. de Bapt. p. 4.*, et in *Notis ed. Paris. 1720.* Basilius *Hom. 2. de Jejun. opp. t. 2. ed. Paris. 1722.* Gregorius Nazianzenus *Orat. 40. in baptism. tom. 1. p. 659. ed. Colon. 1690.* Epiphanius *in Exposit. fid. tom. 1. cap. 21. pag. 1105. ed. Paris. 1622.* Leo M. *Serm. 1. et seq. de Quadragesim. opp. tom. 1. col. 143. et seq. ed. Ballerin. Venet. 1753.* alique Patres. Illud non omittam, et alias olim fuisse Quadragesimas, ideoque illam, quae statim Pascha sequitur, majorem appellatam fuisse, ut a reliquis distingueretur. Confer Cl. Card. Garampiam *Memorie della B. Chiara di Rimini dissert. 6. §. 6. et seq. p. 202. seq.*

(5) Quis diem cinerum, et tres dies alios initio quadragesimalis jejunii primus addiderit, ut numerus conficeretur quadraginta dierum, incertum est. Alii id a Gregorio M., alii a Gregorio II. factum putant.

(6) Quaedam Ecclesiae sex hebdomadibus, et quaedam septem jejunium observabant, uti constat ex Gasiano *Coll. 21. tom. 24. et seq. p. 568. et seq. ed. cit.* Sed nulla tamen earum quadraginta dierum numerus explebat, cum illae dies Dominicos, hae vero etiam sabbata exciperent, et ideo tantum ex diebus triginta sex jejunium constaret. Chrysostomus *Hom. 11. in Genes. c. 1. opp. tom. 4. p. 84. ed. cit. Paris.*; et Ambrosius *de Elia c. 10. num. 34. tom. 1. col. 655. ed. Maurin. Ven. 1748.* Atque ita quidem quadragesimam usque ad aetatem Gregorii M. observatam fuisse constat sex ejus *Hom. 16. in Evangel. opp. t. 1. lib. 1. num. 5. col. 149. ed. cit.*

§. III. Stati jejuniorum dies erat etiam quarta, et sexta feria in qualibet hebdomade, quae je-

junia jam inde a primis saeculis recepta sunt, quod quarta feria Judaei ad occidendum Christum consilium inierint, feria sexta interfecerint (1). Jejunia haec, quae singulis hebdomadibus, exceptis quinquaginta diebus a Paschate ad Pentecosten observabantur, non ad vespervas, uti quadragesimalia, producebantur, sed hora nona finiebantur (2). Latini ab antiquissima aetate etiam jejunium Sabbati habuerunt, quod semper una cum jejunio sextae feriae retinuerunt; jejunium quartae feriae labentibus annis paulatim desiit (3). Nunc feriae sextae, et Sabbati jejunium tantum a carnibus abstinencia est.

(1) Clemens Alexandrinus *Strom. lib. 7. cap. 12. p. 877. ed. Venet. 1757.*, Epiphanius *Haeres. 56. sive 76. num. 3. et 6. lib. 3. cap. 1. p. 908 et 910. Coloniae 1682.*, Augustinus *Epist. 86. seu 36. ad Casulanum opp. tom. 1. cap. 13. num. 30. col. 80. ed. Venet. 1729.*, Petrus Alexand. *Canon. 15. col. 23.*, apud Bevereg. *ed. Oxonii 1672*, Auctor *Const. Apost. lib. 5. cap. 15.*, apud Cotelerium *PP. Apostolic. t. 1. p. 322. ed. Amstelaed. 1724.*

(2) Aetate Ratherii Veronensis, qui ante medium saeculum X. vitae usura fruebatur, mitigari coeperat antiqua disciplina, et jejunium quadragesimale non amplius ad vespervas, sed tantum ad nonam producebatur, uti ostendit ipse Ratherius *Orat. Synodic. ad Presbyt. n. 15. col. 420. ed. Veron. 1765.* Sed etiam post eam aetatem vetustam disciplinam alicubi stetisse, monent Fratres Ballerinii *ibid. not. 48.*

(3) Orientales unum Sabbatum post Parasceven jejunio consecrabant, ceteris vero totius anni Sabbatis non solum non jejunabant, sed eodem fere solemniori ritu, quo diebus dominicis, sacros conventus, et synaxes celebrabant, uti testantur Athanasius *Hom. de Semente tom. 3. num. 1. p. 45. ed. Patav. 1777.*, Socrates *Histor. Eccles. lib. 5. cap. 22. et lib. 6. cap. 5. p. 295. et 313. ed. Valesii Cantabrig. 1720.*, Cassianus *Instit. t. 3. cap. 2. p. 30. ed. cit.* Quinimo die Sabbati vetitum ipsis erat jej

nium, uti patet *can. 56. Apostol. apud Cotelierium loc. cit. p. 450.*, et Auctore *Const. loc. cit.*, quod a Catholicis Orientalibus factum est, ne assentire viderentur errori Marcionis, qui Sabbati jejunium suae fecerat haereseos partem, uti demonstrat Epiphanius *Haeres. 22. vel 42. lib. 1. tom. 1. cap. 3. p. 304. ed. cit.* Quae disciplina magis magisque apud Orientales firmata est, cum haereses eruperunt Marcionistarum, Lampetianorum, Choreutarum, Adelpheianorum, qui superstitiosa, et vana observatione Sabbato jejunabant. Orientalium consuetudinem nunquam damnavit Ecclesia Romana, imo a Benedicto XIV. *Constit. Et si pastoralis 57. §. 9. num. 8. et seq. Bullar. tom. 1. p. 110. cit. edit.* tolerandus edicitur apud Graecos esus carniū die Sabbati, si sine scandalo fieri potest: in locis autem ipsorum, et inter eos tantum Gabriel Alvaspinaeus *Observ. lib. 1. cap. 13. p. 30. ed. Neap. 1770.* putat, olim etiam in Ecclesia Romana die Sabbati carnes edi consuevisse. Verum saeculo IV. jam Sabbatum inter esuriales dies recensebatur, uti ostendunt Hieronymus *Epist. 71. ad Lucinium Boet. num. 5. col. 432. tom. 1. ed. Veron. 1734.*, Augustinus *Ep. 36. ad Casulan. c. 13. not. 31.*, et *Ep. 82. ad Hieronym. cap. 2. num. 14. opp. tom. 2. pag. 108. et 259. ed. Maurin. Venet. 1759.* Vide etiam Concilium Eliberitanum *Can. 76. tom. 1. Conc. Labbaei col. 995. ed. Venet.* Neque vero hoc Sabbati jejunium, ut quidam putant, primum institutum est ab Innocentio I. *Epist. ad Decent. Eugubin. cap. 4. num. 7.*, apud Constantium *col. 859*: nam Innocentius non novi aliquid constituit, sed confirmavit, quod jam constitutum, receptumque erat. Vide Bertinum *Histor. Eccles. tom. 2. Dissert. 1. num. 5.* Extat etiam de jejunio Sabbati dissertatio Paschasii Quesnelli, quae est *Diss. 6. in opp. S. Leonis tom. 2. col. 1069. ed. Ballerin. Venet. 1756.* in Africa aetate Augustini, ut ipse testatur *cit. Ep. ad Casulanum. n. 32. c. 108.*, quaedam Ecclesiae erant, quae Sabbato jejunabant, quaedam, quae non jejunabant; item in Ecclesia Mediolanensi Sabbati jejunium non observabatur, uti narrat ipse Augustinus *loc. cit.*, et Ambrosius *de Elia et jejun. cap. 10. num. 34. opp. tom. 1. col. 656. ed. Venet. 1748.*, similiter in Hispaniis Ro-

manae Ecclesiae consuetudinem non obtinuisse, constat ex Concilio Coyacensi *cap. 11. tom. 7. part. 1. Collect. Harduini col. 1028.* Labentibus annis jejunium Sabbati fere ubique antiquari coepit, et ideo S. Gregorius VII. in Concilio Romano *Can. 31. dist. 1. de Consecrat.* non ausus antiquam disciplinam integram restituere, satius putavit Fideles commonere, ut ea die sese ob esu carniū abstineant. Innocentius III. in *c. 2 de Observant. jejun.* cum a Bracharensi Episcopo de Sabbati jejunio interrogatus fuisset, respondit, *quod super hoc consuetudinem tuae regionis facias observari.* Hinc communis Doctorum opinio est, licere die Sabbati carnes comedere, ubi earum esus a recepta consuetudine non est interdictus. Consule Glossam in *cit. Can. 31., S. Antoninum in Summ. Theolog. par. 1. tit. 16. cap. unic., Fagnanum in cit. cap. 2. num. 19. et seq. de Observant. jejun., Pirhingium Jus Eccles. tit. 46. lib. 3. num. 2.*

§. IV. Quatuor temporum jejunia initio Quadragesimae, post Pentecosten, ac mensibus Septembri, et Decembri, quarta, ac sexta feria, et Sabbato quotannis celebrantur (1). Exemplo Judaeorum, qui quater in anno jejunabant, quatuor temporum jejunia recepit Ecclesia, quae jam saeculo V. obtinebant (2); quamquam non Judaico ritu, sed Christiano animo observarentur (3). Quibus jejuniis id sibi vult Ecclesia, ut pro acceptis beneficiis Deo gratias agamus, ut divinam opem exoremus, atque his poenitentiae operibus nostra crimina expientur, ut denique bonos altaris ministros divinitus impetremus. Nam his temporibus, uti superiori libro demonstratum est, solemnes clericorum ordinationes peraguntur.

(1) Trium temporum jejunia ab Apostolis instituta fuisse, Callistum autem Summum Pontificem addidisse jejunium Decembris, scriptum est in *Epist. 1. ipsius Callisti*; verum haec epistola Isidori Mercatoris figmentum est. Ab Apostolica traditione initium sumere hoc

jejunium tradunt Baronius *ad an.* 57. *num.* 209. *tom.* 1. *pag.* 488. *ed. Lucae*, et Thomassinus *de Jejun. par.* 1. *cap.* 21. *num.* 7. Cum deinde aliqua ex parte vetus disciplina immutata esset, et nonnullae Ecclesiae venum jejunium mense Martio, aestivum vero in hebdomade, quae post festum Pentecostes sequitur, quodam more celebrarent, S. Gregorius VII. Quadragesimae initio primum jejunium fieri, alterum in hebdomade Pentecostes perpetua lege constituit. Quod memorat Micrologus scriptor Gregorio suppar, *de Eccles. observ. cap.* 24. *et* 25. *col.* 746., *et seq. in Biblioth. PP. tom.* 10. *ed. Paris.* et huc spectat Concilium Claromontanum habitum Urbano II. Pontifice *can.* 25. *apud Labbacum tom.* 12. *col.* 832. *ed. Venet.* Confer Odericum Vitalem *de Histor. eccles. lib.* 9. et Muratorium *in Anecd. lib.* 2. *diss. de Jejun. quatuor temporum.* Praesertim autem videndus est Thomas Valfridus, qui anno 1671. Bononiae dissertationem edidit *de Usu et Institutione jejuniorum temporum.*

(2) Consule S. Leonem M. *de Decim. mens. jejun. Serm.* 6. *cap.* 1. *pag.* 32, *et Serm.* 8. *capit.* 2. *pag.* 38. *de Jejun. Penecost.*, *Serm.* 2. *cap.* 2. *pag.* 231., *et Serm.* 4. *capit.* 4. *pag.* 233. *de Jejun. mens. septim.*, *Serm.* 4. *et* 9 *opp. tom.* 1. *p.* 256. *et* 270. *ed. Rom.* 1753.

(3) S. Leo M. *cit. Serm.* 4. *de Jejun. sept. mens. cap.* 1. *p.* 256. *tom.* 1. *ed. cit.*

§. V. Sed et in vigiliis Natalis Domini, Pentecostis, Assumptionis B. Virginis, multorumque Sanctorum per annum jejunia observantur. Vigiliae erant nocturni coetus, quos Christiani in Ecclesia habebant ante praecipuum aliquem festum diem, ut divina officia persolverent. Hae differebant a communi nocturno, seu matutino officio, quod hoc nonnisi post mediam noctem circa gallicinium incipiebat, vigiliae autem longiores erant, quod coetum in Ecclesia per maximam noctis partem detinebant, unde et *Pernoctationes*, et *Pervigiliae* dicebantur (1). Nunc

cum non amplius fideles noctu ad Ecclesiam conveniant, vigiliae illae cum jejunio agendaе sunt.

(1) Videndi sunt in primis S. Joannes Chrysostomus *Homil.* 1. tom. 6. p. 95, et *Homil.* 4. p. 121., *Homil.* 30. in *Genesim* tom. 4. num. 6, p. 303., *Homil. de Terraemotu* tom. 2. p. 718, ed. Paris. cit. S. Augustinus *Confess. lib.* 9. cap. 7. num. 1. opp. col. 162. ed. Venet. 1739. Socrates *lib.* 1. cap. 37. p. 73., et Sozomenus *lib.* 2. c. 6. et 29. p. 53. et 86., atque ed. Valesii *Cambrig.* 1720., Sidonius Apollinaris l. 5. Ep. 17. p. 148. ed. Paris. 1652.

§. VI. Jamvero duabus veluti partibus jejunium constat, abstinencia a carnibus, ovis, lacte, aliisque cibis delicatioribus, et unica in die comestione. Nam institutum est, ut agamus poenitentiam, et corpus affligamus. Et abstinencia quidem a carnibus, cibisque delicatioribus semper ecclesiastici jejunii pars fuit, atque etiam antiquis canonibus constituta (1). Cibi quoque delicatiores, vinique potus erant interdicti (2), ac multi addictos jejunio dies fructibus, herbis, leguminibus transigebant; multi quoque ad duos, tresve, aut quatuor dies jejunium producebant, neque deerant, qui tota hebdomade prorsus jejunii vitam agerent (3). Quin ab ipso aquae potu, nisi legitimus advenisset solvendi jejunii tempus, sese Majores nostri abstinebant (4).

(1) Praeclarum quadragesimalis abstinentiae monumentum est apud S. Gregorium Turonensem *lib.* 5. c. 4. p. 205. ed. Paris. 1609., qui miratur, quod Rucalenus, licet aegrotus, et miles, quadragesimae tempore carnes comederet. Eamdem hanc abstinentiam laudat S. Epiphanius *Exposit. fid. cap.* 23. tom. 1. pag. 2106. edit. Paris. 1622. In Capitulatione de partibus

Saxoniae *cap. 4.* apud Balutium *Capitular. Reg. Francor. tom. 1. col. 181. edit. Venet. 1772.*, statutum est, ut si quis sanctum quadagesimale jejunium pro despectu Christianitatis contempserit, et carnes comederit, morte moriatur. Et Carolus M. *Epist. ad Offum Regem Merciorum* apud eundem Balutium *loc. cit. col. 108.*, graviter reprehendit Scotum quemdam Presbyterum, quod carnem diebus quadagesimalibus comedisset. Confer Natalem Alexandrum *cit. Dissert. 4. art. 2. pag. 305. et seq.*, qui late contra Dallaeum, ceterosque haereticos ostendit, abstinentiam a carnibus semper ecclesiastici jejunii partem fuisse, atque etiam apud veteres Christianos Ecclesiae lege praeceptam. Vide etiam Bossuetum *Histoire des Variations lib. 7. num. 92.* Quaeritur autem num haec abstinentia ad antiquam consuetudinem, an potius ad jus positivum referenda videatur; qua de re vide Benedictum XIV. *Instit. eccles. Instit. 16. n. 3.*

(2) Basilias *Hom. 1. de Jejun. tom. 2. p. 9. num. 10. ed. cit. Cyrillus Hierosolymitanus Catech. 4. ad Illuminat. p. 65. cap. 27. ed. Paris.* Vide etiam quae de Valentiniano Jun. narrat S. Ambrosius in ejus *Orat. col. 254. num. 16. tom. 4. ed. Venet. 1751.*, de Justiniano Procopius de *Aedific. Justinian. lib. 1. c. 7. p. 19. t. 2. ed. Paris. 1766.*

(3) Confer Augustinum de *Morib. eccles. catholic. c. 33. num. 70. col. 712. t. 1. ed. cit.*, et Auctorem *Constit. Apostolic. lib. 5. cap. 18.*, ibique Cotelierum *Not. 18. p. 235.*, qui multis allatis monumentis ostendit, quousque jejunii austeritas apud majores nostros progrediretur. Intendebatur autem jejunium potissimum in majori hebdomade, quo temporis intervallo veteres Christiani sub vesperam utebantur *Ζηροφαγία*, hoc est arido victu, qui constabat aut pane, et sale cum aqua, ubi tradit Epiphanius *Exposit. fidei num. 22. t. 1. pag. 1103 ed. Petavii Paris. 1622.*, aut pane, aqua, sale, et oleribus, uti eum describit Auctor *Constit. Apostolic. loc. cit.* Aridum hunc victum per totam Quadagesimam adhiberi jubet Concilium Laodicenum *Can. 50. tom. 1. Concil. Labbæi col. 1539. ed. Venet.* Sed Laodicensi Concilio recentior Epiphanius *loc. cit.* legem hanc xerophagiorum tantum in majori hebdomade ab Eccle-

sia universa observatam fuisse testatur. Ipse enim triplicem jejunii formam distinguit, alteram illius Quadragesimae partis, quae septem dies Paschatis, seu majorem hebdomadam praecedit; haec mitior erat, quoniam xerophagiis minime adstricta; alteram, majoris hebdomadae, quae illa severior erat; ac xerophagiorum lege tenebantur; postremam utraque asperiores, quoniam hujus hebdomadae pars, imo et tota sine cibo traducebatur. Prima, et altera universae Ecclesiae, cunctisque populis in more erat, et ideo vim legis habuit; postrema vero iis tantum, qui plus pietate fervebant, merumque consilium, non praeceptum fuit. Hinc ipse Epiphanius majorem hebdomadam τῆς Ὑποφωγίας εβδομάδα appellat. Epiphanius antiquiores Irenaeus *Epist. ad Victor. P. opp. tom. 1. pag. 340. edit. Venet. 1734.*, et Dionysius Alexandrinus *Epist. ad Basil. apud Labbaeum t. 1. Concil. col. 855. edit. Venet.* ostendunt plures etiam ea aetate fuisse de forma, ac ratione antepaschalis jejunii controversias. Consule Massuetum in Irenaeum *Diss. 2. art. 1. num. 32. et seq. pag. 74. et seq. opp. Irèn. tom. 2. edit. cit.* Ceterum qui plures continuos dies jejunium agebant, dicebantur jejunium superponere, et conjungere, uti habent Epiphanius *loc. cit.*, Tertullianus *de Patient. cap. 13. pag. 247. edit. Paris. 1675.* Hieronymus *Epist. 24. ad Marcellam num. 4. col. 128. opp. tom. 1., edit. Veronae 1734.*, de qua quidem superpositione jejunii videndus est Du-Cangius *verb. Superpositio.* Confer etiam Tertullianum *de Jejun. cap. 14. p. 552.*, et Sozomenum *Histor. lib. 1. cap. 11. pag. 24. ed. Valesii Cantabrig. 1720.*

(4) Celebre est, quod de S. Fructuoso Episcopo Tarraconensi narrat Prudentius *Hymn. 6. pag. 188. ed. Paris. 1687.*, qui cum ad mortem raperetur, haustum aquae frigidae recusavit, quod illo die jejunium ageretur, neque adhuc ejus solvendi tempus advenerat. Alia multa ea de re habet Bailletus *tom. 3. de Vit. Sanctor. in Histor. quadrag. §. 4. et 7.*, ac Mamachius *Costumi de' primitivi Cristiani tom. 1. lib. 2. cap. 5. §. 10. et seq. pag. 109. seq.*

§. VII. Unica etiam in die comestio, quae ex

cibis esurialibus frugaliter (1), atque hora legitima, hoc est circa meridiem capiatur, jejunii partem constituit (2). Nunc jejunantibus exigua coenula permittitur, quae *collatio* dicitur (3), quaeque constare debet ex eo cibo, eaque potione, quibus homines jejunantes rectae meticulosae conscientiae uti solent (4).

(1) Qui in illa unica comestione, ciborum copia, modo, vel condimentis communes excedit limites, si minus praeceptum ecclesiasticum reipsa violat, tamen immunis non est ab intemperantiae nota, sicuti docet S. Thomas in 4. dist. 15. *quaest. 3. art. 4. quaest. 3. ad 2.* Igitur norma quaedam, sicuti inquit Benedictus XIV. *Inst. 15. n. 12. pro ciborum genere, copia, modoque statuendo ex piis, moderatisque viris* sumenda est. Ipse Benedictus XIV. post editas institutiones, quas emisit cum Cardinalis esset, postquam Pontifex creatus est, Constitutionibus suis, quas paulo post indicabo, edixit, quid de jejunio, ciborumque genere observandum est.

(2) Quaesitum est a Theologis, num duae illae partes, quibus jejunium constat, abstinentia a certis cibis, et unica comestio, ita inter se conjunctae, et conglutinatae sint, ut una sublata, altera quoque necessario tolli debeat. Sed inutilis est haec disputatio, posteaquam Benedictus XIV. *Const. 19. 27. 55. 99. ejus Bullar. tom. 1. pag. 29. 39. 100. 216. edit. ind.* jussit Episcopis, nec cui valetudinis causa diebus quadragesimae carnibus vesci permittant, nisi adiecta lege servandi alteram jejunii partem, quae in unica comestione consistit. Confer ipsum Benedictum *cit. Instit. 15. n. 19. et seq., de Synod. dioec. lib. 7. cap. 3. num. 1.*

(3) Collatio, sive coenula vespertina originem ducit a monachis, quibus ob laborem manuum, in quo tota die versati fuerant, ipsis jejunii diebus post sumptum sua hora cibum haustus aquae permittebatur, cui deinceps frustulum panis adjunctum est, ne simplex aqua noceret. Erat autem proprie collatio lectio spiritualis, quae statis horis, maxime post coenam quotidie ab-

solvebatur, quaeque in claustro, vel in capitulo fieri solebat, diebus autem jejunii fiebat in refectorio, ne scilicet tempus regularis vitae officiis destinatum in illa coenula teneretur. *Mox ut surrexerint a coena*, inquit Regula S. Benedicti capit. 42. apud Holstenium *Cod. Regul.* tom. 1. pag. 127. edit. Aug. Vindelic. 1759, *sedent omnes in unum, et legal unus collationes, vel vitas Patrum aut certe aliud quod aedificet audientes.* Eodem sensu collationis vocabulum accipit Isidori Regula cap. 8. pag. 192. *ibid.* Semper autem vespertinus ille ad refectionem aditus esurialibus diebus significabatur his verbis *ire ad collationem*, aut *accedere ad lectionem collationum*. Nomen hoc collationis translatum est deinceps ad coenulam illam, sive refectionem vespertinam, quemadmodum illud adhibetur in Regula Templariorum cap. 16. apud Holstenium l. 2. *ibid.* pag. 434, eodemque sensu hoc vocabulum usurparunt saeculares, cum illam coenulam sumere coeperunt. Vide Natalem Alexandrum *cit. diss.* 4. art. 7. *prop.* 3. p. 331.

(4) Benedictus XIV. *Constit. Si Fraternitas* 99. p. 216. tom. 1. *Bullar. ed. cit.*

§. VIII. Observatio jejunii omnibus indicta est, qui ad constitutam aetatem pervenerunt; et Episcopus curare praesertim debet, ut haec integra observatio sit (1). Verum carnes, aut ova comedendi facultas a Praesidibus iis tribuitur, praesertim in Quadragesima, qui iudicio medicorum propter adversam valetudinem cibos esuriales ferre non possunt (2); et saepe etiam a Summis Pontificibus integrae nationi iustis de causis eadem haec venia conceditur (3). In quo illud animadvertere oportet, quod quibus est permissus esus carnum, ovorum, casei, lactis, ii jejunii diebus unicam comestionem servare debent (4), neque cum carnibus pisces miscere possunt (5), aut in vespertina coenula carne, ovis, lacte, caseo vesci (6).

(1) Concilium Tridentinum Sess. 25. de Reform. decret. de Elect. cibor. jejun. et dieb. fest.

(2) Late, ac diligenter hoc argumenti genus persequitur Benedictus XIV. *Inst. Eccles. Inst. 15. num. 13. et seq.*

(3) Inter ceteras, quae a Romanis pontificibus integrae nationi ea de re datae sunt facultates, celebris est *Bulla Cruciatæ*, quae ita dicitur, quod olim haec Bulla concederetur militibus, qui rubro signo S. Crucis insigniti ad bellum contra Turcas proficiscebantur sub Urbano II, et in Concilio Lateranensi sub Julio II. Nunc conceditur Christianis omnibus in Regno Neapolitano, atque in regnis, et provinciis Hispaniarum Regi subjectis certam opem, sive operam in subsidium belli contra infideles, et haereticos conferentibus. Hoc idem privilegium an. 1743. Benedictus XIV. in *Constit. Quoniam* 86. tom. 1. *ejus Bullar. ed. cit. pag. 172.*, attribuit etiam Militiae Hierosolymitanae, et incolis insularum ipsius ditioni subjectarum. Qui ejus Bullae beneficio utuntur, praeter alia privilegia, illud etiam habent, ut perseverante anno Bullae ovis, lacte, carnibus jejunii diebus vesci possint. Multa, quae ad hanc Bullam pertinent praeter ceteros, collegit Lucius Ferraris *Biblioth. verb. Bulla Cruciatæ*.

(4) Benedictus XIV. *Constit. Non ambigimus* 19. §. 4. p. 30. et *Const. Si Fraternitas* 99. p. 317. *ejus Bullar. tom. 1. edit. cit.*

(5) Benedictus XIV. *Constit. 19. §. 4., et Const. 99. mox cit.*

(6) Benedictus XIV. *ead. Constit. 99.* Vide etiam ejusdem Benedicti *Constitutionem Libentissime* 239. p. 319. tom. 1. *ejus Bullar.*, ubi multa habes, quae ad jejunii leges pertinent.

TITULUS VII.

DE REBUS SACRIS, ET PRIMUM DE ECCLESIIS.

- | | |
|--|---|
| I. Res sacra quid? Cultus
externus. | VIII Ecclesiae respiratio. |
| II. Christianorum Ecclesiae,
et varia earum nomina. | IX. Variæ ejus partes. Nar-
thex. |
| III. Quales primo, quales
postea Ecclesiae fuerint? | X. Navis. |
| IV. Vetus earum forma, et
ritus. | XI. Sanctuarium. |
| V. Ecclesiae significatio du-
plex. | XII. Altare. |
| VI. Quibus de causis. | XIII. Sacrae imagines in
Ecclesia. |
| VII. Et quibus solemnitati-
bus nova Ecclesia aedifi-
cetur. | XIV. Exteriores Ecclesiae
partes. Vestibulum, et
atrium. |
| | XV. Baptisterium, Secreta-
rium, Pastophorium, Scho-
la, Bibliotheca. |

§. I.

Res sacrae sunt res Deo, et Religioni consecratae, ut quae pertinent ad divinum cultum, peragantur. Hujusmodi sunt in primis Ecclesiae, sacrae nimirum aedes, ad quas Christiani conveniunt, ut opera religionis impendant. Ecclesiae vocabulum proprie significat societatem, et conventum fidelium; sed omnium consensu traductum est ad designandum locum, in quo Christiani suos agunt conventus; et nos hoc sensu ecclesiae vocabulum usurpamus. Nimirum cum Christi Ecclesia visibilis sit, praeter cultum internum, habere etiam debet externum, qui omnis con-

sistit in communibus precibus, in sacris ritibus, in sacrificiis, in sacramentorum administratione: ideoque instituta sunt loca, ad quae Christiani concurrerent, ut divinis, sacrisque rebus operam darent.

§. II. Jam inde ab Apostolorum aetate Christiani certa habuerunt loca, ad quae frequentes conveniebant, ut res divinas, ac sacras agerent, quae loca postmodum Ecclesiae appellata sunt (1); Ecclesiae, inquam, potius, quam templa, ne illi convenire viderentur cum ethnicis, penes quos celeberrima fuerunt templorum, et sanctorum nomina (2). Vocatur autem Ecclesia ab ecclesiasticis scriptoribus etiam *oratorium*, hoc est locus, in quo preces funduntur (3), et *dominicum*, hoc est domus Dei (4), et *basilica*, quo nomine appellantur regiae aedes ad audiendas causas, aut alium publicum usum constitutae, quae aedes a piis Imperatoribus Christianis datae sunt, ut ibi conventus agerent suos (5); et *templa*, quo nomine Christiani serius uti coeperunt, antea non utebantur, cum proprium esset ethnicorum (6); et *tituli* loca scilicet Deo consecrata, quae sacerdotes, et ministros sibi addictos habebant (7). Si quam in memoriam Prophetarum, aut Apostolorum, aut Martyris ecclesiam aedificabant, eam *Propheteum*, *Apostoleum*, *Martyrium* Christiani appellabant (8).

(1) Quamquam certo affirmari non possit, Apostolos initio habuisse Ecclesias, quales certe eorum discipuli habuerunt, tamen exploratum est, eis certa fuisse loca, in quibus opera religionis impenderent. Quod enucleate in primis, et copiose demonstrat Cl. Mamachi *de' Costumi de' primitivi cristiani lib. 1. cap. 4. §. 2. num. 1. t. 1. p. 296. seq.* Videndus est etiam Medus, peculiari dissertatione, cujus veluti compendium dedit Binghamus

Orig. *eccles. lib. 8. cap. 1. §. 13. tom. 3. p. 141. et seq. ed. Halaë Magdeburg. 1758*; qui et sua quaedam adjecit, eaque gravia argumenta adversus eos, qui plane singularem, et novam sententiam, ut inquit, evulgarunt, Christianos tribus prioribus saeculis istiusmodi distincta cultus divina loca non habuisse. Praecipua sunt, quod Paulus I. ad Corinth. XI 12. iis verbis: *numquid domos non habetis ad manducandum, et bibendum? aut Ecclesiam Dei contemnitis?* sine dubio Ecclesiae nomine designat locum sacrum, atque ita Paulum explicant Augustinus, Basilii, Chrysostomus, Sedulius, Theophilactus; quod Apostoli semper in certum locum ad fundendas preces in monte Sione convenerunt, qui fuit hypercon, sive coenaculam, cujus in actis Apostolorum toties mentio est; quod Ignatius ad Magnes. num. 7. apud Cotelierium PP. *Apostol. 1. 2 p. 19. ed. Amstelaed. 1724.*, diserte memorat *τοῦ Θεοῦ τὸν ναὸν* templum Dei, et Epist. ad Philadelph. num. 4. p. 31. loc. indic. unum altare, quae altaris mentio satis ostendit, Christianos certam pro sacris conventibus habuisse locum; quod Therapeutas jam inde a Marci temporibus loca quaedam ad Divinum cultum secreta habuisse scribit Eusebius *Histor. lib. 2. cap. 17. ed. Cantabrig. 1720*; quod denique Alexander Severus cum Christiani quendam locum, qui publicus fuerat, occupassent, contra popinarii dicerent, sibi eum deberi, rescripsit apud Lampridium pag. 219. num. 30. edit. Francofurti 1688. melius esse: ut quomodocumque illic Deus colatur, quam popinariis dedatur. Atque haec quidem, uti observat Card. Orsius *Histor. eccles. lib. 6. §. 23.*, prima fuisse videtur publica Ecclesia, quam Christiani habuerunt, cum antea non nisi privatas, et occultas haberent.

(2) Hinc Origenes, Minucius Felix, Arnobius, Lactantius inquit, christianos templa non habuisse, quod ita accipiendum esse multis ostendit Medus, eos talia non habuisse templa, qualia gentes habebant.

(3) Oratorium appellata est Ecclesia, hoc est domus precationis, idque nomen primum publicae Ecclesiae, uti testantur Eusebius *Histor. lib. 10. cap. 3 pag. 464. et de Laud. Constantin. cap. 17. pag. 770.*, et Socia-

tes *Histor. lib. 1. cap. 18. pag. 49. edit. Cantabrig.* 1720., postea privati oratorii proprium fuit. Oratoria tamen, sive aedes oratorias ab Ecclesiis distinguunt Didymus Alexandrinus de *Trinit. lib. 2. cap. 7. p. 200. edit. Bonon. 1769.*, Socrates *Histor. lib. 5. cap. 10. p. 233. ed. Taur. 1747.*, Teophilus Antecessor *Inst. lib. 2. tit. 1. p. 213. ed. ann. 1751.* Proprie oratoria minores quaedam Ecclesiae erant.

(4) Hieronymus *Chron. Olimp. 277. opp. tom. 8. col. 785. ed. Vallarsii Veron. indic.* auctor est nobis, celebrem Ecclesiam Antiochiae a Constantino aedificari coeptam, et a Constantio absolutam *Dominicum aureum* appellatam fuisse. Eodem vocabulo ad designandam Ecclesiam citatur Hilarius ad *Constan. lib. 1. num. 8. opp. tom. 2. col. 540. ed. Veron. 1730.*

(5) Nomen hoc frequens est apud Ambrosium *Epist. 20. ad Marcellin. num. 1. et Epist. 40. num. 15. opp. tom. 3. col. 960. et 1621. ed. Venet. 1751.*, Augustinum *Serm. 356 num. 9. opp. tom. 9. par. 5. num. 2. col. 1388. edit. Venet. cit.* Hieronymus *Epist. 107. ad Laetam. cap. 9. tom. 1. col. 680. laud. ed.*, Sidonium *lib. 7. Epist. 17. pag. 1416. opp. Poetarum Latinorum tom. 3. edit. Londini 1713.*, aliosque saeculi quarti, et quinti scriptores.

(6) Vix ullus est Christianus scriptor, qui tribus prioribus saeculis ad designandas Ecclesias templi nomine usus fuerit. Sublata, eversaue ethnicorum superstitione, tum demum Christiani scriptores nomen hoc adhibere coeperunt. Magis autem abhorrerunt a sancti vocabulo, eoque utebantur, ut indignationem, atque animi dolorem ostenderent adversus quaedam conventicula haereticorum, quos eodem, quo ethnicos, habebant loco, uti patet ex Ambrosio *Ep. 40. ad Thodos. n. 16. opp. t. 3. col. 1021. ed. cit.*

(7) Consule *lib. 1. tit. 5. sect. 2. §. 9. not. 2. p. 284.* ubi de titulis actum est.

(8) Martyrium memorat Eusebius *De Vit. Constantin. lib. 3. cap. 48. p. 640. edit. cit.* Eaue de causa Eusebius de *Vit. Constantin. lib. 4. cap. 33. et p. 597. et 648*, aliique martyrium Salvatoris appellant ecclesiam, quam Constantinus aedificavit in honorem Christi

Salvatoris, qui praecipuus fuit martyr eorum, qui divinae religionis causa mortem pertulerunt, cujus rei ampla narratio est in epistola Henrici Valesii, quae est ad calcem historiae Ecclesiasticae Eusebii. Latini loco martyrii hujusmodi ecclesiam vocant *memoriam martyris*, uti constat ex Augustino *de Civit. Dei* tom. 22. cap. 8. num. 17., et cap. 10. col. 669. et 673. tom. 8. ed. cit., atque apud eos *martyrium* designat etiam Ecclesia in honorem alicujus Sancti, qui martyr non esset, uti patet ex S. Hieronymo in *Vit. Hilarion.* cap. 31. opp. tom. 2. col. 32. ed. Veronae cit. Apostolei mentio est apud Sozomenum lib. 8. cap. 17. p. 322. ed. Taurin. 1747., *Prophetei* in Concilio Constantinopolitano sub Menna act. 3. col. 1243. tom. 2. *Collect.* Harduini. Memorat etiam ipse Sozomenus *Histor.* lib. 2. cap. 3. p. 45. ed. cit. *μικράλ-ος Michaelium*, hoc est Ecclesiam, quam in honorem S. Michaelis Archangeli Constantinus M. in Hestius extra Constantinopolim Deo erexit.

§ III. Primae Christianorum Ecclesiae simplices, et modicae fuisse videntur, quales videlicet fidelium paupertas, et paucitas, ac formidolosorum temporum ratio patiebatur. Sed aucta fidelibus, atque oblationibus Ecclesia, et extincta christiani nominis invidia, multae, eaeque splendidissimae aedes aedificatae sunt (1). Accesserunt edicta Imperatorum de templis ethnicorum in Ecclesias convertendis (2), et eorum, ac praesertim Constantini munificentia, qua sumptu vere regio magnificentissima templa ex-citata sunt (3).

(1) Baronius *ad an.* 571. num. 82. p. 445 tom. 1. ed. Lucae copiose demonstravit, ecclesias pluribus, iisque ditissimis ornamentis antiquitus fuisse refertas. Joannes Henricus Ottius Calvinianus in libro, cui titulus: *Examen perpetuum historico-theologicum in Card. Baronii annales*, eum refellere conatus est. Sed ea in re opus hoc errorum, et ineptiarum plenum refutavit Muratorius *diss.* 16. ad calc. opp. S. Paulini p. 832. seq.

ed. cit. ubi late ostendit, quam magna, et quam magnifica fuerint antiquarum Ecclesiarum ornamenta. Confer etiam Cl. Mamachium *del Diritto libero della Chiesa di acquistare, e di possedere beni temporali*, lib. 3. par. 2. cap. 3. num. 24. et seq. p. 408. seq. Monumentis, quae ab his duobus doctissimis viris allata sunt, addam Didymum Alexandrinum Scriptorem IV. Saeculi, qui lib. 2. de Trinit. cap. 7. p. 200. ed. Bonon. 1769. testatur sua aetate Ecclesias fuisse auro, argento et ebo-
re ornatas.

(2) Plures ea de re leges extant in Codice Theodosiano lib. 6. tit. 17., et Leg. 2. Cod. de Sepul. violat., idque etiam testantur non Christiani solum Scriptores Eusebius de Vit. Constantin. lib. 3. cap. 51. et 58. p. 606. et 613. ed. cit., aliique, sed etiam ethnici Eunapius Vit. Aedes p. 33. ed. Coloniae Allobr. 1616. Libanius Orat. Apolog. 25. p. 591. tom. 2. ed. Paris. 1627., Julianus Orat. 7. pag. 224. tom. 1. edition. Lips. 1696.

(3) Constantinus nullis pepercit sumptibus, ut in omnibus Orientis partibus, ex. gr. Hierosolymis, Antiochiae, Nicomediae juxta quercum Mambre, Heliopoli in Phoenicia, aliisque in locis compluribus splendidissimae Ecclesiae aedificarentur, sicuti narrat Eusebius de Vit. Constantini lib. 3. cap. 50. et 51. pag. 605. et 606., et Socrates Histor. lib. 1. cap. 16. 17. 18. p. 45. et seq. ed. cit. Ipse etiam fundamenta jecit celebratissimae Ecclesiae, quae S. Sophia, et Magna dicta, quaeque annis triginta tribus post a Constantio absoluta est, uti Socrates lib. 2. tom. 16. p. 95. edit. Cantabrig. 1720., et Auctor Chronici Alexandrini ad an. 360. memoriae prodiderunt; quam quidem Ecclesiam incendio consumptam iterum Justinianus splendidius aedificavit. Ejus autem descriptionem habes apud Evagrium, Procopium, Agathiam, Paulum Silentiarium.

§. IV. Vetus Ecclesiae forma, et situs non semper idem. Interdum oblonga erat, ac navi similis, interdum rotunda, aut plurium laterum, aut ad formam crucis (1); qua de re non unus semper, nec

ubique mos fuit. Ecclesiae frons , ut plurimum , ad Occidentem spectabat , sanctuarium ad Orientem , quoniam versus Orientem Christiani preces fundebant (2). Sed saepe neque Orientem , neque Occidentem , Sanctuarium respiciebat ; et vero ab antiquis monumentis quavis forma , et situ Ecclesiae exhibentur (3).

(1) Auctor *Constit. Apostolic. lib. 2. c. 57.* , apud Cotelierium *PP. Apostolic. tom. 2. p. 263. et 264. cit. ed.* Ecclesiam vult esse oblongam , navi similem. Verum Ecclesiam a Constantino in monte Golgotha aedificatam rotundam fuisse , octo autem laterum Ecclesiam Antiochiae tradunt Eusebius in *Vit. Constantin. lib. 3. c. 38. et 50. p. 599. 606. ed. cit.* , et Strabo de *Reb. eccles. cap. 4. in Biblioth. PP. tom. 10. col. 664. ed. Paris.* Alias fuisse ad formam crucis , scribunt Evagrius *Histor. lib. 1. cap. 14. p. 268. ed. Valesii Cantabr. 1720.* , et Cedrenus *Vit. Justin. in compend. histor. tom. 1. p. 390. num. 160. ed. Paris. 1647.*

(2) Auctor *Constit. Apostolic. loc. cit.*

(3) Late id ostendit Binghamus *Origin. eccles. cap. 5. §. 1. et 2. tom. 3. p. 172. ed. cit.*

§. V. Ecclesiae vocabulum latius , et angustius accipitur Latius acceptum significat sacras aedes , ad quas populus confluit divinis , sacrisque rebus operam daturus ; et hujusmodi sunt templa cathedralia , parochialia , collegiata , conventualia. Cathedralis Ecclesia est , quae fixam habet Episcopi cathedram , et mater , ac princeps est Ecclesiarum omnium , quae in dioecesi sunt. Parochialis Ecclesia proprium habet Presbyterum , qui sub Episcopo curam Animarum gerit ; collegiata collegium canonicorum. Denique conventuales Ecclesiae sunt , quae a Monachis , et Regularibus administrantur. Latius acceptum Eccle-

siae nomen comprehendit etiam oratoria, sacella, capellas, quae privatis conventibus, praesertim vero mittendis ad Deum precibus, addictae sunt.

§. VI. Novum templum non temere, et cujusque arbitrio aedificandum est, sed causa cognita, et cum Episcopi auctoritate (1). Causae sunt populi commoda, et necessitates (2). Quare si tanta sit populi distantia, viarumque discrimen, ut ille sine magno incommodo, aut periculo ad Ecclesiam accedere nequeat, novum templum excitandum est (3), et nova etiam Ecclesia conceditur leprosis, aliisque contagioso morbo laborantibus, ubi suos agant conventus, ne ceteri fideles inficiantur (4). Sed et Episcopo pro paranda sibi sepultura novam Ecclesiam aedificare permittitur, eique ex propriae Ecclesiae redditibus dotem attribuere (5).

(1) *Can. 6. de Consecrat. dist. 1. Concilium Chalcodonense Can. 6. col. 601. et seq. tom. 2. Collect. Harduini.*

(2) *Can. 10. dist. 1. de Consecr., Cap. 3. et ult. de Eccles. aedif.*

(3) *Concilium Tridentinum Sess. 21. cap. 4. de Reformation.*

(4) *Cap. 2. de Eccles. aedific.*

(5) *Can. 74. cap. 12. quaest. 2. Cap. 9. de Donat.*

§. VII. Cum nova fabrica inchoanda est, Episcopus designato loco preces fundit, et crucem humi defigit, ubi majus altare locari debet (1). Ante aedificationem curandum est, ut nova Ecclesia dotem habeat, unde necessaria pro ministris, pro luminaribus, pro sacra suppellectile, et ceteris, quibus est opus, perpetuo comparentur (2); audiendique sunt Parochus antiquae Ecclesiae, et ceteri, quorum in-

terest, iisque etiam injuste adversantibus; novum opus inchoatur, et absolvitur. Parochus antiquae Ecclesiae, quae *matræ* dicitur, respectu habito ad novam, seu *filialem* Ecclesiam, debet partem fructuum Parochiae suae novo Parocho attribuire, habetque ab Ecclesia *filiali* annuam praestationem, quae ejus subjectionis argumentum est. Cum opus fuerit, Episcopus etiam novae Parochiae cives compellit ad praestandum Parocho id, quod ei necessarium est ad vitam honeste traducendam (3).

(1) Consule Pontificale Romanum *par. 2. tit. 1. et 2. tom. 2. p. 1. seq. edit. Rom. 1739.*

(2) *Can. 26. et 36. caus. 16. quaest. 7., Cap. 8. de Consecrat. Eccles.*

(3) Concilium Tridentinum *cit. Sess. 21. 6. 4. de Reform.*

§. VIII. Ecclesiae jam constructae identidem reparandae, instaurandaeque sunt. Id vero faciendum est ex bonis earundem Ecclesiarum, et ideo jam inde a saeculo VI. viguit consuetudo, ut certa pars reddituum ecclesiasticorum ad Ecclesiae fabricam pertineret (1). Cum Ecclesia non habet hos redditus fabricae addictos, beneficiarii debent suorum beneficiorum Ecclesias instaurare (2), eidemque oneri subsunt etiam, qui decimas, aut alia bona ecclesiastica possident (3). Cathedralem Ecclesiam reparare praesertim debet Episcopus, atque aliquid etiam ejus canonici in id conferre coguntur (4). Cum bona ecclesiastica non suppetant, patronos, et ceteros ecclesiasticorum bonorum possessores, ac denique parochianos Episcopus ad paroeciam instaurandam cogit. Quod si nullus sit Ecclesiae reparandae modus,

ea convertitur in profanos non sordidos usus, ibique crux erigitur, et ejus jura ad matricem, aut ad viciniorem ecclesiam transferuntur (5).

(1) Hoc juris Augustino Angliae Episcopo Gregorius M. praescripsit *Can. 30. caus. 12. quaest. 2.*, et idem etiam sancitum extat aliis canonibus, qui eodem loco a Gratiano referuntur. Eandem quoque aliarum, praesertim in Hispaniis Ecclesiarum fuisse disciplinam et quidem ex antiqua traditione constat et Concilio Tarraconensi *Can. 8. col 1042. tom. 2. Collect. Harduini.*

(2) *Cap. 1. et 3. de Eccles. aedific.*

(3) *Can. 2. et 3. caus. 10. quaest. 3.*

(4) *Cap. ult. de His quae fiunt a major. par. cap.*

(5) Concilium Tridentinum *Sess. 21. cap. 6. de Reform.*

§. IX. Jamvero Ecclesiae, praesertim ampliores, pluribus constant partibus, quarum aliae interiores, hoc est intra parietes sunt, aliae exteriores, quae parietibus non includuntur. Partes interiores, ex antiqua disciplina erant *narthex*, sive *ferula*, *templum*, sive *navis*, et *bema*, sive *sanctuarium* (1). *Narthex* erat pars oblonga, et angusta ad instar *ferulae* e transverso frontis Ecclesiae, ibique dum sacrae conciones habebantur, infideles, haeretici, catechumeni, et poenitentes *audientes* dicti consistebant (2).

(1) In his quidem partes tres plerumque Ecclesiae dividebantur. Morinus tamen *de Poenit. lib. 6. capit. 1. num. 20.* et Le Brunius *Explicat. Missae t. 2. diss. 1. art. 3. pag. 64. ed. Venet. 1770:* monet, primis temporibus Ecclesias in duas tantum partes fuisse tributas, in aulam, sive atrium laicorum, et in Sanctuarium, in quo consistere Episcopis, Presbyteris, et Diaconis tantum licebat; divisionem autem illam in partes tres serius a Monachis initium habuisse.

(2) De antiqua Ecclesiarum forma copiosissime, accuratissimeque disputat Cl. Mamachius *de' costumi de' primitivi cristiani lib. 1. cap. 4. §. 2. num. 3. et seq. tom. 1. p. 308 seq.*

§. X. Narthecem excipiebat pars illa Ecclesiae, quae proprie *templum* ac *navis* dicebatur. Haec, ut plurimum, quadrata erat (1), eamque a narthece separabant lignea quaedam repagula pervia portis, quas portas *regias*, et *speciosas* appellabant (2). In inferiori hujus partis loco, qui statim ingredienti occurrebat, stabant poenitentes *substrati* (3); in superiori, qui erat Sanctuario propinquior, *Consistentes*, et fideles communicantes; et hi suum quique habebant locum, mares discretum a foeminis, virgines a nuptis, monachi a saecularibus (4). In media navi erat *Ambo*, hoc est locus editus, ad quem per gradus patebat ascensus, in eoque stabant cantores (5), et lectores, qui epistolas, atque evangelia legebant (6), et in eo etiam diptyca recitabantur (7).

(1) Hinc in constitutione Theodosii, et Valentiniiani, quae extat in *Codice Theodosiano post Leg. 4., l. 9. tit. 45. tom. 3. pag. 397. ed. Lip. 1738.*, Ecclesiae navis *quadratum populi oratorium* appellatur.

(2) Regiae, seu speciosae dicebantur navis portae, quod per eas ad regium Dei palatium, hoc est Ecclesiam patebat accessus, vel quod ibi Reges templum ingressuri coronas deponebant. Hinc Leo Grammaticus in *Vit. Michael. Imper. pagin. 406. edition. Paris. 1655.*, tamquam rem insolentem, et indignam animadvertit, quod Imperator cum venisset ad portas regias, coronam non deposuisset, uti reges facere consueverant.

(3) Omnes ecclesiasticarum antiquitatum scriptores suum substratis adscribunt locum a ceteris discretum, auctoritate praesertim Tertulliani *de pudic. c. 13. p.*

464, *ed. Paris. 1675.*, et Sozomeni *Histor. lib. 7. c. 16. p. 300. ed. Cantabrig.*

(4) Mares a foeminis per ligneos parietes secernebantur; cujus consuetudinis testimonia sunt apud Cyrilum Hierosolymitanum *Praef. in Catech. n. 14. pag. 10. edit. Paris. 1720.*, Augustinum de *Civit. Dei lib. 2. c. 28. et lib. 22. cap. 8. num. 3. col. 57. et 666. tom. 7. ed. Venet.*, Paulinum in *Vit. Ambros. n. 11. opp. Ambros. tom. 4. col. 3. ed. Ven. 1751.*, Socratem *Histor. lib. 1. c. 17. pag. 47. ed. Cantabrig. 1720.* et ligneos quidem parietes, per quos foeminae a maribus discernebantur, nominat Chrysostomus *Hom. 74. in Matth. opp. t. 7. p. 712. ed. Paris. 1727.* Aliae orant portae, per quas viri, et aliae per quas mulieres Ecclesiam ingrediebantur. Hinc Auctor *Constit. Apostolic. lib. 2. cap. 57. p. 266. t. 1. ed. cit.* Ostiarios stare jubet ad virorum introitus, quos custodiant, *Diaconissas ad mulierum.* Atque ex eodem Auctore *loc. cit.* intelligimus virgines et nuptas fuisse discretas, quod etiam patet ex Ambrosio de *Lapsu virgin. cap. 6. num. 22. et 24. col. 387. et seq. tom. 3. ed. Venet. 1751.*

(5) Concilium Laodicenum *Can. 15. col. 784. t. 1. Collect. Harduini.*

(6) Cyprianus *Ep. 33. p. 49. ed. Paris. 1666.*

(7) Concilium Constantinopolitanum V. sub Menna *act. 5. tom. 2. col. 1523. coll. Harduini.*

§. XI. Tertia, et intima antiquarum Ecclesiarum pars erat *Sanctuarium*, quod Graeci *Bema* appellabant. Locus hic septis, sive cancellis munebatur (1), uti nunc munitur, ne laicis ad eum pateret aditus (2), cum sacra officia peragebantur (3). Cancelli erant portulis pervii; portulas autem, et spatia concellorum vela quaedam obtegebant (4). Suprema pars *Sanctuarii Apsis* (5) dicebatur, aedificium scilicet Semicirculi formam exhibens, ubi thronus Episcopi, sedesque erant, seu throni Presbyterorum (6).

(1) Eusebius *Hist. eccles. lib. 10. c. 4. p. 419. ed. Taurin. 1746.* Memorat etiam altare cancellis septum Zeno Veronensis *lib. 2. Tract. 30, tom. 1. p. 341. ed. Aug. Vindelic. 1758.*

(2) Confer Concilium Trullanum *Can. 69. tom. 7. Coll. Labbaei col. 1379.* Concilium Laodicense *Can. 19. col. 1553. tom. 1. ejusd. Collect. solis ιερατοις* in sanctuario communicare permittit, quo nomine alii superiores tantum clericos, Presbyteros, et Diaconos, alii etiam inferiores intelligunt.

(3) Pars haec Ecclesiae *adyta* seu *inaccessa* dicebatur, quoniam ad eam populo accedere non licebat. Quamquam non una semper, neque eadem omnium Ecclesiarum consuetudo fuisse videtur. Nam Dionysius Alexandrinus *Epist. ad Basilidem Can. 2, apud Labbaeum tom. 1. Concil. col. 858. ed. Venet. mares, et foeminas* ad altare accessisse memorat, cum Eucharistiam accipiebant, atque ita Dionysium explicat Valesius in *Euseb. Histor. lib. 7. cap. 9. p. 330.* Idem habet Concilium Turonense *II. Can. 4. col. 358. tom. 3. coll. Harduini.*

(4) Vela haec memorant Athanasius *Epist. ad Solitar. tom. 1. p. 298. num. 56. ed. Petav. 1777.*, Hieronymus in *Epitaph. Nepotian. opp. t. 1. col. 338, ed. Vallars. Veron.*, alique complures. Ea Synesius *Ep. 67. ad Theophil. p. 212. ed. Paris. 1633.*, vocat *vela mistica*; saepe autem erant auro exornata, uti testatur Evagrius *lib. 6. cap. 21. pag. 468. ed. Valesii Cantabrig. 1720.*, Confer Du-Cangium in *Glossar. graec. barb. verb. Βηλοδύρα.*

(5) Apsis graecum verbum est *αψις*, quod latine significat, *arcum, fornicem.* Pars illa Ecclesiae, in qua majus altare collocabatur, proprium habebat fornicem, aut arcum, quo tegebatur, ideoque apsis appellata est. Hieronymus *lib. 2. in Ephes. cap. 4. opp. tom. 7. col. 614. ed. Vallars. Veron.* In summo, inquit, caeli fornice, et ut ipso verbo utar apside. Vide Du-Cangium *verb. Apsida.*

(6) Presbyterorum sedes proprie *secundi throni* dicebatur, quos memorat Nazianzenus *Carm. jamblic. 23. tom. 2. p. 243. ed. Coloniae 1690.*, atque hinc Constantinus apud Eusebium *lib. 10. cap. 5. p. 485, ed. ind.*

Chrestum Syracusanum Episcopum ad Arelatense Concilium vocans duos *secundi throni*, hoc est duos Presbyteros secum deferre jubet.

§. XII. In medio sanctuarii a pariete sejunctum erat altare, quod etiam *ara*, *mensa sacra*, *sanctum sanctorum* dicitur (1). Initio lignea, ut plurimum, erant altaria, deinde lapidea facta sunt (2), erantque etiam in locis compluribus auro, argentoque cooperta (3). Unum in Graecis Ecclesiis erat altare, uti nunc etiam est (4); sed latini jam inde ab antiquissimis temporibus plura in una Ecclesia altaria habere consueverunt (5) Altare obtegebat linteam (6), atque ornabat ciborium (7), et crux in eo stabat (8), et prope crucem ex utroque latere candelabra, quae ardebant, dum sacra peragebantur (9).

(1) Altare semper Christianos habuisse, in quos rem divinam conficerent, certum est; ut proinde inscitia sit, aut impudentia incredibilis Calvinianorum, qui verum Christi corpus in Eucharistia esse negantes vocem *Thysiasion*, seu *Altare* per tria priora saecula vero, ac proprio significato usurpatam non fuisse contendunt. Videntur ea de re Cardinalis Petronius *de Sacrosanct. Eccles. sacram. adversus Philippum Mornaeum du Plessis lib. 2. p. 174. et seq.*, ubi id late demonstrat; et ipsi etiam videndi sunt a Catholica communione alieni Scriptores Guillelmus Beveregius in *Cod. Canon. Eccles. primitiv. cap. 10. n. 3.* Joannes Clericus apud Cotelierum *PP. Apostolic. tom. 2. p. 188. ed. indic.*, Josephus Binghamus *Origin. et antiq. Eccles. l. 8. c. 6. §. 12. et 13. t. 3. p. 222. seq. ed. Halae Magdeb. 1758.*

(2) Augustinus *Ep. 185. ad Bonifac. opp. tom. 2. col. 654. num. 29. ed. Venet. 1729.*, Optatus Milevitanus *lib. 6. p. 112. ed. Paris. 1676.* Athanasius *Ep. ad Solitar. vit. agen. tom. 1. p. 298. num. 39. ed. cit.* De lapideis altaribus decretum extat Silvestri Pontificis; sed hujus decreti suspecta fides est. Certe etiam post hanc aetatem in multis Ecclesiis lignea fuisse altaria, osten-

dit Martenius de *Antiq. eccles. rit.* l. 1. cap. 3. art. 6. §. 4. tom. 1. p. 111. ed. Antwerp. seu Venet. 1763. Lapidum altare memorat Gregorius Nyssenus de *Baptism. Christ.* p. 801. opp. tom. 1. edit. Paris. 1615; et Concilio Epaonensi *Can.* 26. col. 1050. tom. 2. collect. Harduini sancitum est, ut *altaria nisi lapidea, unctione non sacrentur.* Cum autem altaris materia mutari coepit, formam etiam mutatam fuisse, tradit Binghamus *Orig. et antiq. eccles. lib.* 8. cap. 6. §. 15. tom. 3. p. 258. edit. cit. Nam cum ea mensarum similitudinem antea referrent, ad instar arae erigi coeperunt, et una, duabusve aut quatuor columnis lapidea mensa nitebatur, ac nonnulla etiam quadro superposita aedificio, uti observat Card. Bona *Rer. liturg. lib.* 1. cap. 20. §. 1. tom. 2. pag. 64. ed. Taurin. 1749., tumuli formam referebant, tamquam martyrum sepulchra, quae proprie altaria, quasi altae arae, dicebantur.

(3) Sozomenus *lib.* 9. *Histor. eccles. cap.* 1. p. 364. cit. edit. Cantabrig. et Nicephorus *lib.* 14. cap. 2. p. 439. tom. 2. ed. Paris. 1630. narrat, Palcheriam Augustam Arcadii filiam, et Theodosii Junioris imperatoris sororem, Constantinopolitanae Ecclesiae donasse sacram mensam auro, gemmisque confectam, quam describit Paulus Silentarius in *Descript. Aedis Sophiae* p. 518. num. 335. ed. Paris. 1670. Ejusdem materiae fuisse mensam altaris Ecclesiae, quam Basilius Macedo in palatio suo aedificavit, testatur Constantinus Porphyrogenitus in *ejus vit.* cap. 83. p. 200. ed. Paris. 1685.; et aureum item altare memorat Ughellius *Ital. Sac. tom.* 4. col. 82. ed. Venet. 1719.

(4) Unum Graecis altare fuisse demonstrat S. Ignatius M. *Epist. ad Philadelph.* num. 4. p. 77. ed. cit. idque etiam patet ex Theodoro *lib.* 1. cap. 31. p. 64. cit. ed. Cantabrig. Sed quamquam Graeci unum habeant in Ecclesia altare, plura tamen, ipsique Ecclesiae proxima, ac muro disjuncta sacella, sive oratoria habent, quae *Parrecclesiae*, vocantur, quasi Ecclesiarum appendices, in quibus, uti narrat Goarius in *Not. ad Eucholog.* p. 16., profestis diebus liturgiam privatim agunt. Consule Leonem *Allatium de Graec. recent. templis* p. 177. ed. Paris. 1646.

(5) Latinos jam inde ab aetate Gregorii M. plura in una Ecclesia altaria habuisse, inter omnes constat. Nam disertus est Gregorii locus *lib. 6. Epist. 49. ad Pallad. Santonens. Episc. tom. 2. p. 828. ed. Paris. 1705.*, ubi habentur haec: *Veniens lator praesentium insinuavit nobis, Fraternitatem vestram Ecclesiam construxisse, atque illuc tresdecim altaria collocasse, ex quibus quatuor necdum dedicata comperimus remansisse.* Verum et ante hoc tempus eandem fuisse Latinae Ecclesiae disciplinam facile intelliget quisquis in ecclesiasticas antiquitates paulo diligentius inquirat. Revera in vetustissimo S. Sepulchri templo Hierosolymitano a Constantino M. erecto tria, et in Ecclesia Beatae Mariae de Valle Josaphat quatuor altaria fuisse, tradit Arculphus Episcopus Gollus qui VII. saeculo loca sacra lustravit, uti testatur Adamannus *de Loc. sanct. lib. 1. cap. 2. et 13.*, apud Mabillonium *Act. SS. Ord. S. Benedict. saec. 3. par. 2. pag. 457. et 460. ed. Venet. 1734.* Plura quoque in una Ecclesia altaria memorant S. Ambrosius *Epist. 20. ad Marcellin. soror. num. 8. et 26. col. 908. tom. 3. edit. Venet. 1751.*, S. Augustinus *Serm. 5. de S. Steph. opp. tom. 5. par. 2. col. 1271.*, et de *Civit. Dei lib. 8. cap. 27. tom. 7. col. 217. ed. Venet. 1732.* Prudentius *lib. Peristeph. seu de Coron. hymn. 3. 4. et 5.*, S. Paulinus *Poem. 19. col. 471.*, et *Epist. 31. et 32. col. 193. 199. 202. et 471. ed. Veronae 1736.*, S. Gregorius Turonensis *de Glor. martyr. lib. 1. cap. 34. col. 760. ed. Paris. 1699.* Similiter Joannes Diaconus Scrip-
tor vitae S. Gregorii M. *Epist. ad Senarium apud Mabillonium Miss. Italic. tom. 1. p. 74. a Majoribus*, qui certe Gregorio antiquiores erant, decretum testatur, quod Romae Sabbato Paschae septem in Ecclesia altaria consecrarentur. In coemeteriis etiam plura erant altaria, atque unum ex iis describit Aringhii *Rom. Subterr. lib. 3. cap. 22.*, in quo non pauca martyrum tumulis superposita altaria observantur. Coemeteria autem Christianis erant Ecclesiae, cum ethnici imperio potirentur. Recte hinc Cabassutius *Notit. Eccles. Dissert. 10, num. 5. p. 40. ed. Lugduni 1680.*, Juveninus, *de Sacram. Diss. 5. quaest. 7. cap. 3.*, Muratorius in *Paulin. cit. poem. 19. col. 471.* PP. Maurini in *S. Gregorium cit. p. 49.*

lib. 6., alique colligant, plarium in una Ecclesia altarium usum apud Latinos antiquissimum esse. Ex quo intelligitur, quam falso, et quam imperite haereticus homo Claudius Salmasius *Solin. Polyhist. p. 1213.*, et ceteri, qui Salmasii errorem sequuntur, tamquam rem novam reprehendant hodiernam Latinae Ecclesiae disciplinam, per quam plura in uno, eodemque templo altaria retinentur. Non inficior, in quibusdam etiam occidentis Ecclesiis unum fuisse altare in unoquoque templo: atque hanc fuisse quarundam Africae Ecclesiarum consuetudinem, intelligimus ex Optato Milevitano lib. 1. p. 22. *ed. Paris. 1676.*, sed certe in reliquo Occidente obtinebat ea, quae nunc obtinet consuetudo plura in una Ecclesia altaria retinendi.

(6) Vide Optatum Milevitanum lib. 6. p. 113. *edit. cit.*, et Victorem Vitensem *de Persecut. Vandal. lib. 1. in biblioth. PP. t. 7. p. 896. ed. Lugdun.*

(7) Sacrae mensae ciborium imminerebat, hoc est umbraculum, ut inquit Du-Fresnius *comment. in Paul. Silent. p. 569. num. 57. ed. cit.* altius eductum, quo universa sacra mensa tegebatur. Confer ipsum Pauli Silentiarum, et Du-Fresnii locum. Consule etiam Anastasium Bibliothecarium in *S. Gregorio I., in Honorio, in Leone III. pag. 115 122. 285. edit. Rom. 1718.*, quibus locis ciborii mentio est, et vide etiam vetustum ordinem ubi ciborii benedictio extat, apud Martenium *de antiq. eccles. rit. lib. 2. cap. 19. tom. 2. pag. 294. ed. cit.*

(8) Usus Crucis, quae in altari locatur, ab Apostolica traditione descendere putat Card. Bona *Rer. liturgic. lib. 1. cap. 25. §. 8. p. 317. tom. 2. ed. Taurin.* Varias autem erant crucis figurae, quas describit Muratorius *Anecd. tom. 1. dist. 21. de Cruce Nolana p. 210. edit. Mediolani 1697.* Consule Robertum Salam in *Notis ad illum Bonae locum*, et Gretserum *de Cruce lib. 2. cap. 13.*

(9) Candelabra, aliaque vasa affabre facta ex auro, argento, aliove metallo, quibus fixae candelae, vel elychnia oleo imbuta accendebantur ad praebendum lumen, ab ipsa Apostolorum aetate in Ecclesia adhiberi consuevisse, ostendit Baronius *ad ann. 58. num. 70. et seq. pag. 515. tom. 1. edit. Luc.* Confer etiam Card.

Bouam *Rer. liturg. lib. 1. cap. 25. §. 7.* ibique Salam
Not. 4. tom. 2. pag. 314. et 316. edit. Taurin. 1749.
 Tourneiyum *Praelec. theolog. de Sacrific. Missae quaest.*
8. art. 13. Casalium de Veter. sacr. Christianor. rit.
cap. 42. pag. 184. Darantum de Rit. eccles. cathol. lib.
1. cap. 9., Ciampinium de Sacr. aedific. Constant. M.,
cap. 10. pag. 134.; Dominicum Georgium de Liturg.
Rom. Pontif. disquisit. de Sacr. ministr. cap. 8. et seq.
 In antiqua inscriptione Eugenii Notarii apud Aringhiam
Rom subterr. tom. 1. l. 3. cap. 10. pag. 340. mentio
 fit reddituum quorundam ex hortis translyberinis ad Lu-
 minaria. Accendebantur autem lumina non solum noctu,
 sed etiam die, quem morem cum reprehenderet Vigilantius,
 ei graviter, nervoseque respondit Hieronymus Con-
 tr. *Vigilant. tom. 1. cap. 394.,* inquit, eam esse Ec-
 clesiae consuetudinem, accendique luminaria non ad
 fugandas tenebras, sed ad signum laetitiae demonstran-
 dum, quibus iisdem verbis utitur Isidorus *Orig. lib. 7.*
cap. 12. pag. 100. ed. Paris. 1601. Sane qui luminum
 in Ecclesia usum vetustissimum esse negat, is plane ru-
 dis Ecclesiasticae antiquitatis esse debet. Mitto quae de
 cereis in pervigilio Paschatis accendi solitis in Ecclesia
 Christianorum scriptum reliquerunt Eusebium in *Vit. Con-*
stantin. lib. 4. cap. 22. pag. 575 ed. Taurin. 1746.,
 ibique Valesius in *not. S. Gregorius Nazianzenus Orat.*
19., num. 31. opp. tom. 1. pag. 304. et Orat 42. n.
4. pag. 676. ed. Coloniae 1790., S. Zeno Veronensis,
Tract. 38. t. 1. pag. 250. ed. Augustae Vindelic. 1758.
 quem in locum videndi sunt Fratres Ballerini, *Not. 5.*
 quae item de luminibus in funere S. Cypriani adhibitis
 tradita sunt in *Actis ejus Passion. opp. S. Cypriani*
col. CXLVI. ed. Venet. 1758. in funere autem S. Pau-
 lae memoriae prodit S. Hieronymus *Epist. 27. seu 198.*
ad Eustoch. tom. 1. col. 716. num. 29. edit. Vallarsii
Veron., quae demum supra demonstravi *tit. 2. sect. 1.*
§. 35. de cereis facibus catechumenorum. Mitto inquam
 haec: nam luminum, quae noctu, et interdum in Eccle-
 siis ardebant, disertissimam mentionem faciunt S. Pau-
 linus Nolanus, *Poem. 14. de S. Felic. vers. 99. et seq.*
pag. 285. ed. Veronae 1736., S. Epiphanius Epist. ad
Joann. Hierosol. opp. tom. 2. pag. 312. ed. Coloniae

1682., Prudentius apud Ruinart. in *Act. prim. Mart. Hymn.* 2. de *Martyrio S. Laurent.* pag. 190. ed. *Amstelæd.* 1713., S. Leo M. *Serm.* 14. c. 2. t. 1. col. 434. ed. *Ballerin.* Ven. 1753., Concilium Carthaginense IV. c. 6. tom. 2. *Conc.* col. 1437. *Collect.* Labbaei. De canone 34. Concilii Eliberitani, qui cereos per diem in coemeteriis incendi vetat, multae sunt doctorum hominum interpretationes, quas vide apud Cardinalem de Aguirre *Concil. Hispan.* tom. 1. pag. 537. et seq. Confer etiam Alaspinaeum in *Not. ad eumd. canon.* pag. 172. ed. Neap. 1770.

§. XIII. Vix ullus in antiquissimis Ecclesiis sacrarum imaginum usus fuisse videtur (1). Non enim eas adhiberi patiebatur et prisca Christianorum paupertas, et veterum formidolosorum temporum ratio, et petulantia ethnicorum, qui illas facile deridere, et contemnere poterant. Accedit et alia ratio, quod illae imagines aliquam sorte offensionem afferre poterant ethnicis, qui Christi religionem amplectebantur. Sed eversa idololatria, lateque diffusa, et constituta Christiana Religione, sacrae imagines aut pictura, aut statu is expressae adhiberi coeperunt (2).

(1) Nullum quidem est, quod ego sciam, antiquum monumentum, unde colligi possit, tribus prioribus saeculis in Ecclesiis adhibitas fuisse sacras imagines uti nunc adhibentur. Hoc tantum certum est, iis etiam temporibus non plane ignotum fuisse earumdem imaginum usum. Nam Pastoris suis humeris ovem gestantis, hoc est Christi imaginem in calice extantem memorat Tertullianus de *Pudicit.* cap. 27. pag. 559 *Paris.* 1675., et Lucianus *Dial. Philopater* t. 3. pag. 697. ed. *Amstelæd.* 1743. satis clare indicat imaginem S. Pauli, quam ipse viderat, et quam petulanter irridet. Adde quod de muliere Syrophoenissa scribit Eusebius *Histor. lib.* 7. c. 18. pag. 342. *edit. cit.*, eam ex sanguinis fluxu a Christo Domino sanata in ejus honorem aeream statuam erexisse, quae Eusebii aetate adhuc Caesareae Philippi visebatur. Quam statuam cum ethnici Juliano Apostata im-

peratore confregissent, Christiani ejus frustra collegerunt, et in Ecclesia collocarunt, sicuti narrat Sozomenus *Histor. lib. 5. cap. 21. pag. 212. cit. ed. Cantabrig.* Adde etiam antiqua vitra ex quibus prioribus quoque saeculis sacrarum imaginum usus ostenditur; sed quod illae in ecclesiis adhibitae non fuerint, uti post extinctam idololatriam adhiberi coeperunt, mirari non poterit quisquis eorum temporum rationem animo comprehensam, et exploratam habeat.

(2) Innumera fere sunt monumenta IV, V, et VI saeculi, ex quibus constat, ea tempestate sacras imagines in omnibus fere ecclesiis adhiberi consuevisse. Seligam quaedam, sed disertissima Patrum loca. Augustinus de *Consen. Evangelist. lib. 1. c. 10. opp. t. 3. par. 2. col. 8. ed. cit. memorat imaginem Christi pictam cum Petro, et Paulo; tum Apostolorum Petri et Pauli effigies ibidem coloribus expressas refert Ambrosius, et Hieronymus, quos laudat Selvagius antiq. Christiani lib. 2. cap. 4. §. 4. Similiter Gregorius Nyssenus sacrarum imaginum usum vehementer laudat. Orat. S. Theodor. opp. tom. 1. pag. 110. edit. Paris. 1615., et huc etiam referenda sunt testimonia Asterii Amaseae in Ponto Episcopi Panegiric. de S. Euphem. apud. Ruinart. p. 490. n. 1. ed. Amstelaed. 1713, Paulini Natal. 9. et 10. Felic. p. 641. vers. 511. et seq. edit. Veron. 1736. Ven. Bedae, in S. Benedicti Episcopi Abb. Apud Mabillonium Act. SS. Bened. saec. II. lib. 1. numer. 6. et 9. pag. 964. et 966. edit. Venet. 1733., et Theodoreti *Histor. relig. vit. 26. pag. 882. tom. 3. ed. Paris. 1642*, qui refert B. Simeonis Stylitae imagines frequentissimas Romae fuisse, ut tantum tamque Deo earum hominem multi Patronum haberent. Illud tamen animadvertit Petavius de *Incarnation. lib. 15. cap. 14. num. 5. theol. dogmat. tom. 4. par. 2. p. 589. ed. Paris. 1656.*, magis usitatas picturas, quam statuas fuisse. Locum autem Epiphani in *Epist. ad Joan. Hierosolymit. t. 2. p. 317. ed. Paris. 1622.* et canonem 36. Concilii Eliberitani, quae duo antiquo usui sacrarum imaginum obstare videntur, explicant Albaspinasens in *not. ad d. can. Eliberit. p. 174. ed. Neap. cit. Bona Rerum liturgic. lib. 1. cap. 16. §. 2. tom. 1. pag. 328. ibique Sala Not. 6. et seq. p.**

331. *ed. Taurin.*, Schelestratius *de Disciplin. arcan.* cap. 7., art. 3. p. 122. *et seq. ed. Rom.* 1685., Pagi-
 us in *Baron. ad annum* 57. n. 113. tom. 1. p. 455. *ed.*
Lucae, Assemanus *de Eccl. reveren. et asyl.* art. 5. p.
 59. Natalis Alexander *Histor. eccles. sec. 3. Diss.* 21. art.
 2. *et cap. 6. art. 28. t. 4. pag.* 139. *et seq. et* 314. *ed.*
Ven. 1776. Consule eundem Natalem Alexandrum, qui
 adversus antiquiores recentioresque Iconomachos, prae-
 sertim adversus Joannem Dallaeum Calvinianum homi-
 nem late disputat de cultu sacrarum imaginum *Dissert.*
 9. saec. 8. t. 6. pag. 94. *et seq.*, atque illud recte ani-
 madvertit, imaginum usum in templis rem esse discipli-
 nae, sed earum usu semel constituto, rem esse fidei ho-
 norariam earum venerationem.

§. XIV. Exteriores Ecclesiae partes erant aedi-
 ficia, quae ad eam pertinebant, sed Ecclesiae an-
 gustiori sensu acceptae parietibus non includebantur.
 Talis erat *exterior Narthex*, qui *vestibulum* et
atrium, sive *aream* comprehendebat. *Vestibulum*
 erat primus aditus, inter quem, et Ecclesiam angu-
 stius acceptam media erat area, sive atrium, locus
 scilicet, cujus medium sub dio erat, latera vero qua-
 tuor porticibus cingebantur. Erant in medio aquae
 salientes, seu putei, et canthari, aut conchae ubi
 Christiani templum ingressuri manus et os lava-
 bant (1); unde usus aquae benedictae repetendus
 est (2).

(1) Eusebius *Histor. lib. 50. cap. 4. p.* 473. *citat.*
edit. S. Paulinus Epist. 32. ad Sever. p. 205. *edit. cit.*
Veron. S. Jo. Chrysostomus in *Joan. Hom. 73. num.*
 3. p. 433. tom. 8. *edit. Paris. cit.* Vide etiam Variorum
Notas in S. Paulin. Epist. 13. num. 41. pag. 882. *et*
seq. edit. citat.

(2) Usus aquae benedictae ab Apostolica traditione
 profectum, semperque in Ecclesia observatum docent Ba-
 ronius *ad an.* 132. num. 3. tom. 2. p. 122. *ed. Lucae*,
 et Bona *Rer. liturg. lib. 1. cap. 20. §. 5. tom. 2. p.* 77.
ed. Taurin. Auctor *Constit. Apostolic. lib. 8. cap.* 29.

apud Cotelierum *PP. Apostolic. tom. 1. pag. 411. ed. Antwerp. 1698.* benedicendae aquae formam describit. Memorant etiam aquam sanctificatam, aut benedictam Tertullianus *de Baptism. cap. 4. p. 225. edit. Venet. 1744.* Cyprianus *Epist. 70 ad Januar. col. 500., ed. Venet. 1758.*, Epiphanius *l. 1. Haeres. 30. num. 12., p. 137. edit. Colon. 1682.*, Ambrosius *De Sacram. lib. 1. cap. 5. num. 15. opp. t. 3. col. 443. edit. Venet. 1751.* Theodoretus *Histor. Eccles. lib. 5. cap. 31. p. 197., edit. Taurin. 1748.*, aliique Patres. Decretum tamen Alexandri I, quod a Gratiano descriptum est *Can. 20. dist. 3. de Consecr.*, pertinet ad falsas decretales Isidori Mercatoris. Quae haeretici obijciunt adversus usum aquae benedictae, solide inter caeteros expendit, atque refellit Robertus Sala in *notis ad cit. Bonae locum p. 78. et seq.*

§. XV. Cetera aedificia circum Ecclesiam generali *exedrarum* nomine vocabantur, eaque erant *Baptisterium, Secretarium, sive Diaconicon, Pastophorium, Schola, Bibliotheca.* *Baptisterium* erat satis amplum aedificium, ac duabus constabat partibus, vestibulo, in quo catechumeni abrenunciationes emittebant, ac domo interiori, in qua fiebat ablutio, ritusque ceteri in baptismo adhibiti peragebantur (1). *Secretarium, sive Diaconicon* locus erat, in quo sacra indumenta, vasa, ac reliqua Ecclesiae supellex servabantur (2). *Pastophorium* generale nomen est, quo multa significantur (3). Sed ut plurimum, designat aedificia, quae stabant ab utroque Ecclesiae latere ad extremitatem orientalem (4), et custodum, ac ministrorum templi domicilium (5). *Schola* et *Bibliotheca* locus erat, in quo animi literis, atque doctrinis excolebantur (6).

(1) Baptisterium separatam ab Ecclesia locum fuisse, ostendit Martenius *de Antiq. eccles. rit. lib. 1. cap. 1. 2. num. 7. tom. 1. pag. 4. ed. cit.*, ibique etiam ob-

servant Fratres Ballerinii in *Zenon. lib. 2. tract. 31. p. 241. tom. 1. edit. August. Vindelic.* Saeculo tamen VI., intra Ecclesiam baptisteria constitui coepisse ex Gregorio Turonensi docet Durantus de *Rit. eccles. lib. 1. cap. 19.*

(2) Atque hoc quidem *Diaconicon* magnum erat, de quo vide Du Cangium in *Glossar.*; nam quod dicebatur *Diaconicon Bematis*, id erat intra Ecclesiam, eoque Diaconi ea, quae erant ad sacram liturgiam necessaria ex Diaconico magno deferebant, ut ad manus essent, Auctor *Chronic. Alexand. p. 390. ed. Paris.*

(3) *Pastophorium* generali nomine usurpatum comprehendebat etiam *Diaconicon*, et *Gazophylacium*, videlicet locum illum, in quo ponebantur populi oblationes, quae super altare ponendae non erant, sed potius Episcopi domum mittendae judicabantur.

(4) Memorat *Pastophoria* Auctor *Constit. Apost. lib. 2. cap. 57. p. 264. ed. cit.*, quo ex loco intelligimus, ea fuisse loca ex utraque Ecclesiae parte versus orientem. Ipse Auctor deinceps *lib. 8. c. 13. p. 409.* eorum locorum usum explicat, cum illuc Eucharistiae reliquias, post omnium communionem, deferri jubet.

(5) Consule Schelestratum in *Conc. Antioch. p. 186.*

(6) De cunctis exterioribus antiquarum ecclesiarum partibus late disputat Binghamus *Origin. eccles. loc. 8. cap. 7. tom. 3. p. 252. et seq. cit. ed.*, et Selvagias *Antiquit. christian. lib. 2. cap. 3.*

S E C T I O I.

DE CONSECRANDIS , ET RECONCILIANDIS
ECCLESIIS.

-
- | | |
|--|---|
| XVI. Consecratio Ecclesiarum, et ejus antiqui ritus. | tio ad Episcopum pertinet. Ea non iteranda. |
| XVII. Ritus, qui nunc obtinent. | XIX. Ecclesia violata, aut polluta. |
| XVIII. Ecclesiae consecra- | XX. Ea reconcilianda est. |

§. XVI.

Aedificata Ecclesia, ut primum fieri potest, consecratur, vel saltem benedicitur; nam secus in ea rem divinam conficere nefas est. Antiquissimus est Ecclesiarum consecrandarum usus (1); sed non iidem semper ritus, eademque caeremoniae adhiberi consueverunt. Ex veteri disciplina vicini Episcopi vocabantur (2); et interdum etiam concilia celebrari solebant (3). Episcopi sermones habebant (4), cuncti fundebant preces, ac denique divinis sacrificiis, mysticis oblationibus, hymnis, aliisque pietatis operibus summo omnium gaudio, et celebritate consecratio peragebatur (5). Martyrum quoque reliquias, ritu saltem Romano, adhibitas fuisse constat (6).

(1) Ecclesiae tantum IV. saeculo, pacato Constantini imperio, consecrari coepisse multi arbitrantur, laudantque Eusebium *Histor. lib. 10. c. 3. p. 464. ed. cit.*, et Athanasium *Apol. ad Constant. n. 17. et 18., opp. tom. 1. p. 242. et 243. edit. Patav. 1777.* Equidem iis

facile assentior, si publicam illam, et solemnem consecrationem intelligunt, quae tantum pace Ecclesiae data absolvi potui, sed ab iis valde dissentio, si etiam privatam consecrationem excludunt, ac plane omnem adhibitum negant actum religionis, per quem Ecclesia divino cultui addiceretur. Nam templorum consecrationem e veteri testamento ad novum, atque ab Apostolis ad eorum successores transiisse, semperque in Ecclesia retentam, ac servatam arbitror. Quomodo expedita fuerit vetus consecratio toto illo temporis spatio, quo ethnici homines imperio potiebantur, incertum est; et forte initio consistebat in solemni gratiarum actione, certisque precibus, quas tunc eorum temporum usus postulabat, quae est simillima veri conjectura Josephi Aloysii Assemani praestantissimi olim in Romana Academia Collegae mei, mihiq; dum vixit amicissimi in *Tract. de Eccles. rever. et asyl. art. 6. pag. 64*, et Laurentii Selvagii in *Antiquit. Christian. lib. 2. cap. 5. §. 1. Consule Bonam Rer. liturgic. lib. 1. cap. 19. §. 3. tom. 2. p. 81. et seq. ibique Salam in Not.*

(2) Vide Eusebium *Histor. lib. 10. cap. 3. p. 464. et de Vit. Constant. lib. 4. cap. 43. p. 650.*, Socratem *lib. 1. c. 28. p. 65.*, Sozomenum *lib. 2. c. 26. p. 81.*, Theodoretum *loc. 1. c. 31. pag. 64. omnes ed. Valesii Cantabrig. 1720. Augustinum Ep. 269. ad Nobilium col. 902. opp. tom. 2. ed. Ven. cit.*

(3) Huc propter dedicationem Ecclesiarum frequentes habitae sunt Synodi, qualis fuit Antiochena an. 341, quae inde in *encaeniis* dicta est.

(4) Plures hujusmodi sermones apud Ambrosium, Augustinum, atque alios extant.

(5) Eusebius in *Vit. Constantin. lib. 4. cap. 45. p. 651. ed. citat.*

(6) Ambrosius *Ep. 22. col. 931. n. 13. opp. tom. 3. ed. Ven. cit.*, Paulinus *Ep. 32. ad Severum col. 199. num. 7. ed. Veronae 1736.*

§. XVII. Ritus, qui nunc servantur, describit Pontificale Romanum (1), cujus decreto diei con-

secrationis anteire debet jejunium, et vesperae canendae coram reliquiis, quae subtus altare collocantur. Deinde Episcopus mane ter ipsam Ecclesiam exterius circumit, et aqua benedicta adspersit; tum Ecclesiam ingreditur, delineato duplici graeco, ac latino in ipso templi pavimento alphabeto, ac unaquidem in porta, duodecim vero in interioribus parietibus signatis crucibus, iisque sacro chrismate linitis, psalmis, hymnis, precibus, aliisque ritibus consecrationem perficit; denique Missam celebrat, quae tamen ad vim intimam consecrationis non pertinet. Altaria etiam consecrantur, et suos etiam ob eam rem habent ritus, et caeremonias (2).

(1) *Far. 2. tit. 2. p. 32. ed. Catalani Rom. 1739.*

(2) *Vide Pontificale Romanum loc. cit. tit. 3. p. 137. et seq.*

§. XVIII. Consecratio Ecclesiae actus est sacer, et sollemnis, per quem ea divino cultui addicitur (1). Tantum Episcopus Ecclesiam consecrat dioecesis suae, neque haec Presbyteris potestas est (2). Quovis die fieri potest consecratio, quamquam fieri soleat die festo (3), et sollemnia sacra dedicationis quovis anno celebranda sunt (4); semelque facta nunquam iteratur, nisi tota pene collapsa, aut exusta instauretur Ecclesia, vel nisi de illius consecratione dubitetur (5). Altaris etiam consecratio non repetitur, nisi frangatur, aut nisi evellatur e basi, ubi affixum fuerat (6).

(1) *Ecclesiae consecratio, et dedicatio passim confunditur, quasi Ecclesiam consecrare, ac dedicare unum idemque sit; sed revera alia consecratio, et alia dedicatio est, quod observat Mazochius de Camp. Amplit. cap. 3. Diatr. de consecrat. et Epist. de Dedicat. sub*

ascio cap. 1. Dedicatio proprie est *εγκαινία* hoc est initiatio, et primus rerum usus, consecratio autem potius ad caeremonias pertinet, quibus ecclesiae consecrantur. Sed quoniam utrumque conjunctim perficitur, factum est, ut duo haec vocabula indiscriminatim accipiantur.

(1) *Can. 9. et 25. de Consecr. dist. 1. cap. 1. de Relig. domib.*

(3) *Cap. 2. de Consecr. eccles.*

(4) *Can. 16. et 17. de Consecr. dist. 1.*

(5) *Can. 16. 18. et 20. de Consecr. dist. 1.*

(6) *Can. 19. de Consecr. dist. 1. Cap. 1. de Consecr. eccles.*

§. XIX. Consecrata Ecclesia, si violetur, aut polluat, reconciliari debet. quoniam in ea res divina fieri non potest (1). Polluitur autem injuriosa humani sanguinis effusione, et homicidio quod, etiam non effuso sanguine, in Ecclesia patratum est (2); item humani seminis voluntaria effusione (3); denique infidelis, aut excommunicati vitandi sepultura (4).

(1) *Cap. ult. de Consecr. eccles.*

(2) *Cap. 4. eod.*

(3) *Cap. 4. et ult. eod.*

(4) *Cap. 9. eod., Can. 27 de Consecr. dist. 1.*

§. XX. Reconciliatio fit ab Episcopo, missis precibus, et aspersione aquae, cum qua vinum, et cinis commiscetur (1). Quae caeremonia designat peccatorum reconciliationem, eoque videtur spectare cinis, qui in publica poenitentia adhibebatur. Si Ecclesia benedicta tantum erat, non consecrata, etiam Presbyter lustrali aqua reconciliationem facit (2). Cum pollutio facta est ob sepulturam excommunicati, aut infidelis, ante omnia cadaver, si discerni possit, effodiendum est (3). Reconciliata autem Ec-

clesia, reconciliantur etiam altaria, eique conjuncta coemeteria, quae duo simul cum violata Ecclesia violantur (4).

(1) *Cap. 4. 7. et 9. de Consecr. Eccles.*

(2) *Cap. ult. eod. ibique Gloss.*

(3) *Can. 27. et 28. de Consecr. dist. 1.*

(4) *Cap. unic. de Consecr. eccles. in 6.*

SECTION II.

DE IMMUNITATE ECCLESiarUM.

XXI. Sacrorum locorum reverentia apud omnes gentes.

XXII. Christiani suarum reverentia Ecclesiarum cunctis praestare debent.

XXIII. Quanta fuerit veterum Christianorum reverentia.

XXIV. Unde orta Ecclesiarum immunitas?

XXV. In Ecclesia profani

actus non exercendi.

XXVI. Jus asyli.

XXVII. Unde repetendum?

XXVIII. Regendum legibus Ecclesiasticis.

XXIX. Quae loca asyli jure potiuntur.

XXX. Quorum criminum rei ab ecclesiastico asylo excludantur.

XXXI. Quomodo hi ab Ecclesia edacendi?

§. XXI.

Omnes gentes, quae templa habuerunt, habuerunt autem cunctae, quibus erat religio (1), aedes suis Diis addictas, et consecratas praecipuo quodam honore, ac reverentia prosequi consueverunt. Hinc nefas erat violare templum, aut quidquam in eo fa-

cere aliter, ac deceret, in ipso armorum strepitu, ac tumultu militaris licentia templorum jura sancta, et inviolata servabat. Hebraeorum templum quantam venerationem haberet, omnibus compertum est: et certe nemo non intelligit, quam venerandus et colendus esset locus, quem ipse Deus sanctum se fecisse affirmaverat, quem suam domum elegerat, et sponponderat, se auditurum preces, quae in eo funderentur (2).

(1) *Si terras obeas, inquit Plutarchus, invenire possis urbes muris, literis, Regibus, domibus, opibus, numismate carentes: urbem templis, diisque carentem nemo uspiam vidit. Ita videlicet ethnicus homo loquitur.*

(2) Isai. LVI. 7. Genes. XXVIII 17. Exod. III. 5. Machabeor. II. III. 12. Reg. III. VIII. 13. et seq. et IX. 3.

§. XXII. Christiani suorum reverentia templorum non Hebraeis, non reliquis gentibus concedere, imo vero cunctis praestare debuerunt. Nam in eorum Ecclesiis non hircorum, aut vitulorum sanguis offertur, sed ipse Christus sine cruore immolatur, atque ipse adest Deus reali praesentia sua, qua in re Hebraeos vincunt; uti cultu etiam vincunt ceteras gentes, quae non verum, uti ipsi, colebant effectorem, et dominatorem rerum omnium Deum, sed Deos hominum voluntate confictos, et omnium scelerum contagione contaminatos.

§. XXIII. Hinc Ecclesiae a Christianis semper pro sacris usibus, cultuque Religionis adhibitae, exclusaque omnia, quae non aliquo modo ad pietatem tenderent, vel proxime ad eam essent referenda (1). Episcopi mori maluerunt, quam Ecclesias ab haereticis violari sinerent (2); Reges Ecclesiam ingressuri diadema deponebant, atque extra il-

lam custodias relinquebant (3); cuncti autem fideles manus, atque os lavabant, ut significarent innocentiam, ac puritatem, quam omnes in illo tam pleno reverentia, ac majestatis loco praeseferre oportebat (4), calceosque detrahebant (5); in ipso vestibulo caput, ac genua flectebant (6), osculabantur, et circumplebant amplexu januas, atque columnas (7); denique Ecclesia tutissimus erat rerum servandarum locus, et perfugium miseris, quos eo vocaverat spes tutelae, et metus publicae calamitatis (8).

(1) Itaque ne quod in Ecclesiis scelus latenter admitteretur, prohibita sunt foeminae in iis vigiliis agere. Concilium Eliberitanum *Can. 35. col. 254. tom. 1. Collect.* Harduini. Eademque de causa vetitae sunt in Ecclesia convivia. Concilium Carthaginense III. *Can. 3. col. 964. tom. 1. collect.* Harduini, itemque vetitae aut certe imminutae agapae, scilicet convivia illa caritatis, quae in Ecclesia fiebant, quaeque Apostoli instituerant. Concilium Laodicenum *Can. 28. col. 785. tom. 1. Collect.* Harduini. Hinc Synodus Gangrensis duos edidit canones, videlicet *Can. 5. et 6. col. 534. et 536. t. 1. Collect.* Harduini adversus haereticos Eustathianos, Massilianos, atque alios, qui inter Ecclesias, privatasque domos discrimen non faciebant, quaeque in Ecclesia peragebantur ecclesiastica officia, etiam domi peragi posse existimabant. Quis vero ignorat factum Christi Servatoris, qui a templo emptores ac venditores, et ceteros negotiationem exercentes ejecit? *Matt. xxi. 12. et 13. Joan. II. 14. et seq.*

(2) S. Ambrosius *Ep. 17. n. 13. col. 869. et seq. t. 3. ed. Venet. 1751.*

(3) S. Jo. Chrysostomus *Orat. post redit. ab exil. tom. 3. pag. 428.* Idemque habetur in *Serm. 2. in Penitencost. int. spur. tom. 1. pag. 791. ed. Paris. 1721.* Vide etiam Edictum Theodosii post *Leg. 4. Cod. Theodos. de iis qui ad Eccles. confug. tom. 3. pag. 393. ed. Lipsiae 1738.*

(4) Hujus consuetudinis crebra mentio est apud Chry-

sostomum, Eusebium, Tertullianum, Synesium, Paulinum, et ceteros, quorum supra testimonia descripsi.

(5) Memorat hanc consuetudinem Joannes Cassianus *de Instit. caenob. lib. 1. cap. 10. pag. 12. edit. Francofurti, 1722.* non tamen ea generatim ubique videtur obtinuisse.

(6) Quamquam nulla certa hujus consuetudinis demonstratio dari possit, tamen eam valde probabilem esse, ostendit Binghamus *Orig. eccles. lib. 8. cap. 10. §. 7. tom. 3. pag. 344. cit. edit.*, laudatque Chrysostomi testimonium, unde intelligimus, candidatos baptismi procidere, seque in genua projicere consuevisse, cum baptisterium accedebant.

(7) Ambrosius *Epist. 20. num. 26. col. 908. tom. 3. edit. cit.*, Paulin. *Not. 6. Felic. p. 433. vers. 250. ed. Veronae 1735.*, Prudent. *Hymn. 2. in S. Laurent. vers. 530. p. 131. ed. Paris. 1687.* Cassiod. *Histor. tripart. lib. 9. c. 30. p. 344 tom. 1. ed. Rotomagi 1679.* Auctor *Eccles. hierarch. c. 2. §. 4. tom. 1. p. 260. edit. Antwerp. 1633.*

(8) S. Augustinus *de Civit. Dei lib. 1. cap. 1. col. 3. oper. tom. 7. edit. Venet. cit.*, S. Hieronymus *Epist. 127 ad Princip. num. 13. col. 154. opp. tom. 1. edit. citat.*, S. Gregorius Turonensis *Histor. lib. 5. c. 4. col. 205. edit. Paris. cit.* Orosius *lib. 7. cap. 39. pag. 573. edit. Lugduni Batavorum 1738.* Cassiodorus *Var. libr. 12. cap. 20. pag. 197. tom. 1. edit. cit.*, Sozomenus *Histor. lib. 9. cap. 10. pag. 576. edit. Valesii Cantabrig. 1720* Ac saepe ipsi hostes eos, quibus parcere volebant, ad Ecclesias ducebant, ut ibi tuti essent ab aliis, qui ipsis vim, et injuriam inferre potuissent.

§. XXIV. Ipse sensus Religionis impressus, atque insitus in hominum animis fecit, ut Christiani ita colerent, et venerarentur Ecclesias suas; atque hic ipse sensus intimus ecclesiasticae immunitatis origo, et fundamentum est. Non enim Ecclesiarum immunitas inducta est a legibus, ut quidam putant, sed inducta est a Religione, sive a reverentia, qua in Religionem ferri debemus, et proinde Ecclesia-

sticae Potestatis, cujus est moderari res Religionis, ejus est etiam de ecclesiastica immunitate leges constituere.

§. XXV. Duae sunt immunitatis partes, quarum prima est, ut nullus profanus actus, qui minus decet loci sanctitatem, in Ecclesia exerceatur. Quare procul ab ea judicia criminalia, item judicia civilia, quae ad Forum saeculare pertinent (1); procul ludi theatrales, convivia, comoediae, choreae, et cantus non pietatis, sed oblectationis causa instituti (2); procul civiles conciones, et profana concilia, procul nundinae, contractus, negotiationes (3). Acta in Ecclesiis saecularia judicia irrita etiam sunt, criminalia non tantum irrita, sed etiam poenam afferunt excommunicationis (4): contractus tamen valent.

(1) *Cap. 1. et 5. de Immunit. Eccles.*

(2) *Can. 1. dist. 92., cap. 12. de Vit. et honest. cleric., Concilium Tridentinum Sess. 22., decret. de Observ. et vitan. in miss.*

(3) *Cap. 2. de Immunit. in 6.*

(4) *Cap. 6. et 7. de Immunit.*

§. XXVI. Pars altera immunitatis eo spectat, ut debitores, et rei criminum ad Ecclesiam confugientes tuti sint, neque illinc divelli possint. Quod jus asyli appellamus. Quemadmodum homines cum in periculis versantur, a Deo opem, et auxilium postulant, ita ad Ecclesias confugiunt, quoniam in illo precis, et obsecrationis loco se facilius a Deo, id, quod optant, consequi. atque ibi tutum habere perfugium sperant, quod loci sanctitas, et reverentia pollicetur. Natura ipsa atque in animis impressa vis Religionis omnes vocat ad hoc commune praesidium, per quod quasi se in Dei tutelam reci-

piunt, et unde eos non videntur dejecturi ceteri homines, qui Ecclesias reverentur. Quare Ecclesiasticum asylum pars est reverentiae, quae Ecclesiis debetur; atque hanc reverentiam ipsa vis Religionis induxit.

§. XXVII. Ita natum est Ecclesiarum asylum; et vero antiquissimae, quae de eo sunt, leges non asylum constituunt, sed jam antea constitutum, et ubique receptum ostendunt (1). Scilicet ut publice Christiana Religio dominari in civitatibus, atque in provinciis coepit, is statim habitus a cunctis est honor Christianorum Ecclesiis, ut qui ad eas confugissent, loci sanctitate, ac reverentia defenderentur. Adeo verum est, nullis opus fuisse humanis legibus, quae stabilirent jus asyli; quod jam affixum Ecclesiis, et earum venerationi communis omnium consensus agnoverat.

(1) Vetustissima, quae extat de Ecclesiarum asylo, est *Leg. 1. Codic. Theod. de His qui ad Eccles. confug.* Verum haec lex non asylum constituit, sed potius illud omnium moribus, et consensu jampridem fuisse constitutum, lateque patuisse demonstrat; quod ipsi etiam animadvertant Scriptores, quorum hac in re testimonium repudiare non possunt, qui aegre ferunt asylum Ecclesiarum, Jacobus Gothofredus in *Not. ad Leg. 1. Cod. Theodos. tom. 4. pag. 388. ed. Lips.* Binghamus *Orig. eccles. lib. 8. c. 12. §. 1. pag. 353. cit. edit.*, Van-Espenius *Diss. canonic. de Asyl. templor. cap. 1. §. 1.* Revera Gothofredus, et Binghamus loc. cit. complura collegerant antiqua monumenta, ex quibus patet, jam Ecclesiarum asylum obtinuisse multo ante, quam Theodosiana illa lex in manus hominum perveniret, et nulli umquam auctorum, uti inquit Binghamus, dubium fuit, quin id privilegium Ecclesiarum a tempore Constantini esse coeperit, licet nullae leges Theodosio vetustiores, sive in Justiniano, sive Theodosiano Codice de hoc ipso reperiantur. Atqui neque ulla lex extat Constantini,

quae Ecclesiarum asylum constituat, neque in antiquis monumentis ulla hujusce legis mentio, aut judicium est. An non id argumento est plane maximo, nullam ea de re legem a Constantino editam fuisse, quae aut nunc extaret, aut saltem aliqua ejus mentio esse deberet apud Eusebium, qui Constantini vitam accurate conscripsit, atque apud ceteros scriptores, qui eorum temporum historiam literis mandarunt? Quod si Constantini aetate jam asylum vigeat, neque illud erat ulla lege constitutum, planum est, illud induci debuisse a moribus, atque a consensu Christianorum in ipso imperio Constantini, hoc est eo ipso tempore, quo publicus Christianae Religionis cultus obtinere coepit. Hinc autem mos, et communis omnium consensus, qui statim erupit, cum primam erumpere libere potuit, unde ortus, nisi ortus est ex intimo sensu Religionis, atque ex impressa firmiter in omnium animis reverentia Ecclesiarum? Atque huc sane spectat S. Gregorius Nazianzenus *Orat. 20. de Laud. Basil. pag. 353. tom. 1. ed. Colon. 1690.*, qui narrat, S. Basilium protexisse viduam, quae ad altare confugerat, atque ait eum fecisse id, quod non tantum M. Basilium, sed etiam quivis alius Sacerdos facere debuisset, scilicet ut eam adsereret, retineret, omni cura tueretur, Dei clementiae, ac legi, quae altaribus honorem haberi jubet, manum porrigeret etc. Ita scilicet Nazianzenus antequam illa Theodosii lex prodiret, ecclesiasticum asylum referebat *ad Dei legem, quae altaribus honorem haberi jubet*. Quam Ecclesiastici asyli originem minime compertam, atque exploratam habent, qui eam a civilibus legibus repetendam putant; cum revera civiles hac de re leges omnium, quae extant, et quarum mentio habeatur, antiquissimae multo antea ecclesiarum asylum constitutum ostendunt. Anonymus quidem Scriptor, qui anno 1763. Florentiae libellam edidit cum titulo: *Discorso sopra l' asilo Ecclesiastico*; falsis et absurdis ratiunculis, quas a Paulo Sarpio pene omnes accepit, demonstrare conatus est, Christianorum asylum ex ethnica superstitione procedere; illud initio nonnisi meram Clericorum, et Episcoporum intercessionem fuisse, quae non dabat spem certam perfugii; sed tota erat posita in prece, et obsecratione, quam Princeps audiebat,

et
ne
ab
le
tai
et
coi
si
pro
sop
na
rui
et
tal
ex
cor
du
3.
ed.
ad
Isi
ita
ut
pri
ve
Cl
ru
m:
con
ips
tic
Ec
bli
au
qu
m
et
fau
in
co
vi

et despiciebat suo arbitratu; denique totum hoc de asylo negocium ad laicum Principem pertinere, quoniam illud ab ejus beneficio, et auctoritate profectum est. Mitto ceteros errores, quibus hic libellus abundat, et quos refutarunt Josephus Aloysius Assemanus *de Eccles. reverent. et asyl. animadvers. in discours. p. 79. et seq.*, ac Jacobus Pistorozzius opere peculiari. Tantum dico, quod si Christianorum asyllum ethnicae superstitionis argatur, propterea quod illud etiam ethnicis fuit, jam erit etiam superstitio Christianis habere templa, et cultum externum Religionis, quoniam etiam ethnici utrumque habuerunt. Imo vero quod haec reverentia templis ethnicorum, et statuis principum exhiberetur, multo magis ea immortalis, ac praepotenti Deo, ejusque domui a Christianis exhibendam esse, ostendunt Nicolaus I. in *Respons. ad consult. Bulgar. cap. 95. col. 382. tom. 1. Collect. Harduini, Concilium Matisconense II. can. 8. col. 462. t. 3. Collect. Harduini, et Theodosius junior in celebri edicto, quod extat post Leg. 4. Cod. Theod. de his qui ad Eccles. confug. tom. 3. pag. 396. edit. cit. Praeclare Isidorus Pelusiota Epist. 174. pag. 35. ed. Venet. 1745. ita firmum, certumque esse vult ecclesiasticum asyllum, ut illud violare non solum crudelitatis, sed etiam impietatis esse dicat. Et sane si ita Ethnici colebant, ac venerabantur Deos, quos veros putabant, superstitio erit Christianis colere, ac venerari Deum, quem unum verum esse certo sciunt? Nihil hoc magis absurdum, et magis impium dici potest. Quod de intercessionem Clericorum, et Episcoporum Anonymus scriptor addit, id ab ipsa refutatur Theodosii lege, cujus supra est facta mentio, et quam omnium antiquissimam esse dixi, quae de Ecclesiarum asylo disserat. Legis verba sunt haec: *Publici debitores si confugiendum ad Ecclesias crediderint, aut illico extrahi de latebris oportebit, aut pro his ipsos qui occultare probantur, Episcopos exigi.* Lex haec memorat disertissime debitores ad Ecclesias confugientes. et memorat etiam eorum extractionem, quae verba referri certe non possunt ad Episcoporum, et Clericorum intercessionem. Neque vero, antequam illa Theodosii constitutio emitteretur, Episcoporum intercessionem, sed verum, ac germanum, quale nobis est, ecclesiasticum*

asylum memorat Nazianzenus, *loc. cit.* cum narrat, Basilium defendisse viduam, quae contra vim sibi a Praefecto Ponti illatam ad altare confugerat. Similiter Altaris, atque Ecclesiae asylum, non Episcoporum intercessionem habet Ambrosius *Ep. 20. num. 8. col. 903. tom. 3. ed. cit.*, et Ammianus Marcellinus *lib. 15. num. 5. p. 51. et lib. 26. num. 3. p. 365. ed. Lips. 1773.* Atque eadem semper fuit sententia eorum omnium, qui post hanc aetatem floruerunt. Cyriacus, qui in locum Joannis Jejuuatoris factus est Patriarcha Constantinopolitani vertente anno 595, pro asylo, ne templi sanctitas violaretur, aduersus Phocam ipsum Imperatorem stetit, nec passus est, uti narrat Theophanes in *Chronograph. pag. 246. edit. Paris. 1655.*, ab Ecclesia educi Constantinam Mauriti, et tres ejus filias, nisi antea Phocas, eas salvas fore juratus confirmasset. Confer etiam S. Gregorium M. *epist. 37. lib. 1. et Epist. 38. lib. 10. opp. tom. 2. col. 527. et 1068. edit. Paris. 1705.*, Concilium Aurelianense I. *Can. 1., et IV. Can. 21. col. 543. et 1368. tom. 3. Concil. Labbaei edit. Venet. et Matisconense II. Can. 8. tom. 6. col. 676.* Non igitur Episcoporum intercessio cum ecclesiastico asylo confundi debet; intercessio obsecratio erat, et spem ponebat in venia, atque in misericordia Principis, sed asylum tuebatur reum jure sanctitatis loci, et reverentiae, quae Christianos Dei domum prosequi oportebat. Denique quod dicitur, ecclesiasticum asylum nisi beneficio Principis, atque a civilibus legibus esse protectum, id falsum esse demonstravimus, cum illud induxerit ipsa vis Religionis, et reverentia Ecclesiis debita, legesque civiles jam communi omnium consensu stabilitum demonstrent asylum multo ante quam ulla de eo civilis lex ederetur. Quod si non a civilibus legibus asylum procedit, sed a sensu intimo Religionis, atque a reverentia, quae Ecclesiis debetur, manifestum est, ejus curam, et regimen non ad Civilem Potestatem, sed ad eum pertinere cui Religionis cura, et Ecclesiarum regimen commissa, et commissum est. Quod si interdum laici Principes pietate praestantes de Ecclesiarum asylo leges tulerunt, non id ab ipsis factum est, ut primam asylum stabilirent, aut quod eorum legibus indigeret Ecclesia, ut haberet perfugium, quod

dabat ejus sanctitas , ac reverentia , atque ipsa vis Religionis ; nequo ideo dici potest , quod illorum esse debeat de asylo leges constituere. Civiles illae leges eo spectant , ut asyli jura sancte custodiantur , et earum etiam imperio , et auctoritate templorum veneratio firmetur , atque omnes metu quoque civilis coercitionis a sacrilega violatione deterreantur. Non dissimiles Imperatorum leges extant in utroque Codice , atque Novellis , de Fide , et Sacramentis , de Religione ipsa Christiana , de haereticis , apostatis , excommunicatis ; neque tamen eam ob causam Catholicus homo dixerit , jus Religionis , ac Religionem ipsam Christianam . ac Fidem a Principum auctoritate , et clementia pendere. Certe inter civiles leges , quibus ecclesiasticum asyllum confirmatur , celebre est Edictum Theodosii Junioris , cujus paulo ante facta mentio est , et ibi quidem Imperator asyllum , quod jampridem erat constitutum , repetit ex vi ipsa Religionis , atque ex naturali , et omnium animis insita reverentia Ecclesiarum. Neque aliud ferri debet judicium de antiquis Patribus , quos interdum ad Principes ivisse constat , ut de Ecclesiarum asylo leges impetrarent , unde in *Cod. cap. 56. apud Justellum Biblioth. Juris Canon. tom. 1. pag. 154. ed. Paris. 1661.* scriptum est : *ut pro confugientibus ad Ecclesiam quocumque reatu involutis legem de gloriosissimis Principibus mereantur , ne quis audeat eos extrahere.* Imo , et Patres illos legasse scimus Epigonium , et Vincentium ad Honorium Imperatorem , ut concederet asyllum Ecclesiis Africanis , quae lex confirmata est a Justiniano *Novel. de Eccles. constit. in Afric. coll. 10.* Nam eorum Patrum consilium fuit , ut Imperatoris gladio Ecclesiae , ac Religionis honos , et cultus defenderetur , atque ut Imperatores ipsi sacrorum Canonum decreta auctoritate , imperioque suo ad exitum perducenda curarent. Similiter Episcopi pluries ad Imperatorem confugerunt , ut de Christiana Religione decreta firmaret , ut ecclesiasticam libertatem adsereret , at catholicam fidem vindicaret : et multa harum rerum monumenta sunt in Codice Canonum Africanorum , tum in Codice Justiniani , et Theodosii , atque in Novellis Constitutionibus. Sed non ideo quisquam dixerit , Sanctissimos illos Episcopos potestatem in res sacras , ac Reli-

gionis, Ecclesiaeque regimen, et curam laico Princip committere voluisse. Saeculo IV. Eutropius Eunuchus Arcadium Imperatorem impulit ad tollendum jus asyli lata lege, quae est *L. 3. Cod. Theod. de His qui ad Eccles. confug.*; sed postea confugere ipse ad Ecclesiam debuit, ut vitam tueretur suam, atque ita *suomet facto*, ut inquit Chrysostomus *Hom. 1. In Eutrop. opp. tom. 3. col. 383. ed. Paris. 1721, legem suam primus abrogavit.*

§. XXVIII. Quod si Ecclesiarum asylum ex ipsa earum sanctitate, et reverentia procedit, consequens est ut regatur auctoritate ejus, cui regimen ecclesiasticarum rerum commissum est. Certe Ecclesiasticis legibus et ampliati, et arctati sunt asyli fines, uti rerum ratio postulare videbatur. Naturalis reverentia in Ecclesias fecit, ut eae jure asyli fruerentur: deinceps illud traductum est etiam ad ea loca, quae visa sunt reverentia, et obsequio digna vel propter dignitatem eorum, qui in illis habitant.

§. XXIX. Hodie igitur asyli jure fruuntur omnes Ecclesiae, etiam quae consecratae non sunt, earumque porticus, et atria (1); quin et locus, in quo, primo lapide solemniter jacto, Ecclesia aedificanda est (2); itemque oratoria Episcopi auctoritate constituta, ac perpetuo divinis addicta, non autem oratoria, quae sunt in domibus privatorum, quamquam in iis cum venia Sedis Apostolicae res divina peragatur; similiter palatium Episcopi; domus, quae ad parochiam pertinet, et in qua parochus habitat; domus canonicales, et sodalitorum, quae eorum ecclesiis conjunctae sunt; turris campanaria, quae intra passus triginta ab Ecclesia distat; xenodochia, et coemeteria (3); domus Regularium; denique etiam sacerdos Eucharistiam deferens ad se confugientibus asylum praestat (4).

(1) *Can. 8. 9. 20. 36. cap. 17. quaest. 4., Cap. 5., et 9. de Immunit. Eccles.* Quia etiam *Can. 6. et 35. caus. 17. quaest. 4.* jus asyli traducitur ad passus 40. extra Ecclesiam cathedralem, ad passus 30 extra Ecclesiam inferiorem: verum hujus loci asylum nunc antiquatum esse, tradit Card. de Luca *Disc. 12. n. 27. Miscell.*, ac solum obtinere ostendit Pignatellus *Consult. 426. t. 1.* ubi consuetudine receptum est.

(2) Sac. Congregatio Immunitatis in *Januen. 5. Octobris 1688.*

(3) *Cap. 10 de Immunit. Eccles.*

(4) Consule Fagnanum in *Cap. Eccles. 9. de Immunit. eccles. per tot. tom. 3., Ferrarium Biblioth. verb. Immunitas art. 2, Giraldum Exposit. Juris Pontif. par. 1. sect. 637. p. 471.,* a quibus haec omnia, quae ad asylum pertinent ecclesiarum, latissime explicantur.

§. XXX. Publicas tamen ob causas factum est, ut rei graviorum quorundam criminum ab asyli beneficio excludantur. Atque hi quidem sunt qui publice, impudenter aliena bona diripiunt; qui agros depopulantur; qui hominem in Ecclesia, vel ejus coemeterio interficiunt, aut ei membrum amputant; sicarii, qui scilicet alieno jussu alicui mortem inferunt; et qui tanti facinoris causa eorum operam conducunt, aut eos domi excipiunt; homicidae, nisi vel casus, vel justa sui defensio homicidio causam dederit; Judaeus, qui susceptam ante christianam religionem deseruit; haereticus, nisi ad Ecclesiam confugerit ob aliud crimen, quam haereseos; laesae majestatis reus; qui vim inferunt confugientibus ad Ecclesiam, atque eos inde violenter abducunt; qui in literis Apostolicis falsi crimen admiserunt; qui montem Pietatis, aut alia similia loca administrantes falsi, aut furti, patrato crimine, ita publicam arcam minuunt, ut poenae mortis subijciantur; qui

aureas, et argenteas monetas privatim cudunt, aut vitiant, et corrumpunt; qui mentito Curiae nomine sese in alienas domos inferunt, et intrudunt, atque ibi rapinas faciunt, et homines trucidant, aut membra caedunt (1).

(1) Late de his omnibus agitur in cap. 6. et 10. de Immunit. Eccles. in Bulla Cum alias 17. Gregorii XIV. Bullar. tom. 5. par. 1. p. 271., in Bulla Ex quo 73. Benedicti XIII. tom. 12. p. 1., in Bulla In supremo 171. Clementis XII. tom. 14. p. 17., et in Bulla Officii 29 Benedicti XIV. tom. 3. p. 160. ejus Bullarii ed. Romae seu Ven. 1754. Consule Benedictum XIV. Instit. Eccles. Instit. 41. §. 3. et seq. et Giraldum Exposit. Jur. Pontif. par. 1. lib. 3. sect. 635. p. 464. et seq. Recte autem animadvertit Benedictus XIV. loc. cit. §. 9. n. 33., quod praeter ea scelera, quibus omnis immunitas jure negatur, si cetera quoque gravia sint, vel saepius admittantur, auctoritate Summi Pontificis, vel Sac. Congregationis immunitatis, in carceres Ecclesiastici Judicis ex loco immuni rei detrudi possunt nomine Ecclesiae, causaque ipsorum cognita poena constitui paulo quidem mitior, ut simul et rei poenam perferent, et ecclesiastici asyli ratio habeatur.

§. XXXI. Qui se criminibus inquinaverunt tantorum facinorum, ac tam atrocium, dimovendi ab Ecclesia sunt, ut meritis plectantur poenis. Qua in re certa est adhibenda ratio, ne quis imprudenter, et temere privetur beneficio, quod ad se confugientibus Ecclesia praestat. Nimirum ab ecclesiastico Judice videndum est, num reus patrarit crimina propter quae immunitate prorsus indignus habeatur, ejusque auctoritate, ac praesente viro ecclesiastico, quem ipse designavit, reus de asylo dimovetur (1).

(1) Benedictus XIII. cit. Const. Ex quo.

S E C T I O III.

DE CAPELLIS, ET ORATORIIS.

XXXII. Quid Capella, et
Oratorium.

Oratorii distinctio.

XXXIII. Publici, et privati

XXXIV. Altare portatile.

§. XXXII.

Capellae (1), et Oratoria sunt sacella, quae in agris sedent, aut in civitatibus, aut in magnatum domibus, quaeque sacris extraordinariis addicta sunt. Duplex oratorii genus, publicum, et privatum. Publicum est, quod publicam habet januam, et quod culvis e populo patet; privatum, quod in privatis domibus, et quod domini arbitrio constituitur.

(1) Du-Cangius in *Glossar. med. et infim. latinit. verb.* Capella hoc nomen repetit a *capa*, hoc est parva veste S. Martini, quae in Oratorio Regis Galliarum servabatur. Contra alii *Capellae* nomen factum ostendunt a *capa*, hoc est theca reliquiarum S. Martini, et aliorum, quam Galliarum Reges in oratorio habebant, et quam secum deferre solebant, cum ad bellum proficiscerentur. Nimirum *copella* orta est a *Cap*, sive *Capa*, et *Cap* vox Celtica est, uti tradit Leibnitius *Collect. ethymolog. par. 2.*, suaeque origine significat capitis tegmen, ac generalim quodvis corporis tegumentum, ampliorique sensu rerum pretiosarum thecas, et conditoria. Evodius lib. 1. de *Miracul. B. Stephani*, *Capella argentea*, inquit, in qua erat reliquiarum portio. Consule Pithoeum *Glossar. ad libr. capitular. verb.* Capella, et Bignonium in *Not. ad Marculf. formul.* [48. lib. 1., utram-

que apud Balutium *Capitular. Reg. Francor. tom. 2. col. 491. et 626. ed. Venet. 1733.*

§. XXXIII. Publicum oratorium Deo semel dicatum in profanos usus converti nequit (1); quod de privato oratorio non est ita (2). Neque tantum in publicis oratoriis preces ad Deum mittuntur, sed etiam divinum sacrificium super altari rite consecrato peragitur. Hinc ea cum Episcopi auctoritate aedificari, ac benedici debent (3), et campanam habent; per quam populus ad rem divinam, atque ad fundendas preces publice vocatur (4).

(1) *Cap. 51. de Regul. jur. in 6.*

(2) Vulgatum est illud, quod post Glossam, et ceteros Juris Canonici interpretes tradit Fagnanus in *Cap. Auctoritate 27. de Censib. num. 6.* quod hodie privatam oratorium est, *cras poterit fieri camera*, cum non sit locus Deo dicatus. Videndi in primis sunt Jo. Baptista Gatticus, Josephus de Bonis, et Fortunatus a Brixia, qui peculiaribus operibus de oratoriis publicis, et domesticis late ac diligenter agunt.

(3) *Can. 10. cap. 18. qu. 2.*

(4) *Cap. 16. de Excess. Praelat.* In privato tamen oratorio publicam campanam retineri vetat Caelestinus III. in *cap. 10. de Privileg.*

§. XXXIV. Privatum oratorium domi habere unusquisque potest, sed in eo Missam celebrare non licet, nisi haec facultas a Sede Apostolica impetrata sit (1). Verum Episcopi eo privilegio fruuntur, ut ad rem divinam faciendam non tantum domi suae oratorium habeant, sed etiam altare *viaticum*, seu, *portatile*, ut vocant, erigere possint in alienis quoque domibus, in quibus vel visitationem obeuntes, vel iter facientes hospitio excipiuntur, quin etiam in

his domibus, in quibus commorantur, cum probatis de causis absunt a dioecesi sua (2).

(1) *Can. 33. de Consecr. dist. 1.*, Concilium Tridentinum *Sess. 22. in Decret. de Observan. et evitan. in Celeb. Miss.* Confer Fagnanum *in cit. cap. 27. de Censib. num. 17.*, qui hoc Concilii decretum diligenter expendit.

(2) *Cap. 13. de Privileg. in 6.* Quod quidem Episcoporum privilegium a Tridentina Synodo minime fuisse sublatum, eoque potiri Episcopos electos, et confirmatos, quamvis consecrati non sint, ostendit Fagnanus *in cap. Quod nonnullis num. 6. et seq. de Privileg.* Cum autem Bonifacii Decretalis *in cit. cap. 12.* comprehendat *Episcopos*, eorumque superiores, manifestum est, idem privilegium etiam ad Cardinales pertinere, qui praeeminentia, et dignitate, non tamen ordine, sunt Episcopis superiores. Consule Fagnanum *loc. cit. num. 5. et 10. et seq.*, et Passerinum *in cit. cap. 12.* De jure altaris portatilis, quo fruuntur Episcopi, videnda in primis est Innocentii XIII. Constitutio Apostolici ministerii 34. §. 24. pag. 263. tom. 11. *Bullar. Roman. ed. Mainardi*; qua quidem constitutione declaratum est decretum ea de re editum a Clemente XI. die 15. Decemb. ann. 1703., illamque confirmavit Benedictus XIII., atque descripsit in Appendice Concilii Romani, ut ab omnibus observaretur. Confer etiam Benedicti XIV. literas *Magno* datas ad Primum Archiepiscopos, Episcopos Poloniae, atque in ejus Bullario descriptas n. 48. tom. 3. p. 216. *ed. Venet. 1754.*

S E C T I O IV.

DE SACRIS VESTIBUS, VASIS, CETERIS
AD ECCLESIAM PERTINENTIBUS.

- XXXV. Res Sacrae in ho- XXXVI. Sacra indumenta,
minum commercio versari vasa, eorumque benedictio.
nequeunt. XXXVII. Campanae.

§. XXXV.

Sacram supellectilem constituunt sacra indumenta sacerdotum, et ministrorum, vasa quae adhibentur, cum res divina conficitur, omnia demum ecclesiae, et altaris ornamenta. Cuncta haec quae Deo data, ejusque honori, ac cultui dicata erant, Majores nostri *anathemata* appellabant, quod essent a communi usu remota, atque sejuncta (1). Nam semper omnibus fixum, certumque fuit, res Deo consecratas revocari non posse in commercium hominum, in quo res profanae versantur (2).

(1) Justinus Mar. *Resp.* 121. *ad Ortoodox.* p. 493. *ed. Paris.* 1742. Cyrillus Alex. *lib.* 5. *de Adorat.* p. 144. *tom.* 1. *ed. Lutetiae* 1638., Eusebius *de Vit.* Constant. *lib.* 3. *cap.* 38. p. 599. *ed. Cantabrig.* 1720., Zonaras, et Balsamon in *Can.* 3. *Concil. in templ. Sophiae*, apud Beveregium *Pandect. canon. tom.* 1. *pag.* 563 *ediūon.* *Oxonii* 1672. Confer *Svicerum Thes. verb. αὐτοδύνα*, et *Selvagium Antiquit. Christian. par.* 1. *lib.* 2. *cap.* 4. § 1.

(2) Notum est, qua constantia, et firmitate animi S. Ambrosius obstiterit Valentiniano Imperatori, qui ab

eo sacra vasa tradi volebat. Cum esset propositum, inquit, in *Serm. contr. Auxent. num. 5. opp. tom. 6. p. 6. ed. Venet. 1781. ut Ecclesiae vasa jam traderemus, hoc responsi reddidi; me, si de meis aliquid posceretur, aut fundus, aut domus, aut aurum, aut argentum, id quod mei juris esset, libenter offerre: templo Dei nihil posse decerpere; nec tradere illud, quod custodiendum, non tradendum acceperim. Confer etiam Canonem Apostol. 73. apud Cotelierium. PP. Apostol. tom. 1. p. 451. edit. Amstelæd. 1724, acta S. Laurentii apud Ruinartum Act. Mart. sincer. p. 164. ed. Veronae an. 1731., Concilium Arelatense I. Canon. 13. tom. 1. concil. collect. Labbaei col. 1452. edit. Venet., S. Augustinum, qui Silvanum Donatistarum Episcopum proditorem judicat, quod Imperatoris ministris argenteam lucernam tradidisset Ep. 53. al. 155. cap. 2. num. 4. tom. 2. opp. col. 161. edit. Venet. 1759.*

§. XXXVI. Sacerdotem sacris operam daturum non communi, sed peculiari, et magis augusto habitu uti oportere, compertum est; quem ritum ab Apostolica aetate profectum (1) ad nos Ecclesia transmisit, quamquam lapsu temporum aliqua in vestium numero, et forma precum facta mutatio sit (2). Maxime autem decet, benedictione primum sacris usibus initiari vestes, quae sunt ad sacrificium necessariae (3). Consecrantur etiam, ac benedicuntur vasa, quibus in sacrificio opus est, et in his quidem sacrum chrisma adhibetur (4); praeterea benedicuntur lintea, et cuncta altaris instrumenta. Utraque consecratio, et benedictio ad Episcopum pertinet (5).

(1) Quandonam Apostoli primum sacrificium conferint, et num in eo conficiendo communibus, et quotidianis, an potius certis, et peculiaribus usi sint vestibus, non satis convenit inter eruditos. Illud plane compertum est, eos post Christi mortem per triduum seorsum

a sacrificio abstinuisse, sed quaeritur, num statim hoc elapso triduo primum sacrificium obtulerint, an potius illud distulerint ad Pentecosten; qua de re disputant Theophilus Raynaudus *de Prima missa sect. 1. cap. 2. et 3. opp. tom. 6. pag. 530. seq. ed. Lugdun. 1665.*, et Cardinalis Bona *Rer. Liturg. lib. 1. cap. 5. §. 1. t. 1. p. 68. et seq. ed. Taurin. 1747.* Verosimillimum est, quod ante illud tempus lex Evangelica nondum satis promulgata fuisset. Confer etiam Salam in *Not. ad Bonam loc. cit.* ubi quoque ostenditur, primam Missam non a Jacobo, sed a Petro celebratam fuisse. Magna etiam, uti dicebam, controversia est, num Apostoli peculiaribus induti vestibus rem divinam confecerint. Paulus in *II. ad Timoth. IV. 13.* memorat penulam, quam Troade reliquerat apud Carpum, a quo hospitio exceptum fuerat. Si vera esset sententia illorum, qui penulam interpretantur casulam, qua nunc sacerdotes atuntur, satis quidem ex hoc loco constaret, Apostolos rem divinam conficientes sacra indumenta adhibuisse. Verum Guillelmus Estius in *Comment. ad d. Paul. Ep. penulae nomine veteris testamenti libros comprehendere arbitratur.* Contra Josephus Vicecomes penulam casulam esse putat. Baronius *ad ann. 58. num. 67. et 68. tom. 1. p. 514. ed. Lucae*, utramque sententiam in medium affert, atque integrum ea de re iudicium cuique relinquit, *sed magis placet*, inquit, *ut volumen sacrae legis intelligi debeat.* Cardinalis Bona *loc. cit. lib. 1. cap. 24. §. 8. tom. 2. pag. 235.*, magis probare videtur sententiam illorum, qui penulam vestimenti genus fuisse censent, idque etiam late ostendit Robertus Sala in *not. num. 1. p. 237.* Eadem est sententia Augustini Calmeti in *dict. Histor. sac. script. verb. penula tom. 2.*, et Philippi Bonaroti in *animadvers. ad quaed. vitr. fragmen. figuris dist. ex coemeter. Rom. effos. tab. 16. fig. 2.* Sed quaevis de Apostoli penula verior opinio habeatur, illud profecto multo probabilius est, non solum viros Apostolicos, sed ipsos etiam Apostolos peculiares, atque a communibus distinctas adhibuisse vestes, cum rem divinam conficiebant. Cathari quos peculiari opere refutavit Ven. Moneta, et sequioris aetatis haeretici usum sacrarum vestium execrati sunt ad summam impudentiam. At inju-

ria. Nam eas vetustissimas esse ostendunt Bellarminus de *Eucharist. lib. 6. c. 14*, Meratus ad *Gavant. The-saur. sacr. rit. par. 1. in Rubric. general.*, Catalanus de *cod. S. Evang. lib. 2. cap. 7.*, et in *Prolegomen. ad Pontif. Roman. cap. 6*, Card. Bona *lib. 1. cap. 5. §. 2. et Sala in Not. num. 1. tom. 1. p. 70. et seq. in Appendic. p. 409. cit. ed. Thomassinus Vet. et nov. Eccles. disciplin. par. 1. lib. 2. cap. 43.* . Suassajus *Panopl. sacerdot. par. 1. lib. 6. de Casula cap. 6.*, Benedictus XIV. de *Sacrific. Missae sect. 1. cap. 38*, et *Inst. 21. num. 4.*, Georgius de *Liturg. Sum. Pontific. l. 1. can. 3. numer. 7. et cap. 5.* Haec autem sacra indumenta, praesertim post Constantinum, serica, atque auro, argentoque contexta, ut plurimum fuisse observat Cardinalis Bona *lib. 1. cap. 24. §. 1. tom. 1. pag. 211.*, et antiquissimis quoque temporibus varii coloris erant, uti nunc sunt, quod late ostendit Robertus Sala in *Not. ad illum Bonae locum num. 3. pag. 213.*, ubi etiam refutatur Joannes Dallaeus Calvinianus homo, qui illam in sacris vestibus colorum diversitatem amoenam quidem, sed antiquis Christianis ignotissimam esse, impudenter affirmat.

(2) Vestes omnes Episcoporum, Sacerdotum, Ministrorum inter ceteros accurate describit Card. Bona *loc. cit. tot. cap. 24.*

(3) *Can. 42. de Consecr. dist. 1 S. Thomas par. 3. qu. 83. art. 3.* Licet autem Hospinianus, homo videlicet haereticus, de *Origin. dedicat. cap. 3. et 4.* hanc sacrum benedictionis ritum tantum saeculo IX. inductum patet, tamen ejus rei saeculo IV. certissima sunt monumenta. Nam uti narrat Sozomenus *Histor. lib. 2. cap. 26. p. 81. ed. cit.*, cum Imperator Constantinus regali magnificentia Hierosolymitanum templum aedificasset: *Episcopi Hierosolymam delati Ecclesiam consecrarunt, simulque ornamenta, et donaria ab Imperatore transmissa.*

(4) *Can. unic. §. Ungitur de Sacr. unct.* De harum vero consecrationum, ac benedictionum antiquitate late agit Dominicus Georgius *liturg. Rom. Pontific. lib. 2. cap. 1.*

(5) Confer Benedictum XIV. *Instit. Eccles. inst.*

21, ubi etiam agitur de benedictione cinguli, pluvialis, et pyxidis.

§. XXXVII. Pertinent etiam ad Ecclesias campanae (1), seu tintinnabula, per quae populus ad templum vocatur, atque ad fundendas preces excitatur. Antiquissimus est campanarum usus (2), atque earum etiam benedictio sane per vetus est (3). Spectat haec benedictio ad Episcopum, qui eam expedit certis quibusdam ritibus in Pontificali scriptis; campanae autem, cum benedicitur, alicujus Sancti nomen imponitur, sive ut ea quasi ejus tutelae commendetur, sive ut populus quodammodo coelitus voce ad templum vocari videatur (4).

(1) Campanae nomen grandioribus tintinnabulis circa finem saeculi VII. impositum fuisse suspicatur Card. Bona *Rer. liturg. lib. 2. cap. 22. §. 3. p. 135. tom. 2.*, ac deinceps octavo, nonoque saeculo ab omnibus passim usurpatum affirmat. Sed ipsum campanae vocabulum hac aetate antiquius faciunt Martenius *de Antiq. eccles. ritib. lib. 4. c. 2. §. 11. p. 6. tom. 3. edit. Antwerp. seu Ven. 1764.*, et Pagius *Brev. gest. Pontific. in vit. Sabiniani P. num. 2.* Autequam vero tintinnabula adhiberi coepissent, Christiani ad templum vocabantur per tubam, aut tabulas ligneas, id quod pacatis tantum Ecclesiae rebus fieri potuit. Nam ethnicis dominantibus credibile est, Christianos secreto monitos per Diaconum, aut per alium ab Episcopo designatum virum, ut ad Ecclesias convenirent. Cuncta haec late explicant Martenius *loc. cit. §. 7. et seq. pag. 5.* Bona similiter *loc. citat. §. 1. et seq. pag. 126, et seq. ibique, Sala in Not. num. 2. pag. 127.* Baronius *ad an. 58. num. 103. tom. 1. p. 527. ed. Lucae.*

(2) Angelus Rocca *de Campan. cap. 1.* originem campanarum repetit a S. Hieronymo; quoniam earum mentio est in *regula Monachorum*, quae Hieronymi nomine circumfertur. Verum hanc regulam Hieronymi revera non esse, inter eruditos constat, sed eam ex illius scriptis compositam a Lupo Olivetano, et a Martino V.

Pontifice post an. 1417. approbatam scribit Guillelmus Caveus de Script. Ecclesiast. in Hieronymo. Multi sunt, qui tintinnabuli usum tribuunt S. Paulino Nolano Episcopo, qui medio saeculo V. vita functus est; verum cum Paulinus *Epist. 32. ad Sever. col. 194. seq. edit. Veronae*, in qua diligenter Ecclesiam a se aedificatam, ac singulas ejus partes describit, nihil de tintinnabulis, aut de turri dicat, non obscurum inde educitur argumentum, ipsum revera tintinnabula non adhibuisse, sicuti animadvertunt Theophilus Raynaudus *tom. 1. punct. 7. pag. 141. ed. Lugduni 1665.*, et Card. Bona *loc. cit. §. 4. pag. 130.*, Polydorus Virgilius de *Invent. rer. lib. 6.*, Onuphrius Panvinus in *Epist. de Rom. Pontif. lib. 1. num. 71.* Ciacconius, aliique complures tintinnabuli usum referunt ad Sabinianam Pontificem, qui initio saeculi VII. Pontificatu maximo functus est; sed cum Anastasius in Sabiniani vita nullam ejus rei mentionem faciat, plane non intelligitur, quomodo haec opinio probari possit. Illud dici potest, saeculo VI. in Ecclesia Occidentali campanarum usum fuisse receptum, quoniam in vita S. Columbae primi Abbatis Hyensis, qui obiit an. 599, quam vitam edidit Mabillonius *saec. I. Benedictin. pag. 349. tom. 1. edit. cit. scriptum est cap. 22.*, cum *media nocte pulsante campana, ad Ecclesiam ivisse*, et *cap. 25. traditum illum quadam die ministro suo campanam subito pulsare praecepisse, cujus sonitu Fratres excitati Ecclesiam protinus sunt ingressi.* Confer Martenium, et Pagium *loc. cit.*

(3) Baronius *ad. an. 968. num. 93. tom. 16. pag. 192. ed. Lucae* tradit, Joannem XIII. campanae benedictionem tribuisse, eamque consecrasse, antequam in turri Lateranensis Ecclesiae collocaretur, qui ritus, inquit, in Ecclesia perseveravit. Verum Capitularia Caroli Magni, quae ducentis fere annis Joannis XIII. aetate antiquiora sunt, anno 789. *capitul. 2. num. 18.*, apud Balutium *tom. 1. col. 178. edition. Venet. cit.* campanarum benedictionem memorant; atque in libris ritualibus Joanne antiquioribus expresse describitur campanarum benedictio, uti ostendit Hugo Menardus in *Not. ad Sacrament. S. Gregor. not. 587. opp. S. Gregor. tom, 3. col. 438. ed. Paris. ex quibus manifestum*

est, campanarum benedictionem non ab Joanne XIII repetendam, sed multo vetustiore esse. Consule Bonam *Rer. liturg. lib. 1. cap. 22. §. 7.*, ibique Salam in not. num. 1. pag. 137. et seq. tom. 2., Pagium in *Brev. Roman. Pontif. in vit. Joan. XIII. num. 12. tom. 2.*, Roccam de Campanis cap. 6. §. de Campan. consecr., Theophilum Raynaudum *Heterocl. spiritual. opp. tom. 16. sect. 2. punct. 9. p. 245. ed. Lugd. 1665.*, Martenium de *Antiq. eccles. rit. lib. 2. cap. 21. tom. 2. pag. 296. et seq. ed. cit.* Campanarum autem benedictio Baptismus dicitur, quod vocabulum non adoptavit Ecclesia, sed tantum tolerat, ut aliorum fidei, ac simplicitati indulgeat. Quod Baptismi nomen ex eo profectum est, quod populus in campanarum benedictione aquam adhiberi, nomenque imponi videat, aliaque fieri quae in administrando Baptismo fiunt, sicuti observat Du-Cangius *Gloss. med. et. infim. latinis. verb. campana*. Sed minus proprie Baptismi vocabulum cum benedictione confunditur, eo fere modo, quo Ivo par. 2, *Serm. 4. de Sacr. dedic. pag. 269. ed. Paris. 1647.* baptizari dixit Ecclesiam, quae proprie consecratur. Quare se deridendos praebent Haeretici, cum in Catholicis vitio vertunt, quasi ipsi verum Baptismum campanis conferri arbitrentur. Confer Du-Cangium *loc. cit.* Coccium tom. 2. lib. 3. art. 6., Durantum de *Sacr. Eccles. rit. lib. 1. cap. 22. n. 6.*, Suaresium lib. 2. *Defens. cap. 16.* Gretserum lib. 2. de *Bened. cap. 45. et 46.*, Del Rio *Disqu. magic. lib. 6. capit. 2. sect. 3. in fin.*, Card. Hosium lib. 5. *contr. Brentium*. Ed certe in vetusto ordine, atque in Pontificali Romano, cunctisque libris ritualibus Ecclesiarum, quos Thiersius de *superstition. lib. 1. cap. 7.* diligenter collegit, nunquam Baptismi, sed benedictionis nomine campanarum consecratio appellatur.

(4) Videndus P. Petra Sancta de *Rit. Eccles. cathol. lib. 2.*, Martinus del Rio *Disquisit. mag. lib. 6. cap. 2. sect. 4. qu. 4.*, Pouget *Inst. Catholic. t. 2. c. 8. §. 6. p. 905. ed. Paris. 1725.*

TITULUS VIII.

DE RELIQUIIS, ET VENERATIONE SANCTORUM.

- I. Intercessio Sanctorum. II. Sacrarum Reliquiarum veneratio.

§. I.

Sacrae sunt etiam Reliquiae Sanctorum, quibus honorem, et reverentiam haberi jubet Ecclesia, quoniam illorum ope, ac precibus multa homines a Deo beneficia consequuntur. Quare bonum, atque utile est eos suppliciter invocare, atque ob beneficia impetranda a Deo per ejus filium Christum Dominum ad eorum orationes, opem auxiliumque confugere, et honoranda sunt monumenta illorum, quos in caelis cum Christo regnare scimus (1).

(1) Concilium Tridentinum *Sess. 25. in Decret. de Invocat. venerat. et reliq. Sanctor. et sac. imagin.*

§. II. Sacrarum reliquiarum veneratio ab ipsis Ecclesiae primordiis est repetenda (1). Saepe enim sacrae reliquiae causa erant Ecclesiae dedicandae (2), saepe altaria super Sanctorum corpora erigebantur (3) et iis imponebantur reliquiae thecis inclusae (4), easque fideles ad os, oculos, ceterosque sensus admovebant, et osculabantur (5). Sed praesertim antiquissima, et ubique recepta consuetudo fert, ut martyrum reliquiae in Ecclesiarum consecratione adhibean-

tur (6). Eosdem nunc retinet Ecclesia venerationis justae ritus; sed nullae colendae sunt novae reliquiae, nisi a Sede Apostolica approbatae fuerint (7).

(1) Mortuo Polycarpo, uti constat ex ejus actis apud Eusebium *Hist. Eccles. lib. 4. cap. 15. pag. 171. edit. Cantabrig. cit.* urgebant Judaei, ut ejus corpus combureretur, ne Christiani ejus reliquias auferrent, ac venerarentur. Addit Auctor eorundem actorum post narratam Polycarpi martyrium. *Atque ita nos demum ossa illius gemmis pretiosissimis cariora, et quovis auro puriora colligentes, tollentes, ubi decebat, deposuimus. Quo etiam in loco, nobis, si fieri poterit, convenientibus, in exultatione, et gaudio praebebit Dominus natalem martyrii ejusdem cum hilaritate, et gaudio celebrare, tum in memoriam eorum, qui glorioso certamine perfuncti sunt, tum ad posteros hujusmodi exemplo erudiendos, et confirmandos.* Ex quo intelligitur, qui cultus esset, quem Christiani Martyribus initio ipso Ecclesiae praehebant. Nimirum eorum reliquias colebant, tam splendide eas colligebant, ac si aurum purissimum, aut pretiosissimae gemmae fuissent, decoro loco ponebant: ibique cum gaudio anniversariam martyrii diem celebrabant. Atque illud his solemnitatibus erat eis propositum, non tantum ut Sanctorum memoriam colerent, verum etiam ut fideles exempla ad imitandum haberent. Eadem nunc est, quae semper fuit, Ecclesiae mens, cum sanctorum cultum, venerationemque proponit. Hujus quoque venerationis in sacras reliquias illustria sunt monumenta in actis S. Cypriani, in ejus vita a Pontio Diacono conscripta, et apud Cyprianum ipsam. Hic enim *Ep. 6. pag. 176. ed. Amstelæd. 1700.* declarat laetitiam incredibilem, qua perfunderetur, si amplecti possent martyrum corpora, et eorum ora osculari. Praeclara etiam sunt acta martyrii ipsius Cypriani, quae extant ante opera ipsius Cypriani *p. 15. edit. Amstelæd. 1700.* et ex quibus constat, fideles ante eam linteamina misisse, ne ejus cruor defluens a terra absorberetur. Denique Pontius Diaconus, qui ejus vitam conscripsit,

narrat, quemdam Cypriano suas obtulisse vestes, cum ipse multo sudore madidus sederet, ut illas commutaret: qui videlicet, inquit Pontius in *ejus Vit. opp. Cyprian. pag. 10. ed. cit.*, nihil aliud in rebus oblati ambiebat, quam ut proficiscētis ad Deum Martyris sudores jam sanguineos possideret. Late sacrarum reliquiarum venerationem tuentur, et laudant Ecclesiae Patres; atque inter ceteros Augustinus de *Civit. Dei lib. 8. cap. 27. tom. 7. col. 217. edit. Venet. cit.*; Hieronymus *Contra Vigilantium num. 5. tom. 2. col. 391. edit. Veronae, Isidorus Pelusiota contra Hieracem lib. 1. Epist. 55. p. 17. edit. Paris. 1658.*, Cyrillus Hierosolymitanus *Catech. 18. pag. 293. edit. cit.*, ostendunt, quam merito, quam recte, quam catholice fideles sanctorum reliquias venerationem. Quinimo ipsa reliquiarum conditoria Majores nostri summa reverentia prosequabantur, et illorum contactum esse credebant, sanctificationem, ac benedictionem, ut inquit Gregorius Nyssenus *Orat. in S. Theod. opp. tom. 2. pag. 1012 edit. Paris. 1615*, quod etiam testatur Chrysostomus *Orat. de S. Ignat. num. 5. pag. 500. et seq. tom. 2. edit. Paris.* Curabant autem potissimum, ut essent ornata eleganter, atque magnifice conditoria, quae sacra *λεψωα* seu reliquias continebant. Serico enim opere, aut argenteo, aut aureo saepe conficiebantur, quo spectat Prudentius *Hymn. 3. de S. Eulalia pag. 244. vers. 195. seq. edit. Paris. 1687.* Et reliquias, quas thecis inclusas, colloque appensas Christiani gestabant, memorat Gregorius Taronensis de *Glor. martyr. cap. 83. et 84. pag. 816. 817. edit. ind.*; Chrysostomus vero tantum sua aetate fuisse indicat sepulchrorum martyrum magnificentiam, ut ea ipsis principum Palatiis anteferre non dubitaverit *Hom. 26. in Epist. 2. ad Corinth. num. 5. opp. t. 1. pag. 925. edit. Paris. cit.* Facile hinc intelligitur, quam absurdus sit, ac semper ab Ecclesia refutatus error Vigilantii, Eunonii, Eustathii, et aliorum, quos imitati sunt recentiores haeretici Zuīnglius, Calvinus, Lutherus, ac ceteri similes, qui sacrarum reliquiarum venerationem improbant, ac superstitionem ducunt. Hottingerus praesertim, Dallaeus, Medus, Juriaeus, Basnagius, omnes ex grege haeticorum homines, multa absurda, falsa pleneque impudentia scri-

pserunt adversus venerationem sacrarum reliquiarum, sed eos copiose refutant, et catholicam veritatem tuentur Natalis Alexander *Histor. eccles. saec. 5. Diss. 25. t. 5, pag. 311. edit. cit.*; Card. Gottus *Ver. Chris. Eccles. tom. 2. par. 2. art. 15. tom. 16. Throlog. quae. 7. de Cult. Sanctor. dub. 4., et verit. Relig. Christ. cap. 50. §. 2. num. 11. tom. 7.*, Ludovicus Rusca *jud. Eccles. confirm. tom. 3. cap. 3. art. 8. pag. 410.*, Bossuetus *Histor. variat. Eccl. Protest. tom. 3. lib. 13. num. 23. et seq.*

(2) Consule Augustinum *Contr. Faust. Manich. lib. 20. cap. 21. opp. tom. 8. col. 347. edit. cit.*, Gregorius M. *lib. 8. Ep. 4 lib. 9. Ep. 25. opp. tom. 2. col. 897. et 947. et lib. 1. Dialog. c. 10. eod. tom. 2. col. 193. edit. Paris. 1705.*, Sozomenus *Histor. lib. 5. cap. 9. p. 192., et lib. 8. cap. 16. pag. 351. ed. Valesii Cantab. 1720.*

(3) Augustinus, seu potius Auctor *Serm. 222. de Sanct. seu 4. de Innocent. in App. tom. 5. col. 365. et in Apocalip. Homil. 9. col. 1150. tom. 3. par. 1.*, Ambrosius *Ep. 22. ad Marcellin. tom. 1. col. 927. et Exhortat. Virgin. c. 2. num. 10. col. 348. tom. 3. edit. cit. Paulinus Poem. 19. et 26. p. 417. et 637. ed. Veron.* Id autem Felice I. Summo Pontifice constitutum tradit Anastasius in *ejus vit. ut supra sepulchra, aut memorias martyrum missae celebrarentur. Verum Baronius ad an. 275. num. 2. tom. 3. p. 192. edit. Luc. Felicis aetate antiquiorem esse inquit; quam sententiam praeter ceteris sequuntur Bollandistae act. SS. April. t. 1 pag. 23., et Tillemontius Histor. ecclesiast. tom. 4. p. 364. edit. Paris. 1696.*

(4) Leo IV. *Homil. ad Presbyter. et Diacon. apud Iabbaeum Concil. tom. 8. p. 33. ed. Ven.*, Rutherius *Orat. Synodic. ad Presbyter. num. 6. col. 414 edit. Veronae 1765.* Reliquiarum aut ex cruce pendentium, aut super altaribus impositarum antiqua monumenta habes etiam apud Martenium *de Antiq. monach. rit. lib. 3. cap. 14. §. 36. cap. 15. §. 3. et lib. cap. 1. tom. 4. p. 138. 141. et 178. ed. cit. In Regula S. Benedicti cap. 58. apud Holstenium Cod. Reg. tom. 1. pag. 131. edit.*

Aug. Vindelic. 1759. memorantur reliquiae in oratoriis Monachorum.

(5) Dignus est, qui describatur, S. Gregorii Nyseni locus *Orat. de S. Theodor. p. 1012. opp. tom. 2. edit. cit. Nam ipsas attingere reliquias, inquit, si quando aliqua ejusmodi prospera fortuna contingat, ut id facere liceat, quam optabile sit, et summis votis expetitur munus, norunt quicumque sunt experti, et hoc suo desiderio potiti sunt. Ili enim tamquam vivum suum corpus, et florens videntes osculantur, et ad oculos, ad os, ad aures, ad omnes sensus admovent.*

(6) S. Ambrosius *Ep. 22. ad Marcellin. §. 9. col. 930. tom. 4. opp. ed. cit.*, Evagrius *Histor. lib. 1. cap. 16. pag. 271. ed. Cantabrig. 1720.*, S. Paulinus *Epist. 31. ad Sever. col. 189. edit. Veron. cit. Consule Joannem Ferrandum Disquisit. reliquiar. lib. 1. cap. 3. sect. 2.*, et Dominicum Georgium de *Liturg. Roman. Pontif. l. 3. c. 9. n. 9. et seq.*

(7) *Cap. 1. et 2. de Reliq. et venerat. SS.*

TITULUS IX.

DE SEPULTURIS.

- | | |
|--|--|
| I. Coemeterium unde dictum? | V. Sepultura gentilitia, et parochialis. |
| II. Fidelium cadavera primum extra Ecclesiam, postmodum in Ecclesia sepulta. | VI. Jus Parochi in deferendis cadaveribus ad sepulturam. |
| III. Coemeteria loca religiosa. | VII. Jura funeris. |
| IV. Sepulture electio. | VIII. Quarta funeraria. |
| | IX. Quibus ecclesiastica sepultura denegetur? |

§. I.

Loca sepeliendis Christianorum cadaveribus destinata jam inde ab antiquis Ecclesiae temporibus appellata sunt coemeteria, quasi fidelium corpora jacerent in loco dormitionis, unde Christo adveniente excitarentur (1). Loca haec initio erant extra moenia civitatis, cum Romanae Leges quibus etiam Christiani paruerunt (2), ubi nihil in iis inerat, quod eorum Religioni adversaretur, neminem intra Urbem sepeliri permetterent (3).

(1) Apostolus 1. ad Thessal. IV. 12. nolumus, inquit, nos ignorare fratres de dormientibus, quem in locum inquit Hieronymus *Epist.* 75. num. 1. tom. 1. col. 448. *ed. Veron. cit.* Unde et beatus Apostolus velat de dormientibus contristari, ut quos dormire novimus, suscitari posse credamus.

(2) S. Joannes Chrysostomus *Hom. de Fide*, et

*lege naturae opp. tom. 1. num. 2. pag. 209. Hom. 37. al. 38. in Matt. num. 5. pag. 424. tom. 7. et Exposit. psalm. 6. num. 5. pag. 36. tom. 5. edit. Paris. . . L. Codic. Theod. de Sepulchr. violat. Revera in Urbis suburbanis erant Romana coemeteria, quae circiter quadraginta tria numerat Baronius ad an. 226. num. 7. tom. 2. pag. 474. et 475., eorumque nomina singillatim Panvinus describit de Coemeter. cap. 12. per tot. Similiter extra civitatem erant Neapolitana coemeteria, de quibus agunt Gilbertus Barnetus *Epist. 4.* Mabillonius *Mus. Ital. tom. 1. pag. 14.*, et Mazochius in *Kalendar. Consule Paulum Aringhum Rom. subterr. lib. 1. cap. 1. num. 9.**

(3) Jus hoc erat XII. Tabularum, quod saepe novis legibus confirmatum fuit ac traductum ad omnes civitates primum constitutione Hadriani *L. 3. §. Divus ff. de Sepulchr. violat.*, idest D. Pii, ut Capitolinus scribit, deinde ceterorum. Vide Paulum *Recept. senten. lib. 1. tit. 21. num. 2.* ibique Schuldingium in *Not. 8. et seq. Jurispr. vet. Ante-Justinian. tom. 1. p. 261. et seq. ed. Lipsiae 1737.*

§. II. Lapsu temporum quorundam cadavera intra Civitatem, non tamen intra Ecclesiam (1) humo tradi coeperunt. Eo privilegio potiti sunt Imperatores, et Reges, qui, ut plurimum, in Ecclesiae atrio, et porticibus sepeliebantur (2). Postea loca haec patuerunt etiam populo universo (3), et interim illis una cum Abbatibus, ac viris pietate praestantibus intra Ecclesiam sepultura concessa est (4), quam pridem Episcopi ante ceteros habuerant (5). Denique omnibus in Ecclesia permissus sepulturae locus (6), quae hodierna est, qua jamdudum utimur, disciplina.

(1) Vide Concil. Bracarense II. *Can. 18.* apud Labaenum *tom. 6. col. 522. ed. Ven.*, et Auctorem *Vitae S. Fulgentii* apud Bollandum 1. *Januar. Leg. 2. Cod.*

de *Eccles.* Atque hæc quidem erat consuetudo, quæ generatim obtinebat; non tamen desunt, ut paulo postea demonstrabo, hæc etiam ætate exempla aliquorum, qui in Ecclesia sepulturam habuerunt.

(2) Id de Constantino narrat Eusebius *Vit. Constantin.* lib. 4. cap. 71. pag. 668. ed. *Cantabrig.*, et S. Joannes Chrysostomus *Homil.* 26. in 2. ad Corinth. n. 5. opp. tom. 10. p. 625. ed. *Paris.*, de Theodosio Seniore, Arcadio, ac Theodosio Juniore Nicephorus lib. 14. cap. 58. pag. 581. tom. 2. ed. *Paris.* 1530.

(3) Concilium Nannetense *Can.* 6. tom. 7. par. 1. col. 358. *Collect.* Harduini et Moguntiacum *Can.* 52. col. 1016. tom. 4. ejusd. *Collect.*, unde illa desumpta videtur regula, quæ est in Capitularibus Caroli M. lib. 1. cap. 15. apud Balutium tom. 1. col. 493. ed. *Venet.*

(4) Clodoveum Francorum Regem, qui vita functus est an. 511., in Basilica S. Petri sepultum fuisse testatur Gregorius Turonensis *Hist.* lib. 2. cap. 43. col. 100. ed. cit. Evagrius autem *Histor.* lib. 4. cap. 31. pag. 412. tom. 3. ed. *Valesii Cantabrig.* 1720 narrat, a Justiniano Imperatore ædificatum fuisse templum SS. Apostolorum in quo Imperatores, ac Sacerdotes sepeliri mos est. Vide etiam Concilium Moguntiacum anni 813. cit. *Can.* 52. t. 9., et Triburiense anni 895. *Can.* 17. apud Labbæum tom. 11. col. 538. ed. *Venet.* Eodem honore etiam Ecclesiarum conditores effecti sunt, quod demonstrat Sozomenus *Hist.* lib. 9. cap. 1. p. 366. edit. *Cantabrig.*

(5) Ætate Ambrosii, hoc est IV. sæculo Episcopos in Ecclesia sepeliri solitos fuisse, constat ex ipso Ambrosio, qui Mediolani subtus altare sibi sepulturam paraverat, ac eo illatis Gervasii, et Pontasii reliquiis, hunc, inquit, *Epist.* 22. num. 13. opp. tom. 3. col. 931. ed. cit., mihi locum prædestinaveram . . . sed cedo sacris victimis dexteram portionem. Eisdem quinti sæculi fuisse disciplinam, ostendit Pulcheriæ Augustæ epistola ad S. Leonem M., quæ inter ipsius Pontificis Epistolas extat post. 59. pag. 244. tom. 2. edit. *Rom.* cit., unde constat Flaviani Episcopi Constantinopolitani corpus fuisse conditum in Basilica Apostolorum, in qua consueverant prædecessores Episcopi sepeliri. Similiter corpus S. Joannis Chrysostomi, qui hæc vivens dixerat

Orat. quod Christus sit Deus num. 9. pag. 570. tom. 5. edit. Paris, Constantinopoli Reges nostri magnam gratiam putant, non si prope Apostolos, sed si vel extra eorum vestibula corpora sua sepeliantur, fiantque piscatorum ostiarii Reges, Chrysostemi inquam mortui corpus Constantinopolim delatum, atque in Ecclesia SS. Apostolorum septum fuisse, scribit Socrates Hist. lib. 7. cap. 45. pag. 393. edit. Cantabrig. Alia permulta ea de re monumenta collegit Martenius de Antiq. Eccles. rit. lib. 3. cap. 13. §. 11. et seq. tom. 2. pag. 372. cit. edit. Haud tamen desunt antiquissima etiam aetate exempla laicorum quorundam pietate praestantium, qui in Ecclesia sepulti sunt.

(6) Kepperus haereticus, videlicet homo *Polit. eccles. lib. 1. cap. 15.* ritum sepeliendi Christianos in Ecclesia superstitionis arguit, atque hanc consuetudinem ex Monachorum, et Sacerdotum avaritia, ac laicorum ambitione repetit. Eadem fere habent Binghamus *Origin. eccles. lib. 23. capit. 1. §. 9. tom. 10 citat. edit.*, et Van-Espenius *Jus, eccles. univers. par. 2. tit. 38. cap. 2. §. 33. et 34.* Fateor equidem, Christianos olim extra sacras aedes sepeliri consuevisse; sed cum ea res tota sit disciplinae, quae Ecclesiae voluntate mutatur, non video, quamobrem Ecclesia non potuerit decernere, ut fideles intra sacras aedes sepeliantur. Ceterum nova non est, nec antiquis ignota Patribus consuetudo sepeliendi in Ecclesia fideles, eaque procul abest a superstitione, ceterisque vitiiis, quorum arguitur. Mitto tria priora Ecclesiae saecula, in quibus Christianis templorum loco erant coemeteria, ibique suos agebant conventus, et rem divinam conficiebant. Scio, formidolosis illis temporibus Christianos non quovis loco vellent rebus sacris, atque divinis operam dare potuisse; sed certe si aliqua fuisset superstitio facere rem divinam, precesque fundere, ubi mortuorum cadavera jacebant, alio potius quocumque loco, quam in coemeteriis illud christiani praestitissent. Sed mitto hoc nascentis, et undique vexatae Ecclesiae tempus; quamquam hoc quidem gravissimum sit, et omnem plane, quae fingitur, superstitionis notam abstergat. Certe vix data Ecclesiae pace, Constantinus, uti narrat Eusebius in *Vit. Con-*

stantini lib. 4. cap. 71. pag. 668. ed. cit., juxta Apostolos sepeliri vehementer cupiebat, eaque de causa illorum nominibus appellatam Basilicam excitavit. An hoc desiderium pius Imperator praeetulisset, si quid in ea superstitionis inesse putasset? Paulinus *Poem. 19. col. 475. ed. Veron. an. 1736.* memorat cellulas, et eas quidem intra Basilicam, *Ep. autem 32. ad Sever. num. 12. col. 203.* cubacula Ecclesiae, seu capellas, in quibus defunctorum corpora condebantur. Ambrosius, qui, ut mox narravi, sibi in Ecclesia subtus altare sepulturam paraverat, Satyro fratri suo, licet laico, in Ecclesia secus tumulum S. Victoris sepulchrum posuit. Eamdem Taurinensis Ecclesiae consuetudinem fuisse testatur S. Maximus *Homil. 81. col. 261. ed. Romae 1784.*, Africanae autem S. Augustinus *lib. 2. Retract. cap. 64. col. 63. tom. 1. opp. ed. cit.* Ita etiam Caesarius Gregorii Nazianzeni frater, ac Paula in Ecclesiis sepulturam habuerat, quod ostendunt Gregorius Nazianzenus *Orat. 10. pag. 167.*, et Hieronymus *Ep. 108. num. 29. col. 717. opp. tom. 1. cit. ed. Veronae.* Quibus adde exempla, quae supra descripsi, Episcoporum, Regum, ceterorum, qui in Ecclesia sepulti sunt, et facile intelliges, nihil superstitiosum, nihil non religiosum urbana in Ecclesia sepulchra, Patrum omnium judicio, continere. Verum autem causam, propter quam inducta est consuetudo fideles in Ecclesia sepeliendi, apertissime indicant S. Maximus, et S. Augustinus, uterque *loc. mox cit.* Hic enim inquit: quod vero quisque apud memorias Martyrum sepelitur, hoc tantum mihi videtur prodesse defuncto, ut commendans eum etiam Martyrum patrocinio, effectus pro illo supplicationis augeatur. Ille autem habet: Ideo hoc a Majoribus provisum est, ut Sanctorum ossibus nostra corpora sociemus Cum sanctis ergo Martyribus quiescentes evadimus inferni tenebras. Pium hoc desiderium patrocinii Sanctorum, quibus se fideles commendant, et quibus morientes suum quasi credunt corpus, ut studium ostendant, quo in eos feruntur, vera causa est, propter quam et olim sepelirentur, et nunc Christiani in Ecclesia sepeliantur; non autem superstitio, aut hominum ambitio, aut avaritia Clericorum. Consule Muratorium *Diss. 17. ad. calc. opp. S.*

Paulini col. 838. et seq. ed. Veron. 1736., qui illos quos indicavi, Paulini locos illustrat, ac de antiquis Christianorum in Ecclesia sepulturis copiose, et accurate disputat.

§. III. Nunc quamquam Christianis omnibus in Ecclesia sepultura permittatur, tamen in multis locis coemeteria sunt, in quibus mortuorum corpora humo teguntur (1). Sunt autem coemeteria loca religiosa, solemnibus Episcopi benedictione (2), humanis fidelium cadaveribus addicta, eaque prope ipsas Ecclesias sita esse solent. Ubi nulla sunt coemeteria in ipsis Ecclesiis sepeliuntur, nefas autem est eorum aliquem in loco profano sepulturam habere (3).

(1) *Ubi viget antiqua consuetudo*, inquit Rituale Romanum editum jussu Pauli V. *tit. de Exequiis, sepeliendi mortuos in coemeterio, retineatur; ubi fieri potest, restituatur. Vide etiam Concilium Mediolanense I. par. 2. cap. 61.*

(2) Benedictio coemeterii jam vigeat aetate S. Gregorii Turonensis, ut patet *ex loc. de Glor. Confessor. c. 106. col. 986. ed. cit.* Benedictionis ritus descriptos ex antiquis libris Ritualibus habet Martenius *de Antiq. Eccl. rit. lib. 2. c. 20. t. 2. p. 299. et seq. ed. cit.*

(3) *Cap. 3. de Sepultur. ibique Gonzalez.*

§. IV. Integrum cuique est sibi Ecclesiam eligere, in qua ejus cadaver sepeliatur; modo Ecclesia sepeliendi jus habeat. Quo jure gaudent Ecclesiae Cathedrales, ac Parochiales, quaeque illud consuetudine, aut privilegio adeptae sunt (1). Quare etiam uxor, invito marito, et filius pubes, quamquam sit in patris potestate, liberam sepulturae optionem habent (2). Sed filio impuberi ob inopiam consilii pater eligit sepulturam, si id loci consuetudo patiat (3); secus enim aut in sepulchro Majo-

rum, aut in Parochiali Ecclesia conditur (4). Similiter neque Regularibus, qui suo carent arbitrio, sibi eligere sepulturam licet, nisi procul a suis monasteriis decedant, ita ut ad ea transferri commode nequeant (5).

(1) In *Clem. 2. de Sepult.* Dominicanis, et Franciscanis conceditur sepeliendi privilegium in eorum Ecclesiis, quod privilegium aliis quoque Regularibus concessum fuisse, observat Pirhingius *Ius Canon. lib. 3. tit. 28. num. 30.*

(2) *Cap. 3. et 4. de Sepultur. in 6.*

(3) *Can. 7. de Sepultur.*

(4) *Cap. 4. eod. in 6.*

(5) *Cap. ult. de Sepultur. in 6.*

§. V. Si quis sibi sepulturam non eligit, eam habet in sepulchro majorum, vel si eo careat, in Ecclesia parochiali (1). Mulieres autem si non elegerint sepulturam, cum viis suis sepeliendae sunt (2), et si plures habuere viros, cum eo sepeliuntur, cui postremo nupserunt (3). Monachi etiam, et Regulares humanantur in Ecclesia, vel coemeterio sui monasterii, quod ipsis parochiae loco est (4); et similiter canonici, ac beneficiati in Ecclesia sui capituli, vel beneficii sepeliuntur. Cadaver, quod contra interdictum extra propriam Ecclesiam humo traditum fuit, si petatur, effodiendum est, ac propriae Ecclesiae restituendum (5).

(1) *Can. 2. cap. 13. quaest. 2., Cap. 1. de Sepultur. Cap. 2. eod. in 6.*

(2) *Can. 2. et 3. cap. 13. quaest. 2.*

(3) *Can. 3. cit., Cap. 3. de Sepultur. in 6.*

(4) *Cap. ult. eod. in 6.*

(5) *Cap. 5. de Sepultur.* Neque cadaver solum, sed etiam funeris emolumenta propriae Ecclesiae restituenda sunt. Id autem locum habet sive alienae Paroeciae hominem quis in sua Ecclesia sepeliverit, sive etiam hominem Paroeciae suae, qui sibi in alia Ecclesia sepulturam elegit. Vide Giraldum *Expos. Jur. Pontif. par. 1. lib. 3. Decret. sect. 487. p. 319.*

§. VI. Cum cadaver extra paroeciam sepelitur, antequam domo educatur, a parocho benedicendum est, eoque comite ad sepulchrum deferendum. Haec quidem consuetudo est, quae ubique in Italia viget, sed in ultramontanis quibusdam regionibus exequiae in paroecia celebrantur, quod jus Decretalium est (1).

(1) Confer interpretes ad *Cap. 9. de Sepultur.*

§. VII. Vetus est disciplina, per quam oblationes pro mortuis fiunt (1), easque Ecclesia recipiebat, si christiani in ejus communione decessissent. Hujusmodi oblationes initio ex sola fidelium voluntate procedebant; sed postea conversae sunt in laudabiles consuetudines; et nunc haeredes cogi possunt ad praestandas oblationes, quae populorum moribus receptae sunt (2). Atque haec sunt jura, quae *funeraria* dicuntur, quaeque ob curam Animarum parocho debentur.

(1) Oblationes, quae pro defunctis fiunt, memorat Tertullianus *de Exhort. castit. cap. 11.*, et *de Monogam. cap. 10. p. 523. et 531. edit. Ven. 1744.*, et *de Coron. cap. 3. p. 102.* laudat oblationes pro defunctis, et alia quae in Ecclesia observabantur, postremo dicit haec: *harum, et aliarum ejusmodi disciplinarum, si legem expostules, nullam invenies. Traditio tibi praetendetur auctrix, consuetudo confirmatrix, et*
Dev. Instit. Can. Tom. II. 16

fides observatrix. Videndi sunt etiam S. Cyrillus Hierosolymitanus *Catech.* 23. *mystag.* 5. num. 9. seq. pag. 328. ed. Paris. 1720., S. Epiphanius *Expos. Fid. Cathol.* num. 23. tom. 1. opp. p. 1106. ed. Colon. 1682., S. Jo. Chrysostomus *Hom.* 21. in act. *Apost.* num. 4. opp. tom. 9. pag. 175., et *Hom.* 41. in *Epist.* 1. ad *Cor.* num. 4. seq. pag. 592. seq. tom. 10. ed. Montfaucon. Paris., S. Augustinus *Serm.* 172. de *Verb. Apostol.* cap. 2. num. 3. opp. tom. 7. col. 828., de *Cur. gerent. pro mort.* cap. 18. col. 1875. tom. 8, in *Enchirid. de Fide, spe, et char.* cap. 110. col. 620. t. 11. ed. Ven. 1756., S. Ambrosius *Epist.* 39. num. 4. opp. tom. 3 col. 1014. ed. Ven. 1751., ceteri demum Patres, quos collegit Leo Allatius de utriusque *Ecl. Occid. atque Orient. perpet. in dogmat. de Purgat. consens.* pagin. 43. et seq. et pag. 336. seq. edition. Rom 1655.

(2) *Cap. 42. de Simon.*

§. VIII. Quod si aliquis extra Ecclesiam parochialem tumultu mandetur, ex iis rebus, quae ad aliam Ecclesiam funeris causa delatae sunt, pars aliqua detrahatur, quae dicitur, *quarta funeraria*, seu *caconica*, et paroeciae tribuitur. Nam justum visum est aliquid ex iis rebus dare Ecclesiae parochiali, quae defuncto curam spiritualem impendit (1). Haec autem portio non eadem ubique est, sed alibi quarta, alibi tertia, alibi major, aut minor pro gentium moribus (2); verum, quantacunque sit, semper *quarta* appellatur; atque ex consuetudine, pactisque conventis noscitur, quibus ex rebus detrahenda sit. Generatim tamen non detrahatur ex donationibus inter vivos, neque ex legatis missarum, et anniversariorum, atque ex ceteris, quae pia relictia dicuntur (3).

(1) *Cap. 1. de Sepultur.* Plures sunt Romanorum

Pontificum Constitutiones, per quas regulares, quorum in Ecclesiis fidelium cadavera sepeliuntur, ab hujus quartae solutione liberantur; cunctasque memorat Gaudentius a Janua de *Visit. Praelat. regul. tom. 2. cap. 7. dub. 20. sect. 3. num. 35. §. 1. sed Concilium Tridentinum Sess. 25. cap. 13. de Reform. sancivit, ut ii Regulares, qui annis ante ipsum Concilium quadraginta quartam solvere consueverant, eam etiam in posterum solvere deberent, ceteri, qui ante hoc tempus numquam solverunt, eodem onere non tenerentur; hoc Decretum Synodi Tridentinae declararunt S. Pius V. *Const. Etsi Mendicantium* 58 *Bullar. t. 4. par. 2. p. 373.*, Gregorius XIII. *Const. In tanta* 15. *p. 271. tom. 4. par. 3.*, Paulus V. *Const. Decent.* 6. *pag. 150. tom. 5. par. 3.* Denique Benedictus XIII. *Const. 2. Romanus* 51. *pag. 394. tom. 1.* omnia sustulit privilegia post *Clement. Dudum de Sepultur.*, et post Concilium Tridentinum concessa regularibus, qui sunt in Italia, atque in insulis ad eam pertinentibus, de non solvenda quarta parochiae defunctorum, qui in eorum Ecclesiis sepeliuntur. Hodie igitur hac lege Benedicti XIII. reguntur monasteria Regularium in Italia, atque in finitimis insulis, ceteri Regulares, qui extra has regiones commorantur; Tridentinae, quam memoravi, legi subjiciuntur.*

(2) *Cap. 9. cod.*

(3) *Cap. 10. cod., cap. ult. de Testam. Confer S. Pium V. cit. const. Etsi Mendicantium, et Benedictum XIII. cit. const. Romanus.*

§. IX. Ecclesiastica sepultura pars est christinae communionis, quae etiam post mortem manet; ideoque ab illa repelluntur, qui viventes ea communione carebant, atque ab Ecclesia sejuncti ex hac vita migrarunt (1). Quamobrem ecclesiastica sepultura privantur judaei, ethnici, infideles omnes, atque etiam infantes mortui sine baptismo (2), apostatae, haeretici, schismatici manifesti (3); nominatim interdicti (4); excommunicati vitandi, qui ni-

mirum palam in clericum violentas manus iniecerunt, et quos Judex Ecclesiasticus nominatim excommunicatos declaravit (5), qui sibi mortem consciverunt, nisi eos furore actos id egisse constet (6); qui in singulari certamine (7), aut in torneamentis, quae mortis periculum habent (8), interfecti sunt; qui in paschate Poenitentiae, et Eucharistiae sacramentum voluntarie omiserunt (9); usurarii manifesti (10); monachi mortui cum peculio (11); fures et latrones in crimine deprehensi, et occisi (12); raptores Ecclesiarum, qui non satisfecerint (13); denique omnes publici peccatores, qui sine poenitentia decesserint (14). Quod si horum aliquis in loco sacro sepulturam habuerit, ejus cadaver, modo internosci possit, e sepulchro educendum est, atque in loco profano collocandum (15).

(1) *Cap. 12. de Sepultur.*

(2) *Can. 27. et 28. de Consecr. dist. 1., Rituale Romanum tit. de Exeq. rubr. Quib. non lic. dar. eccl. sepult.*

(3) *Caus. 24. qu. 1. per tot.*

(4) *Cap. 10. de Sepult., cap. 17. de Verb. signif. cap. 20. de Senten. excom. in 6. Clem. 1. de Sepult.*

(5) Excommunicati vitandi, secundum celebre decretum Martini V. editum in Concilio Constantiensi, ii tantum habentur, quos Judex Ecclesiasticus palam excommunicatos pronunciavit, atque eos uti tales spectatum, et expresse declaravit. Eodem e genere sunt, quos ob manus in clericum injectas ita certum, atque exploratum omnibus est incidisse in sententiam latam a can. Si quis suadente diabolo, ut eorum factum neque celari, neque excusari aliqua ratione possit. Quibus Benedictus XIV. in Const. Detestabilem 6. §. 9. tom 4. ejus Bullar. p. 22. edit. cit. addidit decedentes in certamine singulari, vel etiam procul a loco certaminis, sed ex eo tamen accepto vulnere, quamquam vitandi

declarati non fuerint. Hi omnes tamquam excommunicati vitandi nunc ab ecclesiastica sepultura excluduntur.

(6) *Can. 11. et 12. cap. 23. qu. 5.*

(7) Concilium Tridentinum *Sess. 25. cap. 19. de Reform.* Vide etiam *cit. const. Detestabilem Benedicti XIV.*

(8) *Cap. 1. et 2. de Torneament.*, Gregorius XIII. *Const. Ad tollendum 140. Bullar. t. 4. par. 4. pag. 19.*, et Clemens VIII. *Const. Illius vices 30. tom. 5. par. 1. p. 385. cit. Bullar. ed. Rom. ult.*

(9) *Cap. 12. de Poenitent. et remiss.*

(10) *Cap. 3. de Usur.*, cap. 2. *eod. in 6.*

(11) *Cap. 2. et 6. de Stat. monachor.*

(12) *Cap. 2. de Furtis.*

(13) *Cap. 2. et 5. de Raptor.*

(14) *Cap. 16. c. 13. quaest. 2.*

(15) *Cap. 12. de Sepultur.*

TITULUS X.

DE MONASTERIIS.

- I. Monasterium quid? III. Exemptio monasterio-
 II. Quid in novo erigendo rum.
 monasterio observandum?

§. I.

Monasterium proprie significat locum, in quo solitarii vitam agunt, et vero monasteria initio erant domicilia eorum, qui e civitate in solitudines discedebant. Sed postea visum est in Urbes vocare Monachos, ut Christianam Religionem tuerentur, et amplificarent (1); lapsu autem temporum multi Regulares in mediis urbibus initio sunt instituti, ut in procuranda salute Animarum clericis opem ferrent. Hodie igitur monasteria dicuntur omnia loca, in quibus plures habitant, qui certa obstricti regula communem vitam ducunt; et qui pro diversa sui instituti ratione Monachi, Mendicantes, Canonici Regulares, Clerici Regulares appellantur.

(1) S. Basilium monasteria in urbe constituisse ut Monachi contra Arianos catholicam fidem tuerentur, narrat Socrates *Hist. lib. 4. c. 25. p. 247. edit. Cantabrig.* Cum vero monachi in Civitates deducti sunt, ut subsidio essent Clericis, novum hoc officium, quod sustinebant, eos deserere coegit laborem manuum, vitam transigebant, cum omnibus solati curis versabantur. Non enim se amplius po-

terant in hoc labore exercere, qui suam in totius Christiani populi utilitate operam collocare debebant. Accedit quod priscis monachis, quibus nulli erant ad vitam agendam redditus, necessarius erat manuum labor, ut per eum sibi ad vitam necessaria compararent. Sed cum suam pro Christiano populo operam impendere coeperunt, aequum profecto, et omni Juri consentaneum fuit, ut necessaria acciperent ab iis, quibus sua erat addicta opera, et occupatio. Hi dederunt, uti par erat, hujus operae remunerandae causa bona, cum quibus Monachi vitam traducerent, et ita sua sponte desiit manuum labor, cui non amplius Monachi aliis distenti curis vacare poterant, et quem vitae necessitas non amplius postulabat. Tunc autem illi sese dederunt studiis, atque laboribus, qui in rei Christianae publicae utilitatem redundarent, quique non solum ad Religionis officia, sed etiam ad studia literarum pertinerent. Quanta autem ad nos delata sint bona ex his Monachorum curis, atque laboribus, ignorat nemo, idque, ut ceteros mittam demonstrat Mabillonii opus *de Studiis Monasticis*, demonstrant praeclara opera Maurinorum, aliorumque complurium, quorum studiis, atque occupatione magna omnibus utilitas allata est. Neque vero illa, in qua nunc Monachi versantur, occupatio eorum instituti sanctitati adversatur, quod ipse fatetur Eybelius *Introduct. in jus eccl. tom. 4. lib. 2. cap. 11. §. 335. Not. 1*; nec certe aliquis reprehendat Monachos, quod pro commodo, atque utilitate Christianae Reipublicae operam terunt. Consule F. G. Ziebrecht c. 4. §. 35. seq., qui peculiari libro Bassani edito an. 1783 refutavit Rautenstrauchium, qui opere, cui titulus *Septem capita de Religiosis Monachos* ad priscum vitae institutum, manuumque laborem revocare vellet. Ceterum falsum est, quod omnes Monachi initio manuum labore sibi victum quaererent, cum Monachorum, qui plis operibus, et studiis vacarent literarum, multa sint exempla apud Athanasium *Epist. ad Dracont. opp. tom. 1. pag. 207. edit. Patav. 1777.*, Sozomenum *Histor. Eccles. lib. 6. cap. 28. et. 29. pag. 236. seq. cap. 30. 31. 32. p. 241. et seq. edit. Taur. 1747.*, et Concilium Constantiense propositionem 24 Wicleffi agentis: *Fratres tenentur per labores manuum victum acquirere*

et non per mendicitatem damnavit in prima parte tamquam scandalosam, et praesumptuose assertam pro quanto sic generaliter, et indistincte loquitur, in altera tamquam erroneam, pro quanto asserit, mendicitatem fratribus non licere tom. 16. concil. Labbaei col. 757 edit. Venet. Vide Mamachium *Del diritto libero ec. par. 1. tom. 1. cap. 2. pag. 326. 327. 370.* Atque id quidem pertinet ad antiquos Monachos, qui initio ea lege instituti sunt, ut in solitudine vitam agerent, ac manuum labori vacarent. Nam ineptum esset, contraque instituti legem ad solitudinem, ac manuum laborem vocare ceteros Regulares, quos recentiori aetate pii homines longe aliis regulis instituerunt, et quos in mediis civitatibus versari voluerunt, ut Christianis auxilio sint. Visum est haec monere, et edicere, ut satisfactum sit Scriptoribus Annalium Ecclesiasticorum Florentiae, qui mihi sententiam adscribunt, a qua longe absum. Nimirum quod harum Institutionum lib. 1. tit. 1. §. 9. not. 5. Clerico licere dixi laborem manuum suarum, et honesto artificio sibi victum comparare, ita hanc meam sententiam interpretati sunt, quasi illis videar assentiri, qui monachos revocari vellent ad manuum laborem, in quo sese olim solitariam agentes vitam exercebant. Sed omnes facile intelligunt, quam longe alia, ac diversa sit sententia agentis, quod liceat clerico labore manuum suarum, et honesto artificio sibi victum comparare, ac sententia illorum, qui falso putant, Monachos ad hunc laborem omnino esse cogendos. Haec adversus Annalium Scriptores monenda esse duxi, ut omnes intelligant, quam valde dissentiam ab iis opinionibus, quibus ipsi contra omnem recti, verique speciem assentiuntur. De ceteris quorum causa me reprehendendum putarunt, non laboro; quoniam mihi non molestum, sed gloriosum est, a quibusdam reprehendi, quod omnibus comperta esse volo jura certissima Summi Pontificis, quem Christus Dominus non solum honore, ac dignitate, sed etiam imperio, et jurisdictione praeesse voluit Ecclesiae universae.

§. II. Novum monasterium sine venia Episcopi, ac Sedis Apostolicae excitari non potest (1). In

primis autem cavendum est, ne novum opus in grave aliorum detrimentum redundet. Quare Episcopus veniam non concedit, nisi primum vocaverit, atque audiverit Praefectos, vel Procuratores antiquorum monasteriorum, quae sunt in locis circum positis per quatuor millia passuum, atque etiam Parochum, intra cujus paroeciae fines novum monasterium erigitur (2). Praeterea nullum extruitur novi monasterii aedificium, nisi in eo duodecim saltem Monachi, seu Religiosi habitare, atque ex redditibus, et consuetis fidelium eleemosynis sustentari possint (3). Denique Monialium monasteria nonnisi in urbibus sita esse debent, ne obnoxia sint praedae, ac ceteris pravorum hominum cupiditatibus (4).

(1) Nova monasteria sine Episcopi consensu aedificari non posse, statuit Concilium Tridentinum *Sess. 25, cap. 3. de Regul.* Tridentinam hanc legem explicaverunt Clemens VIII. *Constit. Quoniam ad Institutum Bullar. tom. 5. par. 3. pag. 14.*, et Gregorius XV. *const. Cum alias 70. tom. 5. par. 5. pag. 47.* Verum cum Tridentina Synodus, ac Romani Pontifices Episcopi veniam postulant, ut novum monasterium erigatur, nihil detrahant de antiquo jure, quod etiam Sedis Apostolicae veniam requirit in *Cap. unic. §. Confirmatos de Relig. domib. in 6.*, et in *cap. unic. de Exces. Praelat. in 6.* Qua de re edita est ab Innocentio X. *Constitutio Instaurandae 157. Bullar. tom. 6. par. 3. pag. 233.*, qua sancitum est, ut sine venia Sedis Apostolicae novum monasterium excitari nequeat, atque ut primum Congregatio Episcoporum, et Regularium diligenter videat, cum praesto sint omnia, quae requiruntur, ut rite monasterium aedificetur. Quae constitutio quamquam ad Italiam, atque ad ejus insulas pertineat, tamen etiam extra Italiam ubique servatur. Quare in novo monasterio erigendo, et Episcopi, et Sedis Apostolicae venia necessaria est. Confer *Benedictam XIV. de Synod. dioecess. lib. 9. cap. 1. num 9.*

(2) Clemens VIII. *cit. const. Quoniam*, et Grego-

rius XV. *cit. const. Cum alias Bullar. ed. Rom. ult.*

(3) Vide Gregorium XV. *loc. cit.*

(4) Concil. Trident. *Sess. 25. de Regul. c. 5.*

§. III. Regularium monasteria de Episcopi potestate subtracta, sive exempta, et uni Pontifici subjecta sunt. Quae exemptio antiquissima in Ecclesia est (1), eaque repetitur ex amplissima potestate, per quam Summus Pontifex certos Episcopo subditos adimere potest, eosque vel aliis, vel sibi met uni subijcere. Etiam Patriarchae Orientales in sui Exarchatus monasteria amplissimum habebant imperium (2), et nunc etiam apud ipsos viget *jus stauropegii*, et id, quidem non fraude, ac violenter arreptum, sed antiquissima consuetudine acquisitum (3), quod in eo positum est, ut in monasterii fundatione Patriarcha, si velit, crucem figat, eoque actu novum monasterium ab Episcopi jurisdictione subtrahat, sibi que uni obnoxium faciat (4). An quod licet Orientalibus Patriarchis, multo magis non licebit Summo Pontifici, qui non tantum habet jura Patriarchatus in toto Occidente, sed etiam divinitus constitutus est Princeps, Caput, Gubernator omnium Christi Ecclesiarum? Verum etiam in monasteria exempta interdum Episcopus jurisdictionem exercet; qua de re copiose egimus libro superiori. Id unum nunc monemus, Episcopo subjecta esse monasteria, in quibus duodecim Religiosi non habitant (5).

(1) Confer ea, quae dicta sunt lib. 1. tit. IX. §. XII. not. 6.

(2) Consule Thomassinum *loc. cit. lib. 1. cap. 9. n. 15. et cap. 16. n. 1.*

(3) Vide Christianum Lupum *Diss. de S. Leon. IX. act. cap. 16. opp. tom. 4. p. 427, ed. Ven. 1725.*

(4) Confer Benedictum XIV. *Const. inter plures* 98. §. 19. tom. 1. *ejus Bullar. p. 214. ed. cit.* Imo non Patriarcharum modo, sed etiam Metropolitanarum, qui certos ex Episcopi jurisdictione subditos subtraxerunt, atque eos sibi tantum subjectos voluerunt, in ecclesiasticis monumentis luculentissima exempla sunt. Ecce saeculo V. Primates Carthaginienses quaedam sibi monasteria subjecerunt, eaque a suorum Episcoporum jurisdictione exemerant. Confer Concilium Carthaginense an. 325., in quo veneranda Patrum constituta de jure Primatus Carthaginensis memorantur tom. 2. *Concil. col. 1071. seq. coll. Harduini, et confer etiam Mabillonium Annal. Benedictin. ad an. 525. n. XIII. seq. tom. 1. pag. 38. seq. ed. Lucae 1736.* Cumque Liberatus primae Sedis Byzacinae Episcopus Monasterium in sua dioecesi positum sibi subjicere tentasset, S. Bonifacius Primas Carthaginensis coacta synodo graviter conquestus est, quod idem Liberatus, *capta injustissimae querelae occasione, privilegia Sanctae Carthaginensis Ecclesiae subtrahere moliretur.* Episcoporum autem, qui ad synodum conveniant, una fuit sententia, et vox una, integra esse oportere jura primae Sedis Africanae, a se autem illi exhiberi quod antiquitas ejus praedecessoribus detulisset. Concilium Carthaginense mox laudatum cap. 1084. seq. loc. ind. Vide etiam Concilium habitum sub Reparato Carthaginensi an. 534., quod memorat ipse Mabillonius loc. cit. num. XVIII. p. 40., et quo sancitum est, ut firma, immotaque essent, quae sub S. Bonifacio in universali concilio gesta fuerant, Mabillonius *ibid. num. 19.* Quid? Com Carthaginensis Episcopus jure Primatus, quem in Africa habebat alienos subditos ordinabat, nonne eos subtrahebat ex suorum Episcoporum jurisdictione eosque sibi submittebat? Atque in Concilio Africano Aurelius Carthaginensis Episcopus quaeri voluit, num sibi propter sollicitudinem, quam gerebat cunctarum in Africa Ecclesiarum, alienos subditos, etiam proprio Episcopo invito, ordinare liceret. Nemo autem ex Episcopis, qui aderant, fuit qui non id suo jure Carthaginensi Episcopo licere fateretur, etiamsi illi subjectus Episcopus unum tantum haberet Presbyterum, quique non agnosceret, hanc semper fuisse superioris aetatis legem, et con-

suetudinem. Consule Concilium Africanum cap. 22. apud Pithoeum *Cod. canon. Eccles. Roman. pag. 148. edit. Paris. cit.* Quod licuit Carthaginensi Episcopo, quem tantum Jus Ecclesiasticum Africae Primatem fecerat, nonne magis licebit Summo Pontifici, quem Christus ipse totius Ecclesiae Primatem constituit?

(5) Innocentius X. *Const. Instaurandae* 157. et in *Decret. Ut in parvis Bullar. tom. 6. par. 2. p. 233. et 270.* e medio sustulit, et extinxit parva virorum monasteria, in quibus sex saltem Religiosi non erant, et si quae adhuc extarent hujusmodi monasteria, Episcopo, tamquam Sedis Apostolicae delegato, subjecta esse voluit. Innocentius autem XII. apud Giraldum *Exposit. Juris Pontif. par. 2. sect. 155. pag. 1028.* Episcopo subjecit monasteria, in quibus duodecim Religiosi non habitant. Innocentii XII. Constitutio comprehendit etiam conventus, seu domus regulares, quae a praecipuo aliquo monasterio pendent, quaeque Granciae latiori significatione appellantur, quod illi conjunctae sunt, atque ejus veluti praedia, seu membra habentur. Nam Granciae propriae sunt domus rurales, seu praedia rustica, quae ad monasterium pertinent, et in quibus non monachi, sed tantum conversi pro colendis agris commorantur. Atque hae Granciae neque Ecclesiam habent, neque publicum oratorium Episcopi auctoritate constitutum, et loca non sacra, aut Religiosa, sed temporalia, ac profana sunt. Videndi sunt Fagnanus in *Discept. de Granciis post tit. de Censib. exaction.* et Giraldus *Expos. Jur. Pontif. par. 1. lib. 39. tit. 3. p. 406. et seq.*

TITULUS XI.

DE SEMINARIIS CLERICORUM.

- | | |
|--|---|
| I. et II. Seminariorum ortus, et progressus. | dare operam debeant? |
| III. Qui in seminario recipiendi, et quibus studiis hi | IV. et V. Seminarii Deputatorum electio, et officium. |

§. I.

Nihil est, quod magis pertineat ad publicam utilitatem, quam quod optime regantur juvenes, atque ad omnem sapientiam instituuntur. Recte igitur, atque sapienter Majores nostri ab antiquissimis usque temporibus Episcopalia Seminaria instituenda curarunt, in quibus sub Episcopi cura, et gubernatione educarentur, atque in spem cleri alerentur Adolescentes, qui optimis imbuti moribus, doctrinisque eruditi inter clericos cooptari, sacrisque initiari ordinibus possent. Sunt qui Episcopaliū seminariōrum vestigia deprehendisse se putant in Synodo Nicaena (1), sunt qui primam eorum originem ab Augustino repeti posse arbitrantur (2). Illud comperitum, exploratumque est, sexto saeculo constitutas jam fuisse communes domos, hoc est seminaria, in quibus clerici communem vitam traducerent, atque ad omne clericalis officii munus instruerentur (3).

(1) Si certa esset fides Nicaenorum Canonum, quos

ex Arabico in latinum sermonem conversos primum Franciscus Turrianus, deinde Abrahamus Ecchellensis evulgarunt, merito statui posset, in Concilio Nicaeno non obscura extare vestigia hujusmodi seminariorum. Nam in can. qui apud Turrianum est 55., apud Ecchellensem 59. t. 2. Concil. Labbaei col. 317. et 341. edit. Ven. jubentur Chorepiscopi instituere Ministros, eosque distribuere per Ecclesias, et monasteria, et providere, ut discant, ut reddantur opti; et idonei ad aedificationem Monasteriorum, et Ecclesiarum, et aliorum locorum, quae horum opera indigebant. Quae quidem verba considerans notarum Auctor scribit haec: Cernitur in hoc canone ratio quaedam seminarii Ministrorum Ecclesiae, seu vestigium quoddam seminarium, quae nuper, secundum decretum Concilii Tridentini, instituta sunt. Verum hujus Canonis nulla certa fides: quoniam non pertinent ad illos viginti canones, quos revera a Nicaena Synodo editos fuisse, inter omnes constat.

(2) S. Augustinus, uti ipse testatur praesertim *Serm.* 355. *opp. tom. 7. par. 2. col. 1379. ed. Venet. 1763.*, in Episcopali domo monasterium habuit clericorum. In eo clerici communem agebant vitam, atque ita Episcopus de illorum indole, moribus, vocatione, et progressu certior fiebat, neque aliquem ordinabat Augustinus, nisi qui meum, inquit *loc. cit. num. 6. col. 1383.*, vellet manere; ut si vellet discedere a proposito, recte illi tollerem clericatum, quia deberet sanctae societatis promissum, coeptumque consortium. Hoc certe monasterium Clericorum veluti seminarium erat; verum hi clerici suis sese bonis abdicare, neque proprium aliquid habere debebant. Benvenutus in *Tit. S. Augustini lib. 4. cap. 2. num. 7.*, late agit de universa ratione, quam ipse Augustinus servabat in iis instituendis, quibus erant ecclesiastica officia committenda. Vide Thomassinum *Vet. et nov. Eccles. disciplin. par. 1. lib. 3. cap. 2. seq.*

(3) Concilium Toletanum II. an. 531. *cap. 1. t. 5. Conc. Labbaei col. 77.*, et Toletanum IV. an. 633. *cap. 24. tom. 6. col. 1459.*, Concilium autem Vasense III. an. 529 *cap. 1. col. 821. tom. 5. cit. non unum tan-*

tum in unaquaque dioecesi, sed in cujusvis Parochi domo clericorum seminarium esse jubet, idque in totius Italiae moribus positum esse confirmat. De seminariis Episcopalibus copiose agit Joannes de Joanne *Hist. Seminar. clerical.*, quo quidem opere horum ortum, et progressum late explicatum habes.

§. II. Labentibus annis negligi coeperunt Episcopalia Clericorum seminaria, quia forte satius visum est Episcopis, clericos ire ad scholas Monachorum, et Academicarum, quae ea tempestate auctae, propagataeque sunt (1). Sed cum deinceps in Academicis tantum scholarum pompa, et studia literarum in pretio haberentur, pietas autem pene oppressa languesceret, neque amplius inter Episcopos, et Regulares vigeret arcta illa, quae antea fuerat, conjunctio animorum, de Episcopalibus seminariis restituendis actum est. Reginaldus Polus Cardinalis cum de instaurando, emendandoque Anglicano Clero cogitaret, animum etiam adjecit ad juvenes, qui instituerentur in seminariis, quorum regimen, rationemque proposuit (2). Sed rem omnem absolvit Synodus Tridentina, lata lege, qua Episcopi jussi sunt prope Ecclesiam Cathedralem, aliove idoneo loco collegium, aut seminarium instituere, in quo Clerici ad studia literarum, atque ad rem Ecclesiasticam instruantur (3).

(1) Monachi scholas ubique habebant, id quibus pueri erudiebantur; verum aliae erant scholae exteriores, et Canonicae, quae patebant clericis saecularibus; aliae interiores, seu claustrales, in quibus Monachi, et pueri monasterio oblati versabantur. In his saecularibus clericis nullus erat locus. Videndus Mabillonius *Act SS. Ordin. S. Benedic. Praef. ad saec. III. §. 4. n. 40. pag. XVI. ed. Venet. 1734.*

(2) Reformationis capita a Cardinali Polo proposita

extant apud Harduinum *Concil. tom. 10. col. 408.*; seminarii autem forma describitur *Decret. 11.*

(3) Concilium Tridentinum *Sess. 23. de Reform. cap. 18.* Videndi sunt etiam Benedictus XIII. *Const. Creditae nobis 67. pag. 409. tom. 11. Bullar. ult. ed.* Benedictus XIV. *Const. Ubi primum 2. §. 2. tom. 1. ejus Bullar. p. 3. ed. Rom. seu Venet. 1754., et Inst. Eccl. 59., et S. Carolus Borromaeus Conc. Provinc. I. Act. Eccles. Mediolan. par. 1. t. 1. p. 11. ed. Patav. 1754.* Secundum Tridentini Concilii legem Pius IV. Clericorum seminaria Romae, aliisque in Urbibus excitanda curavit, uti narrat Raynaldus *ad an. 1564. num. 53. c. 15. p. 427. ed. Lucae.*

§. III. Itaque omnes Episcopi habere debent seminarium, in quo recipiantur, qui ad minimum duodecim annos, et ex legitimo matrimonio nati sint, ac legere, et scribere noverint, et quorum indoles, atque voluntas spem afferat, eos perpetuo ecclesiasticis ministeriis addictos fore (1). Qui juvenes in seminario addiscere debent grammaticam, cantum gregorianum, compulum ecclesiasticum, theologiam, aliarumque bonarum artium disciplinam, sacros ritus, caeremonias, cetera, quae ecclesiasticos viros callere oportet (2). Nam hoc seminarium locus esse debet, unde dioecesis accipiat sacros ministros, quibus opus habet, et recte in pluribus Dioecesibus seu lege, seu consuetudine receptum est, ut nemo sacris initiatur ordinibus, nisi vel plures annos, vel saltem definitum temporis spatium in seminario traduxerit (3).

(1) Concilium Tridentinum *loc. cit.*

(2) Benedictus XIII. *cit. Constit. Creditae §. Postremo.*

(3) Consule Concilium Romanum *tit. 30. cap. 2., Benedictum XIV. de Synod. dioecesi lib. 11. capit. 2.*

n. 11., Joannem de Joanne *Hist. semin. cler. cap. 6. num. 15. et seq.*

§. IV. Seminarii administrandi, beneque gerendi onus omne est Episcopo impositum, quod ipse sustinere, tuerique diligentissime debet (1). Sed ut res gravissima diligentiori gubernatione regatur, Episcopus eligere debet Canonicos duos, quorum consilio in iis utatur, quae ad juvenum ejusdem seminarii institutionem, disciplinam, moresque pertinent. Duo item sumendi sunt e Capitulo, quorum alterum Episcopus, alterum Capitulum ipsum eligit, ac duo item e Clero Civitatis, et horum alterum similiter ab Episcopo, alter a Clero constituitur. Horum est adhibendum consilium in iis, quae temporalium rerum administrationem ac rectam seminarii procuracionem respiciunt.

(1) Videndus S. Carolus Borromaeus *Concil. Provinc. V. Act. Eccles. Mediolan. par. 1. pag. 220. t. 1. ed. Patav. 1754.*

§. V. Itaque his consultoribus uti debet Episcopus, cum gestae administrationis rationem postulat, quae a seminarii administratoribus unoquoque anno reddenda est (1); et cum seminarii egestati consulturus legem, modumque constituit solutionis, quae ex redditibus Mensae Episcopalis, et Capituli, atque omnium, quae in dioecesi sunt, beneficiorum, seminario quotannis tribuenda est (2). Horum omnium adhibendum est consilium, quod tamen sequi non cogitur Episcopos, cui integrum est ea facere, quae pro sua pietate, ac prudentia potiora ju-

dicat (3), et omnes semel electi a commisso munere sine justa causa removeri nequeunt (4).

(1) Concilium Tridentinum *loc. ind.*

(2) Ne unquam propter reddituum inopiam semina-
ria pereant, sapientissime a Concilio Tridentino *ead.*
loc. statutum est, ut ex redditibus Mensae Episcopalis
et capituli, omniumque beneficiorum, quae in dioecesi
sunt certa vis pecuniae detrahatur, quae Seminario sin-
gulis annis solvenda est. Hujus solutionis lex, et mo-
dus ab Episcopo constituitur. Quin etiam eadem Triden-
tina lege cautum est, ut simplicia quoque beneficia ab
Episcopo seminario uniantur, sive conjungantur. Quo-
modo autem haec unio facienda sit, late explicat Bene-
dictus XIV. *de Synod. dioec. l. 9. cap. 7.*

(3) Consule Giraldum *Expos. Jur. Pontif. par. 2.*
sect. 109. et 110 p. 983. seq.

(4) Videndus Giraldus *loc. mox indic.*, a quo etiam
cuncta declarantur, in quibus duo illi ex Capitulo, duo-
que ex Clero electi consulendi sunt.

TITULUS XII.

DE HOSPITALIBUS.

- I. Hospitalia apud Christianos antiquissima. III. Hospitalia Episcopo subiecta.
 II. Variæ eorum species. IV. Loca pia.

§. I.

Magnam sibi semper Ecclesia curam assumpsit fovendorum, ac recreandorum pauperum, qui aliena ope indigerent; et in ipso quidem Christianæ Religionis initio Fideles bonorum pretium Apostolis offerebant, ut illud inter pauperes distribuerent (1). Sed data Ecclesiæ pace, publicas etiam aedes Christiani ædificare coeperunt, quibus pauperes exciperentur, hospitio, ac necessaria quæque obtinerent (2). Praesertim vero Christiani Occidentales ea de re laborarunt octavo, et nono saeculo; qua tempestate omnia fere monachorum, et clericorum monasteria conjunctas habebant aedes, quæ praesidio erant pauperibus, aegrotis, peregrinis. Alia etiam ejusdem generis diversoria constituta sunt, potissimum ut hospitalis domus fere ubique pateret illis, qui sacras peregrinationes suscipiebant (3).

(1) Act. Apostol. IV. 37.

(2) Saeculo IV. jam plura ædificata fuisse hospitalia certum est. Unum certe hospitale circa annum 330. Constantinopoli erexit Zoticus Senator, uti narrat Baronius ad an. 330. num. 28. tom. 4. p. 231. ed. Lucae, cujus

quidem hominis etiam mentio fit in *L. 34. C. de Episc. et cleric.*, ubi plura hospitalium genera memorantur. Gregorius Nazianzenus *Orat. 3. num. 95. p. 102. opp. tom. 1. ed. Colon. 1690.* Julianum Apostatam ridet, quod infidelibus Christianorum exemplum proponens eos hortetur ad excitanda xenodochia *καταγωγὴν καὶ ζῶσας*. Ipse Gregorius *Orat. 20. p. 359.* procotrophia a S. Basilio extra Urbem Episcopalem magnificentissime extracta memorat. Celebre est etiam xenodochium Romae a Pammachio, et nosocomium a Fabiola erectum, uti narrat Hieronymus *Epist. 66 ad Pammachium, n. 11., et Epist. 77 ad Ocean. n. 6. opp. tom. 1. col. 399. et 457. ed. Vallarsii Veronae.* Denique Theodoretus *Histor. lib. 5. c. 19. p. 219. ed. Cantabrig.* narrat, Placidiam Augustam Theodosii M. uxorem in Ecclesiae xenodochiis abjecta quaeque munera exercuisse. Confer etiam S. Joan. Chrysostomum *lib. 6. ad Stagyr. a demon. vexat. num. 13. pag. 213. tom. 1. opp., et Homil. 45. in act. Apostol. n. 3. p. 142. t. 9. ed. Paris. 1718.* S. Augustinum *Tract. 97. in Evangel. S. Joan. n. 4. opp. tom. 4. col. 976. ed. Ven. 1760.* Concilium Chalcedonense *act. 3. col. 1275. act. 11. col. 1606. et Can. 8. col. 1686. t. 4. Concil. Labbaei ed. Venet.* ubi et aliorum hospitalium mentio est.

(3) Consule Thomassinum *Vet. et Novi Eccl. discipl. par. 1. lib. 2. c. 89. et seq., et Muratorium Antiq. Italic. dissert. 37.*

§. II. Loca hospitibus, ac peregrinis excipiendis destinata proprie hospitalia dicuntur; at eo nomine vulgo vocantur omnia loca, quae alendis, educandis, sustentandis quibusvis hominibus ope egentibus addicta sunt. Hinc plura sunt hospitalia, quae propriis nominibus designantur, veluti *xenodochia*, quibus hospites excipiuntur, *Orphanotrophia* orphanis educandis, *Nosocomia* aegrotis curandis, *Prochotrophia* pauperibus sustentandis, *Gerontocomia* alendis senibus, *Brephotrophia* nutriendis infantibus comparata.

§. III. Omnia haec loca subjiuntur Episcopo dioeceseos, in qua sita sunt, nisi exempta probentur, aut aliud postulent leges, quae in eorum fundatione constitutae sunt. Quin etiam exempta poterit Episcopus, ubi opus fuerit, visitare, atque corrigere, exceptis hospitalibus militarium ordinum, aut religiosorum, quibus antiqua institutionis decreta servanda sunt (1), itemque exceptis hospitalibus, quae sub immediata Regum protectione sunt (2). Verum et horum locorum quamquam a laicis regantur, Administratores quovis anno reddere Episcopo debent gestae administrationis rationem, nisi aliter in eorum fundatione cautum sit (3). Quod si lege aliqua, privilegio, aut consuetudine haec ratio aliis reddenda sit, tamen cum iis etiam Episcopus erit adhibendus.

(1) *Clem. 2. §. Praemissa de Relig. domib.*

(2) Concilium Tridentinum *Sess. 22. cap. 8. de Reform.* Vide Giraldum *Exposit. Jur. Pontif. par. 2., sect. 82. t. 2. p. 922*, ubi explicatur, quae hospitalia sint, quae sub immediata Regum protectione esse dicantur, quaeque Episcopi visitationi non subsint.

(3) *Conc. Trid. Sess. 22. cap. 9. de Reform.*

§. IV. Quod de hospitalibus dico, id etiam dictum volo de ceteris piis locis, uti sunt confraternitates, quas vocant, collegia, cetera similia, quae cuncta Episcopo subsunt, quamquam a laicis administrantur. Ac de Confraternitatibus praesertim decet animadvertere, eas erigendas esse auctoritate Episcopi, qui earumdem etiam statuta cognoscere, atque approbare debet (1).

(1) *Clemens VIII. Const. Quaecumque 350. Bullar. tom. 5. par. 3. p. 85.*

TITULUS XIII.

DE REBUS TEMPORALIBUS ECCLESIAE.

- | | |
|---|--|
| I. Communia bona omni hominum societati necessaria. | nis modo, sed etiam sub ethnicis Imperatoribus Ecclesia habuit bona immobilia. |
| II. Semper communia bona Ecclesiae fuerunt. | |
| III. Quo jure fuerint? | VI. et VII. Distributio bonorum ecclesiasticorum. |
| IV. et V. Non sub Christia- | |

§. I.

Ventum est ad res temporales Ecclesiae, quae scilicet ecclesiasticis usibus addictae sunt. Nulla enim Universitas sine bonis communibus stare potest; cum necessario multae faciendae sint impensae, ut ministri stipendium habeant, ut agantur conventus, ut omnia societati necessaria comparentur. Ecclesia hominum societas est, ideoque, ut ceterae societates, communibus his bonis carere non potest. Hinc ei sua fuerunt ab ipso initio Christianae Religionis bona, unde aleret Episcopos, Presbyteros, ministros, curam gereret orphanorum, virginum, viduarum, pauperum, hospitalitatem exerceret, ferret opem fidelibus Religionis causa aut carcere detentis, aut ad metalla damnatis, necessaria quaeque compararet pro luminaribus, sacris vasis, libris, agapis, quod ecclesiastici convivii genus erat.

§. II Ipse Christus, cum hanc societatem instituit, ei communia bona esse voluit, hoc est pe-

cuniam collectam ex fidelium oblationibus (1), habuitque loculos (2), cum quibus Apostolis, discipulis, pauperibus opitularetur. Christi exemplum sequuti sunt Apostoli (3); deinde vero, cum eorum successores Ecclesiae regimini praefuerunt, eadem omnino ratio rerum fuit (4).

(1) *Euntes emamus ducentis denariis panes*, scriptum est apud Marcum VI. 37., apud Lucam IX. 13. *seq. eamus, et emamus in omnem hanc turbam escas*, apud Joannem IV. 8. *discipuli ejus abierant in civitatem, ut cibos emerent*. An emi aliquid potuisset, nisi aut Christus, aut cum ejus consensu Apostoli ab offerentibus pecuniam acceperint?

(2) Joannes XII. 6. XIII. 29. Vulgata habet *loculos*, sed in Graeco textu a fidelibus oblatum positam dicitur *ἐν τῷ γλωτσοχοκ*, in marsupio, quod *fiscum* *Reipublicae Domini* appellat Augustinus *Enarrat. in psalm. 146. n. 17. opp. tom. 4. col. 1684. ed. cit.*

(3) Actor II. 44. IV. 34. V. 1. *seq.* Confer Tertullianum *de Fug. in persecut. C. 12. p. 542. ed. Venet. 1744. Origenem Hom. 15. in Matth. c. 15. p. 673. seq. 1. 3. S. Cyprianum Testimon. ad Quirin. lib. 3. n. 3. p. 46. et de Oper. et eleemosyn. pag. 144. edit. Amstelaed. 1700.*

(4) S. Justinus M. *Apol. 1. num. 67. p. 83. edit. Paris. 1742.*, Tertullianus *Apolog. cap. 39. p. 31. ed. cit.* Adeundus doctissimus Mamachias *del diritto libero della Chiesa di acquistare, e possedere l. 2. c. 2. § 2. p. 251. seq.* a quo haec omnia copiose, diligenterque explicantur. Confer praeterea Anselmum Desing in opere, cui titulus: *Se le ricchezze del Clero nocevoli sieno alla Repubblica.*

§. III. Haec autem bona non aliqua hominum lege, sed Christi voluntate, et exemplo Ecclesia acquisivit. Nam Christianorum Respublica contra eorum, qui tunc imperio potiebantur, voluntatem a

Christo fuerat constituta, neque civiles leges, quibus tunc orbis terrarum regebatur, coetum hominum non earum jure sociatum aliquid acquirere, ac retinere permittebant. Quare si haec societas contra id, quod esset humana lege praescriptum, bona habuit, auctoritate ipsa Christi, consequens est, ut ab Ecclesia divino jure acquirantur, ac retineantur bona; atque hoc jus divinum agnoverint Apostoli, et eorum successores, qui haec Ecclesiae bona esse voluerunt, cum eadem esse vetarent leges ethnicorum, quorum tunc dominatu omnia tenebantur (1).

(1) Consule Mamachium *loc. cit.*

§. IV. Donec ethnici rerum potiti sunt, Ecclesiae bona praesertim fuerunt res mobiles, quae in illis aerumnis facile celari, asportari, ac distribui poterant. Verum et hac tempestate non defuerunt bona immobilia; et sane edicto Constantini, ac Licinii ethnici jussi sunt Christianis restituere; quae hoc temporis intervallo rapuerant (1). Data Christianis pace a Constantino, Ecclesia bonis immobilibus abundare coepit, et multa ei per contractus inter vivos tributa, multa testamento relicta sunt. Ipsi etiam Christiani Imperatores certam pecuniae vim ex publico aerario Ecclesiae solvi voluerunt (2): quam liberalitatem a Juliano Apostata sublatam Marcianus restituit (3), et saepe etiam ethnicorum templa, eorumque redditus Ecclesiis adscripserunt (4).

(1) Confer Eusebium *Histor. lib. 10. c. 5. p. 482.*, et de *Vit. Constantin. lib. 2. cap. 39. p. 555. ed. Cantabrig. cit.*, et Lactantium de *Mort. persecut. cap. 48.*

p. 244. *opp. t. 1. ed Paris. 1748.* Hos autem Eusebii, et Lactantii locos solide, ac diligenter expendit Cl. Machius del *Diritto libero ec. lib. 2. cap. 2. §. 8. p. 358. et seq.*

(2) Vide Eusebium *Histor. lib. 10. c. 6. p. 186.*, et Sozomenum *Histor. lib. 5. c. 5. p. 186. indic. edit. Cantabrig.*

(3) *Leg. 12. Cod. de Sacros. Eccles.*

(4) *Leg. 20. Cod. Theodos. de Pagan.*

§. V. Scilicet ut Gentes Christianae Religionis lucem aspicere coeperunt, consequens erat, ut Ecclesia, quam Ethnici inter vetita collegia recensebant, et ideo nihil ei donari, aut testamento relinqui sinebant (1), civilibus quoque legibus sanctissima, et omni jure instituta societas haberetur. Cū igitur frui non debebat juribus societatum, quae legibus probatae erant, quibus aut per contractum inter vivos, aut per testamentum quidquid acquirere licebat? Itaque civiles leges hoc jus Ecclesiae agnoverunt, et confirmarunt (2); quin etiam actum est de conservandis bonis Ecclesiarum, quorum est vetita alienatio (3); deque acquirendis bonis clerici, aut monachi sine haeredibus, ac sine testamento morientis, quae adscripta sunt Ecclesiae, aut monasterio, cui vivens addictus fuerat (4).

(1) *Leg. 8. cod. de Haered. instit.*

(2) *Leg. 1. Cod. de Sacros. Eccles.*

(3) *Leg. 14. Cod. de Sacros. Eccles., Auth. de Non alien. aut permut. cap. 1. et 3. collat. 2.*

(4) *Leg. 1. Cod. Theodos. de Bon. cleric.*

§. VI. Initio omnium Ecclesiae bonorum cura, et administratio erat penes Episcopum, qui illam
DEP. Inst. Can. Tom. II.

Oecono^{mo}, aut Archidiacono committebat, et hi finito officio gestae administrationis rationem Episcopo reddere debebant (1). Unus erat eorum bonorum cumulus, unde alebantur Episcopus, et clerici, qui Ecclesiae erant addicti, pauperes opem accipiebant, detrahebantur impensae, quas pro Ecclesiae fabrica, ornatu, supellectile, ceterisque rebus facere oportebat. Postea visum est bona Ecclesiastica in certas veluti partes dividere, et sua Episcopo, sua clericis, sua item pauperibus, sua denique Ecclesiae fabricae pars attributa est (2).

(1) *Can. 21. cap. 1. quaest. 7.*

(2) Hanc in quatuor partes divisionem bonorum Ecclesiae memorant Simplicius P. *Epist. 3. ad Florent.* apud Labbaeum *Concil. tom. 5. col. 96. ed. Venet.*, Gelasius P. *Epist. 9. ad Episc. Lucan. c. 27. col. 321. eod. loc.*, et Gregorius M. p. 11. *lib. 4. col. 691, Ep. 12. lib. 5. col. 737., Ep. 7. l. 8. col. 900. Ep. 64. l. 11. col. 1150. et 1151., et Ep. 44. l. 13. col. 1249. opp. t. 2. ed. Paris. cit.* Verum Synodus Bracaraensis l. *can. 7. col. 351. t. 3. Collect. Harduini* tantum constituit partes tres, quarum unam Episcopo, alteram clericis, tertiam aedificiis, et Ecclesiae luminaribus adscribit. In hac autem partitione Episcopo hospitalitas exercenda relinquebatur.

§. VII. Denique certi redditus Parochialibus Ecclesiis adscripti sunt, et clericis, qui pridem ex Ecclesiae, cui erant addicti, redditibus alebantur, certa concessa sunt Ecclesiae bona, quorum curam gererent, et ex quibus perciperent necessaria ad vitam honeste traducendam. Hodie igitur sua sunt bona clericis, et sua item Ecclesiis, quae utraque separatim administrantur. Bona haec temporalia dicimus, quod eorum redditus impenduntur in temporales usus

Ecclesiarum, et clericorum: verum cum semper ecclesiastica sint, eo censenda sunt jure, quo censentur bona Ecclesiarum, quae sine legitima venia distrahi nequeunt, et quibus nemo, tamquam profanis bonis uti, et abuti potest suo arbitratu.

TITULUS XIV.

DE PRAEBENDIS, ET BENEFICIIS.

- | | |
|--|--|
| I. Quid beneficium? | VII. et VIII. Beneficia residentiarum, et non residentiarum. |
| II. Beneficiorum inter clericos distributio. | IX. Majora, et minora. |
| III. Beneficia a praebendis distinguuntur. | X. Saecularia, et regularia. |
| IV. et V. Eorum indoles. | XI. Collativa, electiva, patronata. |
| VI. Praecipuum clericorum officium. | |

§. I.

Beneficii nomen apud Latinos scriptores significat praedium fiscale, quod ducibus ac militibus optime de republica meritis ab Imperatoribus concedebatur, ut ex eo perciperent necessaria ad vitam traducendam, suoque deinceps sumptu stipendia facerent (1). Praedia haec etiam Ecclesia tribuere coepit clericis de ea bene meritis, ut iis fruerentur dum ipsis vita suppeditaret, etque praedia beneficia, beneficiati autem dicti sunt clerici qui eadem obtinuerant. Rarae initio erant hujusmodi concessionem, atque, ut plurimum breve temporis intervallum comprehendebant

(2), quo finito, vel mortuo clerico, cui data fuerant praedia, ad Ecclesiam revertebantur (3).

(1) Consule Du-Cangium *Glossar. med. et infim. Latinit. verb. Beneficium*, Baronium ad an. 502. t. 9. §. 23. pag. 20. ed. Lucae, Thomassinum *Vet. et nov. Eccles. discipl. par. 3. lib. 2. c. 13. n. 5.*

(2) Concilium Agathense *Can. 7. et Can. 22. col. 999. et 100. tom. 2. collect. concil. Harduini, Arelia-nense I. Can. 23. col. 1011. ibid. Symmacus P. Epist. 5. ad Caesar. Arelaten. cap. 1. col. 425. t. 5. Concil. Labbaei ed. Venet.*

(3) *Can. 61. c. 16. quaest. 1.*

§. II. Verum lapsu temporum hujusmodi concessionones frequentissime evaserunt (1), et eo denique res venit, ut clerici non amplius ex communi Ecclesiae aerario alimenta acciperent, sed peculiares haberent praebendas suas in praediis, sive beneficiis, quae ipsis concedebantur, donec vitam agerent. Ita factum est, ut jus percipiendi redditus ecclesiasticos, quod olim affixum erat ordinationi, per quam clericus certae adscribebatur Ecclesiae, cujus ex aerario alebatur, nunc haereat beneficiis, unde clericus redditus percipit, quibus honeste, et decenter vivat. Nimirum semper clericis jus fuit, propter ecclesiasticum officium, de altari vivere. Modus autem, quo clericus ecclesiasticis bonis frui debet, pertinet ad disciplinam, quae non eadem omni aetate est.

(1) Primum parochialibus Ecclesiis, et iis quidem ruralibus adscriptae videntur oblationes, quae ad altare fiebant, salva earum tertia, aut quarta parte, quae ad Episcopum pertinebat *Can. 7. cap. 10. quaest. 1.* Paulo post iisdem ruralibus ecclesiis certi etiam ex fau-

dis redditus tributi sunt. Concilium Aurelianense III. *Can.* 5. *col.* 1424. *tom.* 2. *concil. coll.* Harduini. Certe IX. saeculo omnis ruralis Ecclesia suas proprias decimas, et fundos obtinebat *can.* 25. *c.* 23. *quaest.* 8. Urbanae quoque parochiae eandem disciplinam postea acceperunt; et tunc potissimum, inducta partitione bonorum, certa clericis data sunt praedia, quae ipsi administrarent, et ex quibus ad vitam necessaria perciperent.

§. III. Proprie beneficium a praebenda distinguitur. Haec enim tantum comprehendit fructus, redditus et emolumenta, quae clericis certo obveniunt, ecclesiasticorum officiorum, et beneficiorum causa. Hinc eam saepe etiam beneficii dotem appellamus, sive consistat in praediis rusticis, aut urbanis, sive in pascuis, silvis, aut similibus, sive in illis juribus, quae fructum vicem obtinent, et rebus immobilibus aequantur, uti sunt census, et reliqua generis ejusdem. At vero beneficii nomen latius patet, quoniam, non ea tantum, quae praebenda, comprehendit, sed etiam ecclesiasticum officium, et magistratum. De magistratibus, et officiis, quae beneficiis adjuncta sunt, superiore libro actum est. Nunc in beneficiis potissimum spectamus redditus; quamquam hi redditus nonnisi propter ecclesiasticum officium, et magistratum percipiuntur.

§. IV. Beneficium est perpetuum jus percipiendi fructus de bonis ecclesiasticis, officii causa, ecclesiastica auctoritate institutum. Perpetuum inquam, hoc est donec beneficiarius vitae usura fruitur, beneficium esse debet; quia per hoc certo in Ecclesia obeundo muneri addicitur, quod cum perpetuum sit, perpetuum quoque jus ad redditus esse debet.

§. V. Praeterea ecclesiastica auctoritate, videlicet Summi Pontificis, aut Episcopi, opus est, ut beneficium constituatur. Cum enim ecclesiastici redditus, et multo magis sacra ministeria, quae duo beneficium complectitur, sine Ecclesiae auctoritate dari nequeant, manifestum est, sine hac auctoritate nullum esse, et haberi beneficium posse. Quare omnes redditus, licet perpetuo clericis ob spirituale aliquod officium attributi, uti legata pia, capellaniae, beneficia non sunt, nisi Episcopi accedat auctoritas, sed mera stipendia, aut eleemosynae censentur.

§. VI. Denique beneficium propter spirituale officium institutum est. Non enim clericos otiosos, et nihil agentes ex ecclesiasticis redditibus vivere oportet. Praecipuum clericorum officium positum est in altaris ministerio, atque in precibus, quas ad Deum mittere pro cunctis debent; et vero Ecclesia certas constituit preces, quae unoquoque die a beneficiariis fundendae sunt, ut eo, quo tenentur in primis, fungantur munere. Atque hae sunt horae canonicae, quas omnes beneficiarii quotidie recitare debent, et quae *divini officii*, ac *breviarii* nomine appellantur.

§. VII. Sed praeter hoc officium, quod omnibus beneficiariis commune est, quidam sunt, qui et aliud habent ministerium, personatum, dignitatem, aut curam Animarum. Haec beneficia duplicia; cetera, in quibus illa non insunt, simplicia appellantur. Ex simplicibus beneficiis quaedam sunt, quae adjunctam habent legem residentiae, uti sunt Canonici et Capellaniae perpetuae ecclesiastica potestate constitutae, et haec beneficia *residentiaria*, cetera, a quibus onus illud abest, proprie *simplicia*, et non *residentiaria* dicuntur. Verum Canonici quamquam inter beneficia simplicia recenseatur, ta-

men accedunt ad dignitates (1), ideoque in odiosis simplicium beneficiorum nomine non continentur. Neque vero haec beneficia tamquam inania, et ociosa habenda sunt, quod eorum Rectores nullum peculiare officium exercent. Nam rem praeclaram, et magnam praestant, qui preces pro populo fundunt, et cum alii sint clerici, qui omnibus funguntur muneribus, quae pro Christianorum regimine, et salute sunt necessaria, recte Ecclesia quosdam alit clericos, quorum occupatio in fundendis precibus, et altaris ministerio defixa est (2).

(1) *Cap. 2. de Rescript. in 6.*

(2) Hujusmodi clericorum, quorum tantum erat altari servire, ac precibus, et orationi vacare, jam III. saeculo habebat Ecclesia, et eorum quidem mentio est apud Cyprianum *Ep. 1. p. 169. ed. Amstelaed. 1700.*

§. VIII. Cuncta olim beneficia residentiae lege tenebantur, sed lapsu temporum redditibus imminutis beneficiorum, adeout ex iis clerici necessaria percipere non possent, consuetudine inductum est, ut beneficio donati fructus caperent, licet in beneficii loco non morarentur, ut sibi victum alibi compararent (1). Nunc igitur qui his beneficiis fruuntur, tantum deferunt tonsuram, ac vestes clericales, et horas canonicas quotidie persolvunt.

(1) Consule Conzalez in *cap. Conquerente, 2. de Ceric. non residen.*

§. IX. Rursus alia beneficia sunt, quae majora, alia, quae minora appellantur. Majora sunt, quibus haerent principes in Ecclesia gradus cum cura Animarum et sacra jurisdictione, qualia beneficia obtinent Summus Pontifex, Patriarchae, Archiepiscopi, Episcopi, et Abbates cum quasi episcopali jurisdictione. Reliqua, quae infra haec sunt, minora beneficia dicuntur. Ceterum majora illa beneficia communi beneficii nomine non comprehenduntur; quin ne dignitatis quidem vocabulo, cum potius sint apices dignitatum.

§. X. Dividuntur etiam beneficia in saecularia, et regularia. Saecularia sunt, quae nonnisi saecularibus clericis; regularia, quae tantum regularibus clericis tribuuntur, unde eorum nomen tractum est. Hinc abbatiae, ceteraque officia claustralia suis propriis donata redditibus, beneficia sunt regularia, ac talia generatim censentur omnia, quae a regularibus regi consueverunt. Beneficia regularibus ad dicta demonstrantur vel fundatione, cujus nimirum lege cautum est, ut ea regularia haberi debeant; vel incorporatione, cum monasteriis adnexa sunt; vel praescriptione annorum quadraginta, cum eo temporis intervallo semper a regularibus administrata fuerunt.

§. XI. Denique sunt beneficia collativa, quorum collatio ad eos pertinet, quibus conferendi jus est; electiva, per electionem; patronata, quae ad patroni praesentationem conceduntur. De his omnibus superiore libro actum est.

S E C T I O I.

DE VETITA BENEFICIORUM MULTITUDINE.

- | | |
|--|---|
| XII. Clericus duabus Ecclesiis non adscribendus. | XVI. Poens retinentium plura incompatibilia beneficia. |
| XIII. Beneficia compatibilia, et incompatibilia. | XVII. Quae beneficia plura numero simul retineri possint? |
| XIV. Decretum Concilii Lateranensis. | |
| XV. Et Tridentini. | |

§. XII.

Omnes clerici, ex veteri disciplina, cum ordinabantur, certae adscribebantur Ecclesiae, cui servire debebant, et a qua necessaria quaeque accipiebant. Cum autem unus idemque clericus eodem tempore duabus Ecclesiis servire non posset, consequens erat, ut neminem duabus Ecclesiis adscribi, vetus disciplina pateretur (1). Haec quidem generatim obtinebat regula canonum, cui tamen locus non erat; cum aliud Ecclesiae utilitas, aut necessitas postularet. Non enim antiquiori etiam aetate exempla desunt clericorum, qui pluribus uno et eodem Ecclesiis addicti erant (2).

(1) Concilium Chalcedonense *Can. 10. et 20. col. 606. et 610 tom. 1. collect. Harduini, et Nicaenum II. can. 15. col. 495. tom. 4. coll. cit.*

(2) Concilium Emeritense *can. 19. t. 3. col. 1005. coll. Harduini, celebre est autem, quod de Euphronio*

narrat Basilius *Ep.* 228. *opp. tom. 3. p. 351. ed. Paris. 1730.*, qui ab Episcopatu Coloniensi ad Metropolim Nicopolitanam translatam utrasque deinde Ecclesias administravit.

§. XIII. Postquam beneficia ab ordinatione se-
jungi coepta sunt, etiam interdictum est, ne cui
plura simul beneficia tribuantur, cum unus clericus
simul gerere non possit plura officia, quae beneficiis
conjuncta sunt. Sed imminutis, uti supra dictum
est, lapsu temporum beneficiorum redditibus, oportuit
residentiae lege solvere clericos, qui alibi quae-
rere debebant victum, quem a beneficio habere non
poterant: igitur uti clerico concedi coeperunt plura
beneficia, ut quod unum non dabat, haberet ex
pluribus, eaque dicta sunt beneficia *compatibilia*; quoniam non
residentiam, neque aliud habebant adjunctum onus, quod
alterius beneficii possessionem impediret. Quibus beneficiis
opponerentur *incompatibilia*, quae scilicet plura numero,
ob onus singulis affixum, ab uno eodemque clerico simul
retineri non poterant.

§. XIV. Sed lapsa disciplina, plura simul in-
compatibilia beneficia uni clerico data sunt; quod
malum longe lateque serpens plura, quae ea tem-
pestate habita sunt Concilia remove studuerunt.
Praesertim Synodus Lateranensis III. ea de re labo-
ravit, edita lege, ut nemo duas dignitates, aut duas
parochias simul deinceps habere posset, additque
sanctionem, ut accipiens secundum beneficium amitte-
ret, dans autem largiendi potestate privaretur (1).
Verum non adhuc avulso malo, Innocentius III in
Concilio Lateranensi IV de eo plane tollendo acro-
re studio laboravit. Ergo sancitum est, ut nemo duas

simul parochias, dignitates, aut personatus obtineat, ipsoque jure cedat primo beneficio, qui alterum sine venia Sedis Apostolicae adeptus est, ac utroque privetur si forte illud velit retinere (2). Eadem quoque ratione praebendarum conservatio vetita est (3).

(1) *Cap. 3. de Cleric. non residen.*

(2) *Cap. 28. de praeben.*

(3) *Cap. 9. de Concess. praeben.*

§. XV. Denique Tridentini Patres alias edidisse leges, ut quae a Lateranensibus Conciliis fuerant constituta, diligenter observarentur. Itaque vetitum est uni clerico quovis titulo etiam *unionis* aut *commendae*, plures simul conferre Ecclesias cathedrales, aut beneficia curata, et cetera, quae *incompatibilia* dicuntur, jussique sunt primo beneficio cedere, qui alterum consequuntur. Ex reliquis vero beneficiis, quae *compatibilia* dicimus, uni clerico plura conferri possunt, quando unum satis non est, ut ille honeste, ac decenter vivat (1).

(1) Concilium Tridentinum *Sess. 7. cap. 2. et 4. et Sess. 24. c. 17. de Ref.* Extat etiam de incompatibilibus beneficiis constitutio Joannis XXII. in *Extrav. Execrabilis de Praeben.*, de qua actum fuit *lib. 1. tit. 5. sect. 3. p. 326.*, et qua sancitum est, ut secundum beneficium curatum, vel secundam dignitatem accipiens, nisi statim primum dimittat, utroque privetur, atque in posterum a sacris ordinibus, et a beneficiis repellatur, atque ultimi beneficii collatio Summo Pontifici reserve-
tur. Late ea de re disputat Rigantius *ad Regul. 1. Cancellar. §. 8. per tot.*

§. XVI. Hodie igitur iis utimur legibus, quae

a Tridentina Synodo constitutae sunt. Duo *incompatibilia* beneficia, qualia sunt generatim omnia (1), quae habent curam Animarum; quae officium, personatum, dignitatem, onus residentiae, quae *sub eodem tecto uniformia* dicuntur (2) uni clerico concedi non possunt, et si concedantur, primum ipso jure vacuum efficitur. Quod si utrumque simul beneficium retinere quis velit, utraque privandus est. Vacatio autem ipso jure inducitur non collatione, sed pacifica alterius beneficii possessione, qualis ea censetur, quam quis sine ulla molestia apprehendit, aut apprehendere potuit. Ideo post acceptam alterius beneficii possessionem datur adhuc spatium duorum mensium quo beneficiarius primum etiam beneficium retinere potest, ut interim noscatur, num aliquae de altero beneficio molestiae exoriantur (3).

(1) Quaestio est, num altero impetrato beneficio generatim in omnibus incompatibilibus beneficiis vacatio ipso jure inducatur. Multi enim sunt, qui hanc ipso jure vacationem tantum referunt ad beneficia, quae propter titulum incompatibilia existant, uti sunt duo Episcopatus, duae parochiae, duo sub eodem tecto uniformia beneficia; non item ad ea, quae tantum retentione incompatibilia habentur, uti sunt duo canonicatus in diversis Ecclesiis, et alia beneficia, quae adjunctam habent residentiae legem, sed sine Animarum cura, dignitate, personatu, vel officio. Haec enim beneficia tantum sententia judicis vacare arbitrantur. Sed Concilium Tridentinum omnium generatim incompatibilium beneficiorum ipso jure vacationem indaxisse, ostendit Garcia de Benefic. par. 21. cap. 6. n. 79. et seq.

(2) Beneficia *uniformia sub eodem tecto*, sive in eadem Ecclesia dicuntur, quae ad eundem finem, idemque ministerium instituta sunt, habentque idem onus ac officium eodem tempore persolvendum. Hujusmodi sunt duo canonicatus, duaeque ejusdem Ecclesiae capellaniae.

(3) *Consule Rigantiam in Regul. 1. Concellar. §. 8.*
n. 154. et 155.

§ XVII. In ceteris beneficiis, quæ compati-
 bilia dicuntur, servanda regula est, eorum plura
 ab uno eodemque clerico retineri posse, cum unum
 non tantum praestat, quantum est ad cultum, et
 ad victum necessarium. Si unius redditus satis sunt,
 ut clericus honeste, ac decenter vivat, nefas est
 plura in eo beneficia coacervare; et. vero primum
 amittit, qui praeter necessitatem alterum beneficium
 adeptus est. Sed nunc ex consuetudine ubique re-
 cepta nemo in foro controversiam patitur, quod duo
 possidet beneficia, etiamsi unum satis praebeat ad
 vitam honeste traducendam, modo utrumque resi-
 dentiam non requirat. Et licet Tridentina Synodus
 non definiverit, quinam redditus ad decentem cleri-
 ci tuitionem sufficiant, tamen in comperto est, rem
 totam Episcopi arbitrio respectu habito ad locorum
 consuetudinem, atque ad statum clerici, aestiman-
 dam, ac definiendam esse. Interdum Sedes Aposto-
 lica, cujus tantum est ea in re veniam concedere,
 iustis de causis plura ab uno clerico etiam incom-
 patibilia beneficia retineri permittit; cujus quidem
 rei sunt exempla praesertim in Germania, ubi uni
 plures Episcopatus conceduntur, ut firmioribus mu-
 nitus praesidiis haereticorum conatus retundat.

S E C T I O II.

DE CONJUNGENDIS , AC DIVIDENDIS BENEFICIIS.

- | | |
|---|--|
| XVIII. Beneficiorum unio
quotuplex ? | XXI. Quis unionem recte
expediat ? |
| XIX. Justae unionis causae
quae ? | XXII. Divisio Beneficiorum,
ejusque causae, et solemnita-
tes. |
| XX. Solemnitates in ea fa-
cienda necessariae. | |

§. XVIII.

Plurium Ecclesiarum, vel beneficiorum conjunctio, quae a legitimo Superiore justa ex causa facta est, beneficiorum unio appellatur. Ea vel temporanea, ac personalis, vel perpetua, ac realis est. Personalem, qua plures, veluti pallio ad beneficiorum multitudinem obtegendam, abutebantur, Synodus Tridentina (1) rejecit; perpetua, quae rite, atque ex justis causis fiat, ecclesiasticis legibus probatur. Haec autem conjunctio tribus modis fieri solet: confusione, cum duae, pluresve Ecclesiae, aut beneficia ita coagmentantur, ut ex pluribus una Ecclesia, aut unum beneficium fiat: subjectione, cum unum beneficium alteri subjicitur, ita ut ei quasi fundus accedat, et ejus privilegia, consuetudines, naturam assumat: denique alia est unio, quae dicitur *aeque principalis*, cum neutrum beneficium alteri subjicitur, neque duo beneficia in unum quasi corpus coalescunt, sed utraque integra manent, suumque retinent gradum, ac titulum, sed ab uno

eodemque ministro reguntur. Hoc modo cathedrales praesertim Ecclesiae conjungi solent.

(1) *Sess. 7. c. 4. de Reform.*

§. XIX. Ecclesiarum, et beneficiorum conjunctio nonnisi ex justa causa, atque adhibitis solemnitatibus fieri debet (1). Justa causa est evidens Ecclesiae necessitas, aut utilitas, puta si duo beneficia tenues habeant redditus, ex quibus vivere duo clerici nequeant (2), si valde sit deminutus populi numerus (3), si Ecclesiae temporis, vel hostium injuria vastatae sint (4), si redditus necessarii sint ad adolescentes in seminariis educandos, vel alias ad Dei cultum sustinendum (5). Graviore autem requiruntur causae, ut curata, quam ut simplicia beneficia conjungantur; quin etiam beneficia sunt, quorum plane vetita conjunctio est. Nam diversarum beneficia dioeceseon coagmentari nequeunt (6), neque item licet conjungere beneficia curata Monasteriis, Abbatibus, Dignitatibus, Praebendis Canonico- rum, Hospitalibus, aliisque collegiis (7), beneficia autem liberae collationis beneficiis jurispatronatus, ne et ipsa jurispatronatus obnoxia evadant (8).

(1) *Can. 23. c. 1. an. 7.*

(2) S. Gregorius M. lib. 2. Ep. 30. ad Joan. Episc. Velitern. opp. tom. 2. col. 614. ed. Paris. indic. Concilium Tridentinum *Sess. 21. cap. 5. de Reform.*

(3) Gregorius M. cit. ep. 50. Concilium Toletanum XIV. can. 4. col. 1796. t. 5. coll. Harduini.

(4) *Cap. 2. de Relig. domib.*

(5) Concilium Tridentinum *Sess. 23. cap. 18., et Sess. 24. cap. 15. de Ref.*

(6) *Conc. Trid. Sess. 24. c. 9. de Reform.*

(7) Conc. Trid. Sess. 24. c. 13. de Reform.

(8) Conc. Trid. Sess. 25. c. 9. de Reform.

§. XX. Solemnitates pertinent ad vocandos, audiendosque omnes, quorum interest, atque ad legitimam ecclesiastici Superioris auctoritatem. Principio audiendus est Episcopus, cujus dioeceseos beneficia jungenda sunt, vocandique, et audiendi sunt, Abbates. Praelatique inferiores, et Patroni sive ecclesiastici, sive laici, quorum est collatio, vel praesentatio, item beneficiorum uniendorum possessores, et capitulum Ecclesiae cathedralis (1), sine cujus consensu Episcopus graviora negocia expedire non potest.

(1) Capituli tamen consensum supplere solet Sedes Apostolica, vel Sacra Congregatio Concilii. Consule Carolum Gagliardum de Benefic. cap. 4. n. 34.

§. XXI. Legitima unionum faciendarum potestas penes Summum Pontificem, atque Episcopum est. Cathedrales Ecclesias tantum conjungit Summus Pontifex, qui etiam cetera beneficia conjungendi amplam habet potestatem. Episcopus beneficia consociat suae dioeceseos, exceptis illis, quae ab ejus jurisdictione exempta sunt, quaeque Sedi Apostolicae immediate sunt subjecta, aut perpetuo reservata (1). Cavere autem in primis Episcopus debet ne suae mensae beneficia jungat, propter lucrisuspicionem, a qua abhorreere debet (2).

(1) Beneficia, quae Sedi Apostolicae perpetuo reservata non sunt, ab Episcopis uniri posse, modo haec unio fiat ante eorum vacationem, tradit Garcia de Benef. par. 12. c. 2. n. 102., atque ita a Sac. Congregatione Concilii definitum testatur. Consule Fagnanum ad c. 8.

de Exces. Praelat. n. 22. et seq., et Giraldum *Exposit. Jur. Pontific. par. 2. sect. 57. p. 878.* in primis autem consule, qui ea de re accurate disputat, Benedictum XIV. *de Synod. dioeces. lib. 9. cap. 7.* Episcopi vero Italiae, ac finitimarum Insularum, cum beneficiis Sedi Apostolicae reservata seminariis unire volunt, servare debent legem ea de re editam a Benedicto XIII. in *Const. Creditae nobis caelitus 67. t. 71. pag. 409. Bull. Rom. ed. saepe cit.*

(2) *Clement. 2. de Reb. eccles. non alien.*

§. XXII. Conjunctioni ecclesiarum, ac beneficiorum opponitur eorum Divisio; per quam ex una Ecclesia aut beneficio duo efficiuntur. Divisio haec generatim est vetita, nisi eam postulet justa causa utilitatis, et necessitatis (1). In ea perficienda vocandi, audiendique sunt omnes, quorum interest, ac necessaria est auctoritas ejusdem, a quo conjunctio decernitur. Imo si non amplius existat causa propter quam conjunctio facta est, puta quod cessaverit paupertas, aut vastatio, illa recte dissolvitur. Tunc autem beneficia recuperant naturam suam, eorumque collatio, aut praesentatio ad illos redit, quorum ante unionem fuerat, nisi forte aliud constitutum sit.

(1) *Cap. 8. 26. 36. de Praeben.*

S E C T I O III.

DE COMMENDIS BENEFICIORUM.

XXIII. ad XXVI. Commendarum origo, et earum concedendarum causa.

XXVII. Varia de iis decreta.

XXVIII. A quo dentur commendae, et qualis nunc earum natura sit.

XXIX. Clerici Commendatarii.

§. XXIII.

Beneficia interdum clericis commendantur, unde ortae beneficiorum commendae, quarum origo sane vetus est. Initio commenda erat custodia, aut administratio vacantis Ecclesiae, quae tamdiu obtinebant, quamdiu ea careret Episcopo, a quo regeretur (1). Simili modo commendabantur parochiae, et monasteria; atque haec commendae ad tempus erant, quoniam certo tempore cessabat causa, propter quam institutae fuerant (2).

(1) S. Ambrosius *Ep.* 2. col. 789. *ed. cit. tom. 3.* *Commendo tibi, fili, inquit, Ecclesiam, quae est ad Forum Cornelii . . . donec ei ordinetur Episcopus.*

(2) Vide Concilium Aurelianense III. *can.* 18. *apud Labbaeum tom. 5. col. 1279. ed. Venet.* S. Gregorium *M. Ep.* 38. *l.* 2., *et Ep.* 21. *lib. 6. opp. t. 2. col. 601. et 608. ed. ind., can. 16. 17. 18. 28. dist. 61.*

§. XXIV. Perpetuaedabantur commendae, cum eas perpetua causa postularet. Ita cum hostium impetu vastatae fuissent cathedrales Ecclesiae, atque

illud Episcopi discedere debuissent, Romani Pontifices vel illos aliis praeficiebant cathedralibus Ecclesiis, quae tunc vacarent, vel etiam ipsis Abbatis perpetuo commendabant, ut ex earum redditibus decenter viveret, ac simul Episcopalem potestatem exercerent (1). Sunt et alia commendarum, quae quidem perpetuae erant, exempla, potissimum cum clericus non tantum ex beneficio haberet, quantum ei esset necessarium (2). Itaque justis de causis commendae institutae sunt, neque eas improbare quis potest, cum Episcopatus, parochiae, monasteria commendantur Episcopis, et clericis ordine insignitis, quem beneficium postulat.

(1) Gregorius M. *Ep.* 13. *lib.* 3. *col.* 633. *opp. tom.* 2. *ed.* Paris. 1705. Agnellum Fundorum Episcopum, vastata ab hostibus ejus civitate, Terracinenis Ecclesiae Episcopum constituit, ita ut, inquit, *Fundensis Ecclesiae Episcopus esse non desinas; nec curam, gubernationemque ejus praeleceas.* Itaque duplex uni Episcopo Ecclesia; altera in titulum, altera in commenda data est. Similiter cum Paulinus Tauri in Sicilia Episcopus post Civitatem a barbaris vastatam Messanam secessisset, ibi ei monasterium a Gregorio M. commendatum est *lib.* 1. *Ep.* 40. *col.* 528. *opp. tom.* 2. *ed.* ind.

(2) Multa hujus rei exempla sunt apud Joannem Diaconum in *Vit. S. Gregorii M.* *lib.* 3. *cap.* 22. *lib.* 4. *cap.* 86. 90. 93. 97. *col.* 95. 177. 180. 185. *tom.* 4. *opp. S. Gregorii.* Monasterium etiam S. Martini Episcopo commendatum fuisse, tradit Anastasius Bibliothecarius. Ita enim ille Martino Episcopo Narniensi, et Abbati coenobii S. Martini suam de Martini P. exilio historiam in *Biblioth. PP.* *tom.* 12. *p.* 852. *edit. Lugdun.* inscripsit: quia cum *Episcopatus apice Praepositura sanititati tuae, ob meritum summae religionis, B. Martini monasterii penes urbem positi est a Summis Pontificibus delegata.* Beda quoque *Hist. lib.* 5. *cap.* 18. *pag.* 302. *edit. Cantabrig.* 1643. memorat Joannem

Archicantorem Ecclesiae Sancti Petri, et Abbatem coenobii S. Martini Romae, quem Agatho Summus Pontifex in Angliam misit. Quin etiam cathedrales Ecclesias interdum Abbatibus commendatas constat, atque hujus rei, praeter ceteros, monumenta sunt apud Du-Chesnium in *Vita S. Leodegarii* p. 604. et 618. t. 2. *Histor. Franc. ed. Paris. 1636.*

§. XXV. Verum lapsu temporum laici ecclesiastica bona invadere coeperunt, potissimum vero Principes ea militibus commendabant, ut opes ad gerendum bellum haberent (1). Pravum hunc morem, quem, invita Ecclesiastica jurisprudentia, turbulenta illa aetas induxerat, prorsus tollere studuerunt concilia ea tempestate habita; praesertim vero Romani Pontifices diligentem dedere operam, ut ad Ecclesiam redirent, quae violenter a laicis occupata fuerant (2). Ita factum est, ut sua denique Ecclesiae restituerentur bona, et tunc potissimum clericis multa sunt commendata eorum, quae pridem laici arripuerant, praesertim cum graves essent causae, propter quas commendae non permitgendae solum, sed etiam probandae viderentur.

(1) Consule Thomassinum *Vet. et nov. Eccl. discipl. par. 2. l. 3. cap. 12.*

(2) Late haec omnia persequitur Thomassinus *loc. cit. cap. 1. ad 21.*

§. XXVI. Scilicet ab infidelibus iterum occupatis locis sanctis, et inde ejectis Episcopis, opportunum visum est alios ipsis in Italia, et alibi Episcopatus, aut Abbatias commendare, ut his redditibus vitam ducerent. Accessit studium restaurandae

monasticae disciplinae, quae in puribus monasteriis pene sublata, extinctaque erat, et plures etiam clerici sibi commendata monasteria acceperunt, ut ea tuerentur, atque defenderent. Neque vero Summi Pontifices, aut Concilia factum suum improbari unquam posse existimabant, cum Episcopis, aut aliis clericis dabant redditus, et fundos, qui ad Regulares pertinebant. Illud ipsis curae erat, ut laici Ecclesiae bona non diriperent; sed semper amplam Ecclesiae potestatem esse putarent tribuendi ecclesiastica bona inter clericos, quibus ea magis pro temporum, locorum, ac personarum ratione concedenda videbantur (1).

(1) Commendae neque laudari, neque improbari generatim possunt, uti animadvertit Riganlius in *Reg.* 43. *Cancellar. num.* 49., et saepe multae sunt causae, quae illas non tantum utiles, sed etiam necessarias faciunt. Synodus Tridentina rem omnem ex prudentia, ac pietate Romani Pontificis, atque ex temporum ratione aestimari voluit. Hinc Sedes Apostolica nonnisi ex justis causis, rerumque, ac locorum habita ratione commendas concedit, quin etiam saepe ab ea rejectas constat preces ipsas Principum, qui commendas postulabant, adeo falsum est Romanos Pontifices, uti eos aliqui calumniatur, facile ac sine delectu regularia beneficia clericis saecularibus commendasse. Cuncta haec late expendit Riganlius *loc. cit. n.* 49. *et seq.* Multa etiam de commendis habet Natalis Alexander *Histor. Eccles. saec.* 15. *et* 16. *cap.* 7. *art.* 4. *p.* 193. *seq. et Dissert.* 12. *art.* 9. *p.* 552. *tom.* 9. *ed. cit.*

§. XXVII. Aliquando tamen valde auctus sine justa causa commendarum numerus mala intulit, quae oportuit remove. Itaque Clemens V. commendas sustulit, quae non bene cognitae, expensisque re-

bus datae fuerant (1), et Benedictus XII. ac Leo X. commendas abrogarunt, quas in perniciem monasteriorum, atque ecclesiasticae disciplinae redundare animadverterunt (2). Synodus Tridentina monasteria in posterum vacatura tantum spectatae vitae Regularibus concedi jubet, eaque monasteria, quae sunt capita, ac primates Ordinum: jure commendae aliquem retinere prorsus vetat; reliqua vero monasteria jam commendata, quae suos habent conventus, Romano Pontifici committit, ut iis pro sua pietate, et prudentia Regulares praeficiat, quantum ratio temporum ferre potest (3).

(1) *Extravag. 2. de Praeben. int. commun.*

(2) Vide Raynaldum *ad an. 1335. num. 67. et ad an. 1353. num. 31. pag. 49. 199. et 590. tom. 25. ed. Lucae*, et Bullam Reformationis editam a Leone X. in Concilio Lateranensi V. *tom. 9. Conc. col. 1747. coll. Harduini.*

(3) *Conc. Trid. sess. 23. cap. 21. de Regul.*

§. XXVIII. Hodie justis de causis commendae dantur, et dantur ab uno Romano Pontifice cui tantum potestas est relaxandi canones, qui regularia beneficia clericis saecularibus concedi vetant (1). Verbis autem potius, quam re nunc a beneficiis Commendae differunt, quoniam et hac in perpetuum dantur, et titulum praestant ad ordines suscipiendos (2), et clerici commendatarii iisdem ferme praerogativis, ac juribus, quibus beneficiarii, fruuntur. Quare liberam habent reddituum administrationem, et jus praesentandi, eligendi, conferendi; verum monasteria visitantur a regularibus superioribus, quibus subsunt, atque ad eos regimen, et cura pertinet regularis instituti (3).

(1) *Can. 27. de Elect. cap. Cum de beneficio de Praeben. in 6. Consule Tridentinum Sess. 14. cap. 20. de Reform.*

(2) *Consule Giraldum Expos. Jur. Pontif. par. 2. sect. 54. num. 7. pag. 874.*

(3) *Concilium Tridentinum Sess. 25. cap. 20. de Regular. Vide etiam Constitutionem Pastoralis 183. Innocentii X. in Bullar. tom. 6. par. 3. p. 281. et Constitutionem Exponi 29. Alexandri VI. tom. 6. par. 4. Bullar. p. 31.*

§. XXIX. Clerici commendis aucti, ut plurimum, suam habent mensam a conventuali distinctam (1), et quartam ejus partem in Ecclesiae necessitates, aut in pauperum alimenta conferre debent (2). In Gallia coguntur sacros ordines suscipere; similiter in Italia, aliisque regionibus ad sacros capiendos ordines, et ad assiduam quoque moram adiguntur, ubi commendis Animarum cura vel monachorum, vel saecularium adjuncta sit (3). Semper autem beneficia commendata pristinam retinent naturam suam, quamquam longo usu iis concedantur, qui ejusdem ordinis, atque instituti, ac veri titulares non sunt (4).

(1) *Gregorius XIII. Const. Supernà 28. §. 9. Bullar. tom. 4. par. 3. pag. 275. Quae constitutio quamquam loquatur de Monasteriis Ordinis Cisterciensis, tamen conveniens est, inquit Fagnanus in c. 21. de Rescript. n. 2. ut servetur etiam in aliis ordinibus monachorum.*

(2) *Id vero pertinet ad monasteria commendata, quae mensam habent separatam; nem cum communis mensa est, dari debet tertia pars omnium fructuum monasterii commendati pro omnibus illis oneribus supportandis, et sustentatione monachorum, ut inquit Leo X.*

Constit. Superna 8. §. 10. *Bullar.* tom. 3. par. 3. pag. 396. ejusd. edit. sæpe cit.

(3) Consule Fagnanum in cap. 1. de Capel. monachor. num. 1. et seq. qui recte animadvertit, quod residentiae lege tenetur, sacrosque ordines suscipere debet commendatarius, cum ad ipsum, non item, cum ad monasterium, et conventum cura Animarum pertinet. Vide etiam Gallemart *Adnot. ad Concil. Trident. Sess. 6. cap. 2. de Ref.*

(4) Vide Fagnanum loc. cit. n. 16.

SECTIO VIII.

DE PENSIONIBUS ECCLESIASTICIS.

XXX. Pensio quid?

XXXI. Quis pensionem constituat?

XXXII. Pensio realis, et personalis.

XXXIII. Quibus de causis

pensiones imponantur?

XXXIV. Quae beneficia pensionibus non subjiciantur, et quis eas habere possit?

XXXV. Quomodo pensio extingatur.

§. XXX.

Pensio in re canonica est certa pars reddituum, qui ex alieno beneficio detrahuntur, atque alicui clerico justa de causa, et legitima auctoritate assignantur. Antiquissima est origo pensionum, et earum in Chalcedonensi (1), atque Ephesino Concilio (2) exempla sunt. Nam aequum judicarunt Patres, ut clerici pauperes, qui justis de causis Ecclesiae suae non deservirent, ex ecclesiasticis bonis alimenta obtinerent.

(1) Concilium Chalcedonense *act. 10. tom. 2. Concil. col. 544. 562. Collect. Harduini.*

(2) Concilium Ephesinum *act. 7. Epist. ad Synod. Pamphil. tom. 1. Concil. col. 1625. Collect. ejusd.* Alia etiam occurrunt exempla pensionum, quae concessae sunt Episcopis vel senio confectis, vel hostium impetu Sede pulsus, vel clericis in monasterium ad agendum poenitentiam coniectis, apud S. Gregorium M. *lib. 3. Ep. 55. lib. 5. Ep. 12. lib. 13. Ep. 5. col. 665. 737. 1218. opp. t. 2., et apud Joannem Diaconum in ejus Vit. lib. 3. cap. 27. et lib. 4. cap. 39. col. 97. et 152. t. 4. opp. ejusd. S. Gregorii M. ed. cit.*

§. XXXI. Initio pensiones detrahebantur ex Ecclesiae redditibus, qui in unam arcam confluebant; ideoque Episcopus poterat, cum justa adesset causa, ex communi aerario horum reddituum partem decerpere, eamque clericis non servientibus assignare. At institutis beneficiis, et singulis adscriptis redditibus suis, jus constituendarum pensionum ad unum Romanum Pontificem delatum est. Cum enim per pensiones beneficia scindantur, aut iis onus imponatur, quod utrumque sacris canonibus vetitum est (1), necessario requiritur auctoritas Summi Pontificis, qui relaxatis canonibus pensiones constituat.

(1) *Cap. 8. de Praeben., Cap. 7. de Censib.*

§. XXXII. Nunc igitur ab uno Romano Pontifice pro ampla illa, qua in Ecclesia pollet auctoritate pensiones imponi possunt. Haud tamen desunt, qui etiam Episcopo hanc potestatem adscribunt (1); sed omnes inter pensionem a Pontifice, atque ab Episcopo impositam magnum discrimen faciunt. Nam

pensio Pontificis ipsi haeret beneficio, cum quo transfertur ad omnes ejus possessores; at Episcopi pensio solum afficit beneficiarium cujus obitu extinguitur (2).

(1) Consule Vallensem de *Benefic. par. 1. tit. 1.*, Garciam de *Benefic. par. 1. cap. 5. §. 2.* et Fagnanum in *cap. 21. de Praeben. num. 14. et seq.*, qui late, ac diligenter totum hoc argumentum persequitur.

(2) Monet tamen Fagnanus *loc. cit. num. 31.*, quod quidquid de *Jure sit*, *usus Sedis Apostolicae ubique receptus habet*, ut pensiones a solo Pontifice imponantur.

§. XXXIII. Justis autem de causis pensiones imponuntur, veluti si beneficium sit litigiosum, ita ut inter duos de eo litigantes concilianda concordia sit (1); si illud permutetur, aut resignetur (2); si clericus de Ecclesia sua penemeritus, aut inops sit, aut mala valetudine laboret; denique clerico Ecclesiae utili pensio conceditur, ut inde honeste vivat. Pensio moderata esse debet, ut beneficiario supersint redditus, cum quibus vitam traducere possit, ac praeterea beneficii onera sustinere. Hinc in beneficiis, ex quibus pensiones detrahuntur, sola tertia, aut dimidia fructuum pars a Pontifice reservari solet (3).

(1) *Cap. 21. de Praeben. Cap. 5. de Transact.*

(2) *Cap. 4. de Cleric. aegrot. vel debilit. cap. 6. de Rer. perm.*

(3) Consule Fagnanum in *cap. Nisi essent de Praeben. num. 27.*

§. XXXIV. Cathedrales Ecclesias, quae annuos ducatos mille, et parochiales, quae centum suis fructibus non superant, Tridentina Synodus pensio-

nibus onerari vetat (1). Sed nunc in parochiis omnibus indiscriminatim pensiones non imponuntur, ut Parochus integros habeat redditus, cum quibus pauperibus opem ferre possit (2). Quamquam autem pensiones proprie beneficia non sint, tamen beneficii loco sunt, quoniam ex ecclesiasticis bonis decerpuntur, et ideo nonnisi clericis dantur (3), ac per matrimonium amittuntur, nisi quem Sedes Apostolica lege solverit (4). Porro clerici pensione ditati officium B. Virginis quotidie recitare debent (5).

(1) Concilium Tridentinum *Sess. 24. cap. 13. de Reform.*

(2) Benedictus XIII. *Const. Quanta* apud Ferrarium *Biblioth. verb. Pensio*, qua porro constitutione confirmatum est edictum, quod pridem Innocentius XII, ea de re emiserat.

(3) S. Pius V. *Constit. Sacrosanctum* 98. *tom. 4. par. 3. p. 38. Bullar.*, et Sixtus V. *Const. cum Sacrosanctam* 151. §. 2. *tom. 5. par. 1. p. 43. ejusd. saepe cit. ed. Rom.*

(4) Sunt qui privilegio Sedis Apostolicae ecclesiasticas pensiones retinent, quamquam uxorem habeant, et quamquam clericali tonsura insigniti non sint. *Consule Ferrarium Biblioth. verb. Pensio.*

(5) S. Pius V. *Const. Ex proximo* 186. §. 1. t. 4. *part. 3. cit. Bullar. p. 180.*

§. XXXV. Pensio tamquam usufructus extinguitur morte clerici, qui ea vivens fruebatur, nisi ipse a Sede Apostolica in aliam transferendae pensionis facultatem obtinuerit. Quo privilegio fruuntur Cardinales, et alii, quibus illud a Summo Pontifice datum est; et hi quidem non integram pensionem, sed dimidiam ejus partem in alium transferre possunt (1). Tollitur etiam pensio per redemptionem,

quae fit repraesentatis, hoc est mature factis aliquot annuis pensionum solutionibus ; sed ea in re Summi Pontificis auctoritas necessaria est (2). Denique pensio omittitur Religionis professione, matrimonio, degradatione, crimine haeresis, aut laesae majestatis, ceteris fere modis, quibus beneficia amittuntur (3).

(1) Innocentius XI. *Const. Circumspecta* 32. t. 8. *Bullar.* p. 43.

(2) Verum intra sex menses post captam beneficii possessionem redimi, ac deleri pensiones vetat Benedictus XIV. *Const. in sublimi* 30. t. 1. ejus *Bullar.* p. 43. *ed. Romae seu Ven.* 1754.

(3) Confer Cabassut. *Theor. et prax. jur. Canon.* c. 14. n. 15. et seq.

S E C T I O V.

DE ADIPISCENDA BENEFICIORUM POSSESSIONE.

- XXXVI. Beneficii possessio XXXVIII. Regula de an-
capienda. nali possessore.
XXXVII. Juramentum a Be- XXXIX. Regula de trien-
necuario praestandum. nali possessore.

§. XXXVI.

Satis non est, aliquem beneficium obtinuisse, nisi is etiam ejus possessionem adipiscatur, ut fructus capiat, suosque faciat. Generatim qui beneficium conferendi, is etiam possessionis tradendae jus habet; sed hoc plerumque alteri committi solet, et olim quidem ad Archidiaconum pertinebat (1). Cum possessio traditur, externa quaedam adhibentur signa, quibus ea significatur. Ita ex. gr. Canonici accepto libro, pulsato tintinnabulo, ceterisque similibus signis, Parochi autem possessionem capiunt, cum Ecclesiam ingrediuntur.

(1) *Cap. 7. de Offic. Archid.*

§. XXXVII. Qui possessionem tribuit merus minister est, qui rem totam gerit collatoris jussu, et auctoritate. Quare hoc tantum curat, ut collationis literae exitum consequantur; neque ejus est judicare, num clericus beneficio donatus eo sit revera

dignus, an secus; nisi hoc forte negotium ei commissum fuerit, quia tunc nonnisi re cognita beneficii possessio danda est (1). Capta possessione, qui beneficium obtinuerunt cum cura Animarum intra duos saltem menses coram Episcopo, aut ejus Vicario generali fidei possessionem per semetipsos emittere debent (2); aucti vero Canoniatu, aut Dignitate in Ecclesia cathedrali non solum coram Episcopo, aut Vicario generali, sed etiam coram Capitulo idem praestant (3). Nisi id fiat, inutilis possessio est, neque fructus quis facit suos.

(1) Hac spectant litterae in forma dignum, aut in forma commissaria, de quibus actum est tit. 5. sect. 3. §. XXXXV. p. 333. Vide etiam Garciam de Benefic. par. 6. c. 2. n. 1. et seq.

(2) Fidei professio per procuratorem emitti non potest; qua in re emendandus est error illorum, qui id per procuratorem fieri posse arbitrantur. Consule Benedictum XIV. Instit. Eccles. 60. §. 3. p. 1011.

(3) Concilium Tridentinum Sess. 14. cap. 12. de Reform. Pius IV. Const. in Sacrosancta 102. et Const. Injunctam 103. Bullar. tom. 4. p. 201. et 204. Canonici collegiatarum Ecclesiarum hujus faciendae professionis nulla lege obstringuntur; sed tamen etiam hi pluribus in locis vel peculiari lege, vel consuetudine hanc professionem emittunt. Sic in locis, ubi obtinet Concilium Romanum habitum a Benedicto XIII. an. 1725., multi sunt, qui ea lege tenentur. Confer Giraldum loc. cit.

§. XXXVIII. Illud in primis efficit capta possessio, ut qui eam anni spatio retinuit, is inde dimoveri, aut beneficium alteri, qui illud impetrarit, adscribi nequeat, nisi primum lis petitorio judicio finita sit. Quod jus constituit Regula 35 Cancellariae, quae vulgo dicitur de annali possessore, et

quae duabus constat partibus. Nam sancitum est primum, ut qui beneficium impetrat, quod alter per annum tranquillo, et quieto animo retinuit, significare debeat nomen, et gradum possessoris, proferre causam apertam, et perspicuam, propter quam et retinendi beneficii jus esse negat, temporis, quò in ea possessione versatus est, cursum ostendere; deinde ut intra sex menses possessorem in iudicium vocet, et causam intra annum usque ad sententiam persequatur (1).

(1) Consule Rigantium *ad hanc Regul.* 35.

§. XXXIX. Est et alia regula de *triennali possessore*, quae inter regulas Cancellariae est 36. numero, atque in re beneficiaria quadragenariae praescriptionis vice fungitur. Ea vero cautum est, ut qui procul a labe vitioque simoniae triennii spatio beneficium obtinuit quovis titulo, etiam *colorato*, ut vocant, is nullis amplius molestiis affici, neque a possessione dimoveri possit, atque omnes ejus beneficii *impetrationes*, quas dicunt, irritae habeantur. Quae triennalis possessio ut tantum valeat, pacata esse debet, eaque ut explorata sit, satis est ostendere possessionem, quam quis revera adeptus est. Nam qui illam semel apprehendit, ac post triennium retinet, in ea semper perseverasse censetur, nisi secus ostendatur (1).

(1) Vide etiam Rigantium *ad Regul.* 36.

TITULUS XV.

DE CENSIBUS, EXACTIONIBUS, ET PROCURATIONIBUS.

- | | |
|--|----------------------------|
| I. Census quid? | IV. Subsidiū charitativum. |
| II. Quando censūs ab Epi-
scopo constituatur? | V. ad VIII. Procuratio. |
| III. Cathedriticum. | IX. Portio canonica. |

§. I.

Non solis aluntur Clerici beneficiorum fructibus, sed et alia habent emolumenta, aliasque obventiones, quibus fruuntur, ut honeste, ac decenter vivant. Eorum quaedam ad Episcopos, quaedam ad ceteros clericos pertinent. Proprii sunt Episcoporum census, quorum nomine hoc loco intelligitur certa vis pecuniae, quae ex redditibus ecclesiasticis solvenda est.

§. II. Porro Episcopus in Ecclesia recens fundata, et dotata, cum eam consecrat, censum constituere potest, consensu accedente fundatoris (1), vel patrono reservare (2); idemque recte praestat, cum annuente Capitulo Ecclesiam piis locis concedit, aut subtrahit a jurisdictione sua (3). Generatim tamen aedificata, et consecrata Ecclesia, nefas est aut veterem augere censum, aut novum impingere; nisi primum Apostolicae Sedis venia impetrata sit (4).

(1) *Can. 30. c. 18. qu. 2. Cap. 16. de Censib. exaction. ibique Glossa.*

(2) *Cap. 23. de Jurepatr.*

(3) *Cap. 6. de Relig. Domib.*

(4) Onus, quod etiam mortuo Beneficiario maneat, sine venia Summi Pontificis imponi nequit. Eandem hanc veniam pro onere temporario requiri, tradit Giraldu*s* l. 3. tom. 39. sect. 584. p. 397.

§. III. Praeter census, alia etiam Episcopi tributa exigunt a clericis, et ecclesiis suae dioeceseos, quae tributa vel ordinaria, vel extraordinaria sunt. Ordinarium tributum est Cathedraticum, aut Synodaticum, quod a singulis Ecclesiis quotannis solvitur in signum subjectionis, et honorem cathedrae Episcopalis (1). Penditur in synodo cathedraticum, unde factum est Synodatici nomen (2), et penduntur duo solidi (3) ab Ecclesiis omnibus, et clericis, qui Episcopo subjecti sunt (4).

(1) Cathedraticum, de quo hoc loco agimus, confundi non debet cum eo munere, tributo, seu pastello, quod olim in ordinatione dari solebat, quodque vehementer improbat Gregorius M. in Synodo Romana tom. 3. *Collect. Harduini col. 497.*, et Concilium Tridentinum Sess. 21. cap. 1. de *Reform.* Hoc quoque interdictum dicitur cathedraticum, uti observant Gonzalez in cap. *Conquerente de Offic. Ordin. in fin.* et Christianus Lupus in *Schol. et not. ad canon. Concilior. tom. 2. cap. 3. p. 39. edit. Venet. 1724.* Quae nominis similitudo quosdam in eum errorem induxit, ut crederent, generationem cathedraticum a sacris canonibus improbari. Verum certa illa pensio, quam proprie cathedraticum dicimus, quaeque Episcopo singulis annis persolvitur non propter ordinationem, sed in subjectionis signum, et honorem cathedrae Episcopalis numquam a sacris canonibus vetita fuit, imo ejus antiquissimus est, et Ecclesiae probatus usus. Id testatissimum faciunt Concilium Bracarense II. *Can. 2. Toletanum VII. c. 4. t. 3. Collect. Harduini col. 386. et 622. ed. Paris. Alexander III. in cap. 9.*

de Censib. Honorius III. in *cap. 16. de Offic. judic. ordin.*, Arnoldus Abbas Lubecensis, qui in *Chronico Sclavorum lib. 3. cap. 21. p. 679. inter Scriptores Brunsvicen. 1. 2. ed. Hanover. 1705* narrat, Hartvicum Archiepiscopum Bremensem, cum gravi premeretur inopia, ex solo cathedratico vitam traduxisse. In concilio Ravennatensi an. 997. *Can. 2. tom. 6. Concil. col. 753. Collect.* Harduini sancitum est, ut quovis anno, die S. Vitali sacro, omnes Archipresbyteri censum Episcopo solverent duorum solidorum, atque hunc censum fuisse cathedraticum, ostendit Thomassinus *Vet. et nov. Eccles. disciplin. par. 3. lib. 2. cap. 34. num. 5.* Mitto cetera monumenta quae multa sunt, et ex quibus patet, antiquissimum esse cathedraticum, ac semper sacris canonibus probatum fuisse. Concilium Tridentinum *Sess. 24. cap. 3. de Reform.* quamquam novas exactiones Episcopis interdixerit, non ideo sustulit jus cathedratici, modo non in visitatione, ubi quidvis exigi Concilium vetuit, sed vel in synodo, vel alio tempore solvatur; atque ita respondit Sac. Congregatio Concilii, cujus decretum late exornat Fagnanus in c. *Conquerente num. 48. et seq. de offic. Ordinari. et in Cap. Venerabili num. 16. et seq. de Censib.* Hinc S. Carolus Borromeus, qui Tridentini concilii decreta diligentissime custodiebat, firmam ratam esse voluit cathedratici solvendi *legem Act. Eccles. Mediol. par. 2. pag. 346.* atque idem constitutum est a Synodo Bituricensi an. 1524. *tit. 3 Can. 7. tom. 10. Collect. Harduini col. 1492.*

(2) Synodaticum Episcopo, cum dioecesim iustrabat, interdum solutum patet ex duobus Conciliis Bracarenensi II. et Tuletano VII., quorum paulo ante facta mentio est. Sed fere ubique solvebatur in Synodo, quae cum plerumque post pascha haberetur, hinc ea solutio quandoque *Paschalis* est appellata, uti monet Cironius *Paratitl. ad Decretal. lib. 3. tit. 39. n. 10. tom. 1. p. 315. ed. Vindobon. 1761.* Sed, ut plurimum, a synodo ea praestatio vocata est synodaticum, interdum etiam dicta *Synodus*, uti constat ex Concilio Tolosano *cap. 10. tom. 6. par. 1. Collect. Harduini col. 1045.* atque ex Falberto Carnotensi *Ep 58. Biblioth. PP. tom. 18. n. 18. ed. Lugdun.*; quamquam a Synodatico distingui

*synodus videtur in Indice mes. beneficiorum Ecclesiae Constant. apud Du-Cangium Gloss. verb. Synodaticum. Cum autem synodaticum in synodo persolvatur, quaeri potest, num pendi debeat illis quoque annis, quibus synodus non habetur. Pluries de hac re quaesitum est coram Sac. Congregatione Concilii, eaque semper respondit, cathedraticum, etiam non habita synodo, singulis annis esse solvendum; et vero in Amalphitana Cathedralici 5. Septembr. 1705 et 27. Februar. 1707. et in Cassanent. 21. Mart. 1735. lib. 65. Derret. p. 323. et lib. 57. 68. et lib. 85. p. 188. nullo habito respectu ad Synodum, cathedraticum a die adeptae possessionis Episcopo solvi voluit. Quod idem antea constituerat Synodus Avenionensis an. 1636. cap. 11., et altera similiter Avenionensis Synodus habita Alano Episcopo tom. 4. Anecdotor. col. 575. cap. 11. et 580. cap. 15. ed. Paris. 1717., ubi statutum est, ut non solum ejus anni synodaticum, sed etiam arreragia temporis jam lapsi Episcopo solverentur. Diuturna tamen, ac legitime inducia consuetudine fieri potest, ut nonnisi in Synodo cathedraticum persolvatur. Quamquam enim ejus solutionis onus consuetudine prorsus tolli, ac deleri nequeat, ut scilicet semper extet monumentum honoris debiti cathedrae episcopali, tamen cum hic honos maneat, etiamsi illud non solvatur annis singulis, recte a consuetudine induci potest, ut tantum cum Synodus habetur, cathedraticum pendi debeat. Consule Bottum *Synod. pag. 3. num. 89. et seq.*, et Massobrium *de Synod. cap. 4. dub. 33. et 34.**

(3) Duos solidos propter cathedraticum unoquoque anno solvi jubent Concilium Bracarense II., et Totetanum VII. *loc. cit.*, atque Honorius III. *in cit. cap. 16. de Offic. judic. ordinar.* Verum cum solidi pretium non semper idem, nec ubique fuerit, uti late inter ceteros ostendunt Jacobus Gothofredus *in Cod. Theodos. Leg. unic. lib. 7. tit. 24. tom. 2. pag. 459. et seq. et Leg. 1. lib. 12. tit. 7. tom. 4. p. 597. ed. Lips. 1737.*, et PP. Maurini, *in Addit. ad Glossar. Du-Cangii verb. Solidus*; cum item incertum sit, aureus ne, an argenteus esset, et quanti valeret solidus Lucensis, quem memorat Honorius III. *in cit. cap. 16*, hinc quaesitum est,

quae nunc propter cathedratium moneta pendenda sit. Synodus Romana habita anno 1725. a Benedicto XIII. singulis solidis pretium attribuit unius aurei monetae Romanae, et ideo propter cathedratium solvi jubet viginti julios ejusdem monetae, quamquam non integri solidi a singulis beneficiariis pendendi sint, sed ratione habita reddituum beneficiorum, servatoque modo, qui in ea Synodo constitutus est. Verum provinciale hoc concilium tantum in Romana provincia legem facit. Itaque cum nihil certi ea de re sit a Jure constitutum, ex receptis populorum moribus, et locorum consuetudine cathedratium Episcopo solvendum aestimandum est.

(4) Pendendum est cathedratium a quibuscumque parochis, beneficiariis, et Ecclesiis saecularibus, non item regularibus, quae monasteriis conjunctae sunt, in quibus regulares divina officia peragunt. Nam hae solvendi cathedratici onere non tenentur. *Can. Inter cetera 8. cap. 10. qu. 3. et Can. Quam sit cap. 13. qu. 2.* Sodalitia vero laicorum, quae confraternitates dicuntur, Episcopi auctoritate instituta, si propriam habeant Ecclesiam, non item si tantum capellam, aut altare in aliena Ecclesia habeant, cathedratium pendere oportere, respondit Sac. Congregatio Concilii in *Firmana Cathedratici 24. Jul. 1734 et in Urbevetana Cathedratici 20. Mart. 1745.* Similiter in *Maceraten Cathedratici 29. April. 1731.* definitum est, ex omnibus quotquot sunt beneficiis, etiam simplicibus, solvendum esse cathedratium, exceptis tantum capellaniis laicalibus, et ad nutum amovibilibus. Quod si plures clerici, qui uni, et eidem Ecclesiae addicti sunt, communem habeant massam, non singuli discretam, atque distinctam praebendam, unum tantum ex ea massa cathedratium esse solvendum, statuit Concilium Romanum anni 1725. *tit. 8. cap. 4.*

§. IV. Extraordinarium tributum est subsidium charitativum, scilicet pensio, quam Episcopus charitatis nomine exigit a clericis, et ecclesiis sibi subjectis (1) ad periculum aliquod repellendum, gravemque necessitatem evitandam (2). Justa autem,

et gravis causa requiritur, ac praeterea capituli consensu opus est, ut recte hoc subsidium ab Episcopo indicatur (3). Sed nunc, saltem in Italia, jus viget ab Innocentio XI. constitutum, quo sancitum est, ut semel tantum Episcopus, videlicet in primo ingressu suo, hoc subsidium exigat, et vero tantum accipiat, quantum antea per annos quadraginta dari consueverit (4). Quare si qua postea gravis exoriatur causa, quae subsidium flagitet, Sedis Apostolicae venia opus est (5).

(1) Subsidium hoc, uti etiam cathedraticum, ex lege dioecesana procedit, et ideo regulares, ac ceteri, qui exempti sunt, illius solvendi onere non tenentur, uti ostendit Giralduus *Exposit. Juris Pontif. par. 1. lib. 3. Decretal. sect. 583. p. 397.*

(2) Concilium Lateranense III. *Can. 4 t. 6. par. 2. Concil. col. 1675. coll. Harduini, cap. 16. de Offic. judic. ordin.*

(3) *Cap. 6. de Censib. exaction.* Consule Giralduum *loc. cit.*

(4) Innocentius XI. *Const. 43. §. 10. Bullar. t. 8. p. 617.* Vide eandem Giralduum *loc. mox cit.*

(5) Confer Gaudentium *tom. 1. de Visit. Praelat. eccles. dist. 6. n. 18.*

§. V. Pertinet quoque ad Episcopum procuratio, quae ei tribuitur alimentorum nomine, cum dioecesim visitat (1). Debent enim Episcopi singulis annis vel per se ipsos, vel legitime impediti per vicarium generalem, aliumve virum idoneum dioecesim visitare, totumque negotium saltem intra biennium absolvere; cum ita late patet dioecesis, ut uno anno universa lustrari non possit. Quo munere curandum est diligenter, ut ubique Christiana religio integra observetur, pravique emendentur mores, et quidquid mali irrepsit, avertatur (2).

(1) *Cap. 6. et 23. de Censib. exaction.*

(2) Concilium Tridentinum *Sess. 24. cap. 3. de Reform.*

§. VI. Cum autem aequum sit visitationem fieri sumptibus eorum, qui visitantur, inducta est procuratio, quae comprehendit hospitium, alimenta, cetera necessaria (1), aut etiam certam vim pecuniae, quae nunc sponte data illorum loco accipi potest; modo sit una procuratio, cum plura eadem die loca lustrata sunt (2). Cavendum vero est Episcopis, ne inutilibus sumptibus graves sint Ecclesiis, quas visitant, et ideo modesto comitatu contenti esse debent (3); et si plures intra annum eandem Ecclesiam visitaverint, nonnisi unam procurationem accipiunt (4).

(1) *Cap. 6. et 23. de Censib. exaction.*

(2) *Cap. 2. et 3. de Censib. in 6.* Ita a Bonifacio VIII. abrogatum est jus antiquum in *cap. 1. eod.*, quod procurationis causa pecuniam accipere vetabat. Eadem haec optio dandi pecuniam loco victualium permissa est a Concilio Tridentino *Sess. 24. cap. 3. de Ref.*

(3) Concilium Lateranense in *Cap. 6. de Censib. exact.* praefinivit numerum equorum, quibus Episcopi dioecesim visitantes pro suo comitatu uti possunt; sed eo nunc indiscriminatim uti nequeunt, quod recte monet Giraldu*s Exposit. Jur. Pontif. par. 1. lib. 3 tit. 39 Decretal. sect. 583. pag. 396.* Synodus Tridentina *Sess. 24. c. 3. de Reform.* generatim statuit, ut Episcopi modesto equitatu, et famulatu contenti visitationem quam celerrime expediant. Et licet definitus non sit evectionum, ac dierum numerus, intra quem visitationem perficere oportet, tamen Sac. Congregatio Concilii id totum visitantium conscientiae, et prudentiae reliquit, uti ostendit ipse Giraldu*s l. c.*

(4) Consule Benedictum XIV. *de Synod. dioces. lib. 10. cap. 10. §. 6.*

§. VII. Danda est procuratio non solum Episcopo, aut alteri, qui ejus loco dioecesim lostrat, sed etiam vicario capitulari, cui post annum a die postremo habitae visitationis dioecesim visitare licet (1); et datur ab omnibus, qui visitantur, non tam ab Ecclesiis civitatis, in qua Episcopus assidue commoratur (2), neque item ex privatis oratoriis, quae in monachorum graeciis sita sunt (3). Subsunt autem Episcopi visitationi Ecclesiae omnes, etiam exemptae, atque etiam regulares, quae conjunctam habent curam Animarum (4), itemque commendata monasteria, etiam Abbatae, Prioratus, Praepositorum, ubi non viget observantia regularis; praeterea beneficia tam curata, quam non curata, saecularia, et regularia, qualitercumque commendata etiam exempta (5); Parochiales annexae Ordini Hierosolymitano (6), hospitalia, nisi sub immediata regum protectione sint (7). Nam quae Episcopus ordinario jure visitare non potest, qualia sunt loca exempta, ea visitat jure delegato.

(1) Vide Benedictum XIV. *loc. mox ind.*

(2) Consule Fagnanum *ad caput 15. de Censib. exaction.* et Giraldum *Exposit. Jur. Pontif. par. 1. lib. 3. Decretal. tit. 39. p. 403.*

(3) *Cap. 27. de Censib. exaction.* Quae decretalis consensu omnium interpretum Juris Canonici ad quaecumque privata oratoria traducitur, uti testatur Fagnanus *in cit. cap. 27.*

(4) Concilium Tridentinum *Sess. 25. de Regul. cap. 21.*, Gregorius XV. *Const. Inscrutabili 50. §. 4. Bullar. t. 5. par. 5. p. 1.*

(5) Concilium Tridentinum *Sess. 7. c. 8. et Sess. 21. cap. 3 de Reform.* Vide etiam ea de re decretum *Ut in pareis 184.*, Innocentii X. *Bullar. tom. 6. par. 3. pag. 270.*

(6) S. Pius V. *Const. Exposcit* 187. *Bullar. par.* 3. t. 4. p. 180.

(7) Conc. Trid. *Sess. 22. c. 8. de Ref.*

§. VIII. Visitantur etiam ab Episcopo quotannis monasteria monialium (1); sed tunc nullam ipse procuracionem accipit, nisi quod in earum Ecclesiis beneficium sit (2).

(1) *Clement. 2. de Stat. monachor.*, Concilium Tridentinum *Sess. 25. c. 9. de Regul.* late hoc argumentum persequitur Giralduus *Exposit. Jur. Pontific. par. 1. l. 3. Decret. tit. 35. Sect. 562. pag. 372. et seq.*

(2) Sac. Congregatio Concilii in *Volaterrana* 12. Novemb. 1638. l. 15. *Decretor.* 106.

§. IX. Denique Episcopus jure decretalium habet portionem canonicam, scilicet quartam partem earum rerum, quae Ecclesiae, aut alii pio loco relinquuntur (1). Sed hodie fere ubique haec portio consuetudine sublata est, cum non amplius Episcopi gravi illa premantur inopia, cujus gratia initio ea concessa fuit. Si qua tamen regio est, in qua portio canonica adhuc obtinet, non eam pendunt loca pia, et monasteria exempta, quoniam soluta sunt lege dioecesana, unde illa procedit (2); neque penditur ex piis legatis, quae pro anniversario, pro Ecclesiae fabrica, ceterisque similibus relicta sunt (3).

(1) *Cap. 14. de Testam.*

(2) Consule Giralduum l. c. tit. 27. sect. 48. p. 315.

(3) *Cap. 20. de Testam.*

TITULUS XVI.

DE DECIMIS.

- | | |
|--|--|
| I. Clericorum obventiones,
et emolumenta. | VI. Consuetudo praesertim
in decimis spectanda. |
| II. Decimae quo jure apud
Christianos debita? | VII. Cui solvenda decimae? |
| III. Quando solvi coeptae? | VIII. Decimae an a laicis
accipi possint? |
| IV. Praediales, personales,
mixtae. | IX. A quibus solvenda de-
cimae. |
| V. Earum discrimen. | |

§. I.

Nunc ad ea transgredimur, quae ceterorum clericorum propria sunt; et huc spectant decimae, primitiae, oblationes, quotidianae distributiones, quae ordinariae, quaeque extraordinariae vocantur; voluntariae denique, et honorariae largitiones pro benedictionibus, sacrificiis, sacramentis, aliisque bonis Christiano populo tribuendis. Non omnibus quidem omnes clerici fruuntur, sed alii aliis, pro emolumentorum, clericorumque discrimine.

§. II. Apud Hebraeos, Levitis et Sacerdotibus Divina lege debitas fuisse decimas, hoc est decimam partem fructuum terrae, et pecudum, inter omnes constat (1). Jure Evangelico ad alendos clericos nullae indictae sunt decimae; tantum Christiani jubentur Ecclesiae ministris praebere necessaria ad vitam honeste, ac decenter traducendam (2). Itaque Di-

vinum quidem juris est, quod iis, qui altari ministrant, necessaria vitae subsidia praebeantur; non item, quod ea de causa detur decima pars fructuum terrae, et hoc quidem modo decimae ad jus Divinum referri non possunt (3). Nam Ecclesia constituit modum, quo ejus ministri alendi sunt; nihil autem interest sive id per decimas, sive per alias praestationes fiat.

(1) Prima, quae in sacris libris occurrunt, decimarum exempla sunt, Abrahami decimae a manubiiis omnibus devictorum ab eo Regum, quas ipse Sacerdoti Melchisedecho persolvit. *Gen. XIV. 20.* Imitatus hanc avipietatem Jacobus omnium, quae sibi in Mesopotamia acquirenda essent, decimas Deo offerendas vovit *Genes. XXVIII. 22.*, quam fidem ab itinere reducem liberasse nemo dubitat. Denique Mosaica lege in *Levit. XXVI. 30.* jussi sunt Hebraei decimas persolvere; et tunc quidem decimae Levitis, et Sacerdotibus Dei mandato debemur coeptae sunt.

(2) Matthaeus X. 10. Lucas VIII. 3. X. 7. Paul. I. *ad Corinth. IX. 7. 9. 10. 11. 13. 14.*

(3) Divinum praeceptum solvendarum decimarum morale fuisse, nonnulli existimant, unde conficiant nunc etiam divina lege a Christianis decimas esse solvendas. Rectius S. Thomas 2. 2. *quaest. 87. art. 1.*, decimas divino jure a Christianis deberi affirmat, si earum nomine comprehendimus alimenta, quae clericis debentur, negat autem, si eo vocabulo decimam illam partem fructuum et reddituum intelligimus. Sic ex se patet, inquit, quod ad solutionem decimarum homines tenentur partim quidem ex jure naturali, partim etiam ex institutione Ecclesiae. Quae tamen pensatis opportunitatibus temporum et personarum posset aliam partem determinare. Et merito a Concilio Constantiensi *Sess. 8. c. 300. t. 8. coll.* Harduini damnatus est articulus 18. Joannis Wicleffi agentis, quod decimae sunt purae elemosynae, et Parochiani possunt propter peccata suorum Praelatorum ad libitum suum eas auferre. Nam decimae, tamquam

alimenta Ecclesiae ministris debita, ab ipso divino jure procedunt. Consule Bellarminum *de Cler. lib. 1. cap. 25. §. Quod non sit morale, opp. 1. 2. p. 558. ed. Venet. 1721. Gonzalez in cap. 32. §. 2. de Decim., Cotelerium in Constit. Apostol. lib. 2. c. 35. not. 1. t. 1. p. 248. ed. Amstelaed. cit.*

§. III. Hinc prioribus Ecclesiae saeculis neque Christiani decimas solvebant, neque nulla lex erat, quae hanc solutionem imperaret (1). Clerici vivebant ex oblationibus, quas fideles sua sponte in Ecclesiam conferebant; adeo ut nihil opus esset decimas indicare, ut ex iis clerici victum, et cultum obtinerent. Imminuta fidelium largitate, cum non omnia Ecclesiae, ejusque ministris sponte a fidelibus praeberentur, institutae sunt decimae tum Patrum hortationibus (2), tum Ecclesiae legibus (3), quibus eas Christiani solvere jussi sunt.

(1) Cyprianus *de Unit. Eccles. p. 85. ed. Amstelaed. 1700.* discrete testatur, nullas sua aetate decimas fuisse solutas: et *Epist. 1. p. 170. de Hebraeorum decimis* disserens, *Quae nunc ratio, inquit, et forma in clero tenetur, ut qui in Ecclesia Domini ordinatione clericali promoventur, in nullo ab administratione Divina avocentur, nec molestiis, ac negociis saecularibus alligentur, sed in honore sportulantium fratrum, tamquam decimas ex fructibus accipientes, ab altari, et sacrificiis non recedant.* Quo ex loco perspicuum est, aetate Cypriani sportulas decimarum locum obtinuisse. Idem etiam deprehendi potest ex Origene *Hom. 11. in Numer. n. 2. p. 306. opp. tom. 2. ed. Paris. 1733.* Adde alterum, quod tribus prioribus saeculis de solvendis decimis, ubique silentium est.

(2) Adeundi sunt Auctor *Constit. Apostol. lib. 7. cap. 29., et lib. 8. cap. 20. apud Cotelerium PP. Apostol. tom. 1. pag. 375. et 416. ed. cit., Hieronymus*

in *Malach. cap. 3. versic. 7. 8. et seq. col. 978. et seq. opp. tom. 6. ed. Veron.*, Augustinus *Comment. in psal. 146. n. 17. opp. t. 4. col. 1648. ed. Venet. cit.*, Chrysostomus *Hom. 4. in Ep. ad Ephes. opp. t. 11. p. 31. ed. Paris. 1734.*

(3) Concilium Matisconense II. *can. 5. apud Labbaeum tom. 6. Conc. col. 673. seq.*, Cabilonense II. *can. 19. tom. 9. col. 363.*, Taronense *an. 813. can. 16. 251. ib. Monguntiacense an. 888. can. 13. tom. 11. col. 586.* Confer etiam *Capitularia Regum Francor. cap. de Part. Saxon. cap. 18. et 17.*, apud Balutium *t. 1. col. 183.*, et *Capitul. an. 804. cap. 2. col. 291. edit. Venet. 1772.*

§. IV. Jamvero decimae vel praediales, vel personales, vel mixtae sunt. Praediales debentur ex fructibus, sive redditibus praediorum tum urbanorum tum rusticorum; et harum quidem aliae majores, aliae minores, et minutae, aliae novalis appellantur. Majores sunt, quae ex frumento, vino, foeno, aliisque uberioribus fructibus; minores, quae ex leguminibus, et oleribus; novalis (1), quae penduntur ex praediis, quae recenter ad culturam redacta sunt, cum antea frugifera non essent. Personales (2) solvuntur ex rebus, quas sibi quisquis acquirit opera, et industria sua, veluti ex lucro honestae negotiationis, militiae, venationis. Mixtae denique partim praediales sunt, et partim personales, quippe quae ex rebus quidem ipsis, sed non nisi adhibita industria percipiuntur. Hujus generis sunt foetus pecorum, lac, lana, cetera similia.

(1) Terra praecisa, quae anno cessavit, vel silva, quae avulsis arboribus, ad culturam redacta est, terra novalis dicitur *Leg. 30. ff. de Verb. signif. Leg. 5. §. 2. ff. de Termin. mot.* Memorat hanc *Juris civilis interpretationem Innocentius III in cap. 21 de Verbor.*

signif., tum statuit, novalem esse intelligendum agrum de novo ad cultum redactum, de quo non extat memoria, quod aliquando cultus fuisset.

(2) Aetate Augustini nondum decimae fixae, ac perpetua lege constitutae fuisse videntur; sed ipse tamen *Enarrat. in psalm. 146. num. 14. col. 1648. tom. 4. ed. cit.* vehementer Christianos hortatur, ut reales, ac personales decimas solvant. *Praecidite*, inquit, *aliqua, et deputate aliquid fixum vel ex annuis fructibus, vel ex quotidianis quaestibus vestris.* Sequenti tamen saeculo quo vixit S. Caesarius Arelatensis, non reales solum, sed etiam personales decimae obtinebant; nam ipse *Serm. 277. inter opp. Augustin. in Append. col. 460. tom. 5. par. 2.*, discrete memorat decimas *ex quotidianis quaestibus*, item *de militia, de negotio, de artificio.* Falsus igitur est Van-Espenius *Jus eccles. univers. par. 2. tit. 33. cap. 1. n. 5. et seq.*, qui personalium decimarum originem Caelestino III. adscribendam putat; et insignis est calumnia Justi Henningii Bochemeri *Inst. jur. Can. lib. 4. tit. 3. §. 3.* reprehendentis Romanos Pontifices, quast ipsi jus decimarum plus aequo explicaverint, quod personales decimas instituerunt.

§. V. Inter praediales, ac personales decimas non unum discrimen est. Nam praediales debentur, non deductis impensis, et vero debentur Parocho, cujus in parochia sita sunt praedia, unde illae percipiuntur (1); cumque ipsis praediis adhaereant, ab omnibus, qui praedia habent, etiam infidelibus solvendae sunt (2). Verum decimae personales tantum a Christianis solvuntur Parocho, a quo ipsi sacramenta accipiunt, ex iisque impensae in rebus parandis factae detrahuntur (3). Illud commune est utrique decimis, quod non deducitur, quod necessario ad res conservandas impenditur (4).

(1) *Cap. 7. 13. de Decim.*

(2) *Cap. 16. eod.*

(3) *Cap. 20. et 28. eod.*(4) *Cap. 28. mox laud.*

§. VI. Leges hae sunt Decretalium jure generatim constitutae. Sed recepti populorum mores saepe has leges abrogarunt, et hinc spectandae sunt singularum Ecclesiarum consuetudines, uti noscatur, a quibus eas solvere oporteat. Nimirum posteaquam clericis aliis bonis, atque redditibus parata sunt ea, quae suppeditent ad cultum et ad victum, paulatim decrevit solutio decimarum; et nunc multis in locis neque decimae praediales ex prediis urbanis, neque personales solvuntur (1). Qui ne ex omnibus quidem terrae fructibus detrahuntur decimae, neque solvitur decima eorum pars, licet adhuc decima appelletur; et multae etiam regiones sunt, in quibus decimae prorsus exoleverunt.

(1) Consule Giraldum *Exposit. Jur. Pontif. par. 1. Decret. lib. 3. sect. 508. p. 331.*

§. VII. Decimae debentur Parocho (1); sed tamen ab aliis quoque clericis, aut Ecclesiis acquiri possunt vel privilegio Summi Pontificis (2), vel praescriptione annorum quadraginta cum titulo, sine titulo vero praescriptione temporis, quod hominum memoriam superet (3). Novales vero, ac minutae, ubi hae vigent (4), decimae semper Parocho reservatae censentur; ne is, cui Animarum cura commissa est, graviiori damno afficiatur. Et quamquam laici jure ipso exigendi decimas, quod proprium clericorum est, potiri nequeant, tamen res ipsas, quae decimarum nomine penduntur, habere possunt (5);

modo justa causa praesto sit, et Romani Pontificis accedat auctoritas (6).

(1) Concilium Cabilonense II. *can. 19.* apud Labbaeum t. 9. col. 363. *ed. Venet., et Metense an. 888. can. 2. t. 11. col. 693.*

(2) Multa extant exempla decimarum, quae a Sede Apostolica Monasteriis, et Capitalis concessae sunt. Eas memorant, et probant S. Petrus Damian. *tom. 3. opusc. 33. cap. 3. p. 252. ed. Paris. 1664.*, Ivo Carnotensis *Ep. 192. pag. 83. ed. Paris. 1637.* S. Thomas 2. 2. *quaest. 87. art. 3.* Vide etiam Regulam Templariorum c. 66. apud Holstenium *Cod. Regul. tom. 2. pag. 440. ed. cit.*

(3) *Cap. 4. et 6. de Praescr. in Cap. 1. cod. in 5.*

(4) Minutae decimae plerisque in locis obsoleverant.

(5) S. Thomas 2. 2. *quaest. 86. art. 3.*

(6) Interdum Summus Pontifex ad tempus imponit decimas beneficiorum propter aliquam necessitatem, vel publicam Ecclesiae utilitatem, atque eas solvi mandat alicui Principi, qui Ecclesiam defendit. Tunc autem constituuntur collectores, qui has decimas colligant. Vide *Clemen. 2. de Decim., et Extravag. un. int. commun. cod.*, et vide etiam Gonzalez in *cap. 19. de Decim. n. 4.*, ubi memorat decimas a Sede Apostolica concessas Regibus Hispaniarum.

§. VIII. Verum mediis saeculis in summa rerum confusione laici ut multa ecclesiastica bona, ita etiam decimas usurparunt, easque jure feudi retinuerunt, adeo ut in commercio essent, et in haeredes transirent (1). Interim Parochi carebant suis redditibus, quibus semetipsos, et pauperes sustentarent, neque decimarum possessores ea, quae debebant, Ecclesiae servitia praestabant. Itaque actum est, ut sacra praedia ex laicorum manibus extorquerentur, sed operosum id erat, neque convenire visa sunt extre-

ma remedia, quibus illi exasperarentur. In Concilio Lateranensi III. (2) prohibiti sunt laici novas decimas acquirere, antiquas, quas habebant, in laicos transferre, tum generatim moniti, eos sine Animarum suarum periculo decimas retinere non posse, sed adversus illos, qui eas retinerent, nulla poena indicta est. Denique usu potius, ac silentio, quam lege ulla scripta toleratae sunt decimae, quas antea laici jure feudi obtinebant, novarum tamen acquisitio prorsus vetita; et hodie recepta sententia est, eas tantum decimas infeudatas a laicis recte detineri, quae ante Lateranensem synodum acquisitae sunt (3).

(1) Occupata a laicis bona, ac decimae *Ecclesiae* et *Altaria* dicebantur, quorum turpe, quod calamitosis illis temporibus a laicis fiebat commercium, damnant Paschalis II; et Gregorius VII. *can. 13. et 14. caus. 1. quaest. 3.* Confer Petrum de Marca in *can. 7. Cons. Claromont.*, Fr. Florentem in *cap. 1. et 2. de Jurepatr.* et Muratorium *Diss. 72. et 73. de Antiq. Italic.*

(2) *Cap. 19. de Decim.*

(3) Quod Concilium Lateranense III. non expresse statuat, restituendas esse decimas, quas laici detinebant, neque ullam in ipsos poenam constituat, sed tantum illas in laicos transferri, ac novas acquiri vetet, plerique in eam venere opinionem, quod ea Synodus integras laicis reliquerit decimas, in quarum antea possessione versabantur. Hinc orta communis opinio, laicos retinere posse infeudatas decimas, quas ante illam Synodum obtinebant. Sed recte observat Ludovicus Thomassinus *Vet. et nov. Eccles. discipl. par. 3. lib. 1. cap. 11. num. 7. et seq.*, Concilium Lateranense III. nunquam laicis antiquas decimas permisisse, cum satis diserte dicat, eas laicos sine *Animarum periculo detinere* non posse. Hinc Odo de Saliaco Parisiensis Episcopus viginti circiter post annos, quam Lateranense Concilium habitum fuerit, in suis Constitutionibus Synodalibus *num. 18. Delect. actor. l. 1. col. 1257.*, Frequenter, inquit, moneantur laici

ut non retineant decimas, quas in periculum Animarum suarum retinent. In Concilio Lateranensi IV multa de decimis sancita sunt, praesertim contra illos, qui eas usurpabant; sed nullum decretum est, quod laici restituere cogantur decimas, quas tunc obtinebant. Imo Innocentios III, quo Pontifice Lateranense illud Concilium habitum est, non improbasse videtur decimas, quae a laicis jure feudi retinebantur, uti patet ex *Prima coll. tit. 11. tom. 1. pag. 565. et 569. ed. Balutii Paris: 1682.* Cum enim Capitulum Svesionense earum decimarum redimendarum facultatem postulasset, eam dedit Pontifex adjecta lege, ut Capitulum ea, quae praestabant vetusti decimarum possessores Ecclesiae servitia praestaret. Non hic Ecclesiae restitui jubentur decimae infeudatae, imo vero probatur contractus, per quem illas capitulum a laicis acquisiverat, et confirmantur servitia, quae antea laici propter decimas praestabant, et quae in posterum Capitulum praestare debet. Clarius ipse Innocentius III. in *cap. 25. de Decim.* memorat decimas in feudum concessas, neque eas improbat. Ita cum omnes, quae ferebantur, leges novas tantum decimas a laicis acquiri vetarent, sed decimas jam infeudatas non improbarent, invaluit opinio, quod laicis vetitum esset novas decimas acquirere, contra ipsis illae essent permittendae, quibus jam tunc fruebantur. Medio saeculo XIII Alexander IV in *can. 2. §. Sane de Decim. in 6.*, postquam statuit, regulares posse cum Episcopi consensu decimas a laicis detentas accipere, illas autem, inquit, decimas intelligimus posse taliter a Religiosis de manibus laicorum recipi, vel acquiri, quae ante Lateranense Concilium ipsis laicis in feudum perpetuo fuere concessae. Non hic declarat Alexander, quod Lateranense Concilium intelligat, sed tamen juris Canonici interpretes intelligendum putant Concilium Lateranense III, quod Alexandro III. Pontifice habitum est. Hinc recepta ubique regula, laicos retinere posse decimas infeudatas, modo eas ante Concilium Lateranense III. obtinuerint. Illud non omitam, quod post Pontificatum Innocentii III. abstinuere se Concilia a repetendis antiquis decimis, quas jam laici habebant, quod et ex Tridentina Synodo con-

firmari potest. Quamquam enim statuat, ut qui decimas impediunt, aut subtrahunt, excommunicentur, *Sess. 25. cap. 12. de Reform.*, tamen *Sess. 23. cap. 18. de Reform.* agens de redditibus idoneis Episcopali seminario parandis, aliquid conferri jubet a laicis, qui Ecclesiae decimas obtinent: etiam ex decimis quacumque ratione ad laicos, ex quibus subsidia ecclesiastica solvi solent, pertinentibus.

§. IX. Solutio decimarum omnes generatim obstringit; quin etiam excommunicationis poena constituta est adversus eos, qui decimas subtrahunt, aut impediunt (1). Multi autem eo onere soluti sunt vel privilegio Summi Pontificis (2), vel praescriptione annorum quadraginta cum titulo; sine titulo vero praescriptione temporis, quod supra hominum memoriam est (3); vel pactis conventis, et voluntaria remissione, quae cum perpetua est, Summi Pontificis auctoritatem postulat (4). Clerici decimas pendunt ex bonis, quae haereditate, legato, donatione, aut simili contractu acquisiverunt, non item ex bonis, quae habent titulo spirituali, puta beneficii (5). Regulares autem ex praediis, quae pridem suberant oneri decimarum, antequam ad eos pervenirent (6).

(1) *Can. 5. caus. 16. qu. 7. C. 5. de Decim., Conc. Tridentinum Sess. 25. c. 12. de Reform.*

(2) *Cap. 24. ibique Glossa verb. Exemptus de Decim.*

(3) *Cap. 15. de Privileg., c. 4. 6. 8. de Praescript. Cap. 1. eod. in 6.*

(4) *Cap. 8. de Transact.*

(5) Cum in *Cap. 2. de Decim. Paschalis II.* decimas a clericis primum solvendas neget, ac deinceps affirmat, hinc variae editae sunt ab interpretibus explanationes, ut omnis, quae forte in hac sententia inesse videtur, pugna removeatur. Verior, et ab omnibus fere recepta interpretatio est, quam tradit Glossa, videlicet clericos non teneri decimis ex bonis spirituali titulo acquisitis; puta beneficii, teneri autem ex bonis, quae

testamento, aut contractu obtinuerunt, et ex quibus antequam ea venirent ad clericos, decimae solvebantur, quamquam eorum honorum titulo promotas quis fuerit, nisi aliud legitima consuetudine inductum sit, ut deelaravit Congregatio Concilii in *Marsicana* 12. *Augusti* 1651. l. *Decret. XIX.* p. 143. et in *Usselen.* 11. *Maii* 1658. l. *XXI.* p. 248. Atque id generatim obtinet, etiamsi clerici ab ipso Parocho sacramenta non accipiant, ut respondit eadem Congregatio Concilii in *Feretrana* 19. *Januar.* 1636. l. *Decret. XV.* p. 510. et in *Hortona Decimarum* 25. *Sept.* 1694. lib. *XLIV.*

(6) Extant in *Cap. 10. et 11. de Decim.* privilegia Sedis Apostolicae, per quae Regulares liberantur ab onere solvendarum decimarum ex praediis, quae propriis manibus, atque impensis colerent. Verum Innocentius III. in Concilio Lateranensi IV. *Cap. 34. de Decim.* sancivit, ut cuncti Regulares decimas solverent ex praediis deinceps acquisitis, ex quibus antea decimae solvebantur, quamquam ea ipsorum Regularium labore, et sumptibus fructuosa sint. Secundum hanc Decretalem a Congregatione Concilii in *Pamphilonen. Decimarum* 21. *Augusti* 1728. in *Thesaur. Resolut. tom. 4. p. 21. et tom. 6. p. 29. et seq.* responsum est: quod Regulares non habentes in privilegiis expressam derogationem *Cap. Nuper teneantur solvere integras decimas, exceptis bonis, et rebus praescriptis in Cap. Ex parte 10. de Decim.* Hodie igitur Regulares omnes soluti sunt lege tribuendarum decimarum tum personalium, tum reallium, quae dari deberent ex fructibus hortorum suorum, nutrimentis animalium, atque ex novalibus, quae sunt ex terra prorsus inculta, quam ipsi proprio labore, sumptuque colant; non item ex fundis decumanis, qui ad eos cum tali onere delati sunt, nisi etiam pro his peculiare privilegium obtinuerint, uti etiam declararunt Alexander IV. in *cap. 2. §. Ceterum de Decim. in 6.*, Innocentius X. *Const. Nuper pro parte 53. Bullar. tom. 5. par. 3. p. 78. Consale Passerinam Comment. ad lib. 3. Sexti Decretal. tit. de Decim. qu. unic. art. 15. per tot, Card. Petram ad Const. Apost. tom. 4. in Constit. 8. Martini V. pag. 243, et Gaudentium a Janua de Visib. cujuscumque Praelat. t. 1. c. 5. dub. 13. sect. 6.*

TITULUS XVII.

DE PRIMITIIS, OBLATIONIBUS, CETERISQUE
TEMPORIBUS BONIS CLERICORUM.

- | | |
|---|---|
| I. et II. Primitiae quomodo
apud Hebraeos, quomodo
apud Christianos debita? | VIII. Distributiones quoti-
dianae. |
| III. Oblationes quid? | IX. De his Tridentini Con-
cilii decretum. |
| IV. ad VI. Earum distinctio. | X. Qui distributiones acci-
pant? |
| VII. Cui adscribendae obla-
tiones? | XI. Portio congrua. |

§. I.

Primittiae sunt rerum primi fructus, qui Deo offeruntur. Apud gentes omnes vetustissimi instituti est primum Deo offerre, et consecrare. Hebraei vero Divina etiam lege primitias dabant, quarum tamen modus, et ratio potius moribus, quam lege ipsa erat constituta (1) Inter Christianos primitiae ante ipsas decimas obtinere coeperunt; et vero antiquissima sunt monumenta, unde intelligimus, Christianos primitias rerum suarum praestare consuevisse (2).

(1) Consule Hieronymum in *Ezechiel. c. 45. vers. 13. et 14. opp. tom. 5. col. 565. ed. Vallarsii Veron.*

(2) Origenes *Contr. Cels. lib. 8, num. 34. p. 766. tom. 1. ed. Paris. 1733. Irenaeus lib. 4. Contra Haereses cap. 17. pag. 219. ed. Paris. 1710., Auctor Canon. Apostolor. Can. 5. et Constit. Apostol. lib. 8. cap.*

40. uterque apud Cotelerium PP. *Apostol. tom. 1. p. 423. et 424. ed. Amstelæd. cit.*

§. II. Dabantur primitiae non tantum ad agnoscendum creatorem, sed etiam ad ministros Ecclesiae sustentandos (1); erantque praesertim ex uvis, et frumentis (2), certaue extabat precum formula, quae in earum benedictione adhibebatur (3). Nunç fere ubique primitiae desierunt (4), ac si qua regio est, in qua adhuc eae ex consuetudine tribuuntur, ex eadem noscitur, quid, et quantum dari debeat.

(1) In Synodo Gangrensi in *Praefat. Collect. Harduini tom. 1. col. 530. et seq.* gravissime reprehenduntur haeretici Eustachiani, quod primitias fructuum Ecclesiae olim datas sibi vindicassent, suisque adscripsissent; et hinc duo emittuntur canones, quibus sub poena anathematis omnes prohibentur eos fructus Ecclesiae oblatos accipere, aut dare extra Ecclesiam, praeter Episcopi sententiam *Can. 7. et 9. col. 535. l. c.*

(2) Concilium Africanum *cap. 4.*, apud Pithoeum *Cod. Canon. Eccles. Roman. p. 144. ed. Paris. cit.*, S. Gregorius Nazianzenus *Ep. 80. p. 833. opp. t. ed. c.*

(3) Habes hanc formulam apud Auctorem *Constit. Apostol. l. c.*

(4) Post saeculum V. vix ulla amplius mentio primitiarum occurrit; tantum indicuntur in Concilio Hispalensi apud Ivonem in *Decret. par. 3. c. 174.*

§. III. Oblationes sunt munera, quae a fidelibus Deo, et Ecclesiae sponte offeruntur. Antiquissimus earum usus est, atque ab ipsa Apostolorum aetate repetendus (1). Nemo offerre cogeatur, sed turpe erat, eum non offerre, qui posset (2); et il-

lorum, quorum praeclara erant munera in Ecclesiam, nomina publice recitabantur (3). Neque vero omnibus offerre licebat; quoniam oblationes, praesertim Eucharisticae, ecclesiasticam communionem ostendebant, et ideo rejiciebantur oblationes eorum, qui in Eucharistia non communicabant (4) Ipsi Constitutes, qui scilicet in summo poenitentium gradu versabantur, quamquam communium precum essent participes, tamen ad altare offerre prohibebantur (5); et saepe restitutas constat oblationes eorum, qui deinceps in haeresim inciderant (6).

(1) Agapas, sive sacra convivia, Apostoli instituerunt, atque horum ratio erat, ut singuli Fideles panem, ac vinum, aliaque etiam ad Ecclesiam offerrent, e quibus panis, vinique parte consecrata, quod reliquum erat, in commune illud convivium conferebatur. Atque hoc referendum illud Apostoli I. ad Corinth. XI. 21. *Unusquisque suam coenam praesumit ad manducandum, et alius quidem esurit, alius ebrius est.* Licet vero deinceps Agapae desierint, tamen oblationum usus diu retentus est. Agit, praeter ceteros, de Agapis Thomassinus *Vet. et nov. Eccles. discipl. par. 3. l. 3. c. 47. num. 1.*

(2) Cyprianus de oper. et eleemosyn. pag. 141. ed. Amstelæd. 1700., reprehendit foeminam, quae cum dives esset, nihil obtulerat, et S. Augustinus, seu potius S. Caesarius Arelatensis Auctor Serm. 85. de Tempor. num. 4. et 5. col. 154. opp. tom. 5. ed. e. populum ad hanc officii partem vehementer hortatur, sed lapsu temporum, imminuta apud multos pietate, latis legibus jussi sunt Christiani certis saltem diebus oblationes facere. Concilium Matisconense II. Can. 4. apud Labbaeum tom. 6. col. 674. ed. Venet. cunctis diebus dominicis panem, et vinum ab omnibus offerri jubet, et Capitularia Regum Francorum l. 6. c. 170. apud Balutium col. 636. ed. Venet. 1772. quotidie oblationes fieri mandat, et si quotidie non potest, saltem domi-

nica die. Quo loco autem oblationes fierent laicorum, quibus ad altare accedere non licebat, diligenter ostendunt Bona *Rer. liturgic. lib. 2. cap. 9. §. 1. pag. 199. tom. 3. ed. Taurin. cit.*, et Sala in *Notis ad eundem locum, et ad cap. 8. §. 4. et 6. pag. 183. 191. et 200*, et Martenius de *Antiqu. Eccles. rit. lib. 1. cap. 4. art. 6. §. 7. tom. 1. pag. 140. ed. Antwerp. seu Ven. 1763.*

(3) Cyprianus *Ep. 60. et 62. ad Episcop. Numid. pag. 174. ed. cit.*, Hieronymus in *Jerem. l. 2. c. 11. vers. 15. et 16. opp. tom. 4. col. 921. ed. Veronae c.*, Innocentius I. *Ep. 25. ad Decent. Episc. Eugubin. c. 2. apud Constantium Ep. Pontific. Roman. col. 857.*, Auctor *Constit. Apostol. lib. 3. cap. 4. pag. 279. edit. cit.*, quem in locum vide Cotelierium, et vide etiam Card. Bonam *Rer. liturg. lib. 2. cap. 8. §. 7. t. 3. p. 191. seq. ibique Salam in Not., ac Selvagium Antiqu. Christian. lib. 2. capit. 1. §. 8. ubi multa habes de his nominibus recitandis.*

(4) Auctor *Constit. Apostol. lib. 3. cap. 8.*, apud Cotelierium *loc. cit. p. 265.*, Concilium Eliberitanum *can. 28. quem in canonem vide Alaspinaeum p. 169. ed. Neap. cit.* Quin etiam fratrum inter se dissidentium oblationes recipi vetat Concilium Carthaginense IV. *Can. 93. col. 984. l. 1. collect. Harduini ed. Paris. cit. In Capitularibus Caroli M., et Ludovici Pii lib. 7. cap. 442. col. 751., et in Addit. 4. cap. 81. col. 613. tom. 1. ed. Baluzii Venet. 1772*, rejiciuntur oblationes illorum, qui sibi mortem consciverant, quique pro suis criminalibus puniuntur. Repudiabat etiam Ecclesia oblationes datas ab illis, qui pauperes opprimebant, uti patet ex eodem Concilio Carthaginensi *can. 6. loc. cit.*, cum quo consentit Auctor *Constit. Apostol. lib. 4. cap. 6. p. 297.*, ubi alii praeterea scelesti homines recensentur, quorum oblationes non recipiebantur. Ambrosius *Ep. 17. n. 14. col. 870. t. 3. ed. cit.* Valentinianum Imperatorem monet, ne quid ad idololatriam restituendam conferret, quoniam si id fecisset, ejus oblationes Ecclesia repudiasset. Atque id quidem perpetuum fuit de oblationibus, unde Eucharistiae elementa sumebantur. Ceteras oblationes interdum receptas constat, quamquam ab iis fierent, qui communionis expertes erant, et quidem Hor-

misdas P., uti narrat Anastasius in *ejus Vit.* §. 86. t. 1. pag. 95. ed. Rom. 1718. a Theodorico Ariano offerri passus est Cerostata argentea duo pensan. libras. 70. Verum Liberius P., uti testantur Athanasius *Histor. Arian. ad Monach.* num. 37. opp. tom. 1. p. 289. ed. Patav. cit. et Theodoretus *Histor. lib. 2. cap. 16. p. 95. ed. Cantabrig. cit.* Constantii dona repudiavit; et maniera Valentis nemo accipere ausus est, cum non sciretur, num ea Basilius esset accepturus, sicuti narrat Gregorius Nazianzenus *Orat. 20. de laud. Basilii Opp. t. 1. pag. 351. ed. Coloniae 1790.*

(5) Concilium Nicaenum *Can. 11. tom. 2. col. 38. 45. 52.*, et Ancyranum *Can. 4. et 5.*, apud Labbaeum t. 1 col. 2487. ed. Venet., ubi canones hos poenitentes appellant *κοινωνοὺς ἡμεῖς προσφορὰς sine oblatione communicantes.* Verum eorum, qui in poenitentia constituti, et reconciliationis cupidi subito moriebantur, oblationes Ecclesia accipiebat. Concilium Vasense I. *Can. 21. t. 4. col. 717.*; Arelatense II. *Can. 12.*, apud eundem Labbaeum tom. 5. col. 3. ed. Venet., et Toletanum XI. *Can. 12. tom. 3. collect. Harduini col. 1029.* Idem habent capitularia Regum Francorum *lib. 5. cap. 130. et 142. col. 570. ed. Balutii Venet. 1772.*, et canones Isaac Episcopi Lingonensis *can. 14.*, apud eundem Balutium *eod. loc. col. 641.* Vide Albaspinæum *Observ. 5. lib. 1. p. 17. ed. Neapol. 1770.*

(6) Quod adversus Marcionem, qui ducenta sesteritia Ecclesiae dederat, factum narrat Tertullianus *de Praescript. cap. 30. p. 212. ed. Paris. 1665.*

§. IV. Jam oblationes aliae ad altare fiebant, cum sacrificium peragebatur; et tunc quidem fideles offerebantur panem, et vinum, thus etiam, atque oleum pro luminaribus, praeterea Sabbato Sancto qui dies erat solemnisi Baptismi, lac, et mel, quo recens baptizati vesci solebant (1). Ex oblatis pane, et vino Eucharistiae elementa desumebantur: quod reliquum erat clericis, ac pauperibus tribuebatur (2).

Cum illa desiit panis, ac vini oblatio, coepit offerri pecunia, unde Missae honorarium ortum est (3).

(1) Consule *Can. Apostol.* 3. 4. 5., apud *Cotele-rium loc. cit.* p. 442., *Concilium Carthaginense III. cânon.* 24. apud *Labbaeum tom.* 2. col. 1043., *Concilium Africanum cap.* 4., apud *Pithoeum loc. cit.* p. 144. Sed *Concilium Trullanum can.* 57., apud eundem *Labbaeum tom.* 7. col. 1374., lac et mel offerri vetat.

(2) *S. Justinus M. Apol.* 1. num. 66. et 67. p. 83. *ed. Paris.* 1742., *Tertullianus Apolog. cap.* 39. p. 31. *ed. Paris.* 1676.

(3) Confer *Mabillonium Praefat. ad par.* 1. saec. 3. *Benedictin. num.* 62. pag. XXVII. *ed. Venet.* 1734. *Franciscum de Berlendis Dissert. de Oblat. pecul.* §. 2., et *R. Salam in not. ad Bonam Rer. liturgic. lib.* 2. c. 8. §. 3. et *Not.* 4. t. 3. p. 180. et 196. *ed. Taurin. cit.*

§. V. Aliae erant oblationes, quae pro arbitrio in Ecclesia deponebantur, ut cederent in ipsius Ecclesiae usum aut in clericorum, et pauperum alimenta. Nam a primis saeculis erat in Ecclesia arca, quae *Corbona* dicebatur, et in quam fideles stipem inferebant, unde pauperes opem acciperent (1). Inde institutum est *Gazophylacium*, locus scilicet in exedris Ecclesiae, quo illae fidelium oblationes deferrebantur (2).

(1) Memorat hanc corbonam *Cyprianus de Oper. et elemosyn.* p. 141. *ed. Amstelued.* 1700, cum reprehendit opulentam foeminam, quae nihil obtulerat, his verbis: *Locuples, et dives es, et Dominicum celebrare te credis, quae corbonam omnino non respicis; quae in Dominicum sine sacrificio venis; quae partem de sacrificio, quod pauper obtulit, sumis.* *Basnagius Exerc. Hist. erit. ad an.* 44. num. 67., corbonae nomine non

arcam pecuniariam, sed potius ipsas oblationes designari arbitratur, quoniam Hebraicum hoc vocabulum donum significat. Verum et ipsum *Corbon* Hebraicum locum condendae pecuniae destinatum notat Matthaeus XXVII. 6. *non licet eos argenteos mittere in corbonam.* Adde quod verisimile non est, Cyprianum Latine scribentem aliter, ac Latini explicabant, intellexisse vocem, quae latini juris, ac significationis evasit. Vide etiam Justinum Martyrem, et Tertullianum *loc. cit.*, qui memorant hanc stipem a fidelibus in Ecclesia depositam, ut ea pauperibus auxilium praeberetur.

(2) Duplex Gazophylacium erat: alterum intra, et alterum extra Ecclesiam; utrumque describit Binghamus *Origin. eccles. lib. 8. capit. 6. §. 22. tom. 3. p. 248. ed. Halae Magdeburg. 1758.* in Gazophylacio, quod erat intra Ecclesiam, servabantur priores illae oblationes, quarum antea memini; ad Gazophylacium, quod erat extra Ecclesiam, alterius generis oblationes deferbantur.

§. VI. Denique aliae erant oblationes, quas Christiani pro sua pietate dabant cum justa funeris solvebantur, cum sacramenta suscipiebant, cum alia sacra officia peragebantur. Sane quarto saeculo aliquid in Baptismo dari solebat (1). Hae oblationes initio voluntariae erant, sed temporis cursu in laudabiles consuetudines abierunt; et vero Concilio Lateranensi IV. sancitum est, ut libere sacramenta, ceteraque sacra officia administrentur, sed ut fideles oblationes praestent, quas praestare consueverunt, et recusantes etiam cogi ab Episcopo possint (2). Non enim dantur tamquam pretium rerum sacrarum, sed tamquam praemium laboris, et tamquam alimenta, quae Jus Divinum Ecclesiae ministris tribui voluit. Atque haec sunt jura, quae ad Parochum pertinent, ideo parochialia dicuntur.

(1) Gregorius Nazianzenus *Orat. 40. de Baptism.*
p. 671. tom. 1. ed. Coloniae 1690.

(2) *Cap. 41. de Simon.*

§. VII. Oblationes omnes, etiam quae sponte, quaeque in capella inferiori, aliove loco intra fines Parochiae fiunt, pertinent ad Ecclesiam parochialem, nisi aliam esse constet offerentium voluntatem. Nimirum fideles oblationes facere videntur propter curam Animarum, quam Ecclesia sustinet; quae praesumptio locum non habet, cum alia offerentium voluntas patefacta est. Tunc enim oblationes dandae sunt loco, cui quis eas adscribi voluit (1). Similiter ad Ecclesiam parochialem non pertinent oblationes, quae alii loco, consuetudine, vel privilegio adiectae sunt.

(1) Consule Barbosam *de Offic. Paroch. cap. 24.*
Card. de Luca *de Decim. disc. 19.*, et Fagnanum in c.
9. *de His quae fiunt a Praelat. n. 14. et seq.*

§. VIII. Inter clericorum redditus recensentur etiam distributiones quotidianae, quae debentur Canonici, qui Divinis officiis intersunt. Nulla enim est vel Cathedralis, vel Collegiata Ecclesia, quae communem arcam non habeat, unde sumuntur haec praemia, quae singulis diebus, atque horis adscripta sunt, ut Choro addicti facilius hac illecebra ducti, et frequentius ad illum convenient (1). Non tamen hujus praesertim emolumenti ratio, sed pietatis studium, et obsequium in Deum ad chorum vocare unumquemque debet; neque effugeret simoniae labem, qui tantum distributionum utilitate traheretur (2).

- (1) Ivo Carnotensis *Ep.* 219. *ad Paschalem P. p.*
93. *ed. Paris.* 1547.
(2) Vide S. Thomam in *Quodlibet* 8 *quaest.* 6. *art.* 1.

§. IX. Synodus Tridentina distributiones approbat, atque eas in morem perducere jubet, ubi veteri instituto receptae non essent. Propterea statuit, ut in cunctis cathedralibus, et collegiatis Ecclesiis tertia pars fructuum, aliorumque reddituum, qui ad Capituli Dignitates, aut ad Canonicos pertinent, ab Episcopo, etiam tamquam Apostolicae Sedis delegato, in quotidianas distributiones convertatur (1).

- (1) Concilium Tridentinum *Sess.* 21. *c.* 3. *de Ref.*

§. X. Distributiones, quas absentes amittunt, capitulum nemini remittere, et condonare potest (1); sed Ecclesiae fabricae, aliive pio loco Episcopi arbitrio adscribendae sunt distributiones eorum, qui redditus habent a capituli mensa sejunctos, eorum vero, quibus ex eadem mensa communes sunt redditus, inter praesentes dividuntur (2). Sunt tamen qui justis de causis abesse coguntur, et hi distributiones acquirunt, perinde ac praesentes essent; quales sunt vere, et graviter aegrotantes, carceribus injuria detenti, et absentes propter pestem, vel propter Ecclesiae utilitatem (3).

- (1) Confer Suarezium *de Relig. lib.* 4. *de horis canonice.* *c.* 10. *n.* 20. *opp. tom.* 2., et Benedictum XIV. *Inst. Eccles. Instit.* 107. §. 7. *n.* 42.

- (2) Duae sunt ea de re Tridentini Concilii leges *Sess.* 21. *c.* 3. et *Sess.* 22. *c.* 3. *de Reform.*, alte-

ra absentium distributiones praesentibus, et altera Ecclesiae fabricae, aut alij pio loco arbitrio Episcopi adscribit. Sed lex illa locum habet, cum communes sunt omnium canonicarum redditus; altera vero, cum illi absunt, quibus sua a capitulari mensa distincta praebenda est. Consule Fagnanum in *cap. Quia nonnulli num. 22. et seq. de Cleric. non residen.*

(3) Bonifacius VII. in *cap. unic. de Cleric. non residen.* in 6., quam legem renovavit Synodus Tridentina *Sess. 23. cap. 12. de Reform.*, postquam generatim constituit, absentes distributionibus carere, addit haec: *Exceptis illis, quos infirmitas, seu justa, et rationabilis corporalis necessitas, aut evidens Ecclesiae utilitas excusaret.* Itaque quaesitum est, quae infirmitas, quae item corporalis necessitas, quae denique Ecclesiae utilitas requiratur, ut absentes distributiones accipiant. Generatim verus, gravisque morbus requiritur, qui aliquem domo exire prohibeat, quamquam ea in re boni viri arbitrium spectare oporteat; neque hic ipse morbus est satis, cum quis sanus Divinis officiis interesse non solebat. Excusantur etiam, qui carceribus injuste detinentur, quique ob pestis causam, aut propter inimicitias, vel injurias, quas immerito perferunt, ad choram venire nequeunt. Similiter Canonicus Theologus, et Poenitentarius, itemque Canonicus, qui in eadem Ecclesia et canonicatum, et curam Animarum habet, tamquam praesentes in choro habentur, cum ea praestant, quae sui muneri propria sunt. Haec, et cetera, quae ad hunc locum pertinent, diligenter explicat Benedictus XIV. *loc. cit. §. 3. et seq. num. 45. et seq.* Vide etiam Giraldum *Exposit. Jur. Pontif. par. 1. lib. 3. Decretal. sect. 358. p. 243. et seq.*, a quo omnes, qui etiam absentes quotidianas distributiones accipiunt, accurate recensentur.

§. XI. Denique vicarii, qui exercent curam Animarum, quae capitulis, aut monasteriis conjuncta est, congruam portionem habere debent. Quo nomine intelligitur certa pars fructuum, quae ex pa-

rochiaie redditibus Episcopi arbitrio detrahitur, quaeque vicario adscribitur, unde habeat id, quod ad decentem ejus tuitionem necessarium est (1). Constituunt hos vicarios capitula, monasteria, et cetera loca pia, quae curam habent Animarum, ut parochialia gerant officia, verum illi ab Episcopo approbandi sunt (2).

(1) Concilium Tridentinum *Sess. 7. c. 7. de Reform.* Benedictus XIV. *Const. Cum semper* 103. in ejus *Bullar. tom. 1. p. 222. §. 10. ed. Rom. seu Venet. 1754.* Confer ea, quae supra diximus *lib. 1. tit. 3. sect. 9. §. 84. pag. 257.*

(2) Consule Giraldum *Exposit. Jur. Pontific. par. 2. sect. 23. p. 828.*

TITULUS XVIII.

DE PECULIO CLERICORUM.

- | | |
|--------------------------------------|--|
| I. Peculium ecclesiasticum
quid ? | stici. |
| II. Bona patrimonialia clericorum. | IV. Facultates testandi de
hoc peculio. |
| III. Usus peculii ecclesiasticus. | V. Spolia, eorum Collectores. |

§. I.

Ex Ecclesiae bonis, cum ad clericos ea pervenerint, existit illud, quod in Jure nostro peculium Clericorum appellatur. Peculii nomen ex jure civili desumptum est, ac significat quasi *pusillam pecuniam*, seu *patrimonium pusillum*, ut inquit Ulpianus (1), quod servus permissu domini separatim a dominicis rationibus habet. Placuit hoc nomen traducere ad res ecclesiasticas, quoniam uti servus verum non habet dominium peculii sui, ita neque clericus dominus est bonorum, unde illud peculium conflatum est; imo si dominus revera est fructuum eorundem bonorum, non merus administrator, ut multi putant, hoc certe dominium et arbitrium non ita late patet, uti patet dominium, quod omnes habent in rebus suis.

(1) L. 5. de Pecul.

§. II. Verum, praeter hoc peculium, habent etiam clerici bona privata, sive patrimonialia, qua-

lia sunt acquisita haereditate, legato, contractu, aliove jure, quod clerici cum reliquis civibus commune habent. Horum quidem bonorum omnium plenum clericis dominium est, et ideo distractio, atque consumptio eorum arbitrio relinquitur (1). Moriente vero clerico sine testamento, haec bona transeunt ad cognatos proximos ab intestato, ac si nulli fuerint vel ex testamento, vel ab intestato haeredes, ad Ecclesiam deferuntur (2).

(1) *Can. 4. c. 12. quaest. 3., cap. 9. et 12. de Testam.*

(2) *Cop. 1. eod. . c. 1. de Succes. ab intest.*

§. III. Sed in ecclesiastico peculio illud saepe quaesitum est, num clerici in dominium habeant, an potius tantum usum, et administrationem. Quae disputatio eo spectat, ut sciatur num lex justitiae, an pietatis, et misericordiae, ac jus positivum Ecclesiae clericos cogat in pauperes, aut alios pios usus convertere quidquid ex decenti exhibitione sua superest de redditibus rerum ecclesiasticarum (1). Alterutram sequi opinionem placeat, certum est, clericos ex bonis ecclesiasticis tantum sumere, quod ipsis est necessarium ad honeste, ac decenter vivendum, reliquum in pios usus conferre oportere.

(1) Controversiam hanc, omnibus excussis argumentis, diligentissime expendit Benedictus XIV. *de Synod. dioeces. lib. 7. cap. 2.* Videndus est etiam Theodorus Rapprechtus *Not. histor. in jus Canon. lib. 5. titul. 25.*

§. IV. Antiqui canones de ecclesiastico peculio clericos testari vetabant, quoniam illud redire debe-

bat ad Ecclesiam, unde profectum erat (1). Sed sensim consuetudine, ac privilegio Summorum Pontificum, praesertim ob frequentes lites, quas excitabat difficultas discernendi bona ecclesiastica a patrimonialibus, inductum est, ut clerici etiam de bonis ecclesiasticis testamentum condant. Interim in foro valent haec testamenta; sed gravi certe crimine obligantur clerici, qui potius quam in pios, conferunt in profanos usus, aut in ditandis consanguineis insumunt fructus rerum ecclesiasticarum. Non enim consuetudo bonorum naturam mutat, neque privilegium datum censetur cum gravi detrimento pauperum, et Ecclesiarum (2).

(1) *Can. 40. Apostolor. apud Cotelierum l. cit. p. 447. c. 2. de cleric. c. 7. de Testamen.*

(2) *Vide Concilium Tridentinum Sess. 25. cap. 1. de Reform.*

§. V. Bona ecclesiastica clericorum post eorum obitum spolia dicta sunt, quoniam clerici, exemplo Monachorum, ad vitae exitum properantes rebus peculiaribus sese ultro spoliare consueverunt, ne quid Ecclesia caperet detrimenti. Haec bona, quae clericus moriens relinquit, nisi vel consuetudine, vel privilegio Summi Pontificis testandi facultatem habeat (1), jure spoliis pertinent ad Cameram Apostolicam, quae ea colligit per *collectores* in provinciis constitutos, et cuncta in pauperum alimenta, aliosve pios usus convertit (2). Neque quis sibi per hos collectores inferri damnum, aut injuriam putet; quoniam spoliū ad ea pertinet, de quibus clericus liberum non habet statuendi arbitrium, atque illud declinare unusquisque potest, si vivens obtemperet

legi, qua obstringitur, piisque adscribat usibus redditus ecclesiasticos, qui supersunt ex necessariis ad vitam traducendam (3).

(1) Consule Giraldum *Exposit. Jur. Pontif. par. 1. Decretal. lib. 5. sect. 475. pag. 306. et 307.*, et Lucium Ferraris *Biblioth. verb. Spolium*, a quibus omnes, qui vel consuetudine, vel privilegio de ecclesiasticis bonis testari possunt, accurate recensentur. Cives, et incolae Urbis Romae, quique procul ab ea decedunt intra decem millia passuum eo privilegio fruuntur per *Constit. In eminenti 33.*, Pauli V. in *Bullar. tom. 5. p. 197.*

(2) Consule Benedictum XIV. *de Synod. dioecesis. l. 3. c. 8. n. 6.*

(3) Spolia instituta sunt a Summis Pontificibus ad coercendam avaritiam clericorum, qui multas ex ecclesiasticis bonis quaerebant opes, ut his ditarent consanguineos suos, atque ad tuendos canones, quibus sanctum est, ut Ecclesiae bona in pios usus conferantur. Narrat inter ceteros Matthaeus Paris ad an. 1246. p. 474. *ed. Paris. 1644.*, tres Angliae Archidiaconos incredibilem quamdam pecuniae vim coacervasse, praeter mobilia complurima magni pretii, et ex iis duos ab intestato obiisse, quo factum est, ut opes illae ad laicos pervenirent. *Obierat intestatus*, inquit, *et plura millia marcarum cum vasis multis argenteis, saeculo, et saecularibus infelicitur dimiserat.* Episcopi, cum ipsis decedentium clericorum spoliis permitteretur, saepe vel potentia impediti suum munus exercere non poterant, vel etiam gratia freti ultro negligebant, et saepe etiam in privatam utilitatem suam convertebant quidquid ex hoc spolio clericorum acceperant. Adde, quod multi Episcopi eodem, quo caeteri clerici, laborabant morbo, studio videlicet ditandi suos ex rebus ecclesiasticis; neque ullus erat, qui de Episcoporum spoliis eam gereret sollicitudinem, quam gerere oportebat. Itaque ut fraenum haberet avaritia clericorum, ac sacra tecta servaretur vis legum ecclesiasticarum, sedes Apostolica curam suscepit honorum, quae ad clericum ex ecclesia venerunt, ut ea conferat in pios illos usus, in

quos clerici conferre debuissent. Quod si Ecclesia est, quae spoliis clericorum indigeat, ea facile remittit Sedes Apostolica, ut in illius utilitatem convertantur. Ita Innocentius XII. *Const. Inscrutabili* 81. *Bullar. lib. 9. p. 342.*, quam constitutionem postea confirmarunt Benedictus XIII. in *Const. Sacrosancti Apostolatus* 16. et *Const. Romanum decet Pontificem* 151. *Bullar. tom. 11. et 12. pag. 324. et 325.*, ac Benedictus XIV. *Constit. Pastoralis* 57. *tom. 4. ejus Bullarii pag. 57. edit. cit. in Regno Neapolitano decedentium Episcoporum, ac Praelatorum spolia concessit Ecclesiis, quibus illi praefecti fuerant. Recte hinc observat Thomassinus* *Vet. et nov. Eccles. disciplin. par. 3. lib. 2. cap. 57. num. 3.* quod si invidiosa sunt spolia, omnis invidia, et infamia conferenda est in insatiabilem quamdam avaritiam vel beneficiorum, qui ex stipendiis in pauperes dispergendis quosdam sibi accumulunt thesauros iniquitatis, vel cognatorum, qui in bona pauperibus, et Ecclesiis dedicata succedere gestiunt. Idem habet Baronius ad an. 397. num. 64. *tom. 5. p. 252. edit. Lucae*, ubi etiam animadvertit, quod qui de collectorum importuna exactione quaeruntur, hos facile vitabunt, et prudenter arte deludent, qui bona Ecclesiae, quae supersunt, non congregarint, sed in pauperes erogarint.

TITULUS XIX.

DE REBUS ECCLESIASTICIS NON ALIENANDIS.

- | | |
|--|--|
| I. De rebus Ecclesiae non alienandis vetus regula. | IV. Venia Sedis Apostolicae. |
| II. Quid alienatio comprehendat. | V. Quarum rerum permissa alienatio sit? |
| III. Quae res alienari nequeant? | VI. Venditio fructuum beneficiorum, et horum locatio solutione anticipata. |

§. I.

Vetus est regula, Ecclesiae res alienari non posse; quam regulam et sacri canones (1), et civiles leges (2) ratam haberi voluerunt. Nam sua Ecclesiae bona sarta tecta servanda sunt, ut ex iis habeant clerici, et pauperes unde vivant, et Religionis cultus sustineatur. Hodie ea in re jure utimur, quod a Paulo II. sancitum est (3).

(1) S. Leo M. *Ep. 17. ad univers. Episc. per Siciliæ constit. opp. tom. 1. col. 728. edit. Venet. 1793.* cujus epistolae veritatem adversus Quesnelli ratiunculas egregie ostendunt Fratres Ballerini in *Not. num. 8. Cacciarus in Monit. ad eamd. Epist. p. 86. ed. Rom. an. 1755.*, Tillemontius *Histor. Eccl. not. 7. in Vit. S. Leon. t. 15. pag. 894. edit. Venet. 1732.* Eadem lex est Hilarii Pontificis, qui proximus Leonis successor fuit, *Epist. 8. c. 5. ad Episc. divers. provinc. Gal. apud Labbaeum tom. 5. conc. col. 67.*, itemque Symmachi *Epist. 5. ad Caesar. cod. tom. 5. col. 425.*, qua quidem Epistola S. Symmachus respondet S. Caesario Arela-

tensi, qui eum rogaverat, ut rerum ecclesiasticarum alienationes Apostolica auctoritate prohiberet *ibid.* col. 424., Concilium Ancyranum *can.* 14. *tom.* 1. *concl.* Labbaei, col. 1498., Carthaginense *V. can.* 4. *tom.* 2. col. 155., Agathense *can.* 7. *t.* 5. col. 522., Aurelianense III. *can.* 2. col. 1277., Aurelianense IV. *can.* 18. 1376. et V. *can.* 13. col. 1380. *eod.* *t.* 5. et Nicænum II. *can.* 12. *t.* 8. col. 1256. Cyrillus Alexandrinus *Ep. ad Dominum tom.* 2. *Pandect. can. Beveregii edit. Oxonii* 1672. *p.* 177., quem in locum Balsamon, *vasa*, inquit, *pretiosa Ecclesiarum, seu sacra, et reliqua Deo consecrata, et possessiones immobiles inalienabilia sunt, et Ecclesiis reservantur.* Non igitur nova, ut quidam putant, sed vetustissima est canonum regula de rebus Ecclesiae non alienandis. Confer etiam Decretalium titulum de rebus Eccles. alien. vel non.

(2) *Leg.* 14. et 17. *eod. de Sacros. Eccles., Novell.* 7. *cap.* 1. Vide etiam capitularia Regum Francorum *l.* 2. *cap.* 29. col. 502. et *lib.* 6. *cap.* 136. col. 633. *tom.* 1. *ed. Balutii cit.* aliaque multa eorundem capitularium loca, quae laudat, et expendit Cl. Mamachius *del diritto libero della Chiesa di acquistare, e di possedere* *l.* 3. *cap.* 1. *p.* 62. et *seq.*, ubi totum hoc argumenti genus graviter, et solide pertractatur.

(3) *Extravag. Ambitosae de Reb. Eccles. alien. vel non.*

§. II. Pertinet hoc interdictum etiam ad monasteria, hospitalia, ceteraque loca pia, et religiosa, quorum etiam bona ecclesiastica dicuntur, eaque distrahere nefas est (1). Alienationis autem nomen comprehendit venditionem, donationem, permutationem, emphytheusim, locationem, conductionem, ultra triennium (2), pignoris constitutionem, seu nexum, et hypothecam, in feudum concessionem (3), denique omnem conditionem, per quam res Ecclesiae deterior efficitur (4).

(1) *Tit. nov. 71, et cit. Extravag. Ambitiosae.*

(2) Vetita est locatio rerum ecclesiasticarum ultra triennium, quando ex iis fructus quoque anno percipiuntur. Nam si eae fructus ferant tantum unoquoque biennio, aut triennio, tunc recte per annos sex, aut novem locatio perficitur. Communis haec est Canonistarum sententia, quam praeter ceteros, sequitur Fagnanus in *cap. 5. de Reb. Eccles. alienan. vel non num. 43.*

(3) *Ead. Extravag. Ambitiosae, et cap. 5. de Reb. Eccles. alienan. vel non.* Vide etiam *Const. Humanæ salutis 152. Urbani VIII. in Bullar. t. 5. par. 5. p. 374., ejusdemque decretum editum die 7 Septembris 1624, apud Giraldum par. 1. sect. 451. p. 292., quo sublata sunt privilegia regularium, quibus antea res ecclesiasticas, inscia Sede Apostolica, alienare licebat.*

(4) Vox haec conditionem occurrit in *cit. cap. 6. de Reb. Eccles. alien. et eam tamquam importunam rejiciunt Cujacius, et Antonius Augustinus, quod non intelligant, quae species alienationis conditio sit. Sed recte Innocentius Gironius Paratitl. in Decretal. l. 3. tit. 13. §. 3. pag. 237. ed. Vindobonae 1761., vocem illam retinendam esse ostendit, quoniam conditio est pactum, per quod rei Ecclesiae detrimentum inferri potest.*

§. III. Neque solum res immobiles Ecclesiae, uti praedia rustica, et urbana, alienari nequeunt, sed etiam res mobiles pretiosae, quae servari possunt; integra armenta, gregesque integri, arbores praedio utiles, ac necessariae, jura, actiones, census, cetera, ex quibus annui fructus capiuntur. Verum alienatio valet, si justa de causa, et adhibitis solemnitatibus facta sit. Causa vel est necessitatis, puta aeris alieni dissolvendi, cum ei fructibus satisfieri non possit (1); utilitatis, si Ecclesiae utilis futura sit alienatio, puta si aedes ruinosae in emphytheusim dentur, vel silvestria loca, agrique in

culti colonis permittuntur, aut terrae longe positae cum vicinis commutantur (2); vel demum pietatis, puta si famis tempore alendi pauperes, aut si captivi redimendi sint (3).

(1) *Clement. 1. de Reb. Eccles. non alien.*

(2) *Can. 53. c. 12. quaest. 2. cap. 1. de Rer. permut.*

(3) *Can. 13. et seq. et can. 70. et 71. cap. 12. quæstion. 2.*

§. IV. Solemnitates omnes fere pertinent ad consensum Sedis Apostolicae, a qua causae expendantur, iisque recte cognitis alienatio permittitur (1). Sine consensu Sedis Apostolicae irrita alienatio est; praeterea qui rem distraxerunt, aut qui distractam acceperunt, poena plectuntur excommunicationis, si Episcopi vel Abbates non sint. Nam his Ecclesiae ingressus interdicitur; iidemque, si menses sex in interdicto fuerint, ab omni suspenduntur administratione Ecclesiarum, aut monasteriorum, quibus praefecti sunt. Capitula quoque, et aliae universitates in interdictum incidunt, singuli vero, ex quibus illae universitates constant, privantur jure electionis, et ecclesiasticis officiis, quorum bona alienarunt, atque ab iis, aliisque perpetuo remonentur (2). Quod si post alienationem rite factam Ecclesia grave damnum acceperit, ea, non secus ac minor, beneficium habet in integrum restitutionis (3).

(1) Omnes Episcopi in iurejurando, cujus facta mentio est *lib. 1. tit. 4. sect. 1. §. 2.*, spondere debent se, inconsulto Romano Pontifice non alienaturos suarum Ecclesiarum bona. Aegre ferunt hostes Sedis Apostolicae

hoc juramentum, ejusque originem repetunt a celebri *Extrav. Ambitosae*, quam Paulus II. evulgavit. At si vetustissima, uti demonstratum supra est, regula erat, eaque probata Conciliis, summisque Pontificibus, quod res Ecclesiae alienari non possent, equidem non intelligo, neque intelligere quemquam arbitror, qua in re peccarint Romani Pontifices, cum regulam tam salutarem, tam vetustam, tam probatam, et ubique receptam firmiorem reddere voluerant, imposito Episcopis jurejurando, quo ii nihil se inconsulto Romano Pontifice ecclesiasticorum bonorum alienaturos promitterent. Falsum autem est, quod hujus sacramenti origo ab extravaganti Pauli II. repetenda sit. Nam liber diurnus Pontificum Romanorum a Garnerio illustratus, collectusque saeculo VII. aut initio saeculi VIII., uti ostendit ejus aetatis Codex, quem ipse Garnerius affert in *Praef. n. 10. et 11.*, continet *solemnibus verbis* eandem hanc promissionem, quae se quisvis a Summo Pontifice consecrandus Episcopus obligabat. *Cap. 3. tit. 7. pag. 54. ed. Paris. an. 1680.* Caelestinus III., qui saeculo XII. Pontificatum obtinuit; in *cap. 8. de Reb. Eccles. non alien. memorat Sacramentum fidelitatis*; quo Ravennatensis Archiepiscopus tenebatur *Apostolicae Sedi nihil alienare*. Quam decretalem explanans Glossae Auctor, qui floruit saeculo XIV. testatur quod aetate sua *quilibet Episcopus, qui immediate D. Papae subest, jurat ei fidelitatem, quod non alienabit bona Ecclesiae, neque infeudabit; et idem juramentum praestant alii Episcopi suis Metropolitanis.* Si vero, qui non immediate suberant Romano Pontifici, jusjurandum emittebant ea formula, quam describit Durandus Mimatensis Episcopus, qui vixit in exitu saeculi XIII., uti legitur in exemplari Vaticano, quod laudat Catalanus *Pontif. Roman. tom. 3. §. 9. num. 290.*, eoque jurejurando promittebant perpetuam obedientiam *B. Petro, Sanctaeque Romanae Ecclesiae, et ipsi Summo Pontifici, et Archiepiscopo, cui suberant, spondebantque praeterea, nihil se alienaturos contra jus, vel consuetudinem Ecclesiae, apud Catalanum l. 1. Pontif. tit. 13. pag. 134.* Consule Cl. Mamachiam *del Diritto libero della Chiesa tom. 3. par. 1. c. 1. §. 9. pag. 48. et seq.*

(2) Disputant vero Periti Juris Canonici, num *Extravag. Ambitosae* ubique vigeat, et num etiam in omnibus locis, in quibus viget, obtineant poenae, quae ab ea constitutae sunt. Confer Schmalzgrueber *lib. 3. sect. 444. pag. 288.*

(3) *Cap. 1. de integr. restit.*

§. V. Sunt tamen nonnullae res ecclesiasticae, quarum, etiam sine venia Sedis Apostolicae, permessa alienatio est. Huc spectant ea, quae servando servari, ac retineri non possunt, uti sunt fructus arborum, frumentum, et similia; quae vetusto usu locari, aut in emphytheusim dari consueverunt, quoniam haec finita locatione aut emphytheusi iterum conceduntur iisdem, quibus antea, pactis, et legibus; terrulae, vineolae non fertiles, resque ceterae exigui pretii (1), denique collata in monasterium, aut locum pium, a quo ea retineri nequeunt. Ita legatum Capucinis, aliisque similibus recte distrahitur, modo pretium in Ecclesiae, aut monasterii utilitatem convertatur (2).

(1) *Can. Terrulae cap. 12. qu. 2.*

(2) Consule Fagnanum in c. 5. de *Reb. Eccles. alien. vel non n. 19. et seq.*

§. VI. Pertinet etiam ad alienationem rerum Ecclesiasticarum venditio fructuum beneficiorum, quos aliquis in alium confert vel ad longum tempus, vel quamdiu vivit, accepta pecunia, quae fructus aequet, quos probabile est beneficiarium consequuturum esse. Irrita haec venditio est, et secum fert poenam excommunicationis constitutam adversus omnes, qui res Ecclesiae alienarunt (1). Nec praetereunda

De v. Inst. Can. Tom. II.

locatio bonorum ecclesiasticorum , ex qua in perniciem successoris capiuntur fructus antequam veniat eorum solvendum dies. Locatio haec non obstringit successorem , cui beneficiarius sua illa festinatione fructus praeripere non potest (2).

(1) Benedictus XIV. *Constit. Universalis* 20. ejus *Bullar. tom. 1. p. 41. ed. Rom. seu Ven. 1754.*

(2) Concilium Tridentinum *Sess. 23. cap. 11. de Reform.*

TITULUS XX.

DE BONORUM ECCLESIASTICORUM IMMUNITATE.

- | | |
|--|--|
| I. et II. Unde repetenda
immunitas bonorum ec-
clesiasticorum? | ecclesiasticis. |
| III. Poena imponentis, et
solventis tributa ex bonis | IV. Onera infixæ bonis ec-
clesiasticis, et bona patri-
monialia clericorum. |

§. I.

Ecclésiastica bona sunt, quæ ad Ecclesiam per-
tinent, et quorum redditus in sacris alendis ministris,
atque in sustentandis pauperibus impendendi sunt.
Bona hæc ad Ecclesiam pertinere dicuntur, quod
ipsa eorum habet administrationem atque custodiam;
sed revera propria sunt Dei, ideoque in hominum
commercio versari non possunt (1). Inde repetenda
est eorum immunitas a tributis, et vectigalibus,
quæ a laicis imponuntur; atque hæc immunitas
non hominum privilegio data, sed ex ipsa eorum
natura in bonis ecclesiasticis penitus affixa, atque
insita est (2). Si quando Christus, cum inter ho-
mines versaretur, tributum solvit (3), id quidem
fecit voluntate, et arbitrio suo, ut omnem scandali
causam removeret (4), non quod aliqua humana ad
solvendum lege cogi posset (5); neque vero solvi
voluit ex loculis, in quibus erat patrimonium pau-
perum, et Apostolorum (6).

(1) Adeundi sunt S. Gregorius Nazianzenus *Epist.* 8. pag. 833. *seq. opp. tom. 1. ed. Colon.* 1690. et S. Ambrosius de *Poenitent. lib. 2. cap. 8. num. 75. pag. 549.*, et *Ep. 20. ad soror. num. 8. pag. 903. opp. tom. 3. ed. Venet. cit.*

(2) Consule Thomassinum *Vel. et nov. Eccles. disciplin. par. 3. lib. 1. cap. 33. num. 13. et Cl. Mamachium del Diritto libero della Chiesa di acquistare, e possedere beni temporali, lib. 2. par. 1. cap. 1. p. 212. seq. et lib. 2. par. 2. cap. 3. p. 93. seqq.*

(3) Matthaeus XVII. 23.

(4) S. Hilarius in *Matth. cap. 17. num. 11. p. 696. ed. Paris. 1693.* S. Joannes Chrysostomus *Homil. 53. in Matth. num. 2. pag. 585. tom. 7.*, S. Ambrosius *Ep. 7. num. 12. 13. 18. p. 81. seq. opp. tom. 3.*, S. Augustinus *Enarrat. in psalm. 137. num. 16. col. 1533. opp. tom. 4.* S. Hieronymus in *Matth. lib. 3. cap. 17. col. 136. opp. tom. 7. ed. Veron.*

(5) Hinc merito ab Joanne XXIII. damnatus est error Marsilii Patavini, et Janduni agentium, Christum, cum staterem ex piscis ore sumptum tributum loco solvit iis, qui petebant didrachma, hoc fecisse non condescensione, et liberalitate suae pietatis, sed necessitate coactum, apud Raynaldum ad an. 1327. num. 19. p. 343. tom. 5. ed. Lucae.

(6) Matthaeus cit. cap. 1. v. 23. *seq. ita rem narrat: Accesserunt, qui didrachma accipiebant, ad Petrum, et dixerunt ei: Magister vester non solvit didrachma? Ait etiam: et cum intrasset in domum praevenit eum Jesus dicens: Quid tibi videtur, Simon? Reges terrae a quibus accipiunt tributum, vel censum? A filiis suis? An ab alienis? Et ille dixit: ab alienis. Dixit illi Jesus: Ergo liberi sunt filii: ut autem non scandalizemus eos, vade ad mare, et mitte hamum, et eum piscem, qui primus ascenderit, tolle, et aperto ore ejus, invenies staterem, illum sume, da eis pro me et te. Quo ex loco colligunt Patres, Christum se tributum lege solutum declarasse, id tamen solvisse arbitrio suo, ne publicanos scandalizaret, praeterea non ex loculis, sed ex statere in ore piscis invento tributum pendi voluisse, ut ostenderet, tributum onere non teneri loculos, in quibus pauperum, et Apostolorum patrimonium con-*

sistebat. Ita S. Hieronymus lib. 3. in Matt. cap. 17. col. 136. tom. 7. ed. cit., S. Agobardus de *Dispensat. eccles. cap. 19 pag. 287. et seq. opp. t. 1. ed. Paris. 1666.*, S. Thomas in *summa* 2. 2. *quaest.* 188. *art.* 7. Van-Espenius, cujus in figendis epochis temporum magna semper confidentia, et insignis, ut plurimum, fallacia, atque inscitia est, ita rem narrat in *Jur. Eccles. univers. par. 2. tit. 35. num. 51.*, quasi Agobardus primus animadverterit, quod Christus ex localis tributum pendere noluit, ut ostenderet, nihil ex pauperum, Sacerdotumque ministrorum patrimonio esse detrahendum. Sed errat vehementer. Nam Hieronymus, qui ante quadringentos, eoque amplius, annos, quam Agobardus floreret, vitae usura fruebatur, hoc ipsum animadverit, et ejus loc. cit. verba sunt haec: *Quod si quis objicere voluerit, et quomodo Judas in oculis portabat pecuniam? Respondebimus: rem pauperum (Christus) in usus suos convertere nefas putavit, nobisque idem tribuit exemplum.*

§. II. Privilegium referri potest ad bona patrimonialia clericorum; sed hoc privilegium naturali aequitate nititur, non ex mera hominum voluntate arbitrioque processit. Nam in civitate gratiosos esse decet, qui curam, et sollicitudinem habent rerum spiritualium, et omnino aequum est, ut quae illi sustinent, propter sacrum officium, et ministerium, onera, compensatione immunitatis a tributis, et vectigalibus alleventur (1). His e fontibus hausta est immunitas honorum clericorum, et his fundamentis nituntur leges, quibus eadem probata est.

(1) S. Thomas *Lect. 1. in Ep. ad Roman. c. 13.* ab hoc, inquit, debito, solvendi tributa, liberi sunt clerici ex privilegio Principum. Quod quidem aequitatem naturalem habet. Hoc autem ideo aequum est, quia sicut reges sollicitudinem habent de bono publico in bo-

nis temporalibus, illa ministri Dei in spiritualibus: et sic per hoc quod Deo in spiritualibus ministrant, recompensant Regi, quod pro eorum pace laborant.

§. III. Quare Ecclesiarum, et Clericorum bona non subsunt tributis, et vectigalibus laicorum, sacrisque interdicitur ille, qui his oneribus sine venia Summi Pontificis, ea bona subjicit (1). Imo ne a sponte quidem pecuniam dantibus pro tributis, et vectigalibus accipere fas est, quique hanc pecuniam sponte dederunt, et qui acceperunt pari anathematis plectuntur poena (2).

(1) *Can. 4. et 7. de Immunit. Eccles.*

(2) *Cap. 3. eod. in 6.* Sed poenam a Bonifacio VIII. constitutam in cit. *Cap. 3. Benedictus XI. in Extrav. unic. de Immunit. Eccles. in Commun.*, tantam habere locum voluit adversus laicos, qui a clericis pecuniam exigent, non qui a sponte dantibus acciperent. Clemens autem V. in *Clem. unic. eod. tit.* Bonifacii constitutionem abrogavit, legemque dixit, ut in ea re Lateranensia decreta comprehensa in tom. 4. et 7. de *Immun. Eccl.* observarentur. Verum Leo X. in Concilio Lateranensi V. Bonifacii constitutionem integravit, poenamque excommunicationis obtinere voluit contra omnes, qui onera patrimonialia ecclesiasticis imponerent, quique eadem exigent, aut etiam a sponte dantibus acciperent, uti patet ex *Const. Super.* edita die 5. Mali §. 40. Hodie igitur haec Leonis constitutio, et quae legi solet in die Coenae Domini observanda est: quas quidem constitutiones una cum ceteris Conciliorum decretis, quae ad ecclesiasticam immunitatem pertinent, ab omnibus diligenter observari jubet Concilium Tridentinum *Sess. 26. cap. 25. de Reform.*

§. IV. Sed onera, quae bonis inhaerent, etiam ab Ecclesiis pendeunda sunt (1); modo ex iis bonis Ecclesia fundata, et constituta non sit (2), et


modo perpetuum esset , rei que infixum onus, antequam eadem ad Ecclesiam pervenirent (3). Ecclesiarum bonis æquantur bona monasteriorum, hospitalium, similium, itemque bona in quibus sacrum clerici patrimonium est constitutum; nam hæc similiter insitum habent in se privilegium immunitatis, cujus gratia laicorum tributis, et oneribus non subjiciuntur; cetera vero patrimonialia bona clericorum non eodem omnino censentur jure, quo bona Ecclesiarum, sed iis tantum gaudent privilegiis, quæ nominatim in jure expressa sunt.

(1) *Can. 22. cap. 23. qu. 8. cap. 5. de Pignor., c. 33. de Decim.* Itaque a cunctis tributis, etiam quæ erant imposita, antequam res ad Ecclesiam perveniret, immunis est situs Ecclesiae, ac coemeterii pro sepulturis, hortus juxta Ecclesiam positus, et similia. *Can. 34. cap. 23. qu. 8.* Adeundus Fagnanus in *c. Non minus 4. num. 8. et seu de Immun. Eccles.*

(2) Consule Fagnanum in *cit. cap. Non minus*, et Giraldum *Exposit. Juris Pontific. par. 1. lib. 3. tit. 49. sect. 634. tom. 1. pag. 460. seq.* ubi cuncta fere habes, quæ ad realem clericorum immunitatem pertinent.

(3) Vide Fagnanum in *Cap. Episcopus 4. de Præben. et dignit. nom. 35. et seq.*, et Giraldum *l. c.*

FINIS LIBRI SECUNDI.



RECENSIO

TITULORUM, ET SECTIONUM

TOMI II.

LIBER II.

TITULUS I.

De rerum divisione. *pag.* 3

TITULUS II.

De Sacramentis. 5

SECTIO I.	De Baptismo.	29
SECT. II.	De Confirmatione.	70
SECT. III.	De Eucharistia.	79
SECT. IV.	De Poenitentia.	129
SECT. V.	De Extrema Unctione.	161
SECT. VI.	De Ordine.	171
SECT. VII.	De Matrimonio.	175
SECT. VIII.	De Sponsalibus.	185
SECT. IX.	De Matrimonii impedimentis.	192
SECT. X.	De Impedimentis impediens.	241
SECT. XI.	De Divortis.	244

TITULUS III.

De Indulgentiis, et Remissionibus. 250

TITULUS IV.

De Divino Officio.	259
--------------------	-----

TITULUS V.

De Festorum Celebratione.	273
---------------------------	-----

TITULUS VI.

De Jejniis.	284
-------------	-----

TITULUS VII.

De Rebus Sacris, et primum de Ecclesiis.	299
SECT. I. De consecrandis, et reconciliandis Ecclesiis.	322
SECT. II. De Immunitate Ecclesiarum.	326
SECT. III. De Capellis et Oratoriis.	339
SECT. IV. De sacris vestibibus, vasis, ceteris ad Ecclesiam pertinentibus.	342

TITULUS VIII.

De Reliquiis, et Veneratione Sanctorum.	349
---	-----

TITULUS IX.

De Sepultaris.	354
----------------	-----

TITULUS X.

De Monasteriis.	366
-----------------	-----

TITULUS XI.

De Seminariis Clericorum.	373
---------------------------	-----

TITULUS XII.

De Hospitalibus.	379
------------------	-----

TITULUS XIII.

De Rebus Temporalibus Ecclesiae.	382
----------------------------------	-----

TITULUS XIV.

De Praebendis, et Beneficiis.	387
SECT. I. De vetita beneficiorum multitudine.	393
SECT. II. De coniungendis, ac dividendis beneficiis.	398
SECT. III. De Commendis beneficiorum.	402
SECT. IV. De Pensionibus Ecclesiasticis.	408
SECT. V. De adipiscenda beneficiorum possessione.	413

TITULUS XV.

De Censibus, Exactionibus, et Procurationibus.	416
--	-----

TITULUS XVI.

De Decimis.	425
-------------	-----

TITULUS XVII.

De Primitiis, Oblationibus, ceterisque temporalibus bonis Clericorum.	436
---	-----

TITULUS XVIII.

De Peculio Clericorum.	447
------------------------	-----

TITULUS XIX.

De Rebus Ecclesiae non alienandis.	450
------------------------------------	-----

TITULUS XX.

De Immunitate bonorum Ecclesiasticorum.	459
---	-----

Finis Indicis.

ADDITAMENTA

EORUM QUÆ AUCTORITATE

SUMMORUM PONTIFICUM

IN NEAPOLITANO REGNO VIGENT.

INDEX

ADDITIONUM EORUM QUÆ AUCTORITATE
SUMMORUM PONTIFICUM
IN NEAPOLITANO REGNO VIGENT.

CONSTITUTIO Benedicti XIV de dogmatibus
et ritibus ab Italo-Graecis tenendis atque
servandis. Pag.

Risoluzione di alcuni dubbii proposti alla
Commissione de' Vescovi preseduta dal Nun-
zio Apostolico. » LXIII

] o i s h a l F r i q s t d l i f i q u p o e n e r

Addenda ad pag. 28. (2) §. XX. tit. II.

*Constitutio Benedicti XIV de dogmatibus et ritibus
ab Italo-Graecis tenendis, atque servandis.*

BENEDICTUS EPISCOPUS

SERVUS SERVORUM DEI

AD PERPETUAM REI MEMORIAM.

Proemium.

Etsi pastoralis Romani Pontificis vigilantia ad omnes Christi fideles longissimis etiam locorum intervallis distantes, ac vitae, et rituum, et linguarum genere inter se maxime differentes, paternam charitatem sese extendat, omnemque curam ac studium adhibeat, ut ubique terrarum Catholicae Fidei integritas, Ecclesiae disciplinae nitor, probitasque morum sarta tecta servantur; majoribus tamen Pontificiae sollicitudinis studiis in eos intendit, qui in ditione Ecclesiastica, et in reliquis Italiae partibus, ejusque insulis adjacentibus, sive orti, sive aliunde advecti incolae commorantur. Cum itaque factum sit, ut grassantibus jamdudum per totum Orientem, tum barbaram infidelium immanitate, tum etiam schismaticorum perfidia, plurimi ex Graecia, Epiro, Albania, aliisque Asiae regionibus, ad Italiam, eique adjacentes insulas, tamquam ad Fidei, et tranquillitatis portum confugientes, ibidem sedes, ac domicilium collocaverint, et tam ipsi, quam eorum filii, Graecorum mores, instituta, ritus, atque consuetudines a Graecis progenitoribus sibi traditas studiose, enixeque servare pergant, ita tamen ut debitam

Romanae Ecclesiae obedientiam , ac devotionem omnino profiteantur ; hinc est , quod nos , qui inefabili Dei clementia , meritis licet imparibus , ejus vicem gerimus in terris , apud quem non est Graecus et Judaeus , Barbarus et Scythia (omnes enim unum sunt in Christo Jesu) , Graecos , et Albanenses graeci ritus , tam in ditione nostra ecclesiastica , et utraque Sicilia , quam in reliquis Italiae partibus , et insulis adjacentibus , in Dioecesi latinorum Episcoporum commorantes , specialibus favoribus , et gratiis prosequi volentes , omnia , et singula , quae laudabiliter provida Romanorum Pontificum praedecessorum nostrorum ordinatione Graecis , et Albanensibus praedictis , tum quoad rituum Graecorum , sive consuetudinum observantiam , tum quoad privilegia immunitatis , exemptiones , favores , indulta , et gratias , concessa , statuta , ordinata , indulta , et facta dignoscuntur , ut plenior rem roboris firmitatem obtineant , eoque firmitus , et stabilius illibata inconcussaue perdurent , quo saepius sunt in genere , et specie Sedis Apostolicae praesidio communita , per praesentes nostras literas innovamus , confirmamus , et approbamus , illisque nostrae approbationis , confirmationis , et innovationis robur adjicimus , ut iisdem privilegiis , immunitatibus , exemptionibus , indultis , gratiis , favoribus , perinde ac Clerici latini , tam saeculares , quam regulares , eorumque Ecclesiae , monasteria , et bona in iisdem locis , ubi Italo Graeci commorantur , utuntur , potiuntur et gaudent , uti , potiri , et gaudere libere possint , ac valeant ; ut privilegiis , et gratiis hujusmodi sibi concessis in Domino plene gaudentes , in tranquillitate pacis conquiescant , et per semitam mandatorum Dei gradientes , ferventiori erga Apostolicam Sedem devotione perseverent.

*Confirmatio, et innovatio Constitutionum
Apostolicarum quoad Italo-Graecos.*

Quoniam vero pro diversis rerum, ac temporum circumstantiis plures, ac diversae editae fuerunt ab iisdem praedecessoribus nostris Romanis Pontificibus, et a nonnullis venerabilium fratrum nostrorum Sanctae R. E. Cardinalium congregationibus circa eosdem Graecos, et Albanenses, eorumque ritus, consuetudines, instituta, debitamque latinis Praesulibus, in quorum Dioecesi degunt, subjectionem, Apostolicae Constitutiones, ordinationes, responsa, edicta, et decreta; eamque ob causam tam de ritibus ipsorum Graecorum, Albanensium, quam de eorumdem Sacerdotum potestate, et latinorum etiam Praesulum, atque Parochorum jurisdictione, et auctoritate saepe obortae sunt, et oboriri solent, quaestiones, et controversiae; Nos pro nostra Pastoralis officii sollicitudine, quantum in Nobis est, hisce malis opportunum remedium adhibere, causasque omnes litium, iurgiorum, dissidiorum, contentionum, quaestionum, et controversiarum amputare, certamque super rebus huiusmodi tum praefatis Graecis, et Albanensibus graeci ritus, tum latinis Episcopis, et Parochis regulam, normam, et instructionem, cui potissimum sese in posterum conformare, et in singulis occurrentibus dubiis, et casibus inhaerere debeant, tradere cupientes; omnia, et quaecumque per eosdem Romanos Pontifices, praedecessores nostros, ac praesertim Inn. IV, Leon. X, Clement. VII, Paul. III, Julium etiam III, Pium IV, et V, Gregorium XIII, Clement. VIII, et forsitan alios Romanos Pontifices circa memoratos Graecos, et Albanenses, eorumque ritus,

et consuetudines ordinata, et constituta fuisse comperimus, ut quo saepius fideles ipsi illa perspiciant innovari, eo ferventius, ac promptius ad illorum observantiam excitentur, in aliis omnibus, praeterquam in iis, quae praesentibus nostris adversantur, confirmanda, et innovanda, nostraeque auctoritatis munimine roboranda esse censemus, et confirmamus, atque innovamus, aliaque insuper motu proprio, et ex certa scientia, maturaque deliberatione nostra, ac de Apostolicae potestatis plenitudine, hac nostra perpetuo valitura sanctione, et constitutione disponimus, constituimus, ordinamus, decernimus, et declaramus, prout in Domino conspiciamus expedire.

§. I.

De Fide Catholica.

Ac primo quidem cum Catholica Fides sit ejusmodi, ut nisi eam quisque integram inviolatamque servaverit, salvus esse non possit, quaecumque credit, ac docet Sacrosancta R. Ecclesia, ac omnia, et singula iidem Graeci, et Albanenses graeci ritus integre, firmiter, indubitanterque credere, atque affirmare tenentur; prout in sacra OEcumenica Synodo Florentina super unione Occidentalis, et Orientalis Ecclesiae, definitum, et declaratum fuit, et in professione orthodoxae Fidei a Graecis jussu Gregorii Papae XIII praedecessoris nostri emittenda continetur, videlicet.

I. De processione Spiritus Sancti ex Patre, Filioque.

Quod Spiritus Sanctus a Patre, et Filio aeternaliter est, et essentiam suam, suumque esse

subsistens habet ex Patre simul, et Filio, et ex utroque aeternaliter tamquam ab uno principio, et unica inspiratione procedit: et quod ea verborum illorum, *Filioque*, explicatio, veritatis declarandae gratia, et imminente tunc necessitate, licite, ac rationabiliter symbolo fuit apposita. Etsi autem Graeci teneantur credere, etiam a Filio Spiritum Sanctum procedere, non tamen tenentur in symbolo pronuntiare; contraria tamen consuetudo ab Albanensibus graeci ritus laudabiliter recepta est, quam ab iisdem Albanensibus, aliisque, quibuscumque in Ecclesiis, ubi ea viget, servari volumus; quin etiam a graecis Presbyteris aliarum quarumcumque regionum commorantibus in Italia, ejusque insulis adjacentibus, si ab Ordinariis locorum, vel ob suspicionem haeresis, vel ob scandalum, vel ob aliam justam causam requisiti fuerint, particulam illam, *Filioque*, in symbolo pronuntiari praecipimus, ac mandamus.

II. De azymo, et fermentato.

Item profiteri tenentur tam in azymo, quam in fermentato pane triticeo Corpus Christi veraciter confici: et Sacerdotes in alterutro ipsum Domini Corpus conficere debere, unumquemque scilicet juxta suae Ecclesiae sive Occidentalis, sive Orientalis consuetudinem.

III. De Purgatorio.

Item si vere poenitentes in Dei charitate decesserint, antequam dignis poenitentiae fructibus de commissis, et omissis satisfecerint, eorum animas poenis Purgatorii post mortem purgari: et ut a poenis ejusmodi releventur, prodesse eis

X

fidelium vivorum suffragia , Missarum scilicet sacrificia , orationes , et eleemosynas , et alia pietatis officia , quae a fidelibus pro aliis fidelibus fieri consueverunt secundum Ecclesiae instituta.

IV. De visione beatifica Sanctorum.

Illorumque animas , qui post Baptisma susceptum , nullam omnino peccati maculam incurrerunt , tum illas etiam quae post contracti peccati maculam , vel in suis corporibus vel eisdem exutae corporibus , prout superius dictum est , sint purgatae , in Caelum mox recipi , et intueri clare ipsum Deum Trinum , et Unum , sicuti est , pro diversa tamen meritorum ratione , aliam alia perfectius.

V. De animabus in peccato actuali mortali , vel originali decedentibus.

Illorum autem animas , qui in actuali mortali peccato , vel solo originali decedunt , mox in infernum descendere , poenis tamen disparibus puniendas.

VI. De Romani Pontificis primatu.

Item S. Apostolicam sedem , et Romanum Pontificem in universum orbem tenere primatum , et ipsum Pontificem Romanum successorem esse B. Principis Apostolorum , et verum Christi Vicarium , totiusque Ecclesiae caput , et omnium Christianorum patrem , et doctorem existere , et ipsi in B. Petro pascendi , regendi , et gubernandi universalem Ecclesiam a Domino N. Jesu Chr. plenam potestatem traditam esse , quemadmodum etiam in actis OEcumenicorum Conciliorum , et in sacris Canonibus continetur.

VII. De recipiendis, et rejiciendis caeteris, quaecumque recipit, et rejicit Sancta Romana Ecclesia.

Caetera item omnia, quae a sacris Canonibus, et OEcumenicis Conciliis, ac praecipue a Sacrosancta Tridentina Synodo, et a Greg. XIII praedecessore nostro in professione praedicta orthodoxae Fidei a Graecis emittenda, tradita, definita, et declarata fuerunt, indubitanter recipere, ac profiteri debent, simulque contraria omnia, et schismata, atque haereses quascumque a Sancta Catholica, et Apostolica Ecclesia Romana omnium Ecclesiarum Matre, et Magistra damnatas, rejectas, anathematizatas, pariter damnare, rejicere, anathematizare, et abjurare omnino tenentur.

§. II.

De Sacramento Baptismi, pueris baptizatis, ritusque in baptismate suscepti mutatione.

I. Sacramenti Confirmationis collatio, quae in Euchologio Graecorum post Baptismum praescribitur, a graecis Presbyteris est praetermittenda.

Presbyteri graeci baptizatos Chrismate in fronte ne consignent; et ideo ab ipsis in ordine Baptismi apud eorum Euchologium praetermittantur, quae sequuntur post illa verba: καὶ μετὰ τὴν εὐχὴν etc. usque ibi εἶτα ποιεῖ ὁ ἱερεὺς σχῆμα κύκλου hoc est: et post orationem etc. ubi habetur forma hujusmodi consignationis, usque ad illa: postea facit Sacerdos figuram circuli etc.

II. Non sunt inquietandi Presbyteri graeci quoad Sacramentum Baptismi.

Cum Presbyteris graecis in Euchologio haec Baptismi forma praescribatur: *baptizatur servus Dei N. in nomine Patris, et Filii, et Spiritus Sancti*, quae Latinae formae: *Ego te baptizo in nomine etc.* aequivalet: trinaque aquae immersione seu aspersione in eo conferendo utantur, non sunt his super rebus a latinis locorum Ordinariis inquietandi.

III. In unctionibus, quae circa Baptisma fiunt, ritum suum in Euchologio descriptum sequi permittuntur.

Etsi Graecis in regno Cypri commorantibus Inn. IV praedecessor noster olim injunxerit, ut in unctionibus, quae circa Baptisma fiunt, morem Ecclesiae Romanae teneant, et observent; si tamen Presbyteri albanenses ritum ungendi pectus, et dorsi medium, aures, pedes, atque manus in Euchologio descriptum servare voluerint, ubi non est contraria consuetudo, non sunt impediendi.

IV. Toleratur ritus ungendi per totum baptizandorum corpora, si tolli sine scandalo non possit.

Ritus autem, seu consuetudo, quam habere dicuntur Graeci orientales, ungendi per totum baptizandorum corpora, si alicubi tolli, vel removeri sine scandalo non potest, cum sive fiat, sive non, quantum ad Baptismi efficaciam, vel effectum non multum referat, in iisdem toleretur.

*V. Nec refert utrum frigida, vel calida
aqua baptizent.*

Nec refert etiam, utrum frigida, vel calida aqua baptizent, cum in utraque Baptismum habere parem vim, atque effectum affirmare, et tenere dicantur.

*VI. Graeci Parochi rite Baptismum conferunt aqua
per ipsos graeco more benedicta.*

Si in eadem Ecclesia infantes utriusque ritus baptizentur, graecus Parochus subditis suis aqua per ipsum graeco more benedicta rite Baptismum confert; ac propterea molestandus non est, si non utatur aqua baptismali, quae a Parochis latinis juxta morem Romanae Ecclesiae adhibetur. Curent tamen Ordinarii, ut adsit aqua baptismalis latine consecrata, quam omnino (praeter casum urgentis necessitatis) Sacerdos latinus adhibeat, quoties ei occurrerit latinos pueros ad Baptismum excipere.

VII. Prohibentur Graeci ne infantibus in Baptismo, nec pueris in Missa Sacramentum Eucharistiae ministrent.

Cum administratio Sacramenti Eucharistiae, quod sub una, vel sub utraque specie infantibus in Baptismo, et pueris in Missa solent Graeci exhibere, nihil contra orthodoxam Fidem, bonosque mores contineat (dummodo iidem Graeci credant, firmiterque teneant communionem hujusmodi non esse necessariam ad salutem, et Baptismum sine communione valide, ac licite posse ministrari); quia tamen ad decentiam: et reverentiam Sacra-

menti magis expedit, si illud eisdem denegetur : propterea ne Graeci, vel Albanenses graeci ritus Eucharistiae Sacramentum sub una, vel sub utraque specie infantibus rationis usu carentibus in Baptismo, nec pueris in Missa ministrent, interdiciamus, ac prohibemus.

VIII. Proles parente utroque graeco progenita graeco ritu baptizetur.

Infantes nati ex Patre, et Matre graecis ritu graeco, nisi aliter parentes accedente Ordinarii consensu voluerint, baptizari debent.

IX. Latine baptizetur infans ex Patre latino, et Matre graeca natus.

Nati vero ex Patre latino, et Matre graeca, latinis sunt caeremoniis baptizandi, proles enim sequi omnino debet Patris ritum, si sit latinus.

X. Ex Patre autem graeco, latina Matre natus, latine Baptismum suscipere potest, si latina uxor praevaluerit.

Si vero Pater sit graecus, et Mater latina, liberum erit eidem Patri, ut proles, vel ritu graeco baptizetur, vel etiam ritu latino, si uxor latina praevaluerit, idest si in gratiam uxoris latinae consenserit graecus Pater, ut latino ritu baptizetur.

XI. Infantes ad ejus Parochi jurisdictionem spectant, et ab eo sunt sepeliendi, si ante usum rationis decesserint, cujus ritu sunt baptizati, sive graeco, sive latino: et quid post usum rationis.

Infantes ad ejus Parochi jurisdictionem perti-

nent, cujus ritu sunt baptizati, cum per Baptismum fiat suscepti ritus graeci, vel latini professio, ita ut ad latinum ritum spectent, qui latinis caeremoniis baptizati fuerint; qui vero ritu graeco Sacramentum Baptismi susceperint, in Graecorum numero sunt habendi, adeoque si ante usum rationis decesserint, a proprio cujus ritu baptizati sunt, Parocho, et in propria Parochia sunt jure communi sepeliendi, nisi iis Baptismus collatus fuerit, vel ob gravem necessitatem, cum nimirum morti proximi fuerint, nec haberi potuerit proprii Parochi, vel ritus copia; vel ex dispensatione Apostolica, cum videlicet facultas data fuerit, ut latine quidem baptizentur, sed in suo ritu graeco permaneant; in his enim casibus non censetur a proprio ad alium ritum transiisse. Post usum autem rationis idem dicendum, nisi quis in alieni ritus Ecclesia sepeliri cupiat; si quis enim graeco ritu baptizatus in Latina Ecclesia, vel latine baptismate initiatus, in Ecclesia Graeca sepulturam eligat, juris regulae sunt servandae: nimirum cadaver extra propriam Parochiam a proprio Parocho esse associandum, quarta funerali ei minime imminuta; et ubi tumultandum est cadaver, ibi a Parocho illius Ecclesiae, sive Latinae, sive Graecae, sunt exequiae celebrandae.

XII. Cum infantibus, sive adultis, ritu graeco in Ecclesia graeca sunt exequiae celebrandae nullum jus est latino Parocho interessendi, aut partem stolae percipiendi, et contra.

Quando vero infantibus praedictis, seu etiam adultis, exequiae ritu graeco, et in Ecclesia graeca, ut praesertur, jure communi sunt celebrandae, tunc nullum jus habet latinus Parochus in-

teressendi cum graeco Parocho, nec partem aliquam stolae percipiendi; similiter nullum jus competit Parocho graeco, quando exequiae in Ecclesia latina; et per latinum Parochum sunt peragendae, sed servanda sunt utrobique statuta de juribus Parochorum circa sepulturam eorum, qui ad propriam Parochiam spectant.

XIII. In quo quis ritu est baptizatus, in eo educari, et vivere debet: ritus latinus semel assumptus deserere nequit.

Quem ritum semel in Baptisma sunt professi, sive latinum, sive graecum, in eo institui, et educari debent, nec ad alium possunt transire, si latinum semel susceperint; ritus enim latinus propter suam praestantiam, eo quod sit ritus S. Romanae Ecclesiae omnium Ecclesiarum Matris, et Magistrae, sic super graecum ritum praevallet, maxime in Italicis regionibus, ubi latinis Episcopis Graeci subjecti sunt, ut non modo ab ipso ad graecum transitus nullatenus permittatur; verum etiam a Graecis semel assumptus, absque Apostolica dispensatione deserere nequeat.

XIV. Quando de ritu graeco ad latinum transire liceat.

Quod si infans graecum ritum in baptismo susceperit, tunc requirendus est: primum Patris graeci consensus, deinde Episcopi latini licentia, ut possit Mater latina filium suum graece baptizatum ad latinas caeremonias traducere. Adultis autem, si quidem sunt Ecclesiastici, in quocumque ordine minori, vel etiam majori constituti, saeculares, vel regulares a ritu graeco ad latinum

sine expressa Sedis Apostolicae licentia transire non liceat : si Laici , ut ad ritum latinum transire possint ; Episcopus dioecesanus pro sua prudentia permittere valeat. Non tamen communitati Graecorum , sive Albanensium hujusmodi , sine Sedis Apostolicae licentia , sed solum privatis personis , attenta uniuscujusque necessitate.

§. III.

De Sacramento Confirmationis.

I. Episcopi latini infantes a graecis Presbyteris baptizatos , et absolute Chrismate consignatos confirmant.

Episcopi latini infantes , seu alios in suis Dioecesibus baptizatos a Presbyteris graecis absolute Chrismate in fronte consignatos confirmant , cum neque per Praedecessores nostros , neque per Nos graecis Presbyteris in Italia , et insulis adjacentibus , ut infantibus baptizatis Sacramentum Confirmationis conferant , facultas concessa sit , aut concedatur ; quin imo usque ab anno 1595 a sel. rec. Clement. VIII Praedecessore nostro fuit Presbyteris italo-graecis expresse interdictum , ne baptizatos Chrismate consignet.

II. Sub conditione autem , si verosimiliter dubitari potest , quod ab Episcopis graecis fuerint baptizati.

Secus sub conditione , et cum cautela eos confirmare debent , de quibus verosimiliter dubitari potest , utrum ab Episcopis graecis ordinem Baptismi juxta eorum Euchologium servantibus fuerint baptizati.

III. Idem dicendum, si Episcopus latinus ordinet aliquem graecum ab Episcopo graeco baptizatum, de quo non constet fuisse Chrismate consignatum.

Idem dicendum, si Episcopus latinus ex dispensatione Apostolica Graecum aliquem ordinaverit, qui a Presbytero graeco in Italia, vel adjacentibus insulis fuerit baptizatus, nec constet illum ab aliquo Episcopo, sive latino, sive graeco, Chrismate in fronte fuisse consignatum; debet nimirum illum antea absolute confirmare; sub conditione autem, si verosimiliter dubium esse possit an ab Episcopo graeco fuerit baptizatus.

IV. Confirmati a simplice sacerdote, cogendi non sunt recipere ab Episcopo Confirmationis Sacramentum.

Quamvis confirmati a simplice Sacerdote, cogendi non sunt ejusmodi Confirmationis Sacramentum ab Episcopo suscipere, si ex tali coactione scandala oriri possint: cum Sacramentum Confirmationis ejusmodi necessitatem non habeat, ut sine eo salvus quis esse non possit; monendi tamen sunt ab Ordinariis locorum, eos gravis peccati reatu teneri, si cum possunt ad confirmationem accedere, illum renuunt, ac negligunt.

V. Ubi graecus catholicus Episcopus habetur, Sacramentum Confirmationis Episcopi latini non administrent.

Ubi graecus catholicus Episcopus haberi potest, prout habetur constitutus in Collegio Corsino Italo-Graecorum in Calabria, curent omnino latini Ordinarii, ut ab illo potius graecis caeremoniis

juxta graecum Euchologium , quam a se latino ritu Sacramentum Confirmationis subditis suis graeco ritu viventibus , Chrismate a latinis Episcopis accepto , ministretur , ne scilicet Ecclesiarum ritus , quoad fieri potest , misceantur.

§. IV.

De Oleo Sancto Chriftatis , Catechumenorum ,
et infirmorum.

I. Non sunt cogendi Presbyteri graeci , praeter Chrisma , alia Olea Sancta ab Episcopo latino accipere.

Non sunt cogendi Presbyteri graeci Olea Sancta , praeter Chrisma , ab Episcopis latinis dioecesanis accipere , cum hujusmodi olea ab eis in ipsa oleorum , et Sacramentorum exhibitione , ex veteri ritu , conficiantur , seu benedicantur , nisi tamen contraria consuetudo introducta sit , quam servari volumus , ac mandamus. Chrisma autem , quod non nisi ab Episcopo , etiam juxta eorum ritum , benedici potest , cogantur accipere.

II. Prohibentur Chrisma accipere ab Episcopis schismaticis.

Non audeant tamen ab Episcopis graecis externis schismaticis , seu S. Romanae Ecclesiae communionem non habentibus , illud accipere , vel eo uti.

III. Item a quocumque alio Episcopo , etiam catholico , praeter Ordinarium latinum.

Item abstineant Chrisma accipere a quocum-

que alio Episcopo latino , seu graeco catholico , praeter suum Ordinarium latinum , cujus jurisdictioni subjiciuntur.

§. V.

De Sacramentis Poenitentiae , et extremae unctionis.

I. Unctio non est sufficiens satisfactio poenitentiae.

Nulli per Sacerdotes , vel Confessarios , pro satisfactione poenitentiae unctio aliqua solummodo injungatur.

II. Extrema unctio infirmis exhibenda.

Infirmis vero , juxta verbum Jacobi Apostoli , unctio exhibeatur extrema.

III. Per unum , vel plures Presbyteros administrari potest.

Nec refert , utrum eadem extrema unctio per unum , vel plures Presbyteros fiat , ubi hujusmodi viget consuetudo ; dummodo credant , et asserant , illud Sacramentum , servata debita materia , et forma ab uno Presbytero valide , et licite confici.

IV. Qui ungit , idem formam proferat Sacramenti.

Idem Sacerdos materiam adhibere , formamque pronunciare respective debet ; ac propterea , qui ungit , idem dicat formam respondentem , nec alius ungat , et alius formam pronuntiet.

*V. Forma absolutionis in Concilio Florentino
praescripta utantur.*

In casu necessitatis Presbyteri graeci catholici possunt Latinos absolvere; utantur tamen forma absolutionis in Concilio Florentino praescripta, postea vero, si voluerint, dicant orationem illam deprecativam, quam pro forma hujusmodi absolutionis dicere tantum consueverunt.

VI. Extra necessitatis casum, prudentiae, et arbitrio Ordinariorum relinquitur, ut Presbyteri albanenses Latinorum etiam confessiones excipere valeant.

Extra vero casum necessitatis, si quos ex Presbyteris albanensibus peritos ad confessiones omnium audiendas idoneos Ordinarius latinus judicaverit, ut non solum Graecos, sed etiam Latinos ad se accedentes possint absolvere, id eorundem Ordinariorum prudentiae, et arbitrio relinquitur.

VII. Sacerdotes conjugati possunt, et curam suscipere Parochiarum, et Parochianorum confessiones audire.

Sacerdotes quoque conjugati, aliique, quibus Parochiarum cura, vel Ecclesiarum Parochialium regimen per Episcopos suos committitur, licite, et libere possint Parochianorum suorum confessiones audire, ipsisque poenitentiam injungere pro peccatis; quia cui licet, vel conceditur, quod est majus, competit quoque, nec negari convenit, quod est minus.

VIII. *Ecclesiarum Parochialium regimini praeficiendi sunt, qui in Seminariis Italo-graecorum, seu Albanensium trium ad minus annorum spatio versati sunt.*

Ecclesiarum Parochialium regimini praeficiant Ordinarii latini, si habere possunt eos, qui in Seminariis Italo-Graecorum erectis, altero quidem Panormi, altero autem in Calabria, in oppido S. Benedicti Ullano, vel in Collegio Graecorum in urbe, trium ad minus annorum spatio versati sunt, studiisque literarum incubuere, dummodo cetera ad curam animarum exercendam requisita non desint, atque Episcopis ejusmodi Seminarii Praesidis, seu respective Rectoris literas exhibeant, quae de recta eorum vitae ratione, deque in graecis, latinisque scientiis progressu testimonium ferant.

IX. *Possunt Ordinarii latini alios Presbyteros idoneos Parochis graecis, velut Coadjutores, et cooperatores adjungere.*

Liberum tamen sit ipsis Episcopis, viros alios idoneos coadjutores, et cooperatores Parochis graecis, si opus fuerit, adjungere in audiendis confessionibus, et poenitentiis injungendis, ac caeteris, quae ad salutem pertinent animarum, ipsisque in his per eorum Dioeceses absque Sacerdotum ipsorum praejudicio, et gravamine, committere vices suas, cum propter occupationes multiplices, et occasiones varias possit contingere, ut nequeant per easdem Dioeceses officium suum exequi per seipsos.

X. Monachis graecis , nisi ex justa causa , non est cura animarum committenda.

Numquam Monachis graecis , seu Calogeris , animarum cura committatur , nisi ex necessitate , vel alia justa causa.

XI. Presbyteri saeculares advenae , abjuratis erroribus , et schismate in Parochos Graecorum institui possunt.

Presbyteri saeculares graeci , ex Albania , vel aliis Orientis partibus advenientes , abjuratis schismate , et erroribus , atque in Fide Catholica bene instructi , in Parochialibus seu Curatis Ecclesiis Graecorum institui possunt.

XII. Vir , et uxor non debent simul confiteri.

Tollendus abusus , ubi est , ut vir , atque uxor simul , et eodem tempore eidem Presbytero confiteantur.

XIII. Aquae benedictae usus.

Aqua ex ritu graeco in die Epiphaniae , vel primo die mensis benedicta , conservetur in Ecclesia , ut illa fideles aspergantur.

§. VI.

De Sacramento Eucharistiae , et Missae
Sacrificio.

I. Sacerdotes ad Sacramentum Poenitentiae frequenter accedant ; cum praesertim Divinum Sacrificium sunt peracturi.

Sacerdotes ad Poenitentiae Sacramentum frequenter accedant , ut cum Divinum Mysterium peracturi sunt , nulli coram Deo crimini sint obnoxii ; sed cor habeant omni pravitate vacuum , mundum , quoad fieri potest , et purum : indignum enim , ac auribus plane horrendum est , ut qui animum habet aliquo scelere foedatum , Sanctum Sanctorum impuris manibus contrectet , et placare Deum attentet , qui in peccatis existens , ipsius Dei furorem , et iracundiam provocat.

II. Permittitur etiam , ut aquam ferventem in calicem infundant.

Item permittitur eisdem , facta jam consecratione , antequam Sacerdos communicet , juxta ritum in Liturgia praescriptum , aquam ferventem seu tepidam in sacrum calicem infundere.

III. Interdicitur abusus tundendi , vel exiccandi species Sacramenti Eucharistiae.

Tollatur abusus tundendi , vel etiam miscendi sacro oleo , ac iterum coquendi , vel alias exiccandi species Sacramenti Sacrae Eucharistiae feria V Coenae Domini , ut deinde illud asservent.

IV. Eucharistia pro infirmis renovanda singulis octo aut quindecim diebus.

Sanctissimum Eucharistiae Sacramentum, quod pro infirmis asservatur, singulis octo diebus, aut saltem quindecim renovetur.

V. Non asservanda toto anno.

Non asservetur idem Sacramentum toto anno; si tamen asservatum fuerit, in fine anni sumatur.

VI. Servandus Graecorum ritus in celebratione Missarum sub certis conditionibus.

In celebratione solemni, et aliarum Missarum, et de hora celebrandi eas, dummodo in confectione, vel consecratione, formam verborum a Domino expressam, et traditam observent; et celebrando non trasgrediantur horam nonam, suam sequi consuetudinem permittantur: ita tamen, ut jejunii lex de unica comestione in die religiose servetur; et si alicubi viget consuetudo producendi jejunium cum Missa usque ad vesperam, minime aboleatur; sed in suo robore, ac firmitate permaneat.

VII. Ne Monachi iter agentes Eucharistiam secum ferant.

Si inter Graecos, qui in Italia, et insulis adjacentibus degunt, viget abusus, quem in orientalibus regionibus vigere perhibent, ut Monachi Eucharistiae particulam suspensam ad collum, vel aliter secum deferant, necnon in privatis domibus,

ubi eos commorari contingat, retineant, ut eo auxilio freti, liberi a quibuscumque periculis evadant; vel cum in longiora itinera se committunt, ea refici valeant; eum omnino aboleri volumus, et expresse mandamus: praefatisque Monachis, ne id in posterum facere audeant, severissime prohibemus. Obsequium enim ac reverentia, qua singuli fideles augustissimum hoc Sacramentum prosequi debent, non patitur, ut privatim, ac latenter, cujuscumque arbitrio et voluntate domi illud retineatur, aut in itineribus, ac peregrinationibus asportetur.

VIII. Permittuntur graeci Presbyteri suum servare ritum, nonnisi semel in die super uno, eodemque Altari Missam celebrandi, et prohibentur Sacerdotes latini in Parochialibus ipsorum Graecorum Ecclesiis Missas, et Divina Officia celebrare.

Cum in Parochialibus Ecclesiis ipsorum Graecorum, ex antiquissimo, et hactenus servato ritu, nonnisi semel in die per unum Sacerdotem celebrare liceat, permittitur quidem Presbyteris graecis suum, si velint, morem hac in parte servare: interdicitur autem latinis Sacerdotibus, ne Missas, et alia Divina Officia in dictis Graecorum Ecclesiis, et super eorum Altaribus majoribus extra casum alicujus necessitatis, et aliorum Altarium, Ecclesiarumque defectus, et nisi ex Parochi graeci consensu, quem nullatenus hujusmodi in casibus negare possit, celebrent.

IX. Conceditur Presbyteris graecis, et albanensibus ut in Ecclesiis suis praeter Altare majus, alia quoque Altaria erigant, in quibus ipsi Graeci, vel Latini Missas celebrare possint.

Quia tamen ipsi graeci, et albanenses Presbyteri Nobis humillime supplicarunt, ut sibi liceat pro Sacerdotum numero plures in die in suis Ecclesiis Missas celebrare: Nos ipsorum precibus annuere volentes, per praesentes nostras concedimus, ac indulgemus, ut in suis Parochialibus, vel aliis Ecclesiis, praeter Altare majus, alia etiam minora Altaria, seu cappellas sacris indumentis Graecorum, seu Latinorum more, ornata, seu ornatas, erigant, in quibus latini, vel graeci Presbyteri respective suo quisque ritu celebrare valeant.

X. Prohibentur Graeci celebrare ritu latino, et Latini ritu graeco.

Cum in Sacro generali Florentino Concilio praescriptum sit, ut unusquisque Sacerdos Eucharistiam juxta Ecclesiae suae ritum, sive latinae, sive graecae in azymo, seu fermentato conficere debeat, vetitumque a Summis Romanis Pontificibus praedecessoribus nostris, ne latinus Sacerdos graeco ritu, aut graecus latino utatur; districtius inhibemus, etiam sub poenis perpetuae suspensionis a Divinis, ne Presbyteri graeci latino more, et latini graeco ritu, sub quovis licentiarum, et facultatum Missas, et alia Divina Officia, Graeci latino more, et Latini graeco ritu celebrandi, ab Apostolica Sede, vel ejus Legatis, ac etiam majori Poenitentiario pro tempore existente obtentaram

praetextu, Missas, aut alia Divina Officia celebrare, vel celebrari facere praesumant.

XI. Prohibet ne latinus Parochus Pyxidem in ciborio cum particulis sub specie fermentati pro communione Graecorum, aut Parochus graecus sub specie azymi, pro communione Latinorum retineant.

Eadem quoque ratione, tam ubi sunt duae Parochiae, latina altera, et altera graeca, quam in una eademque Parochiali Latinorum, vel etiam Graecorum Ecclesia, in qua, ut praemittitur, praeter Altare majus, quod pro solis graecis Sacerdotibus erectum est, minora quoque Altaria pro latinorum Sacerdotum usu extracta conspiciuntur, statuimus, et decernimus, ut neque latinus Parochus Pyxidem in Ciborio cum particulis sub specie fermentati pro communione Graecorum, neque Parochus graecus sub specie azymi pro communione Latinorum, in quocumque Ecclesiae suae Altari retineat; sed unusquisque Sacerdos nonnisi in suo sive graeco, sive latino ritu Eucharistiam fidelibus porrigere debeat.

XII. Praecipit Laicis latinis, ne umquam sub specie fermentati communicent.

Ne Laici autem latini communionem a graecis Presbyteris sub specie fermentati recipiant, prohibemus omnino, et interdicimus.

XIII. Permittit graecis Laicis, ut ubi propriam Parochiam non habent, possint communicare in Ecclesia latina sub specie azymi.

Graecis tamen Laicis permittimus, ut ubi Pa-

rochiam graecam non habent, possint, si velint, in Ecclesia latina Eucharistiam sub specie azymi a latinis Sacerdotibus sumere.

XIV. *Contrariam consuetudinem curent Ordinarii locorum suavissimis modis tollere.*

Quod si in locis, in quibus Graeci, et Latini simul moram trahunt, et sunt utriusque ritus Ecclesiae, Latini quidem in fermentato, et Graeci in azymo Sacram Eucharistiam quandoque sumere soleant; si quidem haec consuetudo sine populi offensione, animorumque commotione removeri non potest, Ordinarii curam suam suavissimis modis impendant, ut Latini semper in azymo, Graeci autem, ubi propriam Parochiam habente, in fermentato communicent.

XV. *Communio sub utraque specie permittitur in illis dumtaxat locis, in quibus hactenus fuit introducta.*

Ut autem iidem Laici graeci Eucharistica sub utraque specie communione refici valeant, permitimus, in illis dumtaxat locis, in quibus ejusmodi ritus introductus est, et ad praesentem usque diem servatur, ac viget: ita tamen, ut sub altera tantum specie totum, atque integrum Christum, verumque Sacramentum sumi firmiter credant, ac propterea, quoad fructum attinet, nulla gratia ad salutem necessaria eos fraudari, qui unam solam speciem accipiunt: ubi vero praefatus ritus consuetudine hactenus receptus non est, Episcopis, quorum jurisdictioni Graeci subjiciuntur, curae sit, ne in posterum admittatur.

XVI. Indulget Presbyteris graecis, seu Albanensibus, ut praeter Dominicas, et Sabbata, in reliquis feriis Quadragesimae, excepto ultimo triduo ante Pascha, possint Missas integras celebrare; sic tamen, ut ab Hebdomadario, seu Parocho Missa Praesantificatorum non omittatur.

Volentes autem specialem ipsis graecis, et albanensibus Presbyteris gratiam facere, tenore praesentium, ut tempore jejunii quadragesimalis, quo, exceptis Dominicis, Sabbatis, et nonnullis solemnioribus festivitibus, ex antiquo more, non nisi Missa Praesantificatorum celebratur, Graeci, et Albanenses praedicti, servato tamen, nec praetermisso in Parochialibus Ecclesiis Praesantificatorum ritu, in aliis Altaribus, seu Ecclesiis sive cappellis; pro sua, ac fidelium populorum devotione, Missas integras quibilibet Hebdomadae diebus, ac praesertim cum dies festi de praecepto latinae Ecclesiae occurrunt, quos observare tenentur, excepto postremo Majoris Hebdomadae triduo, celebrare possint, et valeant, concedimus, et indulgemus.

XVII. Possunt, si velint, Graeci Altaria portatilia a Latinis accipere.

Si Graeci velint accipere Altaria portatilia ab Episcopis latinis consecrata, bene erit; sin minus, tolerantur eorum Antimensia, sive Throni, super Altaria lapidea ponendi, cum celebrant.

XVIII. Graeci Thronis pro corporalibus uti possunt.

Corporalia ut Latini habeant, nisi Thronis etiam pro corporalibus utantur.

XIX. Presbyteris latinis non licet super Antimensio Graecorum sacrum facere, si careant proprio Altari lapideo portatili.

Latinis Presbyteris latino ritu in Graecorum catholicorum Ecclesiis celebrantibus, si careant proprio Altari portatili lapideo, super Antimensiis, seu Thronis Graecorum sacrum facere non licet.

XX. De vestibus, et aliis sacris.

Unusquisque Sacerdos in aureo, vel argenteo solum, aut saltem stamneo calice sacrificet, habens Thronos, seu corporale de lino, candidum, et nitidum, et Altare mundis vestimentis opertum, vel decenti paratu ornatum.

XXI. De mulierum servitio ad Altare.

Mulieres autem servire ad Altare non audeant, sed ab illius ministerio repellantur omnino.

§. VII.

De Sacramento Ordinis.

I. Ut Graeci a graecis Episcopis ordinentur.

Romani Pontifices praedecessores nostri necessitatibus Italo-Graecorum occurrere volentes, ut commode possent a proprii ritus Praesulibus ad ordines promoveri, simulque caventes, ne si ab Ordinariis latinis ad graecos Antistites in Graeciam, vel Epirum, aut alias Orientis partes cum dimissoriis remitterentur, ad schismaticos Episcopos pro

Ordinatione confugerent, constituerunt: Clemens quidem VIII anno 1595 Romae habendum esse Episcopum graecum catholicum, qui Graecos Episcopis latinis Italiae, et adjacentium insularum subiectos sacris ordinibus initiaret: Clemens vero XII anno 1735 ut Italo-Graecorum in utraque Sicilia commorantium commodis consuleret, alterum ejusdem graeci ritus Episcopum in Seminario Corsino a se in Calabria erecto, propter Graecorum hujusmodi Ordinationes, manere jussit, quorum laudatissimum institutum Nos quoque per praesentes nostras perpetuo valituras literas confirmamus, et innovamus.

II. Ecclesiasticum beneficium, vel patrimonium, ad sacros ordines promovendis necessarium.

Ne quis Clericus Saecularis ritus graeci, quamvis alias sit idoneus moribus, scientia, et aetate, ad sacros ordines promoveatur, nisi prius legitime constet, eum Ecclesiasticum beneficium, vel patrimonium, quod sibi ad vitam honeste sufficiat, pacifice possidere: ac propterea deficiente titulo beneficii, per legitima documenta Ordinarium suum certiozem reddere debet de sufficienti patrimonio, ut valeat sacris ordinibus initiari: loco autem dicti patrimonii, nec Clericus uxoris suae dotem assignare praesumat, nec Ordinarius eam recipere audeat.

III. Nemo ex Graecis, seu Albanensibus, ad ordines promoveatur, qui trium saltem annorum spatio in Seminario Graecorum non fuerit commoratus.

Quemadmodum etiam nemo ex Graecis, seu

Albanensibus in Calabria, et Sicilia commorantibus, ad sacra ministeria assumatur, qui trium saltem annorum spatio, graecis, latinisque literis non dederit operam in altero ex Seminariis Italo-Graecorum, vel in Collegio Graecorum in urbe.

IV. De examine Ordinandorum.

Promovendi ad Sacerdotium, et Presbyteri, qui praeficiendi fuerint Ecclesiarum regimini, examinentur antea diligenter, si praecipue de horis canonicis et Missarum officiis, secundum distinctionem temporum exequendis sint sufficienter instructi, ut ad haec non nisi digni admittantur.

V. De horis canonicis.

Sacerdotes, et quicumque sunt in sacris ordinibus constituti, horas canonicas more suo dicant: et priusquam Missam celebrent, officium matutinale recitare curent.

VI. Episcopi graeci in ordinibus conferendis Euchologio graeco utantur.

Episcopi graeci in ordinibus conferendis ritum proprium Graecorum in Euchologio descriptum servant, in quo, etsi nonnulli de minoribus ordinibus praetermissi videantur, eos tamen vel numquam habuisse, vel eorum exercitium aliis ordinibus esse adnexum iidem Graeci affirmant.

VII. Quidam ordines ritu latino supplendi sunt ab eo, qui ritu graeco aliquos ordines suscepit.

Inde tamen dubitationes quandoque oriri so-

lent, quinam nimirum ordines supplendi sint ab eo, qui primum ritu graeco aliquibus ordinibus fuit initiatus, deinde ritu latino ad reliquos est promovendus. Quas controversias ut de medio penitus tollamus, certamque tradamus regulam in posterum servandam, ita decernimus; si quis ritu graeco Clericus, et Lector tantum fuit initiatus, atque ex benignitate Sedis Apostolicae obtinuit, ut majores ordines latinis caeremoniis sibi conferantur, is antequam Subdiaconus ordinetur, tres minores ordines omissos debet ritu latino suscipere. Si vero, praeter Lectoris ordinem, ad Subdiaconatum etiam graeco ritu ascendit, et ex dispensatione itidem Apostolica facultas sibi facta sit, caeteros ordines ritu latino suscipiendi, antequam inter Diaconos cooptetur, ex minoribus ordinibus Exorcistatum tantummodo supplere cogitur: cum per Subdiaconatum graeco ritu collatum, Acolythatum, et Ostiariatum recepisse censeatur. Idem dicendum de eo, qui una cum reliquis inferioribus ordinibus Diaconatum, aut etiam Presbyteratum graece suscepit, et latino postea ritu ad sacrum Presbyteratus respective ordinem, aut Episcopatum promovendus sit, ex Apostolica concessionem: nimirum Exorcistatus ordinem in ipso, antequam Presbyter ordinetur, aut Episcopus consecratur, esse supplendum.

VIII. Non ordinetur, nisi cum dimissoriis latini Ordinarii.

Graeci sine literis dimissoriis Episcopi latini Dioecesani nullatenus ad primam tonsuram, vel aliquem ordinem recipiendum admittantur.

IX. De suspensione , et irregularitate.

Promoti ad primam tonsuram , vel ad alium quemcumque ordinem sine dimissoriis latini Ordinarii , suspensi sint ; et si suspensi in sacris ordinibus ministraverint , efficiuntur irregulares , sicut et Latini.

X. Solus Papa in irregularitatibus dispensat.

Super hujusmodi autem , et similibus irregularitatibus dispensandi facultatem a S. Sede Apostolica obtineri oportet.

XI. Episcopi schismatici nec ordines , nec alia Sacramenta conferant.

Non sunt admittendi Episcopi schismatici sive pro ordinibus , sive pro aliis Sacramentis conferendis , sed impediendi , quoad Sancta Sedes Apostolica desuper consulatur , et responsum habeatur.

XII. De Episcopis graecis catholicis.

Quos vero communionem S. Romanae Ecclesiae habere constiterit , eis Pontificalia exercendi facultatem Ordinarii latini in suis Dioecesibus libere concedere possunt.

XIII. De Ordinatis a Schismaticis.

Ordinati ab Episcopis schismaticis , alias rite ordinatis , servata debita forma , recipiunt quidem ordinem , sed non executionem.

XIV. De eorumdem absolutione.

Proinde ipsi ordinati ab Episcopis schismaticis, correcti, vel emendati, reconciliandi sunt, et absolvendi cum poenitentiis salutaribus, dummodo errores, si quos amplexi fuerint, sin minus schisma Ordinatoris abjurent in iudicio, vel publice, vel secreto pro qualitate facti.

XV. Et dispensatione super irregularitate.

In ordinibus autem per eos alias rite susceptis ministrare non permittantur, nisi cum ipsis super irregularitate, hujusmodi occasione contracta, auctoritate Sanctae Sedis Apostolicae fuerit dispensatum.

XVI. Interstitiorum lex cum Graecis seu Albanensibus relaxatur. Tribus diebus festivis, non tamen continuis, si ex longinquis regionibus se conferant ad ordines suscipiendos, ordinari possunt.

Cum ex Ecclesiae disciplina a Graecis olim recepta, promoti ad aliquem ordinem sacrum, si per aliquod temporis intervallum in eo non fuerint versati, ad altiore gradum ascendere non possint, quo nimirum Ordinandorum fides, morumque probitas eo temporis spatio cognosci valeat; qua lege Graeci, seu Albanenses in Italia, et insulis adjacentibus commorantes dubio procul tenentur: nihilominus cum praedicti Graeci, seu Albanenses Ordinarios suos, quibus subjiuntur, habeant latinos, a quibus tamquam alieni ritus sacris ordinibus initiari prohibentur; ac proinde cum

Romam , vel in Calabriam , ubi sunt Episcopi a S. Sede Apostolica ad Ordinationes ritu graeco exercendas deputati , repetitis vicibus , non sine quam plurimis incommodis , et expensis , ad sacros ordines juxta temporum intervalla suscipiendos sese conferre deberent , Nos , eosdem Graecos , seu Albanenses gratiis , et favoribus prosequi , eorumque incommodis consulere volentes , de Apostolicae plenitudine potestatis , praefatis Episcopis graecis Romae , et in Calabria pro tempore degentibus , licentiam , et facultatem impertimur , ut Graecos , seu Albanenses hujusmodi ex longinquis regionibus accedentes , qui minoribus , sive majoribus ordinibus initiari cupiunt , ad omnes ordines promovere in posterum valeant tribus diebus festivis , non autem continuis , sed aliquo temporis intervallo Antistitis ordinandis arbitrio separatis , non servata interstitiorum lege , nec requisita ad hoc ab iis , qui initiantur , suorum respective Ordinariorum latinorum licentia , sive dispensatione.

XVII. Non tamen dispensatur cum illis , qui domicilium habent , seu commorantur in ea provincia , in qua Episcopus ritus graeci solet sacros ordines exercere. Alumni et convictores Collegii Graecorum urbis , et Italo-Graecorum in Calabria , et Sicilia , tribus diebus festivis ordinari possunt , si Collegiorum utilitas , vel necessitas exegerit.

At cum illis Graecis , seu Albanensibus , qui domicilium habent , seu alias commorantur in ea provincia , in qua Episcopus ritus graeci solet sacras Ordinationes exercere , ad quem propterea sine gravi incommodo per temporum intervalla ac-

XXXVIII

cedere possunt, ab interstitiorum lege minime dispensamus, praeterquam cum alumnis, et convictoribus ritus graeci Collegii graeci urbis, et Italo-Albanensium, in Calabria, et Sicilia, si eorundem Collegiorum necessitas, vel utilitas, arbitrio S. Romanae Ecclesiae Cardinalis administratoris, et protectoris praefati Collegii Graecorum urbis, et Episcopi praesidentis, seu rectoris utriusque Collegii Italo-Albanensium praedicti, respective pro tempore existentium exegerit, ut praefati alumni, et convictores absque temporis intervallo tribus diebus festivis, non tamen continuis, ut praefertur, ad ordines promoveantur: quo casu eos sic initiari posse, plenam facultatem facimus, atque concedimus.

XVIII. *Cum iis, qui non servata interstitiorum lege, sunt hactenus bona fide ordinati, dispensatur, ut in susceptis ordinibus ministrare valeant, et ad majores etiam ascendere.*

Illis autem, qui non servata interstitiorum lege sunt hactenus bona fide ordinati, ex Apostolica benignitate etiam concedimus, ut in susceptis ordinibus ministrare, et ad majores etiam servatis servandis ascendere, absque alia dispensatione valeant.

XIX. *Quoad aetatem ordinandorum servandum est, quod a Sacrosancta Trident. Synodo est praescriptum.*

Quod tamen de aetate Ordinandorum a Sacrosancto Tridentino Concilio praescriptum est, omnino servari volumus. Nullus proinde ex praedictis Graecis, seu Albanensibus ad Subdiaconatus or-

dinem ante vigesimum secundum, ad Diaconatus ante vigesimum tertium, ad Presbyteratus ante vigesimum quintum suae aetatis annum absque Apostolica dispensatione promoveatur. Praefatorum autem graecorum Praesulum conscientiam oneramus, ut dignos dumtaxat, et quos literis, et iis, quae ad ordines exercendos pertinent, bene instructos esse noverint, ad sacra ministeria assumant.

XX. *Latinus Antistes Graecos etiam sibi subjectos ordinibus initiare prohibetur, sic etiam graecus Episcopus Latinos ordinare non debet.*

Ut in ordinibus conferendis quaelibet rituum confusio, et commixtio penitus tollatur, et unius ritus Antistes alterius ritus Clericos initiare in posterum minime valeat, sub perpetuae suspensionis a Divinis poenis prohibemus, ne latinus quicumque Episcopus etiam subjectos suae jurisdictioni Graecos, neque graecus quilibet Antistes Latinos quovis praetextu, sine speciali Sedis Apostolicae licentia, ad primam tonsuram, vel ullum ordinem sive minorem, sive majorem promovere praesumat; alioquin tam Ordinans, quam Ordinatus, perpetuam, ut praefertur, suspensionem se subituros intelligant.

XXI. *Prohibet Latinos ex Latinis progenitos, ac latino ritu educatos, juxta ritum graecum sub spe retinendi uxores, ad sacros ordines promoveri, etiam in locis, ubi graecus ritus servatur.*

Maxime autem neque permittendum, neque ullo modo tolerandum ut Latini ex Latinis progeniti, ac latino ritu educati, qui continentiam pro-

XL

fiti nolunt, juxta ritum graecum, sub spe retinendi uxores, ad sacros ordines a quocumque Antistite quavis auctoritate fulgente promoveantur, tam in locis, in quibus non sunt populi graeco ritu viventes, sed Latini, quam in locis, in quibus sunt populi, qui a Graecis antiquitus fuerint oriundi, seu a Graecis originem ducant, vel alias retroactis temporibus ritum graecum servaverint, seu apud illos, vel in eorum aliquibus Ecclesiis ritus hujusmodi ab antiquo hactenus fuerit observatus.

XXII. *Dispensatur cum Italo-Graecis, qui ad hanc diem a latino Episcopo sunt ordinati, cum animo tamen in ritu graeco permanendi, ut possint in eodem ritu permanere, et ad majores etiam ordines a graeco Episcopo cum dimissoriis tamen latini Ordinarii, graece promoveri; cum clausula, ne id in posterum inconsulta Sancta Sede attentetur.*

Cum iis tamen Italo-Graecis, qui ad hanc diem, vel propter antiquam consuetudinem, vel propter quaedam sibi, ut ajunt, a Romanis Pontificibus praedecessoribus nostris concessa privilegia, quibus mittebatur Episcopis latinis, ut Graecos sibi subjectos, vel ipsi ordinarent, seu ab aliis tam graecis quam latinis Episcopis ordinari facerent, ab Episcopis latinis bona fide, et absque dispensatione Apostolica, ad clericalem tonsuram, vel minores, seu majores ordines sunt promoti, cum animo tamen proprium graecum ritum retinendi, et absque actuali latini ritus in susceptis ordinibus exercitio; per praesentes nostras, hac vice tantum dispensamus, ut eis liceat in suo graeco ritu permanere, in eoque ad ulte-

riores ordines (dummodo per suum Ordinarium approbati fuerint) a graeco Episcopo promoveri : per easdem nostras expresse prohibentes, ne quid hujusmodi de caetero , vel a Graecis ipsis , vel a latinis Episcopis, inconsulta Sancta Sede, attentetur.

XXIII. Italo-Graeci, si ab Episcopo latino, cum dispensatione Apostolica, ad aliquos ordines ob defectum graecorum Praesulum promoventur; possunt sine alia dispensatione cum dimissoriis Ordinarii ad majores ordines graece a graeco Antistite provehi.

Insuper ut omnibus, circa praefatas Italo-Graecorum hujusmodi per latinos Praesules Ordinationes, controversiis, ac dubiis opportuna ratione obviemus, hac nostra constitutione decernimus, et declaramus, quod si Episcopus latinus, sive Ordinarius, Italo-Graecis primam tonsuram, vel ordines minores ritu latino conferat, cum dispensatione Apostolica, ita ut ordinati ab illo in suo graeco ritu ministrare debeant (quod ex defectu graecorum Praesulum per Sedem Apostolicam concedi solet): licite possit idem latinus Ordinarius literas dimissoriales Italo-Graecis hujusmodi a se, vel ab alio latino praesule, ut praemittitur, ordinatis concedere, ut ad sacros ordines graeco ritu, absque alia dispensatione Apostolica promoveantur.

XXIV. Secus, si absque dispensatione Apostolica a latino Episcopo fuerint ordinati, debent in latino ritu permanere, nec possunt amplius sine dispensatione Apostolica ad graecum redire, aut in eo ministrare.

Si vero absque Apostolica dispensatione Italo-

Graeci hujusmodi a latino Episcopo ad aliquos ordines ritu latino promoverentur (id , quod illicitum tam ab Ordinante, quam ab Ordinatis fieret, utpote huic nostrae Constitutioni contrarium) graeci Clerici hujusmodi sic latino ritui alligantur, ut ab eo ad graecum redire amplius non liceat, sine Apostolica dispensatione; neque latino Episcopo, seu Ordinario amplius fas sit graecum Clericum, a se ut praemittitur, latino ritu in minoribus ordinibus constitutum, cum literis dimissorialibus ad graecum Antistitem mittere, ut ab eo ad sacros ordines graece promoveatur, sine dispensatione Apostolica; sed debeat illum potius, si quidem idoneum judicaverit, post obtentam absolutionem a suspensione, vel ipse ritu latino ordinare, vel ab alio latino Praesule ordinari facere. A ritu enim latino ad graecum, ut praediximus, nec transire, nec redire fas est absque Apostolica dispensatione.

XXV. Maxime si post susceptos a latino Episcopo ordines, latine vixerint: nam latinus ritus semel assumptus, absque licentia Sedis Apostolicae deseri nequit.

Hinc eadem literae dimissoriales potiori jure denegandae sunt Italo-Graecis, qui quamquam baptizati ritu graeco; non modo primam tonsuram, et minores ordines latino ritu susceperunt, sed etiam latine vixerunt, et postea ad majores ordines ritu graeco provehi cupiunt: nam latinus ritus semel assumptus, ut praefati sumus, absque speciali Sedis Apostolicae auctoritate, deseri nequit. Ut igitur Italo-Graeci hujusmodi ad ritum graecum redeant, indigent Apostolica dispensatione; ut vero ad majores ordines ritu latino ascendant, dispensatione non indigent.

XXVI. Matrimonium Presbyterorum cum unica, et virgine non reprobatur.

Etsi expetendum quam maxime esset, ut Graeci, qui sunt in sacris ordinibus constituti, castitatem, non secus ac Latini servarent: nihilominus, ut eorum Clerici, Subdiaconi, Diaconi, et Presbyteri uxores in eorum ministerio retineant, dummodo ante sacros ordines virgines, non viduas, neque corruptas duxerint, Romana non prohibet Ecclesia. Eos autem, qui viduam, vel corruptam duxerunt, vel ad secunda vota, prima uxore mortua, convolarunt, ad Subdiaconatum, Diaconatum, et Presbyteratum promoveri omnino prohibemus.

XXVII. Post Subdiaconatum, Diaconatum, et Presbyteratum, contractum irritum declaratur.

Praeterea si quis Subdiaconus, Diaconus, vel Presbyter, post sacram Ordinationem, uxore mortua, aliam duxerit, vel si uxorem non habeat, ducere praesumpserit, nedum excommunicationis latae sententiae poena, aliisque nostro, et successorum nostrorum Romanorum Pontificum arbitrio infligendis, severissime punietur; verum etiam statim ab ordine erit deponendus, et ab illegitima uxore separandus. Matrimonium enim post recensitos ordines contractum, nullum, irritumque declaramus.

XXVIII. De Praesbytero graeco conjugato.

Praesbyter graecus conjugatus; antequam ad sacrum Sacrificium, seu sanctam Missam celebran-

dam accedat, vel per hebdomadam, vel per tri-
dium ab uxore curet abstinere.

§. VIII.

De Sacramento Matrimonii.

I. Decretum Concilii Tridentini de matrimonio servandum.

Curent Ordinarii locorum, ut decretum Sacri
Generalis Concilii Tridentini de reformatione ma-
trimonii vertatur in linguam graecam vulgarem,
et in locis, et Parochiis Graecorum, et Albanen-
sium, quoties expedire viderint, evulgetur et pu-
blicetur.

II. Matrimonia dirimi nequeunt.

Matrimonia inter conjuges graecos dirimi, seu
divortia, quoad vinculum, fieri nullomodo permit-
tant, aut patiantur. Et si qua de facto praecesser-
unt, nulla et irrita declarent.

III. De secundis, et ulterioribus nuptiis.

Quia vero, secundum Apostolum, mulier mor-
tuo viro ab ipsius est lege soluta, et nubendi,
cui vult in Domino, liberam habet facultatem,
secundas, et tertias, et ultiores etiam nuptias
Graeci non condemnent, sed illas tamquam legiti-
mas, et validas approbent inter personas, quae
alias licite de jure ad invicem matrimonio jungi
possunt.

IV. De bigamis.

Secundo tamen nubentes Presbyteri nullatenus be-

nedicant : nec ipsos bigamos ad sacros ordines, sine speciali dispensatione Apostolica , promoveri liceat.

V. De gradibus consanguinitatis , et affinitatis.

Et quoniam apud Graecos consueverunt contrahi matrimonia inter personas contingentes se , juxta eorum computationem , octavo gradu ; qui secundum computationem , et distinctionem graduum , quam Latini faciunt , apud hos quartus habetur : ne id praesumatur deinceps , firmiter prohibemus ; ac districte praecipimus , ut cum in ulterioribus gradibus licite matrimonia contrahantur , in praedicto quarto consanguinitatis , vel affinitatis gradu copulari ulterius non praesumant ; statutum , quoad hoc , Generalis Concilii observantes.

VI. De cognatione spiritali.

Item in cognationis spiritalis , quae in Baptismo , et Confirmatione contrahitur , gradibus , servetur id quod in Tridentina Synodo definitum est. In Baptismo videlicet inter suscipientem , et baptizatum , et illius patrem , et matrem , nec non inter baptizantem et baptizatum baptizatique patrem , et matrem tantum cognationem contrahi ; eamque rursus quae ex Confirmatione oritur , confirmantem , et confirmatum , illiusque patrem , et matrem , ac tenentem non egredi : omnibus inter alias personas spiritalis hujus cognationis impedimentis matrimonii sublatis.

VII. De ritu conjugum.

Maritus Latinus uxoris graecae ritum non sequatur.

Latina uxor non sequatur ritum mariti graeci.

Graecus maritus potest, si velit, ritum uxoris latinae sequi : item graeca uxor potest, si velit, sequi ritum mariti latini, post cujus obitum, ad ritum graecum redire nequeat.

Quod si nolint, unicuique conjugum in suo ritu, catholico tamen, manere permittatur.

Matrimonium inter maritum latinum, et graecam mulierem, latine coram Parocho latino contrahatur : inter maritum vero graecum, et mulierem latinam, potest contrahi vel graece coram Parocho graeco, duobus, vel tribus testibus praesentibus, vel latine coram latino, ubicumque maritus graecus voluerit.

Ejus autem loci, ac ritus Parochus debet assistere, ubi, et quo ritu matrimonium contrahitur.

§. IX.

Ritus graecus qua ratione in Italia, et insulis adjacentibus servandus ; de Graecorum, seu Albanensium subjectione Episcoporum latinorum jurisdictioni.

I. Ut Graeci in Missis, et Divinis Officiis ritus suos observare valeant, nec super his a quoquam molestantur.

Quoniam Orientalis Ecclesiae ritus, utpote non minima ex parte a Sanctis Patribus profecti, vel a maioribus traditi, sic animis Graecorum, aliorumque insederunt, ut praedecessores nostri Romani Pontifices satius, consultiusque duxerint, ritus huiusmodi, qua in parte nec Fidei Catholicae adversantur, nec periculum generant animarum, aut ecclesiasticae derogant honestati, approbare,

seu permittere, quam illos ad romanarum caeremoniarum normam reducere; idcirco Graecis ipsis, et Albanensibus ritus graeci inter Latinos degentibus, tam Praelatis, Parochis, et Presbyteris saecularibus, quam regularibus, et laicis, ut suis ritibus, atque observantiis, sive consuetudinibus uti, ac illos, et illas observare, Missasque, et alia Divina Officia secundum eorum antiquam consuetudinem celebrare libere, ac licite possint, concedimus, et indulgemus. Nec super his a quocumque latino Ordinario illos, vel illorum quemlibet molestari vel inquietari permittimus: inhibentes omnibus et singulis Praelatis, aliisque, ne quis ritus, et caeremonias Graecorum in Concilio Florentino, vel alias approbatas blasphemare, aut reprobare, seu improbare ausit.

II. In quibus debeant Italo-Graeci ritum latinum sequi.

Sic vero dictis Graecis, et Albanensibus in suis ritibus permanere concessum esse, atque indultum declaramus, ut quae a fidelibus in Dioecesi, ubi ipsi habitant, universim, et sine ullo personarum, ac rituum discrimine, juxta sacros Canones servanda sunt, ad eadem etiam ipsi, non obstante rituum diversitate, obligati censentur.

III. Kalendarium Gregorianum, quoad festa, servare tenentur.

Cujusmodi sunt in primis Kalendarium Gregoriani observatio juxta quod iidem Graeci, et Albanenses tenentur universalis Ecclesiae jejunia, et festa celebrare, ut, puta jejunium quadragesimale, Pascha, Ascensionem Domini, Pentecosten,

Natalem Domini, Circumcisionem, Epiphaniam, et cactera hujusmodi, quae in Latina, et Graeca Ecclesia aequae celebrantur.

IV. Item Romani Pontificis, et Ordinarii loci nomen in Missis, et Divinis Officiis commemorare; non autem Antistitum orientalium.

Deinde Summi Romani Pontificis, et Ordinarii loci in Missis, ac Divinis Officiis commemoratio; non Patriarcharum, neque Antistitum orientalium, quibus nulla est in Italia, et adjacentibus insulis jurisdictio: ubi tamen graeco catholico Antistiti, ex licentia Sedis Apostolicae, vel Ordinarii loci, Pontificalia exercere permittitur, ejus quoque nomen juxta Graecorum morem post Summum Romanum Pontificem, et Ordinarium loci commemorare liceat.

V. Subjiciuntur constitutionibus contra sollicitantes in confessione editis.

Tum subjectio omnibus, et singulis Romanorum Pontificum constitutionibus, contra sollicitantes praesertim in confessione editis, quae in singulas nationes universim vires suas extendunt, ac Latinos aequae, ac Graecos sua amplitudine comprehendunt.

VI. Dies festos de praecepto Latinae Ecclesiae observare tenentur.

Demum dies festos de praecepto Latinae, ubi degunt, Ecclesiae servare tenentur.

VII. Possunt, si velint, Latinae Ecclesiae, jejunia et vigiliis servare; non tamen ad id cogi debent.

Ad observationem autem jejuniorum, et vigiliarum ejusdem Latinae Ecclesiae, si tota loci illius Graecorum communitas, vel potior laicorum pars cum Parochis, et Presbyteris conjuncta induci posset, optimum esset; idque absque alia Sedis Apostolicae dispensatione, arbitrio Ordinariorum relinquimus latinorum. Non tamen ad id cogi debent, si velint ritum suum in jejuniis sequi: cum ipsi qualibet hebdomada feria quarta, et feria sexta, ut asseritur, soleant jejunare; neque privatis personis sit, ubi Parochiam graecam habent, ibi, contra proprium ritum, Latinorum more jejunia, et vigiliis servare; sed omnes vel graece cum Graecis, vel latine cum Latinis jejunent. Ubi vero propriam Parochiam non habent, ibi libere, et licite possunt in omnibus latino ritui sese conformare, sive laici sint, sive Presbyteri, excepto graeco ritu, qui in Missis, ac Divinis Officiis a Presbyteris est servandus.

VIII. Tolerandus esus carniū die sabbati apud Italo-Graecos.

Hinc ubi Parochiam graecam habent, tolerandus est apud Graecos esus carniū die sabbati, si sine scandalo fieri potest; in locis autem ipsorum, et inter eos tantum.

IX. Latini famuli Graecorum, latinum ritum debent servare.

Prohibentur tamen Graeci suis famulis latinis

L.
cibos velitos apponere, sive die sabbati, quando praefatis Graecis carnes comedere licet, sive alio quocumque tempore, quo Latini debent ab illis abstinere; latini enim famuli Graecorum latinum ritum servare tenentur.

X. *Non cogendi ad jejunandum die sabbati, praeter sabbatum Sanctum.*

Item tolerandum est, ut ad jejunium eodem die sabbati in Quadragesima, excepto uno sabbato Sancto, ex antiqua traditione, non teneantur, sed dumtaxat ad abstinentiam.

XI. *Jejunium a Latinis die sabbati indictum ad aliam diem pro Italo-Graecis ab Ordinariis latinis transferri conceditur.*

In jejuniis quoque biduanis, vel triduanis, vel alias a Dioecesanis, vel in jubilaeis a Summo Pontifice Romano indictis, dies sabbati in eis comprehensus, vel praescriptus, in alium diem pro Graecorum plebe ab ipsis Dioecesanis, Apostolica auctoritate permittitur commutari.

XII. *Italo-Graecis in tota Italia, et insulis adjacentibus permittitur, ut in Quadragesima, et aliis ipsorum jejuniiis, piscibus, oleo, et vino uti possint.*

Verum quia pro parte dilectorum filiorum graeci ritus in Corsica habitantium Nobis nuper humillime preces porrectae fuerunt, ut auctoritate Apostolica declararemus, ipsos non teneri ad abstinentiam a piscibus sanguinem habentibus, oleo, et vino, tam in Quadragesima, quam in quartis,

et sextis feriis, et in aliis anni jejuniis, vel, si ad abstinentiam hujusmodi tam ex praecepto, quam ex consuetudine Ecclesiae Graecorum, ut Nobis exponitur, tenerentur, cum iis eadem auctoritate dispensare dignaremur, ut piscibus, oleo, et vino in dictis quartis, et sextis feriis, et in Quadragesima, aliisque per annum occurrentibus jejuniis, vesci ipsis liceret: Nos paternae Pontificiae charitatis, quae novit imbecillitates infirmorum sustinere, non immemores, tam dictis Graecis in Corsica habitantibus, quam omnibus, et singulis Albanensibus, et Graecis, qui in Italia, et insulis adjacentibus commorantur, tenore praesentium, ut ad instar Latinorum, in quorum Dioecesibus degunt, in memoratis Quadragesimae, quartis, et sextis feriis, et reliquis anni jejuniis, vino, oleo, et piscibus cujuscumque generis possint uti, concedimus, et indulgemus. Atque literas Clementis Papae XII praedecessoris nostri in forma brevis datas ad Abbatem, et Monachos monasterii Ordinis Sancti Basilii Magni ritus graeci orientalis terrae Dimidii-Jussi Panormitanae Dioecesis, pro Monachis, graecis et epirotis eorumdem Ordinis, et ritus fundati, quibus concessit, ut piscibus sanguinem habentibus libere, et licite nonnullis anni Quadragesimis vesci possint, non obstantibus ritus graeci ordinationibus, hac nostra Constitutione confirmamus, et roboramus.

XIII. Ne Italo-Graeci a latino Dioecesano Episcopo latine ordinati plebibus italo-graecis praeficiantur.

Cum autem Sedi Apostolicae semper curae fuerit graecum ritum custodire, illiusque abolitionem numquam intenderit, aut in animo habuerit: hinc Nos, Praedecessorum nostrorum exemplo, quan-

tum cum Deo largiente possumus, conservationi rituum graecorum intenti, neque expedire ducimus, neque facultatem facimus, ul latini Ordinarium iuxta ritum latinum ad Sacerdotium promoveant aliquem italo-graecum Dioecesanum, qui Graecorum more baptizatus fuerit, atque etiam vixerit, ut scilicet Graecorum plebi latino ritu ipse ministrans praesit: praesertim quia id graecis plebibus nullam utilitatem affert, quibus magis acceptus Parochus esse solet, si eundem cum ipsis ritum graecum colat, quam si latinum sequatur.

XIV. Sed Graeci vel Albanenses, catholici tamen, sive advenae, sive indigenae, graeco ritu viventes praeficiantur.

Sed in terris, seu locis, et casalibus Graecorum, et Albanensium, seu in quibus fuerint Graeci, vel Albanenses, sive sint indigenae, sive ex Graeciae provinciis, et insulis, vel ex Epiri, et Albaniae partibus, aut alias undequaque advenierint, graeco ritu in praesentiarum usque viventes; ad illorum Ecclesias, seu curam animarum exercendam, non Latini, neque latinis orti parentibus, aut latino more viventes, ad eundem ritum graecum initientur, sed Graeci, vel albanenses ritus graeci respective, catholici tamen, et alioquin idonei, et sufficientes, atque alias qualitates a sacris Canonibus habentes, sive sint indigenae, sive in defectu indigenarum, etiam advenae, ordinantur, et eorundem Graecorum, seu Albanensium animarum curae praeficiantur.

XV. Presbyteri latini, nisi vocati, non se immisceant Graecorum functionibus.

Caeterum ad tollendam omnem rituum com-

mixtionem, et confusionem, Presbyteri, et Clerici latini Ecclesiis Graecorum neque Missas celebrare, neque funeribus, nuptiis, ac Baptismis, et aliis Graecorum actibus publicis, et privatis interesse, aut sese immiscere, nisi ad haec specialiter per ipsos Graecos vocati fuerint, audeant, vel praesumant.

XVI. Presbyteri, et Clerici Graeci Missas, et Divina Officia in Ecclesiis Latinorum cum solemnitatibus et cantu celebrare prohibentur absque Episcopi licentia.

Nec Presbyteri, et Clerici graeci in Ecclesiis Latinorum, inconsulto Episcopo, cui illae subji-
ciuntur, vel ejus in spiritualibus Vicario generali, Missas et alia Divina Officia cum solemnitatibus, et cantu celebrent. Ut autem praefatus Episcopus, sive Vicarius generalis, praefatam licentiam rite concedere valeant, nulla praecisa necessitas pro causa requiritur, sed satis est, ut aliqua spiri-
tualis utilitas inde speretur.

XVII. In praecedentiis Clericorum latinorum, et graecorum, non attenditur diversitas ritus, sed tempus Ordinationis, vel qualitas ecclesiasticae dignitatis.

Cum inter latinos, graecosque Clericos, in processionibus, sessionibus, aliisque ecclesiasticis solemnitatibus, quas ex consuetudine, aut proprio arbitrio, et voluntate promiscuo usu peragere solent, lites quandoque, et controversiae, quibus charitas, et mutua animorum concordia violatur, ob praecedentiae ordinem exoriantur, quia Graeci Latinis, et Latini Graecis praecipuum locum dare

renuunt ; has in posterum dirimere , atque amputare volentes , praecipimus , ut in praecedentiis hujusmodi , nisi consuetudo aliter obtineat , non attendatur ritus graeci , et latini diversitas , sed tempus Ordinationis praedictorum Clericorum , vel qualitas ecclesiasticae dignitatis , si aliqui eorum ea insigniti reperiantur , vel caeterae qualitates , quae jure suo in praefatis solemnitatibus principem locum sibi vindicare solent.

XVIII. Non nisi ecclesiasticis libris per Congregationem à S. Sede eorumdem emendationi deputatam correctis utantur.

Quia in ecclesiasticis Graecorum libris nonnulli errores irrepserunt , quibus primaevam Ecclesiae Graecae puritatem fraude potissimum , ac dolo schismaticorum corruptam esse , orthodoxi dolent : ideo pastorem latinorum Ordinariorum , in quorum Dioecesibus iidem Graeci , et Albanenses degunt , vigilantiam per praesentes nostras literas excitamus , ut omni ope , et studio curent , non aliis Graecos ipsos , seu Albanenses tam Praelatos , ac Presbyteros saeculares , quam regulares , ecclesiasticis libris in Sacramentorum administratione , et Missis , Divinisque Officiis celebrandis uti , nisi iis , qui per Congregationem à S. Sede Apostolica emendationi librorum hujusmodi deputatam , correcti , typisque impressi fuerint.

XIX. De Italo-Graecorum subjectione Episcopis latinis , in quorum Dioecesi degunt.

Ita autem Graecos , seu Albanenses in suo ritu , ut praefertur , permanere , graecasque caeremonias custodire permittimus , ut latinorum Epi-

scoporum, in quorum Dioecesi degunt, jurisdictioni subjecti censeantur. Itaque Graeci, seu Albanenses ritus graeci, tam Ecclesiastici, et Regulares, quam Laici, in utraque Sicilia, vel in aliis Italiae partibus, insulisque adjacentibus commorantes, cum suos Ordinarios graecos non habeant, non obstantibus quibuscumque exemptionibus, aliisque privilegiis dictis Graecis eorumque Prelatis, Rectoribus, Abbatibus, et aliis tam S. Basilii, et alterius Ordinis Regularibus, qui privatam vitam ducunt, nec in Congregationem sunt redacti, quam saecularibus, ac etiam laicis personis quocumque nomine nuncupatis per fel. rec. Leonem X, Paulum III, Julium etiam III, et forsitan alios Romanos Pontifices, et Sedem Apostolicam in genere, vel in specie hactenus concessis, ac etiam iteratis vicibus approbatis, et innovatis; ita latinis Ordinariis locorum, quae habitant, debent esse subjecti, ut ipsi locorum Ordinarii quascumque eorundem Graecorum, et Albanensium Ecclesias, Monasteria, Prioratus, et alia pia loca, tam saecularia, quam cujusvis Ordinis regularia, eorumque Praelatos, etiamsi Episcopali, Archiepiscopali, ac majori dignitate praefulgeant, necnon Abbates, Rectores, Ministros, et quasvis alias ejusdem nationis personas in suis civitatibus, et Dioecesibus consistentia, quoties opus fuerit, visitare, ac in illis suam ordinariam jurisdictionem, plenamque, et omnimodam auctoritatem, in iis, quae Dei cultum, Sacramentorum administrationem, ac animarum salutem, haeresumque extirpationem concernunt, exercere, et exequi libere, et licite valeant, reliquis ipsorum Graecorum, et Albanensium, in Divinis celebrandis, aliisque ritibus a Sede Apostolica approbatis, necnon privilegiis, et gratiis Apostoli-

cis intactis remanentibus : nec ipsis Graecis , et Albanensibus Clericis , vel laicis eorumve Praelatis , Ecclesiis , Coenobiis , aut aliis piis locis dictas exemptiones , seu privilegia in aliquo suffragari , sed illos omnes , et singulos locorum , in quibus moram traxerint , Ordinariorum visitationi , correctioni , punitioni , jurisdictioni , et omnimodae auctoritati in praemissis subesse , illisque tamquam Superioribus suis , suorumque animarum Pastoribus humiliter obedire.

XX. Ubi duo Episcopi sunt ejusdem loci , Episcopus latinus Latinorum , graecus Graecorum dumtaxat jurisdictionem , et curam habeant.

Ubi vero duo essent Episcopi ejusdem loci a S. Sede Apostolica deputati , unus latinus , alter graecus (quemadmodum in Calabriae partibus , et in Sicilia olim fuisse perhibentur , et nunc in quibusdam Graeciae insulis existunt) ; Episcopus latinus de personis ecclesiasticis , et saecularibus graecis , ac de jurisdictione Episcopi graeci , vel aliis quibuscumque ad Episcopum graecum quomodolibet spectantibus , nullatenus se intromittere praesumat ; sed Episcopus latinus Latinorum , Episcopus vero graecus Graecorum dumtaxat curam , regimen , et jurisdictionem respective habeant , et exerceant. Id , quod de Episcopis Graecis pro Ordinatione Italo-Graecorum , Romae , vel in Calabria per Sedem Apostolicam , ut supra diximus , constitutis , minime intelligendum esse declaramus : cum ii facultatibus Ordinariorum careant , nec quemquam ex iis , qui non sunt alumni Collegii Graecorum Romae , et Collegii Italo-Graecorum , seu Albanensium in Calabria , ad primam tonsuram , aut ullum ordinem sive minorem , sive ma-

jorem, nisi cum dimissoriis sui Ordinarii, promovere valeant.

XXI. *Episcopus latinus circa causas Graecorum Vicarium graecum ipsius salario retinendum deputet.*

In Dioecesi, ubi Latini, et Graeci inhabitant, et solum Archiepiscopum, sive Episcopum latinum Ordinarium habent, dictus Archiepiscopus, sive Episcopus, circa negotia, et causas dictorum Graecorum, Vicarium graecum ipsis Graecis gratum, vel per ipsos Graecos eligendum (ex quo graecus vir melius graecos mores novit, quam latinus) ipsorum stipendio, et salario retinendum deputet; et in causis appellationis ad Metropolitanum, qui forsitan graecus non esset, dictus Metropolitanus similiter in dictis causis judicem graecum deputare teneatur.

XXII. *De Monachorum, seu Calogerorum Institutis.*

Ordinationes demum, et Instituta regularia Sanctorum Patrum, de vita, et statu Monachorum, ab Abbatibus, et Monachis graecis, qui in Italia, et insulis adjacentibus privatim degunt, nec regulam Monachorum Ordinis S. Basilii in Congregationem reductorum sunt professi, praecipimus inviolabiliter observari; eosque omnes, et singulos jurisdictioni Ordinariorum latinorum subicimus; mandantes insuper, ut quaecumque supra, circa rituum Graecorum observantiam, praescripta sunt, adamussim exequantur.

XXIII. *Salvis privilegiis a Sede Apostolica concessis Collegio Graecorum de urbe, Seminario Corsino in Calabria, et Congregationi Monachorum S. Basilii in Italia.*

Salvis tamen, et in suo robore semper permanentibus privilegiis, quae a Summis Romanis Pontificibus praedecessoribus nostris Gregorio XIII, Sisto V, Clemente VIII, Paulo V, Urbano VIII, Innocentio X, Clemente XII, et forsitan aliis, tam Collegio Pontificio Graecorum de urbe, et Seminario Corsino in Calabria, quam Congregationi dilectorum filiorum Monachorum Ordinis S. Basilii in Italia, concessa sunt, et indulta, quibus derogare non intendimus.

XXIV. *Quae in hac Constitutione sunt disposita quoad Italo-Graecos, non praejudicant constitutionibus Apostolicis, decretis, Synodalibus, et aliis statutis circa ritus Graecorum in Oriente sub catholicis Episcopis commorantium, vel aliarum nationum cujuscumque ritus a Sancta Sede approbati, seu permissi.*

His insuper, quae superius in quacumque parte Italo-Graecis concessimus, indulgimus, declaravimus, praecepimus, ordinavimus, et interdiximus, seu prohibuimus Graecorum in Oriente sub propriis catholicis Episcopis, Archiepiscopis, vel Patriarchis commorantium, et aliarum christianarum nationum quorumcumque rituum a S. Sede approbatorum, seu permissorum, juribus qualibuscumque, si quae illis de jure, vel ex consuetudine, vel alias quomodolibet legitime competant; aut Apostolicis constitutionibus, vel Conciliorum

generalium , aut particularium , seu Congregationum venerabilium Fratrum nostrorum S. R. E. Cardinalium decretis , quae supra ritibus Graecorum , seu aliorum Orientalium emanarunt , ullo pacto praepjudicatum , vel praepjudicium ullum quantumvis minimum illatum esse non intendimus ; idque expresse declaramus , et pro declarato , et in quolibet hujus nostrae Constitutionis , seu Dispositionis parte pro repetito haberi volumus , et mandamus.

§. X.

Clausulae.

Decernentes praesentes literas , et in eis contenta quaecumque nullo umquam tempore de subreptionis , vel obreptionis , seu nullitatis vitio , aut intentionis nostrae , seu quopiam alio defectu notari , seu impugnari , aut alias quomodolibet infringi , vel retractari , seu invalidari , aut in jus , vel controversiam vocari , aut adversus eas , et ea quodcumque juris , et facti , vel justitiae , et gratiae remedium intentari , impetrari , vel concedi ullatenus posse , sed ab omnibus , quos concernunt , et concernent , quomodolibet , quacumque dignitate , et honore fulgentibus in futurum inviolabiliter observari debere.

Decretum irritans.

Sicque et non aliter per quoscumque iudices ordinarios , et delegatos , ac commissarios , quavis auctoritate fungentes , ac etiam S. R. E. Cardinales , et de latere Legatos , sublata eis , et eorum cuilibet quavis aliter judicandi , et interpretandi

facultate , et auctoritate , judicari , et definiri debere ; ac irritum , et inane , si secus super his a quoquam quavis auctoritate scienter , vel ignoranter contigerit attentari .

Nihil innovetur , inconsulta Sancta Sede.

Mandantes universis , et singulis venerabilibus Fratribus , Episcopis , Archiepiscopis , Primatibus . Patriarchis latinis , in quorum Dioecesibus Italo-Graeci hujusmodi degunt , ut in suis Synodis , constitutionibus , statutis , edictis , decretis , seu aliis quibuscumque mandatis , et monitis , circa eorum ritus , observantias , et consuetudines , praeter id quod in nostris hisce literis expresse , et explicitè continetur , nihil aliud , nisi consulta prius S. Sede Apostolica , moneant , edicant , decernant , constituent , praecipiant , seu mandent .

Derogationes.

Non obstantibus Praedecessorum nostrorum literis , aliisque praemissis , necnon Apostolicis , ac in universalibus , provincialibus , et synodalibus Conciliis editis generalibus , vel specialibus circa Italo-Graecos hujusmodi , eorumque ritus observantias , mores ac consuetudines , constitutionibus et ordinationibus , ac etiam communitatum , monasteriorum , et Ecclesiarum praedictarum , etiam juramento , confirmatione Apostolica , vel quavis alia firmitate roboratis , statutis et consuetudinibus , privilegiis quoque , indultis , et literis Apostolicis eisdem Italo-Graecis , illorumque communitatibus , vel singulis , eorum personis , sub quibuscumque tenoribus et formis , ac cum quibusvis clausulis , et decretis etiam per modum statuti perpetui , etiam

motu proprio, et ex certa scientia, ac de Apostolica potestatis plenitudine similibus, etiam iteratis vicibus, ac etiam cum quibusvis derogatoriis derogatoriis, aliisque efficacioribus, et efficacissimis, et insolitis clausulis, irritantibusque, et aliis decretis in genere, vel in specie, alias in contrarium praemissorum quomodolibet concessis confirmatis, et innovatis. Quibus omnibus, et singulis, eorum tenores praesentibus, pro plene, et sufficienter expressis, ac de verbo ad verbum insertis habentes, illis alias in suo robore permansuris, hac vice dumtaxat specialiter, et expresse derogamus, caeterisque contrariis quibuscumque.

Exemplorum fides.

Volumus autem, quod praesentium transumptis sive exemplis, etiam impressis, manu alicujus Notarii publici subscriptis, et sigillo alicujus personae in dignitate ecclesiastica constitutae munitis, eadem prorsus fides habeatur in judicio, et extra, quae eisdem praesentibus adhiberetur, si forent exhibitae, vel ostensae.

Sanctio.

Nulli ergo omnino hominum liceat, hanc paginam nostri decreti, constitutionis, declarationis, inhibitionis, prohibitionis, et voluntatis infringere, vel ei ausu temerario contraire; si quis autem hoc attentare praesumpserit, indignationem Omnipotentis Dei ac Beatorum Petri, et Pauli Apostolorum Ejus se noverit incursum.

Datum Romae apud Sanctam Mariam Majorem, anno Incarnationis Domlnicae millesimo se-

LXII

ptingentesimo quadragesimo secundo septimo Kalendas Junii, Pontificatus Nostri anno secundo.

P. Card. Pro-Datarius — D. Car. Passioneus. —
Visa de Curia. —

N. Antonellus. = Loco ✠ Plumbi.

J. B. Eugenius. — Registrata in Secreteria
Brevium. Publicat. die 2. Julii ejusdem anni.

Addenda ad pag. 445. §. XI. tit. XVII.

Risoluzione di alcuni dubbii proposti alla Commissione de' Vescovi preseduta dal Nunzio Apostolico.

L'anno 1822 proposti tre dubbii. 1. Se gli Economi Curati nelle Parrocchie vacanti oltre l'onorario loro dovuto debbano esser pagati delle messe *pro populo*. 2. Qual sistema debba tenersi per far fronte alle spese di Culto nelle Parrocchie vacanti, che non hanno una rendita bastante alla prestazione dovuta agli Economi. 3. Se gli Economi dei Canonici Concurati, abbiano dritto ad un onorario.

La Commissione ha risposto al 1 dubbio che non possa competere agli Economi Curati oltre dell'onorario loro stabilito, anche il pagamento delle messe *pro populo*, essendo questo un loro debito durante il loro esercizio. In quanto al 2 dubbio è stato di avviso che il medesimo riguardo il caso, in cui in qualche Capitolo la cura attuale si eserciti da più Canonici Concurati e si domanda sapere qual onorario debba darsi all'Economo nella vacanza di alcuno di tali Canonici, potrebbe in tal caso darsi all'Economo sulla prebenda del Canonico vacante un onorario corrispondente a due quinti della prebenda stessa, per la rata del tempo che eserciterà la cura.

SBN VAI-1532251

